

大定府志卷之四十九

內篇卅九

知大定府事鄱陽王允浩原本  
知大定府事河曲黃宅中重輯

水西安氏本末第四下 舊事志五

國朝順治十五年經畧洪承疇率師至沅州分爲三路進討永明王偽晉王李定國遣兵抗之中路兵不得進承疇遣使招坤許以阿畫靄翠故事坤大喜俄而中路兵進取鎮遠平越至貴陽惟西路平西大將軍吳三桂兵尚未進坤遣漢把曾經熊彥聖繳印投誠於三桂五月遂導之取開州降修文廣順是月四川有警三桂還羅大定府志 卷四十九 一

大順者明舊將也伏置於水西界內覘三桂還遂由水西取道敷勇陷新添時承疇等大軍在貴陽而清平守兵無幾大順夜襲之卞三元守城不能支遂陷七月承疇遣張勇南一魁率兵攻新添大順聞勇將至焚城走保水西十萬溪勇追至其地大順憑險下矢石擊之勇冒矢石而進克其數寨大順走勇復追之斬獲無算大順復憑險而守勇不能進乃還十月三桂復自遵義出水西坤仍遣曾經熊彥聖爲鄉導因命坤襲職賜袍帽鞬帶并彩幣二十匹加都督僉事是時明將白文選守七星關臨江岸峭壁數十仞三桂至天生橋憚其險

不敢攻坤令人導之取道俄波出烏撒至寔益出其背  
斷文選糧道文選聞之懼已而爲達薩克哈張勇科爾  
崑瑪爾賽所攻敗文選走雲南十一月信郡王遣路什  
噶褚哈鄂訥勦羅大順於十萬溪路什等知大順難攻  
分爲三隊使一隊佯攻之二隊從間道冒險以入搗其  
背大順不支又走路什追敗之水西地盡平十二月洪  
承疇奏水西宣慰司投誠明年明將呂宏煬爲亂於水  
西擒之宏煬順天人仕鄭成功成功遣之從永明王遂  
入貴州永明王走緬甸宏煬竄伏水西之隴革潛謀起  
兵取貴陽以應李定國而永明敗將權時泰賀鼎李健

大定府志

卷四十九

二

王泗等亦匿於水西之隴納宏煬招與共事時泰等從  
之宏煬乃自稱得永明王敕封己爲興國公以號召叛  
亡坤覺之以告巡撫卞三元密遣兵破之擒宏煬等五  
人宏煬斃於貴陽獄中四人已下獄復逸時泰鼎尋捕  
得斬之健泗竟走免先是明故將劉鼎勾結丹平土官  
莫之廉爲亂於定番爲官兵所敗之廉伏誅鼎走水西  
康熙二年七月坤獲鼎送至貴陽殺之三年正月上元  
常金印自廣西走水西自稱明開平王常遇春之後與  
明故元江總兵匡國公皮熊謀逆金印自稱平魯將軍  
湘平伯僞造敕印旂纛招亡命陳鳳麟高岑吉士英米

應貴熊國賢戴勝李萬紫陳國才爲之羽翼潛遣人招諸土府令一時俱起旋爲同謀陳太所首諸人先後就擒惟皮熊逃免坤自歸附以後數擒叛將有功皮熊藏匿山谷屢遣人說坤坤亦不從時三桂欲專滇黔恐禍亂平而已兵權解數激叛諸土司坤有妄美而體香三桂求之不得三桂以此銜坤常金印之就擒也三桂使引坤坤懼三年二月遂與其甥烏撒土司安重聖謀反招皮熊使之將兵而土目蔡革刺慕魁周室把總高揆復和之蹤蹟頗露巡道劉芳聲總兵劉之復令朱世爵往偵得實歸以報總督楊茂勳茂勳曰水西地方沃野大定府志

卷四十九

三

千里地廣兵強在滇爲咽喉於蜀爲牖戶若黔則腹心之蠱也失今不討譬之養癰爲害必大乃與三桂合疏請勦三月坤重聖及皮熊反三桂率雲南十鎮兵自畢節七星關入果勇城令四川總兵劉之復駐兵大方邊其逸走之路令貴州提督李本深率四鎮兵至六歸河會勦屯糧於三岔河首尾夾擊布置既定而檄黔文書誤書六歸爲六廣於是川貴兵糧皆屯六廣三路聲息不通三桂入水西境坤率衆禦之佯敗走三桂乘勝輕追皮熊以兵斷其後坤反兵攻之遂圍三桂三桂不能進退者兩月食將絕而外援不至永順總兵劉安邦戰

死三桂益困水西土目阿布黑者約諸目謀劫本深營  
王可臣知之夜約諸鎮兵伏於化乍而空營以待賊劫  
營無所獲而反至化乍伏發賊驚潰斬首數百又追敗  
之於搭寨箐口擒黑者之子受斬之土目安如鼎遣人  
偵貴州軍本深獲之始知三桂被圍乃使爲鄉導四月  
本深率諸軍赴援使王可臣別由箐澗進可臣至雪棚  
遇賊敗之賊據阿哈箐以抗大軍可臣攻克之賊奔黃  
沙渡可臣攻之斬賊數百坤聞東境失守復遣賊日率  
兵拒貴州軍副將白世彥突其陳斬賊中之驍者以其  
首徇賊遂敗走官軍遂進達三桂所總兵李如碧率精  
兵陷陳先入賊皆披靡三桂聞喧呼聲知外援至鼓噪  
而出貴州諸軍自外夾擊坤熊皆敗走本深運糧入三  
桂營營中有二日不舉火者六月三桂遣總兵王會勦  
隴納一作納總兵王友進副將王可臣勦雄所總兵李如  
碧勦渭河總兵李世輝剿烏撒而自率兵追坤熊敗之  
於阿合洞又敗之得初洞王友進王可臣自臺石琪進  
遇賊於阿和木江箐友進擊之賊敗走追逐四十里至  
明家渡殺賊千餘獲其馬數千器械稱是李如碧破賊  
寨十餘七月至渭河與王可臣會遂由渭河之七山進  
克高家坡及法中石叢山等八洞殺土目九人賊千餘

人八洞地皆北鄰遵義爲水西城之東北隅也九月三桂攻克紅巖坤聞紅巖破率其妻祿氏逃於木弄箐十一月木把陳老善聚衆據東隆箐可臣攻之坤遣兵迎戰於魚孔可臣突其陳賊潰走箐上可臣乘之賊又潰斬老善及其黨二百餘獲器械稱是千總張起鳳追至大木廠擒賊目阿市等三人餘衆皆散王會亦勦平隴納十二月三桂及總兵劉之復李世輝攻木弄箐坤自箐上下木石擊之三桂不能進別分兵爲兩隊從間道襲其後而自率兵於其前佯攻之坤悉力禦前而不虞二隊之襲己也越三日二隊自後薄坤營坤敗走至烏

大定府志

卷四九

五

蒙烏蒙不納遣漢把曾經投降不許坤與熊逃匿大方之杓裏箐祿氏走烏撒三桂按杓裏箐獲坤熊及其黨數人遣李世輝攻烏撒四年正月重聖遣祿昌賢憑險拒之世輝不能進三桂又遣馬寶襲其後獲昌賢世輝軍乘勢進攻烏撒克之獲重聖及其弟重乾三桂欲生降熊遣人說之不聽與之食不食七日三桂釋其縛而誘之降熊至三桂所背立大罵積十三日不食始瘞十四日乃死三桂戮其尸熊塔趙然亦被戮臨刑索紙筆書絕命詞於是水西遂亡十一月三桂奏分其地爲四府以大方城爲大定府而木胯火著架勒化各四則溪

隸之以水西爲黔西府而則窩以著雄所三則溪隸之以比刺城爲平遠府而的獨采備要架隴跨四則溪隸之以烏撒爲威寧府移治舊烏撒衛城又設四總兵以鎮之安重聖之妻隴氏郎岱土官隴安藩之妹也烏撒平隴氏走郎岱隴勝者水西故土目也助坤作亂圍三桂甚力坤敗亦走郎岱二人者皆勸安藩作亂三桂索二人於郎岱甚急安藩不予三桂使人速安藩安藩懼遂反使隴勝攻大定威寧二府殺畢節經歷秦文安藩自率兵攻安順殺經歷袁績三桂以雲貴兵討之五年六月三桂令貴州兵出安順而已向威寧二路皆屢敗

大定府志

卷四九

六

賊賊咸退保郎岱三桂圍之數月賊中糧盡安藩勝及隴氏潰圍而走三桂皆獲而誅之降逆黨萬餘人以其地屬安順府坤妾隴氏匿烏撒山谷聚餘黨謀亂十二月官軍搜得誅之坤妻祿氏烏蒙土官之女也生子曰勝祖坤之亡也祿氏及勝祖自烏撒逃之烏蒙匿處於山谷及三桂反祿氏勝祖詣威寧總兵朱萬年謀拒逆而已說連諸土府以應之弗克萬年爲三桂所殺時十六年也其年祿氏密遣目把雄勝鄒瑜楊明善分探四川湖廣廣西三路

王師令爲鄉導

師未進不及迎而反祿氏又密約水西舊日把以臧阿武歸宗得素化沙隴騰

以上皆土目

明弼羅蔡等

以上皆把事

召

集土兵以拒三桂十七年八月十二日以臧掠果勇殺

三桂平遠千總王松把總陳友德斬首三十七級十二

月土目莫得阿戶掠高山鋪殺三桂畢節兵十八人十

八年二月九日勝祖率屬目札蜡巴架歸宗攻大定與

三桂大定鎮兵合戰臨陳斬偽把總潘蕃及偽兵二百

三十人五月十三日勝祖遣罵色數人抄糧於簸羅箐

殺偽大定守備張鳴鳳千總蔣富國李自龍及偽差官

三人斬首三百二十六級擒偽千總陳起鳳虜偽兵八

大定府志

卷四九

七

十七人獲米二百五十一石十九日進至大定北門外

斬賊首十四級俘二人二十五日阿戶敗賊兵於雨龍

山殺偽大定千總晏中庭傷偽副將陳元中斬首十三

級六月十二日歸宗及頭目黑拱擊賊於大定西門外

殺偽大定千總陳典斬首七級七月三日以臧與偽總

兵黃甲戰於松樹坪斬首十八級十一日罵色阿虎等

擊賊於白工騰斬三十一級俘三人十九日又戰於公

鷄山殺偽守備一人斬首七十一級七月二日罵色白

松掠白勒架斬首十八級俘四人四日以臧阿武歸宗

黑拱熊騰杓佐及土官隴某與黃甲戰於阿戶斬首五

百有三級十二日諸罵色邀賊兵於楊家海殺僞官一人兵十九級十九日又邀賊於洪水斬首四十一級二十二日罵色架母阿納與賊戰於黔西西門外斬首八十五級八月一日頭目糯膩及諸罵色敗賊兵於挖腳達殺賊兵四百十六人擒八人十六日諸罵色與僞遵義總兵楊某戰於古樓隘斬首百十五級二十五日糯膩阿戶邀楊某於洽教跨斬首六十四級俘四人九月二日得額納虎孺集邀僞黔西總兵喻正郎於比戈斬首二十六級俘四人十日諸罵色擊僞副將蕭鳴鳳於落聚斬首十八級俘三人十九日以膩阿武歸宗黑拱大定府志

卷四十九

八

及土目烹者與黃甲戰於木空扎那跨殺僞副將劉乙及兵百八十七人俘六人二十五日隴跨化沙與僞平遠總兵蔡丙戰於平遠之普拱殺僞副將楊丁及千總一人兵九十二人十月四日得素與僞侯李戊戰於怯里之蠟巴普殺僞副將一人守備二人千總把總共八人兵四百三十人俘十六人十一月二十日以膩邀僞黔西總兵黃甲僞副將蕭鳴鳳於革著殺僞把總一人斬首七十八級俘十六人十二月十日頭目總算杓佐掠中所殺賊兵十四人十九年正月二十五日諸罵色邀賊兵於烏西羊場琪斬首四十七級俘八人二月十



日頭目以列裸集即糯掠閣鴉夷狀作葛了斬首三十七級

俘二人十三日隴騰化沙邀蔡丙於莫中殺偽千總一

人斬首七十五級三月八日頭目以市烹者布凍掠平

遠之納恩斬首十八級俘三人五月十七日頭目引葉

阿戶莫得邀賊於層臺斬首三十七級二十六日布凍

納虎擊賊於平遠州之落結河殺偽把總劉經斬首百

五十級二十八日得素掠安順之三岔殺偽安順守備

一人千總把總共三人兵二百十人二十九日罵色沮

革掠大定城外之浪風臺殺賊六人三十日罵色阿俄

劫羊場填偽侯營殺偽侯標千總把總各一人兵五十

大定府志

卷四九

九

三人六月三日罵色阿挖掠耗子洞殺偽大定把總邱

士賓及領旗二人兵十八人十一日罵色務卜掠路穿

岩殺賊十二人十五日罵色李增榮劫偽黔西營兵於

乾堰殺守備一人千總二人斬首六十二級七月六日

罵色沮革敗賊於平遠鳳凰山之罵鴉殺偽平遠守備

劉宇斬首九級二十日罵色巴底邀截賊糧於楊家海

獲米三百七十五石殺護糧兵二十六人八月十日罵

色阿挖邀截賊糧於沙溪獲賊糧二百五十二石殺護

糧兵十三人二十二日罵色白臥邀賊於谷里獲軍裝

二十束殺賊兵十九人二十七日罵色內革邀截賊糧

於羊場填獲米一百八十七石六斗殺護糧兵八人九月七日罵色以市掠殺賊打糧兵十七人於左所二十八日罵色阿雜邀賊於歸化斬首二十七級獲軍裝五十三束十月十日勝祖聞賊陷永寧遣以贓王得勝二人領兵往探至白巖遇賊甚衆乃尾之間道出其前而伏於毛垵截殺偽千總把總共八人兵四十人自十六年以來勝祖兵共殺賊官賊兵四千一百八十四人然以道路梗塞尚未有

朝命勝祖痛其宗社邱墟憾三桂甚故極力擊賊往往有功至是貝子彰泰征南將軍穆占總督蔡毓榮等已率

大定府志

卷四十九

十

大兵入貴陽毓榮將取道平遠以西聞勝祖攻賊甚力遣使招之因其所稱授以烏撒土知府銜且許之復宣慰勝祖悅遣阿五明弼送款於彰泰等獻米四千石以助軍糧十一月二日罵色李增榮擊賊之掠野者於撒臥殺把總一人斬首八十二級五日罵色巴底邀賊於簸羅箐斬首五十六級七日罵色巴底阿挖伏於路穿岩殺賊兵三十九人八日以贓邀賊於歸化斬首百五十二級十四日罵色杓革主劫賊於黔西頭塘斬首十六級十七日罵色巴底掠黔西三重堰等四塘殺賊四十一人十八日罵色務卜底殺賊差官一人兵一人於渭

河之核桃坪二十六日阿五抄擊賊兵至黔西頭塘共  
殺賊兵百二人俘偽千總陳啟陸念獲馬三匹器械稱  
是十二月四日總箕邀賊於歸化黎樹坪斬首百五級  
俘十二人二十一日阿五邀賊之掠野者於織金殺偽  
把總一人兵百二十七人虜偽守備一人千總一人兵  
五人二十年正月七日頭目阿差殺掠野賊三人擒一  
人於莫賦時蔡毓榮遣穆占等自安順北出擊賊帥高  
起隆等於平遠勝祖聞大軍至十二日遣頭目阿五化  
沙阿沮迎官軍之先鋒沿路搜賊至於平遠府城獲賊  
兵三人馬三匹二十六日阿沮獲賊兵三人於的都以

大定府志

卷四九

十一

個二十七日諸罵色伏兵於白沙河斬賊首一級俘三  
人獲馬一匹二十八日阿五得素化沙伏兵邀擊賊帥  
揚應選於平遠之大莫架斬首三百級俘十人器械稱  
是二十五日阿五歸宗化沙得素隴勝從

大兵擊賊於平遠之望城坡殺賊三人於是賊守城中而  
分兵二萬屯城西南山穆占屯城東北趙賴屯山下莽  
奕祿花色以前鋒護軍兵間道出山背冒險上山夾擊  
斬首四百餘級賊走城中四將合攻城內出兵突之官  
軍又斬賊千餘偽帥王會以城降趙隆及其黨分走永  
寧黔西二月八日阿五化沙阿沮邀賊帥夏國相於平

遠之朶備六歸斬僞千總把總二十人兵四百十人國  
相北走九日歸宗以賦沙會祿永燦渡六歸河尾賊帥  
張足法揚應選於北渡羊場路穿共斬首三十級俘千  
總一人獲九子炮二鐵甲三十足法應選走至黔西又  
據險以守十日勝祖率阿五化沙阿沮從莽奕祿及遊  
擊王成功至黔西勝祖等由間道出足法所營之上而  
下木石以攻之莽奕祿自下夾擊奪其險賊敗走復邀  
擊於高家橋斬首千餘級陞巖死者無算足法走黔西  
遂復是日阿五等又追賊於濫泥溝斬首六十級擒僞  
巡撫張惟堅及都司秦傑惟堅家屬門丁三十八人兵  
大定府志 卷四九 十三

九人獲馬八匹銀五十兩勝祖以獻莽奕祿斬之十四  
日勝祖率歸宗以賦沙惠祿永燦從莽奕祿進兵至大  
定城內頭目開門以納之復大定賊僞文武皆走勝祖  
遣土兵千人伏路邀之於左所僞副將蕭鳴鳳及通判  
教授守備千總把總共六人皆降十五日阿五化沙阿  
沮追賊於烏渡水獲通判楊茂而賊帥楊應選及僞總  
兵喻正郎田茂年王己皆降十八日以賦沙惠祿永燦  
授殺賊兵五人是時蔡毓榮率諸將自大定進兵攻雲  
南十九日勝祖使沙惠領兵千人先驅清道至畢節牛  
場橋擒僞守備一人把總一人兵六人永寧賊南出掠

野是日勝祖使罵色者帶領兵千人禦之者帶伏於永寧之鎮西賊掠至其地伏起斬首四十二級墜巖死者不可計二十一日以膩歸宗沙惠祿永燦黑拱總箕復畢節降偽衛守備李崑千總董柱遣使繳印於毓榮次日官軍始至二十三日阿五化沙阿沮與賊帥馬寶所部兵戰於遵義之杜包殺偽千總一人斬首四百二級俘偽千總一人兵一人二十四日罵色李增榮巴底邀擊馬寶於赤水斬偽副將王教及千總一人兵三百人俘千總一人三月四日以膩歸宗沙惠遇馬寶潰兵於畢節與戰斬首二十一級六日聞偽撫夷將軍匿永寧

之鎮西遣頭目小孃尋授之俄而偽撫夷將軍及總兵蘇甲副使王乙遣守備張丙就小孃乞降小孃送之毓榮軍門又降偽副將一人偽郭將軍幼子一人八日頭目小阿五莫得與賊出掠兵戰於石朶斬偽官及兵百十人俘十人於是畢節遂定官兵取道威寧而入雲南矣勝祖自十九年十二月歸附以後又殺賊官及兵二千五百九人明年大軍至雲南凱旋勝祖未獲宣慰使之命乃自上狀陳其功且言水西未設三府時歲輸米二千石於畢節衛倉土目歲供驛馬銀五千四百兩站夫銀二千二百六十兩日費銀二千一百六十兩協濟

畢節夫價銀三百六十兩共銀一萬八十兩初設三府秋糧雖云三萬餘石後覈實各府止各數千石又設三鎮歲饗支銀三萬三千有奇加以馬乾文武俸薪幾有十萬之數若以秋糧而論三府原加於水西之舊額以動支而論三府實倍於舊日水西爲宣慰司亦屬王臣土地人民亦隸於版圖似宜依元明及

國初舊制爲便當事以其狀上二十二年三月

上特命兵部侍郎庫勒納至貴州察議土司事宜

諭之曰曩時逆賊吳三桂見土司富厚因收其土地今既歸順

或云更設土司或云設立流官衆論互異朕思土司祇

大定府志

卷四九

有大定黔西平遠威寧四府錢糧亦不甚多爾往善爲經畫使可永遠遵行十二月庫勒納會同雲貴總督蔡毓榮上疏曰平遠大定黔西舊爲水西安坤所轄威寧爲坤子勝祖所屬自康熙四年設立流官相安已久糧差悉無違誤安勝祖宜去烏撒土知府銜不得擅預軍民事所有水西宣慰使仍以勝祖承襲

上允之於是勝祖仍襲水西宣慰使又建阿武長官司以土目阿武爲之然皆不許預軍民事而其權藉輕矣三十七年勝祖卒無子繼督王繼文上疏曰水西宣慰使安勝祖大爲苗民患今已病故與故長官阿武并無嗣請停

襲所屬地方改歸大定平遠黔西三州流官管轄

上許之於是安氏之爲宣慰使者遂絕然四十八日至今多安氏爲之黑白二種羅羅咸自謂爲土目百姓徵召悉至雖虐之至死不敢背亦可見其民之淳樸矣安氏自漢後主建興三年至康熙三十七年凡千四百七十四年世長水西其受命於中朝爲蠻長爲羅殿王爲姚州刺史爲順元宣撫使爲貴州宣慰使爲水西宣慰使號凡六更而於其國常自稱爲趣慕一作直慕謂其妻爲乃某一作德土司土目之長妻及土舍之妻稱曰肩某其官有九捨九縱之目九捨者自上而下之等級猶中國之九品

大定府志

卷四九

十五

九縱者分司掌事猶中國之九卿九縱之目不可得詳

九捨

亦作九批

則更直不魁擢魁補木器脈備所罵色額拔

黑乍是其地有十二則溪則溪蓋于旗之轉其制猶唐

之州宋之軍則溪之下有四十八日又其下有百二十

罵衣千二百夜所蓋猶中國之鄉里甲也又自有夷字

夷志以紀其先代之掌故語言亦多不與中國同此其

典章之要最也若其異俗則別具於苗蠻篇云

參華陽國志南

齊書隋唐書五代史記宋史元史明史明史綱目史

紀事

國史貴州通志黔書大定志稿安氏譜安勝祖

狀表志

附錄安氏譜一世慕齊齊二世齊齊火三世火阿得

四世得烏沙五世沙烏穆六世烏穆菊七世菊阿糯

八世糯阿羅九世羅阿杓十世杓阿脈十一世脈阿

得十二世得阿捨十三世捨脈烏十四世烏莫得十

五世莫得墮十六世墮阿委十七世委烏所十八世

所比額十九世比額勿二十世勿阿納始至二十一

世納阿縱分於二十二世縱阿卜二十三世卜阿勺

二十四世勺阿妥二十五世妥阿乍水西鎮二十六

世乍比五分阿二十七世五莫翁二十八世莫翁說

二十九世說阿歹三十世歹阿瓦三十一世瓦額備

三十二世備阿扯殺革三十三世扯阿住三十四世

大定府志

卷四九

十六

住阿特三十五世特阿沮三十六世沮阿葉三十七

世葉阿都三十八世都阿札分阿三十九世札阿朵

四十世朵阿塔分得四十一世塔阿趣四十二世趣

六葉四十三世葉阿風四十四世風納志四十五世

納志主色開基四十六世主色阿更四十七世阿更

阿委四十八世阿委阿是分那四十九世阿是隴那

分歸五十世隴那阿閣分波臥跨五十一世阿閣額

葉五十二世額葉沮區分白五十三世沮區則額分

世五十四世則額普額分密五十五世普額額則五

十六世額則隴杓五十七世隴杓主載分阿五十八



世主載額歸五十九世額歸普色六十世普色阿膩  
六十一世阿膩阿糯六十二世阿糯阿畫六十三世  
阿畫乍俄六十四世乍俄隴內六十五世隴內隴贊  
六十六世隴贊靄翠六十七世靄翠隴弟六十八世  
隴弟普者六十九世普者那科七十世那科白則七  
十一世白則裸至主妻奢志乏嗣以龍鋪為子鋪乃志妹之子今黔西四方井闊波是也  
七十二世裸至龍鋪明賜安姓七十三世安祚七十四  
世安貴榮七十五世安萬鎰七十六世安萬鍾七十  
七世安國亨七十八世安仁七十九世安疆臣八十  
世安堯臣八十一世安位八十二世安世八十三世

大定府志

卷四九

七

安永宗八十四世安坤八十五世安勝祖

安勝祖狀一世主色二世阿革三世阿佩四世阿是  
五世龍那六世阿闊七世普露八世沮去九世沮額  
十世普貴十一世額則十二世隴杓十三世主贊十  
四世額歸十五世普色十六世阿膩十七世阿糯十  
八世阿畫賜名帖木兒不花十九世乍俄二十世隴內二十  
一世隴贊二十二世靄翠二十三世隴弟二十四世  
普者二十五世納科二十六世白則二十七世裸至  
二十八世隴鋪明朝賜姓安二十九世安祚三十世安貴  
榮三十一世安萬鍾三十二世安萬鎰三十三世安

國亨三十四世安仁三十五世安毅臣三十六世安  
堯臣三十七世安位三十八世安世三十九世安承  
宗四十世安坤四十一世應襲安祿祖

大定志  
稿原本

謹

案濟火卽譜所云二世齊齊火攻諸葛武侯之南征  
當建興三年歲在乙巳勝祖具供狀當康熙廿一年  
歲在壬戌綜計首尾共一千四百五十八年上除慕  
齊齊下除勝祖共八十又三世通計之每世約莅職  
十七年餘於人情尙合勝祖供狀以三世爲阿佩與  
譜四十七世阿委相當七世爲普露與譜五十一世  
額葉相當十世爲普貴與譜五十四世普額相當阿

大定府志

卷四九

六

佩普露名見正史普貴名見通志譜無其名而狀皆  
有之似狀可爲據然狀第十八世阿畫卽譜六十二  
世阿糯阿畫元史本紀仁宗延祐五年順元宣撫使  
阿畫以洞蠻酋黑冲子子昌奉方物來覲卽其人也  
延祐五年歲在戊午上朔武侯征南之年千又九十  
四年歷六十世每世約十八年亦不太遠轉以上攷  
普貴當乾德末見通志乾德元年歲在癸亥上朔武  
侯征南之年七百三十九年歷世五十二每世約莅  
職十四年餘太促下沿至延祐五年共三百五十五  
年僅八世每世莅職約四十四年餘太舒狀又云齊

齊火相傳四十代至後漢時主色佐武侯擒孟獲封羅甸國王傳三世至唐開成元年阿佩歸順仍襲原爵年世愈不合實爲亂道蓋勝祖之狀本漢人據通志爲之彙合又不知朝代遠近是以處處橫決反不若譜之爲其質也譜無阿佩普露普貴者或係別派或名號之異不可得知而阿委非阿佩額葉非普露普額非普貴則定矣譜每世皆以先世名冠之此表法之不可究詰者然如其法以求之則齊齊者一世之名火乃二世之名阿得乃三世之名也慕容居齊齊之上當又是齊齊之父名夷書主木生補及貊貊卽

慕容慕容濟濟生濟濟火濟濟卽齊齊慕容蓋卽木音近隨筆騰寫無有與則也七十五世安萬鎰七十六世安萬鍾七十九世安疆臣八十世安堯臣據明史萬鎰萬鍾爲兄弟行疆臣堯臣爲兄弟行則譜狀所敘非父子相續但據其莅職相承接言之可知明史安的當譜隴弟卜葩當譜普者明史卜葩後歷中及聚卽至隴富譜普者後歷那科白則裸至三世始至隴鋪隴鋪卽隴富至卽聚而科當亦卽中是譜狀多白則一代安位之後譜狀亦多安世一代白則安世蓋莅職未幾不及赴闕請命故史不書而譜有之此亦

可補史文之缺譜狀又無萬銓者蓋以借職不數也  
自納阿縱以下屢言某分某地校以它夷書皆是其  
昆弟別出爲土目非其身爲之此文實略王文成公  
與安貴榮書云安氏之職四十八支更迭而爲今使  
君獨傳三世而羣支莫敢爭以朝廷之命也三世蓋  
謂隴富觀即譜之祿及貴榮審如是則譜謂隴鋪爲閩波  
支之子益信此亦可補史文之缺惟七十七世安國  
亨據明史通志當爲安仁七十八世安仁據明史通  
志當爲安國亨譜狀皆倒置夷人涉筆之譌宋史羅  
氏鬼主有得蓋及僕夜二人譜狀咸無其名辜推其

大定府志

卷四九

二十

時代僕夜與五十四世普額相當則普額即僕夜之  
聲轉無疑南宋時又有羅殿王羅呂見桂海虞衡志  
然攷其地當在今之羅斛冊亨自是別支非水西羅  
氏鬼國此亦攷西南掌故者之所當知附識於此云  
夷志十二則溪主木居羅萊白原注山名今屬東川娶妻三人  
長宜密補次乃密朵次齒烏堵補乃產二子名烏名  
扎孟獲樊兒子是其後裔朵乃產二子名糯名恒糯  
爲建昌梁山雷波黃郎波卜之祖恒爲烏蒙祿氏且  
簡奢氏之祖堵乃產二子名補名豹補爲雷益鹽倉  
播勒原注即安順之祖豹即慕濟生濟濟火濟濟火有四

子長爲東川之祖次芒部之祖次普安龍氏之祖幼  
爲水西安氏之祖 勿阿納初至水西其僕者額中  
從之納以所乘騾馬與之者額中後爲白羅羅之祖

七星河源於裸理勿阿納初在裸理卜宅後家於

鴨池

原注今  
赫聲所

又至姑糯箐亦家焉姑糯箐亦名黑羊

箐最後又家於租義歹

原注卽定遠  
府大河巖上

奢香乃永甯

且蘭奢氏之女

天啟四年安位追王三善於內莊

奢寅至大方第中俄射第梁正中太極圖而走位見  
矢亟追之及之於永寧紅巖畱之弗許歸且簡寅以  
莫得波臥得額得查四目地還水西位乃許寅歸且

大定府志

卷四九

三

簡 崇禎二年削水西六目之地曰阿戈地

原注安  
平界

龍爾地

原注卽龍  
里恐誤

龍夜地

原注卽落陽小  
蛇場屬清鎮

龍夜底飛

地

原注卽  
修文

化那地

原注卽大小化那  
陳釋云在清鎮

引菜遮勒

原注  
卽鎮 安氏初肇夷語稱爲苜慕自蜀漢封羅甸以至

西 國朝封號凡六而夷語苜慕不改 趣慕王號乃菜夫

人之稱土司土目之二房土舍之妻曰肩菜黑羅羅

言真正百姓白羅羅言僕役之後宣慰始自安順土

府安順土府名播勒土名大革威寧土府名烏撒土

名勺迷畢節係比五舊基土名裸革鎮雄土府名忙

布土名業塊永寧土府名扯勒土名係魁遵義土府

名沙業扒瓦貴州原係姑糯定遠土府地名相義互西南寔益土府名賭家木東河普安土府名阿外則黔西地名過仲平遠地名比刺大定土名白札果

母鷲格卽水西鷲古格卽烏撒古苦格卽宣威州

录录格卽播勒

原注今安順

互得普遏卽烏蒙黑貓著舌卽

鎮雄录租魯通卽東川 比躋係白羅羅之名因號

其地爲比躋久之譌爲畢節比躋地與水西烏撒播

勒三家界相聯三家俱來越佔比躋潛逃至募役司

後又遁至楚雄府家焉 夷山水名鳳山名化戈伯

鳳山名阿露耶伯雨龍山名落佐伯果箔山名架母

大定府志

卷四九

三

伯涼水井山名主渣伯白巖山名發樞伯白巖左大

山名比轉伯木弄關山名革火伯白泥臥山名白泥

伯將軍山名畫眉伯閣鴉名伯揚白鋪寨後石壁山

形似羊鼻名录挖伯寨民祭上石壁大山名伐處伯

土日祭雷打山卽兩龍山尾在城東北四里原注雍正六年

六月二十七日雷擊之出黃水數日乃止其先山頂

有霧是日其旁必雨自雷擊之後其旁有雨而山頂

亦不必有霧有霧水吊巖原注水在巖隙間白朗朗流

上有靈芝云在 水頭洞原注有水下羊鬼洞原注洞

嘉永里頭甲 石多病病以羊祀之卽愈洞因以名卽鹿洞原注有

出廣一二尺許至洞前人一石窟其深莫測窟上有

里許水復流出三洞皆在嘉禾里頭甲擢魁龍洞一

成溪大刺雍河名左家洞在悅服里二甲白鋪巖上原注洞中有石街巖巖悉疑成

花卉可人土人曾避兵於此自洞內行三日出白鋪巖上阿古肚洞阿古肚洞去左家

洞七里原注自洞內行七日阿佐彭家溝阿佐彭家洞去阿古肚洞

三十里二洞皆在悅服里大有里七甲洞去左家洞

三日程原注自阿佐彭家洞內行二十七日日出此洞果木閭河打鷄閭河

會流爲兩吳河又下爲暮得河下注赤水以上十一則大定志

稿原阿者原注即水西設巢於白札果原注今大定東自個

仲一帶原注即黔西州直抵沙賦原注即沙漢扒瓦原注即遵義東自

姑糯原注貴州及租義互一帶原注即定遠府直抵大河湖廣

大定府志 卷四九 三五

界按元時湖廣地有九溪十八南自彼那一帶原注即平

遠直抵播勒大革原注即安順府西南自米裸歸濟一帶原注即

今米裸塘歸直抵阿外則普安州及賭密木東原注即密

益汎二處直抵阿外則普安州及賭密木東原注即密

州西至得素一帶原注即水城直抵五所原注即威寧杓噉原注

及鹽西北自裸巨一帶原注即畢節直抵暮不原注即鎮雄州北

自得札暮得一帶原注即龍場直抵扯勒原注即永寧

大定攷 謹按夷志原文不無誇張且多俚藪之語

原本 今畧爲刪潤然亦不減其質也其書言建昌雷波烏

蒙東川芒部烏撒永寧普安普里與水西同出一祖

說與明史概安堯臣狀畧同堯臣狀云鎮雄與水西

原一家後安氏絕鎮雄瓏富來繼遂名安瓏富鎮雄  
絕堯臣自水西回繼遂名瓏澄堯臣原瓏富之後非  
冒姓瓏也據其說是瓏祿羅本一家蓋同聲之轉然  
夷志繆誕不可盡信聊存之以廣異聞耳

夷字釋畧天能音模陰地勻音米陰人屯音撮日切音宜

月音洪星世平聲音姐陰風音兀赫雪音烏雲汎音菜陰平

兩流音洪君音居臣音助慕音父鋪音子可音友兄音已外

第音彙夫音地聲音約陰平婦音朋朋音朋友音友弟音弟笑音笑

轉音長幼音幼平聲音座陰說音說話音話喜音喜笑音笑

譌音善惡音惡平聲音方陰飢音飢寒音寒加音加飽音飽波音波

大定府志 卷四十九

暖音鋤賈音賈賣音賣四音四多音多諾音諾陰音陰平音平少音少允音允勤音勤陰音陰

轉音長好音好賒音賒短音短平聲音你陰寬音寬窄音窄心音心活音活飲音飲忍音忍吃音吃白音白

租音租酒音酒飲音飲肉音肉叱音叱飯音飯粥音粥菜音菜呂音呂房音房田音田牀音牀窠音窠

飢音飢極音極此音此聲音格陰平梳音梳梳音梳箸音箸水音水匙音匙匙音匙以音以約音約陰音陰平音平山音山

炒音炒獲音獲陽音陽石音石曰音曰聲音浴陰平田音田步音步得音得陰音陰平音平土音土泥音泥陰音陰平音平

聲音春恻音恻平聲音那陰夏音夏另音另詩音詩秋音秋歐音歐平聲音措陰冬音冬昨音昨出音出金音金命音命校音校

銀音銀曰音曰平聲音土陰銅音銅志音志鐵音鐵元音元黑音黑一音一呼音呼二音二呼音呼義音義三音三三音三色音色

四音四梁音梁五音五平聲音我陰六音六元音元不音不轉音不七音七也音也今音今八音八凡音凡亥音亥九音九

凡音凡格音格陰音陰平音平十音十小音小冊音冊百音百記音記洪音洪千音千中音中都音都萬音萬乃音乃密音密兩音兩菽音菽徹音徹

錢音錢小音小聲音聲不音不轉音不分音分非音非聲音聲中音中聲音聲夷音夷明音明義音義漢音漢也音也沙音沙



年音的音課音月音以音宏音日音元音泥音時音加音免音甲音丙音著音陰音平音乙音京音

齊音丙音百音開音丁音豕音泰音戊音也音克音己音既音期音庚音功音亨音辛音指音亥音壬音

吧音情音癸音弓音禱音建音非音免音陰音除音忌音愛音滿音斟音平音竹音奪音定音

只音措音執音燕音癡音破音的音刺音危音州音谷音成音安音陰音收音中音慕音開音

云音不音閉音胃音被音金音抽音奢音木音以音腮音水音力音一音火音阿音階音土音鼠音速音

陰音平音子音公音哈音月音宋音宜音陰音寅音而音臆音卵音舌音辰音心音魯音平音

聲音已音乞音射音午音以音平音聲音陰音未音仰音合音申音田音橋音酉音坤音阿音戌音罕音

歎音亥音均音窪音賁音他音更音州音口音糯音大音炊音木音陰音定音只音柯音威音弟音

聲音不音轉音寧音又音密音平音亢音比音遠音卑音黔音中音觶音西音回音著音畢音聿音

龍音節音功音更音水音匹音底音城音尺音蘇音公音司音法音鷄音穿音哥音山音炒音補音雲音

大定府志 卷甲九 二十五

寫音竹音龍音好音渣音山音補音落音而音录音折音只音遮音河音力音逸音烏音却音无音

西音呂音徐音東音宋音呆音川音弓音去音聲音芒音中音孟音部音以音羅音叩音阿音甸音

亦音著音颺音勻音寶音弓音原音注音東音川音長音房音范音部音二音烏音步音五音撒音似音

朮音颺音勻音普音以音原音注音宣音威音長音房音五音昭音吧音烏音通音另音蒙音且音草音

杜音蘭音也音勒音更音乃音亨音命音原音注音昭音通音長音房音且音蘭音公音房音

得初土目監生安光祖所譯夷書四則 慕齊齊枊

業東川夷號爲兜苴慕卽都主部之轉也烘阿乃居阿窠惹

卽普安龍土司之祖也皆出於烘一作思必松居

扒瓦爲今水城扒瓦土目之祖扒瓦卽播隈之轉以

且水一名播水也出於阿納統孟布居慕亦號慕不  
首慕卽濠坡主部之轄也統阿則勅水西皆出於阿

統

一作阿通則阿五卽今仁育里土目阿五之祖則

比五爲標主阿則七卽郎岱阿則七土目之祖今爲

沙氏所繼皆出阿則慕翁居木柯今大定東九層衙

是也慕得仁育里慕得土目之祖今絕慕得分支又

爲義漸里果瓦土目楊氏之祖皆出於比五

一作比

樓底蘇卽今水城底蘇土目沙氏之祖居水城城外

出於阿尺阿戶今仁育里阿戶土目之祖也以支今

仁育里以支土目之祖也皆出於阿都那貢

今水

大定府志

卷甲九

三六

城嬰北土目之祖

嬰俗作軀

出於阿遮得額今樂貢里得

額土目之祖出於阿朵墮泥今水城墮泥土目之祖

出於六葉以義今悅服里以義土目之祖皆出於主

色阿龍今水城阿龍土目沙氏之祖扒撒今水城土

目扒撒之祖皆出阿華那威今平遠那威土目之祖

祖也出於阿尾歸宗今嘉禾里歸宗土目之祖也出

於阿是阿勒今水城阿勒土目之祖也以直居託泥

黔西以直土目之祖今從白舍今黔西白舍土目之

祖也斂窩今義漸里斂窩土目之祖華利今悅服華

利土目之祖也今絕白鋪今悅服里白鋪土目之祖

也補露今悅服里補露土目之祖也以利今悅服里以利土目之祖也皆出於阿閩阿閩一作阿可德初今悅服

里德初土目之祖也德皆今義漸里德皆土目之祖

也一作白皆德幾早卒皆出於懿德臥這卽安邦彥之祖

也今絕以角水城以角土目之祖也今絕密受黔西

密受土目之祖也今絕阿克平遠阿克土目之祖也

遮嗟平遠遮嗟土目之祖也阿克遮嗟皆絕以增大

定以增土目之祖也今絕法怯今大定法怯土目之

祖也輔兄今大定輔兄土目之祖也一作非兄皆出於車

額隴舍居阿戶則阿居阿戶皆爲黔西阿戶土目之

大定府志

卷甲九

二十七

祖同出於隴杓比起居阿烏謎黔西阿烏謎土目之

祖也今絕出於額歸馬擺今仁育里馬擺土目之祖

也總幾今仁育里總幾土目之祖也窪書今仁育里

窪書土目之祖也媽嶺今仁育里媽嶺土目之祖也

帕那今仁育里帕那土目之祖也皆出於阿膩阿布

今黔西鴨池阿布土目之祖也出於納科法沙今大

有里法沙土目之祖也杓佐今悅服里杓佐土目之

祖也皆出於隴鋪 水西十二宗親阿五德初臥這

嗣法沙阿戶以義歸宗概住府擴撥阿烏密住黔西

嗣底蘇住水阿則七住郎以則龍利文住修 水西十

三則漢木騰則漢管錢糧阿戶兵馬阿五火著則漢管錢糧歸宗兵馬以義化角則漢管錢糧德初兵馬法沙以上三則漢屬府架勒則漢管錢糧阿隆兵馬扒瓦此地撥歸水城則窩則漢管錢糧喪舍兵馬法騰雄所則漢管錢糧阿烏密兵馬密蘇以著則漢管錢糧以直兵馬阿布以上三則漢屬黔西的獨則漢管錢糧這借兵馬又夏刺朶泥則漢管錢糧那威兵馬臥這隴騰則漢管錢糧隴騰兵馬支鋪以上三則漢屬平遠隴騰係根亨子孫非陵實安姓遺脈也安架則漢管錢糧阿則七兵馬底蘇其地多屬水城少

屬郎岱六慕于的二則漢在清鎮修文等處即水外六目地也宣慰時管地方錢糧之夷目號六慕濯色管操練兵馬之夷目號慕直焉色 水城除安姓地外有爬普子孫之地夷號今魯德即漢詔四大部也比起比得二目為一部疑概為安姓所繼歸賽歸故二目為一部歸賽疑今為宣威姬姓所繼密洛為一部早無繼疑 黃河阿德為一部姓保今謀廷杰即爬普今魯德之遺脈也

白皆五目安國泰所譯夷書九則 主木居羅業之山諸夷奉以為君娶三婦長姑君宜之女曰宜恩密

補宜恩猶言宜氏

生二子曰穆阿枯曰穆阿怯次義

君能之女曰乃恩密朶生二子曰穆阿賽曰穆阿臥

三布君齒之女曰齒恩烏堵生二子曰穆克克曰穆

濟濟兄弟六人分居六國曰巫枯之曰乍怯之曰孺

後賽之曰恒曰補克之曰貌濟之爲六大姓其後子孫

繁衍各君一部大者方數百里小者方數十里史記

所謂西南君長以十數漢書所謂邑侯君長續漢書

所謂邑君邑長者也 穆阿臥主木第四子姓更亨

氏烏蒙永寧及涼山之祿姓與馬湖磨波等皆其後

裔穆阿克主木第五子姓庭普氏曲靖宣威烏撒等

大定府志 卷四九

二十九

皆其裔穆濟濟主木第六子姓庭實氏東川芒部水

西郎岱及會理州沙馬等皆其後裔 恩阿勒悶畔

今東 君之少子其父愛之其嫂嫉焉譖於其兄父死

兄立逐之惟老奴支烏突希珠從攜米一升瓦鬲一

具煮粥松下松枝墮鬲毀粥覆希珠號傷阿勒曰勿

悲丈夫貴自立耳行將太牢食也其後創業爲芒部

水西之始祖阿統濟火後其長子曰芒部爲鎮雄祖

次子曰阿晟爲沙罵祖次子曰阿則爲水西祖四子

曰迫墨爲郎岱祖那阿可毋庶嫡姪生不敢育棄於

野羣燕覆翼之父祿那知之以爲祥育之傳以國夷

詔燕阿可因名阿可有四十八子宗支甚繁而國以強阿呵唐時納垢酋居巖谷撰髮字字如科斗三年始成字母一千八百四十號曰題書卽今夷文字左翻倒念亦有象形會意諧義一名題書書籍有曰理命言性理者也有曰苴載紀世係事蹟者也曰補蘇巫祝書也曰弄恩雅頌也曰怯杰風歌也又有堪輿祿命書其堪輿卽楊茂筠雌雄之說祿命與漢法不同不用五行生尅其歷法類古宣夜家言而間皆於餘自元以後奉行正朔其法遂無傳君長曰蘭稱爲苴穆猶可汗標信之稱大部曰穆濯次

大定府志

卷甲九

三十

曰禡裔次曰奕續通稱爲我苴穆立分其諸弟爲我授以土地分以重器而以黑白夷各數族分之謂之約作世掌事我之子嗣分諸弟爲能虛能虛分爲黑種夷語謂巫爲補最尊貴喪祭用之父子相繼其先蠻夷君長突穆爲大巫渣喇爲次巫慕德爲小巫又五所白爲烏撒巫恩蘇爲墨夷巫餘黑白諸巫雖由學習亦各承受於其祖先突穆渣喇嫡派在宣威在大定者乃其支庶也其術惟祈禳占卜而無果報鬼怪之說飲食起居務潔淨以感神明又別類巫曰蘇額不尊重專治病

平水西逸事第五

安坤皮熊之作亂於水西也

上命平西王吳三桂征之康熙三年三月我兵至水西境坤熊

營於阿札室以待三桂至歸集令烏三保率兵三千先

進夷目歸集阿得以五千人迎戰

凡夷目皆書其地名  
名多不可攷夷法如

此始仍

三保射殺夷目以忠中歸集左目戰交綏而退

明日又戰於米裸戰數文三桂以大礮轟之夷人敗走

明日進逼阿札別將劉繡領兵三千與夷目阿五法沙

兵五千戰於臺下夷兵爲繡所圍皮熊出兵救之乃解

繡中流矢阿五法沙亦爲我兵所中遂管收兵入營居

大定府志

卷四十九

五十二

三日別將王洪領兵三千至臺下夷目必憂那率兵三

萬來戰又憂那中流矢爲洪所窘阿五出兵救之乃免

坤遂收衆上臺分守要害據臺不出我兵攻之不免三

桂謀舍之弗攻進趨水城令三保自水城出勦監倉而

已進搗以那以那者坤妻祿氏所居也謀既定三保先

發三桂過水城宿於安作次日穿大箐出箐口與夷人

之守箐者戰於比牒殿之乃營於黑坐次日別將王洪

領兵三千出擊賊夷目龍胯率夷人三千來戰以大礮

轟之夷兵死者過半追度克溪至蠟雍返至逞牒營於

阿祖謀者言夷目歸宗來犯三桂令董良營於比牒頃

以待之夷目歸集率夷兵二萬營於犀牛巖岨敢前而夷目黑坐以兵千夜襲三桂營三桂覺馬發礮擊之死者十九歸宗自安作趨比牒良與戰又敗之歸宗走免良殺夷兵幾盡焚其廬舍無筭別將袁甲營逞牒劉安邦以兵千營猴兒關夷人於峭壁上鉅索夜繫火及鈴三桂自黑坐觀之疑賊未襲營使把總王乙率精騎三百赴之夜中馬駛不能止乙及三百人咸墜巖死甲營於免溪夷人又以兵萬五千人圍安邦於關側衆寡不敵我兵敗沒安邦死之其免者惟數十人三桂收軍令皆營黑坐明日遂發黑坐渡一水至海子側前有大箬

大定府志

卷甲九

三

謀者謂夷兵屯馬駿嶺不可前三桂以礮擊之焚其寨落過音舍到法都臥營焉夷人以兵塞路木天裸至皆置守而夷目那志抗公鷄山三桂使何丙出擊敗之虜蔡家苗女子三百人以還卽日三桂斂兵啟行經糯克殺夷兵之扼險者未至臥這城得德勒堪營焉堪者西南人稱平陸也坤熊知三桂趨以那急赴臥這陳兵以待三桂使都統蔡丁覘之謂賊未易破三桂急使人召三保於鹽倉并兵攻臥這大敗之坤熊皆遁夷兵退屯確又壘又戰於蓮花塘復敗坤走還以那與熊聚夷卒陳兵以待三桂東出度那巴橋越箐經松樹坪至果勇



底而營焉使三保及何丙柳成秀沈洪劉奇陳在客趙  
達蕭費等八人將兵二萬四千人出戰而夷卒有十萬  
戰不利以大礮轟之夷人逆散始還營次日皮熊悉衆  
圍果勇底城使兵守那巴橋六歸河以斷我兵運道軍  
中糧絕我兵大困又憂那爲坤所信任而有貳心於三  
柱三柱許平坤以反憂那襲宣慰又憂那信之故爲三  
柱所用方三柱之急也夷目阿五阿戶及皮熊咸請於  
坤欲乘其困乏急擊之又憂那謂漢兵已饑行自斃毋  
庸擊也坤從之先是三柱檄貴州發兵運糧至六歸河  
應接吏設書六歸爲六廣及困於果勇底又發間使從  
大定府志

卷四九

三三

提督李本深來救本深至六廣不見

大兵獲夷人始知三柱困於果勇底城急趨之至阿窪水  
放礮安營三柱軍中聞之知救兵至亦放礮與之應皮  
熊阿五又欲抄掠運糧士卒又憂那復止之糧遂達於  
城中軍士不食數日矣糧至三柱令作粥漸食之三日  
乃能勝甲是時本深營於圍外城中放信礮鼓譟而出  
本深夾擊之夷兵大敗死者什七八又憂那來降我兵  
亦喪萬人惟餘兵萬八千將弁數百人而已坤敗急奔  
至以那與其妻祿氏訣祿氏奔臨通歸匿其母家而坤  
走九里箐從者九人鞍馬衣服如一人無能辨之熊自

縊三桂使劉奇追坤及之於箐獲其夷官程幕魁

幕魁夷官

號其名無故

以爲坤也急獻之問於又憂那始知之坤已走

暮得歷皮甲籠胯諸箐轉從間道西奔將折入歸集歷  
犀牛巖及比牒果裸諸箐至阿札壘所從九人爲我兵  
所獲者七皆自謂卽坤咸爲又憂那所識中有韓慕魁  
者爲又憂那所識大罵數其背主始就刑死黨犯上固  
結不解至於如此亦可歎也已坤至阿札惟二人從追  
急不得免乃相與投巖二人咸死坤冒於半壁不死奇  
擒之以獻遂戮之水西平

知大定府事鄱陽王允浩原本  
知大定府事河曲黃宅中重輯

烏撒安氏本末第六 舊事記六

烏撒安氏與水西安氏同祖蓋咸出於昆明昆明與嵩皆西南種族名也史記自滇以北君長以什數邛都最大其外西自同師以東北至牂榆名為嵩昆明皆編髮隨畜遷徙毋常處毋君長地方可數千里自嵩以東北君長以什數徙笮都最大又曰天子乃令王然于柏始昌呂越人等使間出西南夷西指求身毒國至滇滇王大定府志 卷五十 一

嘗羗乃留為求道西十餘輩歲餘皆閉昆明莫能通身毒國徐廣曰永昌有嵩唐縣後漢書滇王者莊蹻之後也元封二年武帝平之以其地為益州郡割牂柯越嵩各數縣配之後數年復并昆明地皆以屬之又建武十八年夷渠帥棟蠡與姑復牂榆牂棟連然滇池建憐昆明諸種反叛殺長吏十九年遣劉尚擊之渡瀘水入益州界羣夷聞大兵至皆棄壘奔走尚獲其羸弱殺畜二十年進兵與棟蠡等連戰數月皆破之明年正月追至不韋斬棟蠡凡首虜七千餘人得生口五千七百人馬三千匹牛羊三萬餘頭諸夷悉平又建初元年哀牢王

類牢與守令忿爭遂殺守令而反叛攻嵩唐城太守王  
尋奔樛榆哀牢三千餘人攻博南燔燒民舍肅宗募發  
越嵩益州永昌夷漢九千人討之明年春邪龍縣昆明  
夷酋承等應募率種人與諸郡兵擊類牢於博南大破  
斬之傳首洛陽賜酋承帛萬疋封為破虜佺邑侯水經  
注笮夷也汶山曰夷南中曰昆彌蜀曰邛漢嘉越嵩曰  
笮皆夷種也劉昭續漢志注嵩唐本西南夷史記曰古  
為嵩昆明章昭曰同師邑名也不知所在漢書嵩唐周  
水首受徼外又有類水西南至不韋行六百五十里華  
陽國志嵩唐有同水從徼外來同周古字多通用同水

大定府志

卷五十一

二

周水一也同師疑在同水之近側曰同師者猶洛師云  
耳雲南志嵩唐當在永平縣西境保山縣北境雲龍州  
南境周水其潞江類水其祐柯河與大氏漢之嵩唐葉  
榆邪龍不韋雲南比蘇弄棟皆古嵩昆明之地也雲南  
志葉榆今太和縣北境及鄧川州邪龍當在蒙化永平  
順寧班固曰貪水首受青蛉南至邪龍入濮行五百里  
其卽今之碧雞與不韋今永昌府保山縣雲南今雲南  
縣及太和南境比蘇在今雲龍州西弄棟今姚州定遠  
廣通皆其境也嵩近西而昆明近東二種皆無君長至  
酋承始封為邑侯此繩水以南之昆明然繩北亦有昆

明元和郡縣志舊州昆明縣東北至州三百里本漢定  
筓縣屬越雋國後沒變夷周武帝立定筓鎮武德二年  
于鎮置昆明縣蓋南接昆明之地因以為名定筓今鹽  
源縣也唐書蠻西有昆明蠻一曰昆彌此則昆明居金  
沙江之北有古苻都地也東蠻部哀昆明益東從唐書  
昆明東九百里即牂柯國也又西趙蠻西屬昆明南西  
珥河也通典云西趙蠻西至昆明南至西珥河通鑑注  
西珥河即牂柯江形如月抱珥故名唐書龍朔三年鉅  
州刺史謝法成招慰昆明比樓七千戶內附總章三年  
置祿州湯望州咸亨三年昆明十四姓率戶二萬內附  
大定府志 卷五十一 三

析其地為殷州總州敦州殷州居戎州西北總州居西  
南敦州居南遠不過五百里近三百里其後又置盤麻  
等四十一州地理志殷總敦在黔府羈縻州中湯望盤  
麻在戎府羈縻州中黔府又有賓州萬歲通天二年以  
昆明夷內附置大約今敘州之西南邊境寧遠之南境  
及昭通東川曲靖大定興義廣西廣南鎮安泗城諸府  
州皆為昆明所居故有四十餘州其協靖曲播陵鉗哥  
靈高切騎品從柯連碾衛十四州宋史謂之石門路者  
惟協曲二州為舊制餘俱在四十一州中蓋可推而知  
也五代史記昆明在黔州西三千里外地產羊馬其人

椎髻跣足披氍其首領披虎皮天成二年嘗一至其首  
領昆明大鬼主羅殿王普露靜王九部落各遣使者來  
使者號若土附牂柯以來是羅殿王亦為昆明之明徵  
蓋爨氏強之時昆明為其屬爨氏衰滅昆明盡收其故  
地也唐書云東爨後分為七部一曰阿羊居曲州靖州  
故地四曰暴蠻五曰盧鹿二部分保竹子嶺盧鹿部已  
具安氏本末中暴蠻即烏撒是已元和郡縣志云曲州  
朱提郡漢武帝於此置朱提縣屬犍為郡後立為郡在  
犍為南一千八百里後漢省郡諸葛亮復置朱提郡自  
梁陳以來不復省屬開皇四年開置南中立為恭州武

大定府志

卷五十

四

德元年改為曲州朱提山名出善銀此即今之昭通靖  
州即今威寧西南之則著所謂梁陳不賓服者為爨氏  
所據也蓋梁太清之時徐文盛入援江陵不復除刺史  
於寧州土人爨瓚遂竊有寧州武陵王之敗遙屬於周  
謂之南寧州瓚死子震及翫分統其部於是有東西爨  
後震翫咸為隋所誅唐高祖詔翫子宏達於昆州東爨  
已為蓋氏所有洎宏達死子歸王襲殺東爨首領蓋聘  
及其子蓋啟於是東爨無復君長而昆明之流移於兩  
爨者實為繁衍尚無大君長其所推崇者悉謂之鬼主  
大鬼主後歸王為大鬼主崇道所殺崇道及其子輔朝

又為南詔蒙歸義所誅歸義遂脅歸王子守隅及其種  
族徙於永昌東爨以言語不通散依林谷得不徙而七  
部於是起焉烏撒者暴蠻主部之人名也亦謂之烏些  
亦謂之五所亦謂之五朮亦謂之物叔夷書云穆克者  
祝明之第五子居於濮亦作普亦作補亦作暴實為其長克卒柏  
墨襲柏墨卒著襲著卒模襲模卒論襲論卒解襲解卒  
敷襲敷卒齊杜襲齊卒廬襲廬卒博襲博卒溫遮襲  
溫遮卒脈襲脈卒街襲街卒封襲封卒期周襲期周卒  
鐸襲鐸卒一德襲一德卒毅胎襲毅胎卒裕襲裕卒牧  
郎襲牧郎卒兜襲兜卒母襲母卒麥則襲麥則有子二

大定府志 卷五十一

長仍子濮少即物叔也物叔雄偉有才畧遂北并阿芋  
部進至魯望城魯望者昆明王所居蓋祝明長子楮之  
他所謂烏君者也東爨蓋氏之亡也烏君自立為王謂  
之魯王蓋本其姓以為稱爾魯一也西南人稱王為望  
故中國呼之為魯望也已而內附置為賓州夷語謚寶  
為巴謚州為的謚都門為兀姑故謂魯望為巴的兀姑  
也是時巴的兀姑之部長為他蠻所逼而南徙於存油  
之東其地空虛故物叔據之也即今威寧是矣物叔卒  
羿襲羿卒夢得襲夢得卒更襲更卒公襲公卒蒙襲蒙  
始驅逐他蠻克復巴姑今鹽倉是也於是始盡有烏君

之故地蒙卒奇襲奇卒哲襲哲卒弩襲夷連父名稱之為哲弩也先是巴的之翁有阿頭部易溪部易娘部烏蒙部悶畔部又有茫布部阿晟部皆其種族即石門路十四州之地也折怒始盡降其部因以祖名號其部始曰烏撒部弩卒普籠襲普籠卒令襲令卒錄襲錄卒世襲世卒沐浴襲沐浴卒白墮襲白墮卒牘牒襲牘牒卒治襲治卒德樸襲德樸弱為他部所并降為庶人其妻生子曰勒字仲雲甫數月避亂棄之野土人收養之及長有勇畧與其故臣慕魁特置阿迂阿祖二人復烏撒土宇元憲宗征大理屢招不降世宗至元十年始附十

大定府志

卷五十

六

三年立烏撒招討司十五年改為總管府二十一年改軍民宣撫司二十四年置烏撒烏蒙宣慰司於其地勒卒古襲古卒卜格襲卜格卒陂地襲蛇節之亂烏撒及烏蒙東川茫部諸蠻皆乘鸞攻掠州縣也速鐸兒分兵討平之蓋古卜格陂地之世也陂地卒庫襲庫一曰余文宗至順九年四月壬寅余叛殺烏撒宣慰司官吏降於伯忽伯忽雲南叛臣也戊申祿余以蠻兵七百餘人拒順元烏撒界立關固守五月己未羅羅斯土官宣慰撒加伯阿陋土官阿刺里官土官德益叛降於祿余七月伯忽勢愈猖獗祿余乘勢連烏蒙東川茫部諸蠻欲



奉伯忽弟拜延順以攻順元樞密院臣以聞詔即遣使督豫王及行樞密院四川雲南行省亟會諸軍分道進討以烏撒烏蒙羅羅斯地接西番與碭王安撫司相為唇齒命宣政院督所屬民嚴加守備十月乙亥四川行省平章搭出引兵由永寧左丞孛羅引兵由青山茫部并進陳兵周泥驛及祿余戰殺蠻兵三百餘人祿余衆潰即奪其關隘導順元諸軍同進二年春正月大兵獲伯忽餘兵皆潰獨祿余猶據金沙江有旨趣進兵討之丙寅中書省臣言四川省臣塔出脫帖木兒等攻祿余凡十七戰賊大敗潰去乙巳躍里特穆爾倍道兼進奪

大定府志

卷五十一

七

金沙江二月己酉樞密院臣言撒里特穆爾孛羅以正月戊寅敗烏撒蠻射中祿余降其民烏蒙東川易良州蠻兵夷獠俱款附乙卯雲南統兵官來報捷諸蠻悉降惟祿余未獲命番休各衛漢軍十之二以三月一日放遣六月丙寅雲南出征軍悉還烏撒羅蠻復出殺戍軍黃海靖等命雲南行省及行樞密院凡境上諸闔戍兵未可輕撤宜視緩急以濟其變秋七月己卯以雲南既平惟祿余等懼罪竄伏降詔曲赦之九月丙子樞密院臣言祿余與東川路總管善折兄那其會兵殺烏撒宣慰月魯庚辰樞密院臣言六月行樞密院官以兵與

烏撒賊兵五戰破之惟祿余竄伏未獲命四川行省給其軍餉庚寅祿余寇順元路丁酉雲南行省遣都事那海鎮撫樂智等奉詔往諭祿余及授以參政制命至撒家關祿余拒不受俄而賊大至那海因與力戰賊乃退及晚烏撒兵入順元境左丞帖木兒不花禦戰那海復就陳宣詔招之遂遇害帖木耳不花歛兵還三年二月戊申雲南行省言會通州土官阿賽及河西阿勒等與羅羅斯兵千五百人共寇會川路之卜龍部祿余將引兵與莊部羅羅斯合截大渡河金沙江以攻東川會通等州臣等敢奉先所降詔書招諭之不奉命則從宜進

大定府志

卷五十一

八

軍制可乙酉祿余言於四川行省自父祖世為烏撒土官宣慰使佩虎符素無異心曩為伯忽所誘比聞朝廷招諭而今期限已過乞再降詔赦即率四路土官出降詔中書樞密御史諸大臣雜議從之祿余降余卒葶襲葶卒裸輪襲裸輪卒備襲備卒哲襲一日那者哲者其妻實卜攝事元末加行省右丞明太祖既平蜀規取雲南大師皆集於辰沅欲并翦諸蠻以通蜀道洪武十四年十一月特遣內臣齋敕諭烏撒諸部長曰西南諸部自古及今莫不朝貢中國朕受天命為天下主十有五

年而烏撒烏蒙東川茫部建昌諸部長猶桀驁不朝朕

已遣征南將軍潁川侯左副將軍永昌侯右副將軍西平侯率師往征猶恐諸部長未喻朕意故復遣內臣往諭如悔罪向義即當躬親來朝否則遣人入貢亟攜誠款朕當罷兵以安黎庶爾其省之時征南將軍傅友德已遣都督胡海洋等率師五萬由永寧趨烏撒矣復自率師自曲靖至茫部循格孤山而南以通永寧之兵進搗烏撒元右丞實卜聞海洋至乃聚兵赤水河以拒之及聞大軍繼進皆遁友德令諸軍築城烏龍箐版舖方具蠻寇大集友德屯兵山崗故特重以待之既知士勇可用乃縱兵接戰茫部土酋率衆來擾實卜與合勢甚

大定府志

卷五十

九

銳大軍鼓譟而前其酋長多中槩墜馬死大軍益奮蠻不支大潰斬首三千獲馬六百匹實卜率衆遁遂城烏龍箐是為烏撒衛城得七星關以通畢節又克可渡河其年烏撒大酋實卜來歸置烏撒土府以授之烏蒙東川茫部望風降附十五年正月置烏撒及東川烏蒙茫部諸衛指揮司詔諭烏撒諸部人民以雲南已降附宜益效順中國以享昇平復諭諸部長曰今置郵傳通雲南宜率土人隨其疆界遠邇開築道路各廣十丈準古法以六十里為驛符至奉行又敕征南將軍傅友德曰烏撒烏蒙東川茫部諸酋長雖已降恐大軍一還仍復

嘯聚符到日悉送其長入朝又諭貴州已設都指揮使然地勢偏東今莫若於實卜所居之地立司以便控制卿其審度之四月烏撒諸蠻復叛帝諭征南將軍曰烏撒諸蠻伺官軍散處即有此變朕前已慮之今果然雲南之地如曲靖普安建昌烏撒勢在必守其東川茫部烏蒙未可據守也且畱屯大軍蕩掃諸蠻戮其渠長乃可分兵守禦耳乃命安陸侯吳復為總兵平涼侯費聚副之征烏撒烏蒙諸蠻并諭勿與蠻戰於闔索嶺上當分兵掩襲直搗其巢使彼各奔救其家之不暇必不敢出以抗大師俟三將軍至破擒之是月副將軍西平

大定府志

卷五十一

十

侯自大理還軍會征南將軍擊烏撒七月進兵大敗其衆斬首三萬餘級獲馬牛羊以萬計餘衆悉遁復遣兵捕擊之諭征南將軍師捷之後務必戮其渠魁使之畏懼搜其餘黨絕其根株使彼智窮力屈誠心款附方可畱兵鎮守也又諭其宜乘兵勢修治道途令土酋諭其民各輸糧一石以給軍為持久計十六年正月以雲南所隸烏撒烏蒙茫部三府隸四川布政司傅友德既敗烏撒諸蠻餘黨潛匿者皆捕殺之諸蠻震懾相率來降至是悉平二月烏撒烏蒙東川茫部諸部長百二十人來朝貢方物詔各授以官賜朝服冠帶錦綺鈔錠有差

其女酋則加賜珠翠首飾五月詔賜烏撒女知府實卜  
及烏蒙東川等知府人朝服一通并常服一襲十月烏  
撒知府實卜等七百七十一人來朝詔賜織錦文綺鈔  
錠及把事以下從人各有差十七年五月改烏撒烏蒙  
茫部為軍民府而定其賦稅烏撒歲輸糧二萬石氈衫  
一千五百領烏蒙東川茫部皆歲輸八千石氈衫八百  
領定茶鹽布易馬之數烏撒歲易六千五百匹烏蒙東  
川茫部皆四十匹凡馬一匹給布三十疋或茶一百觔  
鹽如之十月烏撒知府實卜貢馬賜綺鈔是時哲已先  
卒踰年實卜又卒子能襲二十年徵烏撒知府阿能赴

大定府志

卷五十一

十一

京二十一年東川反命傅友德沐英陳桓討之七月敕  
諭友德等言東川茫部諸夷種類皆出於羅羅厥後子  
孫蕃衍各立疆場乃異其名曰東川烏撒烏蒙茫部祿  
肇水西無事則互起爭端有事則相為救援昔唐時閣  
羅鳳亡居大理唐兵追捕道經茫部諸境羣蠻聚眾據  
險設伏唐將不備遂墮其計以致喪師二十萬皆因將  
帥無謀故也今須預加防閑嚴為之備九月烏撒軍民  
府官屬葉原常獻馬三百匹米四百石於友德以資軍  
用且願收集土兵從征友德以聞從之十月東川平二  
十三年烏撒土知府阿能烏蒙茫部土官各遣其子弟

入監讀書已而能卒卜穆襲二十七年烏撒知府卜穆奏霑益州屢侵其地命沐春諭之二十八年戶部言烏撒烏蒙東川茫部歲賦氊衫不如數詔已免徵今有司仍追之宜申明從之自是諸土官三年一朝貢以為常永樂中烏撒阿能烏蒙撒可茫部香佩各遣人貢馬賜之如故事宣德二年烏撒知府卜穆妻圓和入貢先是卜穆已卒故圓和攝久之圓和卒尼襲七年行在兵部侍郎王驥言四川烏撒烏蒙土官祿尼祿昭等爭地仇殺宜遣官按問八年二月遣行人章聰侯璉齋敕往諭仍敕巡按與三司官往平之六月丙午四川都司奏比

大定府志

卷五十一

十二

以烏撒烏蒙二府土官祿尼祿昭等爭地讎殺蒙遣行人章聰侯璉奉敕往諭皆悅服烏蒙耆老念烏撒為世親以所爭地什之三讓之永息爭訟上曰蠻夷能讓亦是天理未泯特惠訓諭不至耳果能開誠布公何不可化尼立無幾卒弟舊襲夷名為廓博也正統七年裁烏撒軍民府通判推官知事檢校各一員十一年革烏撒烏蒙遞運所景泰元年敕諭烏撒烏蒙諸府土官普茂等以貴州諸苗叛亂恐滋蔓鄰近命戒嚴防守毋聽賊衆誘惑陷於為非倘逼近前來便當勦殺三月烏撒進高壽表踰期部議宜究以遠人宥之成化十二年烏撒

知府隴舊等奏同知剛正撫字有方蠻民信服今九年  
秋滿乞再任三年以慰羣望從之舊卒伯關襲改姓安  
氏三十年烏撒土知府安伯關遣人貢馬三年始至今  
又踰貢期乞減賞例從之是後伯關卒得襲夷語謂之  
波也宏治四年烏撒知府安得朝覲踰期乞減半賞如  
例十三年烏撒貢復踰期如前議減十四年烏撒所進  
萬壽表及千秋冬至表皆踰年始至京禮部請罪之帝  
以其遠人且前後所遣遲滯皆有故宥不問是年烏撒  
所轄可渡河巡檢司言閏二月二十七日大雷雨不止  
及至二十九日水漲山崩地裂山鳴如牛吼地裂而陷

大定府志

卷五十一

十三

湧出清泉數十派衝壞廬舍橋梁及壓死人口牲畜無  
筭又本府阿都地方八月亦暴風雨田土淹沒二百餘  
處民死者三百餘人得卒妻奢勿攝嘉靖初芒部隴政  
支祿與隴壽爭襲朝廷立壽隴政支祿倚烏撒土舍安  
寧數為亂填底參將何卿請兵討之於是巡撫許廷光  
發土兵二萬五千人命貴州參將楊仁等將之受何卿  
節制相機進勦政祿佯聽撫乞緩師而令賊黨阿黑等  
掠周泥站七星關復遣阿核等糾集諸苗剽掠畢節衛  
諸處殺傷官軍燬居民房屋甚眾兵部言賊勢猖獗宜  
速征於是何卿等進勦斬首一百餘級俘二十餘人降

其累數百政敗奔烏撒卿令烏撒土舍安寧土婦奢勿擒之安寧佯許諾久之乃以阿核阿達等屍獻竟不出政兵久不解都御史湯沐以聞乃切責諸將及守巡官罪而革何卿冠帶令勦賊自贖四年隴壽為隴政誘執殺之收其印帝命鎮巡官諭安寧縛政條反諸助惡者時政已為官軍擒於水西追奪芒部印信前後斬獲六百七十四級生擒一百六十七人招撫白烏石等四十九寨以捷聞貴州巡撫劉廷簾言烏撒衛所驗那達阿黑二屍及水西所獻隴政真偽未可盡信恐首惡尚在不無後慮請核實自後遂令芒部改土歸流數弗靖朝

大定府志

卷五十

十四

廷又不專主提督伍文定之言乃復立土官而安寧之黨惡早置之不問矣奢勿卒子承祖襲承祖夷名為彼烏撒與永寧烏蒙霑益諸土官境土相連復以世戚親厚水西安國亨安智之構釁也國亨部下土吏目與智有親恐為國亨所殺率所部投於烏撒土目安路墨路墨遂詐稱本府知府安承祖職銜赴京代奏國亨亦令其子安民具題永寧宣撫奢效忠亦具奏行所司令各照蠻俗罰牛例處分務悔過息爭以保境安民時萬歷六年也承祖卒墨襲墨夷名為質先是烏撒軍民土府與霑益土州雖滇蜀異轄而宗派一源傅友德之初定



諸蠻也祿哲之妻實卜與哲弟阿哥二人率眾歸順實  
卜授烏撒土知府而阿哥為霑益土知州自後彼絕此  
繼通為一家萬歷初霑益女土官安素儀無嗣奏以烏  
撒土知府祿墨次子為後即安紹慶也祿墨者祿哲七  
世孫也祿墨卒子雲龍襲雲龍夷名曷克二十四年為  
安國正所弑及其二子安紹慶奏欲以其次子安劾良  
歸宗仍襲土知府劾良夷書謂之祿庚雲龍之妻隴氏  
即鎮雄女土官者氏之女也隴氏以雲龍雖故尚有遺  
孤且挾母家兵力與紹慶為敵而紹慶則以隴氏所出  
明係假子亦倚霑益兵力與隴氏為難彼此仇殺流毒

大定府志

卷五十

十五

一方以致士民連名赴奏事下兩省會勘實二十八年  
也又歷十年不能結三十八年雲龍之從弟雲翔奏稱  
隴氏有子官保今已長成劾良倚父兵強圖篡據殺戮  
無辜又引川南道參詞以祿哲子孫尚眾烏撒之宗派  
甚明紹慶出繼已明有一州今令劾良承襲又暗據一  
府恐非西南之利兵部覆案仍敕撫按議處報聞官保  
夷書謂之祿卜三十九年廷臣議安劾良與安雲翔爭  
奪職官之案行川貴諸大吏勘報而貴州撫臣又以二  
土官爭職在雲南而為害在黔蜀必得三省會勘而後  
可定獄帝命逆勘已勘定立劾良矣而雲翔數為亂謀

逐劾良焚劫烏撒四川撫按上其事以劾良為雲龍親姪雲翔乃其堂弟親疏判然劾良自當立雲翔何得妄生覬覦其擾害地方欺罔朝廷罪原難赦但為奸人指使情可原姑準復冠帶下所司議可從之四十三年貴州巡按御史楊鶴言烏撒土官自安雲龍物故安咀與安劾良爭奪官印仇殺者二十年夷民無統盜寇蜂起僅屯焚毀行賈梗絕者亦二十年矣是爭官奪印者蜀之土官而蹂躪者黔之赤子也誠若改隸於黔則彈壓既便而干戈可戢又言烏撒者滇蜀之咽喉要地臣由普安入滇七日始達烏撒見劾良之父安紹慶據露益

大定府志

卷五十

十六

當曲靖之門戶劾良據烏撒又抗滇蜀之咽喉兩雄父子各據一方且壤地相接無他郡縣土司以隔絕鈐制之將來尾大不掉實可寒心蓋黔有可制之勢而無其權蜀有遙制之名而無其實誠以為隸黔便帝命所司速議議上卒如舊安咀夷書謂之祿蜀時諸土司皆桀驁難制而烏撒東川烏蒙鎮雄諸府地界復相錯於川滇黔楚之間統轄既分事權不一往往軼出為諸邊害故封疆大吏紛紛陳請冀收鈐束以安邊隅而中樞之臣動委勘報彌年經月卒無成畫以致疆事日壞播州初平永寧又叛水西煽起稱戈東川鎮雄烏蒙皆觀望

騎牆心懷疑貳賊又恐喝言烏蒙不反朝廷尚欲勦之  
何況於他於是安効良首以烏撒附於安邦彥并力助  
邦彥陷畢節都司楊明廷中軍程坤皆死之又攻陸廣  
時天啓元年也効良遂率夷兵圍烏撒衛城衛官率軍  
民拒守者九月救不至城陷城樓衛署學宮祠廟附郭  
軍屯咸為効良所焚復與亦佐營長安應龍霑益賊首  
補鮒等圍羅平二年四月遂攻霑益雲南參將尹啓易  
守備李加培周嘉映自交水進兵救之為効良所敗加  
培嘉映俱死之遂陷霑益已而為雲南巡撫閔洪學所  
敗洪以兵力不繼好語招之令擒賊自贖効良亦佯為

大定府志

卷五十

十七

恭順擒安應龍以獻而所遣獻功之人領文還至中途  
被劫効良又見黔師出陸廣滇師入霑益水烏之勢已  
成騎虎遂合永寧水西諸部三十六營直抵霑益對壘  
城下五日副總兵袁善宣撫使沙源等督將士力戰出  
奇兵破走之未幾効良敗死妻安氏無子妾設白生其  
爵其祿二婦素不相能安氏居鹽倉設白母子居抱渡  
安氏遂代効良為土官然亦未絕其爵其爵亦以安氏  
為安位姊不敢抗崇禎元年四月四川巡撫差官李友  
芝齋冠帶獎賞其爵母子令管烏撒其爵夷書謂之祿  
勺也於是安氏始惡其爵而絕之其爵於五月十一夜

襲安氏於鹽倉不克與設白其祿逃匿東川界圍東川亦不令入而抱渡又失李友芝遂誑請總督咨發滇兵三千人會援其爵漢撫恐先開兵端不應事遂寢安氏以反芝其爵之請加兵也懼謀接害益土官安邊為婚授之以烏撒以絕其爵其祿見拒於東川走霑益安邊懼奪其地亦欲偶安氏以拒其祿乃以催糧為名至建昌安氏遂接邊至鹽倉成婚曲靖一時皇皇謂水西必糾霑烏入犯雲南巡撫謝存仁以聞存仁因移鎮曲靖以觀變安氏安邊請復烏撒衛以自贖弗許二年總督朱燮元調集漢土兵列營霑益趣滇撫會兵進烏撒境

大定府志

卷五十

十八

安邊安氏逃避偏橋土兵入鹽倉拔難民一千餘人師凱旋安邊安氏復還鹽倉遣人至軍前請俟烏撒城克復束身投見意實緩師總督復發兵以逐安邊安氏納其爵進兵至望城坡遇賊哨騎百餘麾兵奮擊賊盡奔箐中遂復烏撒城安邊駐三十里外擁兵求見諭令束身歸誠邊乘夜遁遂棄鹽倉入九龍圍烏撒陷賊八年至是始平定乃召其爵來鹽倉令約束九頭目以守鹽倉且令圖安邊安氏其爵以鹽倉殘燬乞移烏撒城許之遂令其爵署烏撒知府而令其祿署霑益知州二人雖懦推頗忠順其母亦頗有主持能得眾以是稍安靜

而安邊屢乞降於總督朱燮元且籍水西安位為代申  
以邊寶紹慶嫡孫宜襲知州請罪其爵其祿燮元曲為  
調持欲予以職銜分烏撒為二以置之雲南撫按堅執  
不可以安邊迫阿克反勒兵於野川復以千金賂  
誘其爵頭目布雄日為并吞需烏計萬一其爵被襲則  
烏撒失而前功盡棄烏撒失需益危而全滇動搖非但  
震鄰實乃切膚竟不行安邊乃乞師於安位位出師納  
之需益而遂其祿時安氏尚存故位與邊合既而安氏  
死位貳於邊邊岌岌不自保其祿乃誘羅彩令者布叛  
邊圍而殺之邊夷書謂之祿谷其祿率兵入需益詭言

## 大定府志

卷五十

十九

為邊報仇土民歸者如流於是其祿復有需益久之其  
爵卒得襲已而明亡水西安坤取鹽倉使其子重聖居  
之順治十六年經畧洪承疇征永明王至雲南烏撒及  
烏蒙諸夷悉先後歸附各予原職康熙三年安重聖從  
安坤反以兵塞可渡河糾合土目察革刺等兵千餘圍  
烏撒衛城迤西守備楊宗道衛守備蘇進孝團練都司  
李天材斂民入城悉力固守時

上已命平西王吳三桂討坤知可渡河已為重聖所據率兵直  
自歸集入水西境水西人屯於阿札聖以待三桂連敗  
夷兵於歸集米裸直至聖下見其險不可攻舍之進薄

水城為搗巢之計而令馬寶自水城西解烏撒之圍已而夷人聚於臥這城以抗

師三桂召寶并力攻之而以銀一千兩賞守城弁兵重聖遁於鹽倉不敢復來攻城已而三桂大破夷兵於臥這安坤退屯以那三桂入果勇底營焉戰弗利坤進兵圍之糧絕軍中大困提督李本深救之兵至果勇底內外夾攻大敗夷兵又連敗之於木弄簸羅枸等坤轉奔阿札聖獲之三桂遣李世輝攻烏撒重聖遣祿昌賢憑險拒守世輝不能進三桂又遣馬寶自間道出襲其後獲昌賢遂會世輝攻鹽倉克之獲重聖及其弟重全皆

大定府志

卷五十

二十

誅之水烏悉平遂設四府重聖之妻隴氏郎岱土司隴安藩之妹也重聖既誅重聖生母常氏及隴氏走郎岱水西土目隴勝亦走郎岱皆勸安藩反三桂索三人於

郎岱甚急安藩皆不予三桂連安藩安藩遂反隴勝攻

大定犯威寧至畢節殺經歷秦文安藩攻安順殺經歷

袁績三桂發雲貴兵討之五年常氏隴氏入犯威寧境

夷裸多從之總兵塔新策知府張英才遣使告急於三

桂三桂徵固山吳應岐曲靖鎮總兵王輔臣等率兵援

威寧援兵未至守備楊宗道率鐵騎數十出探倉卒遇

賊於五岡與之戰自午至申賊死傷甚眾宗道力亦垂

盡忽聞礮聲知援兵至復奮力前擊輔臣等援兵自後  
攻賊賊衆大敗常氏隴氏逃至柯落執而誅之六月三  
桂又獲安藩及勝賊遂平十年正月扯處烏夷目俄回  
阿蠟等始來降隸之威寧之德化里媽姑勿泥者安重  
聖之屬目也重聖滅三桂俘之使為隸以守園三桂之  
叛而東出也二人逃歸乃更姓名曰王乘龍曰王騰龍  
相與謀叛迎霑益土目安世基歸鹽倉自署為知府以  
續烏撒夷衆響應惟扯處烏不從乘龍騰龍秦世基攻  
扯處烏之屬目古打而四堡瓦甸野馬川諸處皆為所  
焚掠扯處烏潛兵救古打襲殺其銳卒十餘人餘俱潰  
大定府志 卷五十 二十一

遁乘龍走歸鹽倉世基走還霑益其後安勝祖據鹽倉  
以起事攻偽周府鎮蓋因王乘龍騰龍之舊也事具水  
西安氏本末二十四年吳逆既平裁雲貴兵乘龍見威  
寧鎮兵少復叛總兵王朝海總督蔡毓榮以聞遂發兵  
進勦

上諭之曰苗蠻賦性樸實不敢生事祇因地方官不能撫卹反  
行需索誅求無已遂生釁端耳逆賊吳三桂因需索不  
遂擅濬水西反叛發兵勦滅盡利其所有今苗蠻之事  
恐亦類此已而乘龍襲殺遊擊劉大受於魯章垣朝海  
使扯處烏為嚮導攻魯章垣破之乘龍騰龍皆逃入深

箐捕之弗獲越二年始獲之於阿札壘而斬之烏撒遂  
亡參史記漢書後漢書華陽國志史記徐廣注續漢書  
劉昭注通典元和郡縣志唐書九域志宋史元史明  
史明史概貴州通志  
國史威寧州志新輯

附錄明史概大事記泰昌元年四川永寧奢崇明奢  
寅作亂殺巡撫徐可求明年正月水西安邦彥聞風  
並起圍貴州省城滇黔接壤普安南安莊平夷雖  
屬黔越在滇界皆被圍請救甚急沈儼价即發銀二  
萬以助徵兩迤漢土官兵分遣都司李天常等統領  
一救普安南安莊一由畢節烏撒救赤水永寧而  
烏撒叛酋安效良上六衛叛酋羅應魁等兩路截殺

## 大定府志

卷五十

二十二

阻滇兵救黔之路効良者烏撒土知府屬四川鄰黔  
為其本姓爭官奪印日相讐殺蹂躪黔境且二十年  
在蜀則鞭長不及馬服在黔則鄰父不能制鄰子且  
其父紹慶在霑益州當滇曲靖之門戶効良在烏撒  
當滇蜀咽喉父子各據一方節比者輔車然無州縣  
土司限絕之尾大難制其勢已成前撫按屢請屬黔  
就節制不果而紹慶忠順頗亦相安至是死孫安遠  
當立効良以計逐之遂成逆節 霑益土官安舉宗  
在元為曲靖宣慰使其後有祿哲天兵平南哲妻寶  
卜與夫弟阿哥歸附卜授烏撒府知府哥授霑益州



土知州哥傳至安九鼎世絕妻安素儀典州事因以烏撒安紹慶繼紹慶祿哲七世孫祿墨次子此霑益絕而烏撒繼也烏撒酋安雲龍為烏人安國正所殺復以紹慶次子効良為烏撒土知府此烏撒絕而霑益繼也 沈傲炆使都司楊明廷將三千人先入畢節參將尹啓易將四千人入烏撒安効良圍畢節明廷初與賊戰殺傷相當後賊兵漸增城中奸細放火明廷與中軍程坤皆死指揮蔣藩屏百戶盧應藩奉差指揮張繼斗范世坤朱家相居允欽縋城走追及俱被殺尹參將在烏撒聞變與守備李加培回守交

大定府志

卷三十

二十三

水 設科姓安氏安邦彥堂叔阿梗女嫁霑益土官安紹慶次子効賢科從幼淫慧通文墨好馳馬試劍自適効賢生心奪嫡嫌伯效忠居長用計鳩殺亡何効賢亦死狐媚安紹慶擅寵專權紹慶死長孫安遠襲職復欲就遠為妻圖管地方遠有弟安邊出之於外遠母隆氏以媼姪非偶拒不許復被鳩死遂奔効良與私通定計殺安遠奪其官會曲靖兵備吳參政入賀道經霑益安遠候之設科糾兵數百伺遠至斫傷方守備護送兵至救遠得脫尋死邊初贊亦佐酋婦隆氏今以繼遠而所部四十八營咸附水烏為漠

患邊寄空名而已天啓二年四月賊圍烏撒衛後所  
水西鹽倉助兵甚急參將尹啓易救解之斬六十七  
級賊焚霑益州遁去啓易促守備李加培周嘉映出  
哨擣巢連破馬谷等營安効良統水西烏撒兵三萬  
拒戰二十九日嘉映遇賊坡上加培與合兵而行未  
十里賊分四路伏山谷中尹參將發永騰五營兵并  
鐵索營盡往賊兵數千各山俱出迤西昂兵北勝州  
土兵奔退兩將被圍數重皆戰死失貢象二霑益洵  
懼幾潰尹參將收撫傷殘死守安効良不敢攻而去  
五月尹啓易割交水十月安効良兵入霑益軍民降

大定府志

卷五十

二十四

附奔逃同城烏撒衛後所千戶劉受祿等棄城投交  
水 天啓三年正月委官方仕伯撫諭安効良申稱  
世代忠義水鎮圍烏撒衛城以來百方勸息奈官兵  
自棄自潰反尋覓見攻掘墓棄骨卒致損兵捐餉逃  
往曲靖今開誠具稟夷漢各有罪案似難脫漏各叛  
目攻平夷衛城白水松炎等處責令陪償正罪夫復  
何辭而各惡抄擄激變掘冢拋屍若不依律梟示獨  
罪激成之賊恐難服四夷之心三省終無寧宇後安  
效良又請撫責以擒獻安應龍補鮓無徒狐疑口說  
支吾 四年十二月安効良差目把何與先保邦正

縛獻安應龍勞具使遣之回至曲靖城外被殺者十  
四人蓋參議王鏌與守道黃似華積不相能聞應龍  
既擒各遣人就烏撒接取烏撒以付似華所差之人  
以此生嫌遂動殺機効良聞而驚疑點兵我軍亟申  
飭戰備以待 天啓五年黔師大舉賊勢奔突滇先  
受禍不得不獨任其責滇撫乃遣副總兵袁善率各  
部兵五千於炎方取齊進霑益鎮守繕城垣立哨鋪  
招集流移仍於炎方松林各建土城鷄世昌期曲奈  
科等俱差夷人投見送米豆州夷居九漢居一夷之  
為營火者四十八錢糧站馬悉土官主之而流官直

大定府志

卷五十一

二十五

拱手而受成事焉其十一之漢人則烏撒後所官軍  
也三月十二日水蘭烏霑賊數萬到霑益城四山割  
滿分為三股攻東西北三門袁副總同監紀同知吳  
思溫於北門設伏誘賊來攻百銃齊發擊死甚眾賊  
四山齊下衝城又發銃擊退明日力戰追十餘里前  
後擒斬二百二十九級十四日早賊兵萬四千從東  
山往炎方分三枝官兵止二千五百亦分為三再發  
城中步兵應接決戰共斬一百四級十五日賊從石  
龍山頂下窺城中橫劄二十餘里馬步相兼寸寸埋  
伏炎方出師絕其後城中兵潛出南門劫營賊屍遍

地十八日安効良率兵三萬餘圍炎方繞十餘匝我放百子銃打死賊百餘人又增兵數萬十九日早插木牌堆集草束縱火順風來攻我以火箭噴筒投草旋積旋燒至黃昏賊方退吾必奎大銃鳥銃龍在田交銃每銃打死二三人者五人者賊死三百有奇磨戰已三晝夜我營中各兵懼而思逃必奎在田仗劍喝止募死士張文魁等劫營賊擾亂四鼓撤營去袁副總亦以是日來救行八十里困乏大雨不能進二十日賊哨三百餘分二枝來犯聞銃聲不敢近退剗清水溝在石龍山下霑炎適中處二十一日袁副總

大定府志

卷五十

二十六

沙源等佯為疑兵擾之是夜又發步兵於四山絕頂各舉火為號賊驚亂毘聲不絕二十二日沙源等躡賊營止空壘已遁去矣追八十里斬一百十三級霑益城下之戰五日夜屢出奇兵殲賊炎方以木為柵兵不滿二千賊環而攻之兩晝三夜不能克又引而向霑終不得志斬級三百四十有奇効良敗回至得勒遇安邦彥領兵到鹽倉阻之不許歸巢四月合兵列營分東西二路東營由白水入交水西營由塊補入曲靖効良統水烏兵出木冲犯馬龍直上省城撫臣大集兵分布各隘二十五日水西十七營已到達

朗離窟益一百四十里又三十營至烏撒運糧不攻  
窟益徑出木沖馬龍袁副總聞之引五千人剗松林  
適中以便應援左布政謝存仁統總鎮莊兵六百及  
景東象陳駐馬龍調派諸將抗木沖要路五月初三  
日賊鼓行而前號二十萬實八九萬共九十八營初  
十日至馬龍後山去省城十五里袁副總於是日統  
兵六千至城下尹啓易亦於是夜兵三千續到賊分  
兵四出燒擄諸將截殺共斬九十二級十二日賊聚  
營盤山十三日道將會議決戰二副總親立馬鷄頭  
山督陣分派沙源兵中路祿洪兵中左路龍在田王  
大定府志 卷五十

顯祖兵中右路又以景東象伏左路分家丁攬其左  
右老營賊恃衆分八路衝至我兵僅萬餘偃旂不動  
俟賊將近礮并發賊死戰不退景東陶明卿等象陣  
從左衝出狂跳捲踏賊騎始驚諸軍齊進賊大奔勢  
如山傾追逐十餘里賊走據山頂共斬二千餘級頭  
目數十人把總施鶴齡等入落龍僻路截賊糧道并  
獲級以獻賊自敗後將兩山新營撤入大營劄高山  
我兵挑戰不出十五日猶投幔書我每日發哨必有  
斬獲諸將刻期以馬龍兵攻其前曲靖兵從木沖襲  
其後十八日早宣撫沙源領兵到賊營賊先已拔營

走尋甸卽統兵往救賊於上流渡河十九日攻城諸將兵僅二千直衝其營賊尚數萬從山馳下圍之沙源卽圍中飛馬奔突斫殺無數賊為開西南一缺放出卽燒營走鳳梧山二十二日乘夜遁去其地緊界東川將取道焉守備金為貴結寨甚堅東川亦斫樹塞路不許過仍自竄益歹補爭渡溺死數百人追兵斬獲又五十餘人是役也賊悉其精銳空巢而至我衆寡懸殊摘各路精銳集松林偵賊四往緊與之持故賊至先成列以待賊不得長驅分兵翦其游騎首挫賊鋒比大戰踰時乃決得景東戰象之力滇以一

大定府志

卷五十

三

隅當三省劇寇輒一戰破之十年來未之有也撫臣已升兵部侍郎尋以新銜留任則天啓六年二月也水鳥世繫通攷夷譜云一世孟起居邛之鹵二世大觚三世覺世四世立五世萌六世橐皋音說居漢及鳥七世足八世澤九世宗十世燮十一世居十二世柏能十三世道十四世孟論夷讀陰平聲十五世池十六世宿十七世投十八世奚斯夷讀十九世多二十世畢兒二十一世都二十二世熹思二十三世託二十四世泰二十五世烏二十六世褒二十七世亨二十八世廕二十九世落錯三十世讀三十一世祝明祝

明居瀘陰之山取觚君宜之女曰孟補生子二曰栝  
曰怯又取義君能之女曰孟都生子二曰賽曰臥又  
取布君齒之女曰堵生子二長曰克少曰齊舅第六  
人各居一邑栝世守烏怯居於笮賽居於盧臥居於  
協克居於濮齊居於閩烏在今威寧其後稱魯望至  
唐而絕怯之子稱孟氏再傳至孟獲為武侯所擒旋  
釋之仕漢為御史大夫而邑土遂絕笮在今安南盧  
卽建昌梁山雷波黃郎波卜之祖元羅羅斯也臥字  
君亨子孫為君亨氏自協移於竇地竇地君有曰俄  
海者生德赫德赫有子二長曰隆少曰輝德赫愛輝

大定府志

卷五十

二十九

及其卒也以位傳於輝輝讓於隆而去之邑人義輝  
從者九千人乃東渡白水擊都掌界子及土獠而降  
之依鰓水而居因自號為鰓部夷人謂之須協須東  
也以竇地為諾協諾西也隆世守竇地卽烏蒙部之  
祖也烏蒙明史有傳輝當晉世累傳至墨者墨者生  
扯里扯里益強盛晉末授之以令長之職宋及周隋  
皆自長其部不賓服於中國唐中葉內附以其地置  
簡州為羈縻州宋初州廢後又置藍州元置永寧路  
宣撫使為奢氏至明季而亡明史有傳桂王時復立  
奢辰奢震順治十八年奢辰歸順置之於龍場營之

臥牛河辰死妻龍氏以功保舉土巡檢未授死乃立  
八目以司其地奢氏又稱余氏奢辰亦曰余保壽奢  
震亦曰余化龍八目者余繼先張保楊天欽楊阿綺  
蘇國權陸國璽陸國卿李廷貴是也余繼先即奢氏  
之伯也初八目皆屬永寧雍正五年分正疆界以赤  
水之北屬永寧南屬畢節黔西又以臥牛河分黔畢  
之界於是八目隸黔西者二隸畢節者五隸永寧者  
厘一也嘉慶九年余楊三目之後余國棟楊琦楊瑛  
皆以從征南籠仲苗有功授土千總久之裁烏蒙至  
雍乾間亦滅克字德布子孫為德布氏濮今宣威也

大定府志

卷五十

十

蜀後主時克從子火受命征談東濮豫滅之後主命  
長其邑火以讓克之子柏墨號曰濮君後謫普里君  
柏墨既居濮使仲子著反居故地號曰西濮著生模  
模生論論生解解生敷敷生齊杜杜生盧盧生博博  
生溫遮溫遮生派派生街街生封封生期杓期杓生  
鐸鐸生一德一德生穀貽穀貽生裕裕生牧郎牧郎  
生兜兜生蒙蒙生麥則麥則生子二長仍居西濮為  
暴蠻部少曰物叔烏氏既亡乃南徙稱羅殿今貞豐  
是也物叔於是居於烏夷人謂物叔為五所又謫烏  
撒烏些烏瑣物叔生羿羿生夢得夢得生更更生代出



公生慕慕生奇奇生折折生弩弩當宋時最强盛概  
有七部始以其祖烏撒之名為部族名弩生普礮普  
礮生令令生錄錄生世世生沐浴沐浴生白墮白墮  
生牘牘牘牘生治治生德樸德樸生勒勒字仲雲德  
樸失邑其妻生勒數月而棄於野風屈桑枝墮地勒  
食之不死土人異之收養焉長有勇力與其故臣慕  
魁特直阿迂阿祖二人收復境土烏撒復強勒生古  
古生卜格卜格生哲哲生能能生卜穆卜穆生廓博  
廓博生百穀百穀生圍圍生質質生岳岳克克生通  
通生蜀蜀生庚庚生谷谷生得得累世皆撫有烏撒至

大定府志

卷五十一

三十一

得而亡濟字德施子孫為德施氏濟生火火有功賜  
鳩杖火生兜兜生沙及穆穆生菊菊生騰騰生龍龍  
生杓杓生脈脈生德德生釋釋生墨烏及夾納夾納  
為已折平土目之祖墨烏生慕抵慕抵生墮墮生委  
委生屋瑣屋瑣生被衣被衣生翁翁生子四長世守  
閩邑曰閩君夷人謂為閩畔君仲曰輪居來南為郎  
岱隴氏之祖叔曰台居濮隈為普安龍氏之祖季曰  
納為翁所愛及翁卒伯兄嗣立嫂譖之納東徙居於  
濛坡之裸里遂長其地生子二長曰縱世守濛坡少  
曰必松居於琶隈即漢陽也縱生卜卜生洵洵生通

通生子四伯曰孟博居濛坡號濛坡主部後謚芒部  
芒布仲曰晟居沙陌為阿晟部謚為沙罵叔曰則始  
居水西之裸革季曰孽麻居祖里則生子三伯曰阿  
五為阿五土目之祖仲曰比六嗣立居裸革季曰阿  
七出後孽麻比六與阿五孽生故又稱比五比六生  
子二長曰慕翁始居濛阿謚為木窩木柯木窠少曰  
慕得即慕得土目之祖也慕翁生說說生臺臺生瓦  
瓦生宜禰宜禰生尺尺生讀及底蘇底蘇為水城土  
目之祖讀生解解生沮沮生牒牒生都都生子三長  
曰遮中曰戶少曰以智戶為阿戶土目之祖以智為

大定府志

卷五十

三十一

以支土目之祖牒都遮之嗣也皆幼牒甫五歲都為  
遺腹子遮亦幼弱阿武之佑有曰慕者是生卜慕卜  
父子共輔牒卜生餘及兜餘兜兄弟共輔都兜生勒  
又輔遮故有阿五四代五忠臣之稱遮生子二長曰  
朶少曰賁賁為那奔土目之祖朶生子二長曰鳳少  
曰託尼託尼為墮泥土目之祖鳳生志志始居矩州  
使其仲子守焉志生色色生子二長曰革少曰與義  
以贓土目之祖也革生子三伯曰尾中曰隆少曰培  
思隆為阿籠土目沙氏之祖培思為扒撒土目安氏  
之祖尾生子二長曰是少曰威威為阿威土目之祖

是生子二長曰那少曰歸宗歸宗為歸宗土目沙氏之祖那生可可之母為庶嫡如可生不敢育棄之於野羣燕謀集於旁以萬數那因收之夷語謂燕為可因名之可有子四十八人其嫡妻生者九伯曰懿德中曰勒叔曰禹祖曰柏舍曰播和曰革利曰柏溥曰普露季曰禹釐勒為阿勒土目之祖禹祖無後曰舍為白舍土目之祖播和為簸窩土目之祖革利無後柏溥為白鋪土目之祖普露為補路土目之祖禹釐為以利土目之祖懿德生子四伯曰沮渠中曰初叔曰階季曰幾沮渠之卒也無子以初之子車輓為子

大定府志

卷五十

三三

尚幼而初亦先卒故階攝位階有謀勇闢地至磧津因請命於宋仁宗遂為姚州刺史宋史謂之德蓋即是人也夷人皆子連父名故夷譜沮渠謂之德沮初請之德初階謂之德階幾謂之德幾也初嘗出後普里後以車輓歸本其長子亦反水西實維德初土目之祖階為白階土目之祖幾無後車輓生子九伯曰僕射一作僕夜中曰望著叔曰託義曰義著曰阿克一作普額曰柘支曰與增曰法佉季曰輔兄望著卧道土目安邦彥之祖也託義阿克柘支與增皆無後義著為以角土目之祖法佉為法佉土目之祖輔兄為飛兄土

目之祖僕射生依曾依曾生子三伯曰酌中曰醪季  
曰醪醪為礪舍土目之祖醪為岐山土目之祖一口則寫

士酌生子二長曰贊幼曰白起白起為阿烏密土目  
之祖贊生宗宗生幼歸幼歸生布塞布塞生義義生

子六伯曰稭中曰摩碑叔曰總己曰媯書曰摩空季

曰薄羅摩碑為馬坡土目之祖總己為總溪土目之

祖媯書為窪水土目之祖摩空為馬猷土目之祖稭

生阿畫元時賜名鐵木兒不花畫生俄俄生內內生

讚讚生碱稱阿碱即碱賜姓安生悌一作悌生普哲

一作普哲生子二長曰科少曰布布鳴池土目之祖

### 大定府志 卷五十

三四

也科生褒秦一作褒秦褒秦生聚一作聚娶奢志無

子以擴坡土目之子富為子富生子三伯曰祚一名

觀中曰法薩季曰灼佐法薩即滑沙土目之祖灼佐

即權左土目之祖觀生貴榮夷名直伯貴榮生子三長曰

萬鐘夷名阿助中曰萬鎰季曰萬銓皆嗣位萬銓攝既老

退居臥這直溪萬鎰生仁夷名持務仁生國亨夷名魯則國亨

生子二長曰疆臣夷名褒襲少曰堯臣夷名欣祖堯臣生位夷名

魯位無子萬銓之孫世嗣位世夷名魯益世生承宗夷名懿飛

承宗生坤夷名阿羯坤生勝祖夷名密子自則以來世居水西

至勝祖而亡夷書敘烏蒙又云先世自旄牛徼外徙

邛都原注今建昌

自邛都徙竇地敘烏微云自橐皋至麥

則四十九代居宣威自麥則至得四十二代居鹽倉

攷孟獲火當漢昭烈之世溯其前三十二三代乃至

孟越則孟越乃秦獻孝之時人後漢書云秦獻公初

立復穆公之迹兵臨渭首滅狄獯戎羌豪忍之季父

邛畏秦之威將其種人附落而南出賜支河曲西數

千里與衆羌絕遠不復交通其後子孫分別各自為

種隨所之或為犛牛種越舊羌是也或為白馬種廣

漢羌是也或為參狼種武都羌是也邛即越舊地而

羅羅風俗大類羌人疑羅羅即犛牛種也羅羅之先

大定府志

卷五

三五

本為昆明其譜子必連父名稱之與唐書南詔同南

詔之先曰蒙拓與孟越音近但蒙拓世近而孟越遠

或疑是兩人然夷書不備或南詔漏書其遠代亦不

可知孟越當周末猶用周法以王父字為氏故其子

孫或姓孟氏或姓越氏孟氏孟獲是也孟或謚為穆

為木夷譜稱祝明為木物夷書又稱祝明六子曰穆

阿楷穆阿怯穆阿賽穆阿臥穆克穆濟皆是也又謚

為蒙南詔是也越謚為者明史普安者氏是也又為

折為蛇元史折節蛇節是也又謚為奢蘭州奢氏是

也又謚為沙哀牢沙壺是也又謚為余八土目之余

氏是也孟越居於瀘水之翁故又為鹵氏後漢書封  
昆明鹵承為破虜傷邑侯是也鹵或譌為祿明烏蒙  
祿氏霑益祿氏及元祿余祿哲皆是也或譌為羅唐  
羅殿王宋羅呂羅氏鬼主羅氏鬼國是也或連言為  
羅羅元羅羅斯是也羅羅又轉為盧鹿今稱裸羅祿  
或為陸或為路或為那或為魯或為隴或為龍馬乃  
龍氏郎岱隴氏芒部隴氏或作瓏皆是也夷言夷字  
本異於漢今詢之夷人鹵音為盧字之陰平轉為龍  
字陰平越音為者字陽平孟音為古庚韻盲字陰平  
轉為蒙字陰平實則三字轉為五音其易以漢字則

大定府志

卷五十

三十六

漢人隨手徵文故一音又轉為數字也又孟越鹵三  
氏諸家隨意互以冠名如春秋之隨士中行智荀本  
無定則也夷人之辨姓者惟君亨德布德施云君亨  
又作居亨又作更亨德布又作陔普德施又作陔實  
也安國泰譯夷書曰婚姻不娶同姓如烏撒姓德布  
水西姓德施雖漢姓同安而夷姓不同可通婚姻永  
寧漢姓奢烏蒙漢姓祿而夷同為居亨不可通婚姻  
也蓋祝明之子六姓為婚猶契稷皆帝嚳而姬氏  
子氏為姻其後安隴不為婚祿奢不為婚猶東郭氏  
崔氏自丁至桓不為婚也即其證矣夷書又云水西

永寧正月為歲首蚤通中國先奉正朔也烏撒以南  
十月為歲首猶習秦風也以是言之則羅羅自秦時  
來越嵩明矣明初何福齊讓征貴州蠻皆帶平羌將  
軍之號蓋宋元及明初相傳羅羅為羌故帶此號也  
若是則昆明即羌種審矣或曰孟越即邛之字邛臧  
有勇力故能越張此為名字相符合也

德初土目安光祖所譯夷書四則 詫規至麥則共  
四十九代居雲南宣威自麥則至魯得共四十二代  
居鹽倉詫規木物木克克麥則物叔阿嫩那裸阿世  
沐浴卜格龍在皆為英賢之君長 鹽倉住都烘那

大定府志

卷五十一

三七

婁不首至宣威裸葦柯渡橋尾至畢節詫兜埡口右  
至鎮雄水綠不左至賴歐不 烏撒八大部遵化首  
目以幾安氏德化首目赤兔鳥安氏性化土目居好安氏治  
化土目馬擺安氏廣化首目阿底祿氏大化首目起處安氏  
歸化首目媽姑顏氏順化首目雄所安氏八部惟阿底祿  
氏最大乃廕實子孫移住非廕普之後其所屬各有  
數目即黑胯布雄等目是烏撒大土目皆號續補  
烏撒四大部曰塞翁曰塞託曰乃恩曰鹿烘其八大  
部二十四部即在四大部內塞翁部十三目阿底阿  
飛論詩馬擺阿依卜兄五所白雄所媽姑瓦泥阿甲

威家魁握塞託部十一目居吁租慕憂產底嗣法窩  
嗣布魁赤兔烏果木始塔拉呼古打杓德魁乃總部  
四目起處兄姑杓懿杓多鹿烘部四目以幾洛烘阿  
克奢渣

白皆土目安國泰所譯夷書七則 烏撒與古之少  
子居巴的甸後世即以其名名地曰烏撒分四大部  
曰賽翁曰賽託曰乃恩曰鹿烘為四姓其部落別有  
八大部二十四部 巴的兀姑兀姑譯言都門蓋國  
都之謂也 阿蒙居巴的甸烏撒之後 折怒宋時  
烏撒君長 烏撒中衰四鄰侵削不能自立苴慕降

大定府志

卷五十

三六

而為民生子曰德布仲雲弗能舉棄於野山桑有曲  
枝垂椹哺之數日不死鄰人異而收之及長沈鷲果  
勇有二臣曰慕魁特直曰阿迂阿租謀勇絕倫用兵  
攻四鄰拓地千里 夷書謂夷字乃補曠居色賽所  
作明一統志謂阿呵撰者亦猶史籀李斯之變古文  
耳 閉珊居集唐時烏撒人今土目查刺突穆之祖  
精卜筮之術其法用細竹四十九枝或以雞骨或猪

羊膊骨

大定府志卷之五十終



大定府志卷之五十一

外篇一

知大定府事都陽王允浩原本

知大定府事河曲黃宅中重輯

敕第一 文徵一

宋太祖

賜普貴敕

予以義正邦華夏蠻貊罔不率服惟爾貴州遠在要荒先王之制要服者來貢荒服者來享不貢有征伐之兵攻討之典予往年為扶播南楊氏之弱勞我王師罪人斯得想亦聞之有司因請進兵爾土懲問不貢予曰遠大定府志 卷五十一 一

明太祖

賜西平侯沐英敕

曩因元政不綱豪傑縱橫朕提師旅與之並驅十有二年然後命征虜大將軍平華夏諸將四征五年中原是平萬姓寧謐紀年已十五年矣惟爾烏撒烏蒙東川芒部建昌等處抗命不庭况雲南梁王誘我邊土因是發征南將軍穎川侯傅友德副將軍永昌侯藍玉西平侯

沐英率三十萬衆問爾西南諸夷之罪今潁川侯等報至言雲南等處盡行克復特遣使齎詔諭爾雲南烏撒烏蒙東川芒部大理建昌水西普定等處人民今敢有不遵教化者加兵討平之於戲春秋之義最重者釋有罪而納逋逃爾雲南王及諸夷蠻長宜其然乎

又賜西平侯沐英敕

東川芒部夷種雖異而其始皆出於羅羅厥後子孫繁衍各立疆場乃異其名曰東川烏蒙烏撒芒部祿肇水西無事則互起爭端有事則相為救援若唐閣羅鳳之居大理唐兵追捕道經芒部諸境外稱歸順內實挾詐大定府志 卷五十一 二

聚衆積兵據險設伏唐將不備遂墮其計以致喪師幾二十萬皆將帥過信無謀故也近稱東川烏蒙不叛者號為循良雖未可逆詐然須防閑嚴整師旅使不得肆其奸謀然後賊可破也

疏第二

范承勳

改設州縣疏

為查議冗員以培民力事該臣看得滇黔衛所併歸臣仰體

皇上愛民至意悉心籌畫從議汰冗員甦息軍民到任後即檄

行二省藩臬會同妥議通詳除滇省各衛所已經臣議  
撤具題在案據貴州布政使柯鼎會同按察使李之粹  
公詳復批令再加確議茲據詳稱查黔省衛所康熙十  
一年間已將清平等五衛改縣安莊衛改州現今尚存  
十五衛十所其間有專城者有與府州同城者有與州  
縣犬牙相錯者軍丁耕田納糧與民無異所當分晰撤  
併改設如偏橋衛在鎮遠一府兩縣之間查施秉縣民  
糧稀少應將偏橋衛撤併施秉縣仍屬鎮遠府管轄撤  
去守備一員至施秉縣原未設學裁去衛教授一員改  
設縣訓導一員舊衛地方應設偏橋驛丞一員管理  
大定府志 卷五十一 三

驛務興隆衛地錯黃平應將興隆衛裁併黃平州移州  
於衛治管理驛站仍屬平越府管轄裁去守備一員經  
歷一員其原設興偏營改為黃施營營制照舊至黃平  
州學原兼餘慶甕安二縣學今州治既移興隆裁去教  
授一員以州學正移駐衛治於甕安縣另設訓導一員  
兼攝餘慶縣學務新添衛附近貴定縣田賦無多應將  
新添衛裁併貴定縣移縣於衛治管理驛站仍屬貴陽  
府管轄裁去守備千總經歷各一員查貴定縣原與龍  
里縣合學今裁去衛教授一員改設縣訓導一員貴州  
貴前二衛同附會城應裁改為一縣恐兩縣地方差徭

不均將附近新貴縣量行割附應名貴筑縣亦屬貴陽府管轄至兩衛原未設學應無庸議裁去守備千總各二員經歷一員改設知縣典史各一員此貴東各衛之當裁併改設者也如鎮西威清二衛兩地相接應共設一縣而以赫聲威武二所附之縣治駐於威清管理驛站應名為清鎮縣裁去守備千總經歷守禦所千總各二員改設知縣典史各一員查鎮西衛原附安順府學今二衛改設一縣裁去威清教授一員改設縣訓導一員平壩衛路當孔道管理驛站應改設一縣即名安平縣以附近之柔遠所附之裁去守備千總經歷守禦所

大定府志

卷五十一

四

千總各一員改設知縣典史各一員裁去教授一員改設訓導一員安南衛亦在大道管理驛站應改為一縣即名安南縣裁去守備千總各一員改設知縣典史各一員裁去教授一員改設訓導一員其附近普定縣之定南所裁併普定縣附近南籠廳之安籠所併南籠廳管轄裁去守衛所千總二員至普安州同城之普安衛應裁併歸州裁去守備千總經歷各一員仍俱屬安順府管轄但普安設有兩站州官僅可管理在城驛務吏目又有佐理巡逋之責其亦資孔一驛應設驛丞一員管理此貴西衛所之當裁併改設者也又會城西北之

敷勇衛應改設一縣而以修文濯靈息烽于襄四所附之即名修文縣仍駐衛治亦屬貴陽府管轄裁去守備經思各一員守禦所千總四員改設知縣典史各一員裁去衛教授一員改設訓導一員又永寧衛係川黔襟喉要地應改為一縣而以普市所附之即名永寧縣裁去守備經思守禦所千總各一員改設知縣典史各一員裁去教授一員改設訓導一員畢節衛無州縣可歸亦應改為一縣而以赤水衛附之即名畢節縣裁去守備二員經歷二員千總一員改設知縣典史各一員裁去教授二員改設訓導一員二縣俱屬大定府管轄至

威寧府同城之烏撒衛應裁衛歸府裁去守備千總各一員及衛教授一員併歸府教授此西北衛所之當裁併改設者也再查衛所既裁都司一官無所事事亦應裁去武闡事務即令藩司料理操捕都司一員亦應裁去製辦火藥應照他省例責令城守營管理其都司經歷併應裁去以上共應裁去都司一員操捕都司一員都司經歷一員衛守備一十五員衛千總一十員守禦所千總一十員衛經歷十一員衛教授十一員俱各咨部改補共應改設知縣七員典史七員訓導七員驛丞二員應請內部照缺銓補再查各府有稱軍民者今既

概編為氏則軍氏字樣亦應裁去等因前來臣覆加籌酌似宜裁併改設以昭畫一以垂經久通計議裁各官共六十員議設官共二十三員稍減經費以紓物力或亦省官省事之一助也至有各衛所田土人民跨入他境應查坐落附近州縣酌量歸併及新設之縣幅員太廣應查近鄰州縣糧額多寡酌量割附容臣行令該司逐一查明分晰另冊報部外臣謹會題

### 裁改協鎮疏

黔省山菁深險苗夷雜處通省額兵止有二萬名當年封疆諸大臣於邊防門戶輕重緩急分布設兵所以久

### 大定府志

卷五十一

六

而相安也但前任提督臣馬某議將大定裁鎮改協平遠裁協改營以大定平遠為內地耳臣自蒞任以來細訪威大黔平四州府夷獠種多狡悍善鬪至我

朝翦孽開疆勞心費力初設四鎮彈壓之始畏威而不敢

叛後裁兩鎮改二協猶慮桀驁思逞幸我

皇上威德遠屆各鎮協殫心密訪故其慶救寧之福也今若大定裁鎮平遠裁協豈不使兩軍喪氣而控制羅夷之權愈輕各裁數百官兵並子弟親戚皆隨裁兵以去則城汛空虛狡夷必致生心倘偶焉告警一時或有救援不及之虞况水西地方素為跳梁之藪所賴大威平黔四

鎮協環佈其間初無輕重寬隘之分何事生裁改添設之擾且營制既久而相安焉知不因更張而滋事似不若仍舊之為愈也在臣之鄙議似應仍照舊制無事裁改增益祇嚴飭汛防以固封疆可耳康熙三十九年十月初九日題十二月奉

旨依議

于準

苗民久入版圖請開上進之途疏  
為苗民久入版圖苗族宜沾

聖化請開上進之途以宏文教以變苗俗事竊惟貴州地方

大定府志

卷五十一

七

古號羅施遍處皆苗種類頗繁要皆好鬪嗜殺越先王禮義之教尚強凌眾暴之風輿稽往古沿置不一分隸各省不過羈縻而已迨至明代始設布按二司定為貴州省然亦郡縣少而衛所多武弁不能宣化惟在示威以故迄數百年習俗仍未變化自我

聖朝平水西改衛所設立郡縣建置學校

聖教覃敷遐荒天末莫不仰沾德化惟獨苗民未沐甄陶伏

念六合蒼生盡屬赤子何分苗漢豈有已入版圖之苗

民而忍令棄之化外耶官斯土者視苗如草芥居斯地

者擯苗為異類既不鼓舞又無教習即間有一二苗民

志切上進又以土人無用流官之例不準考試科舉遂使若輩沉淪黑海罔見天日然教化無不可施之地風俗無不可移之鄉今貴州苗民輸糧貢賦與漢民連井而居彼此交易原非不通聲教之野苗可比臣愚以為應將土司族屬人等並選苗民之俊秀者使之入學肄業一體科舉一體廩貢以觀上國威儀俾其漸摩禮教薰陶性情變化其醜類彰我

朝一統車書之盛則此進取之法必須酌定規制令各府州縣置立寬廠公所一處以為義學將土司承襲子弟送學肄業習曉禮義以俟襲替其餘族屬人等並苗民

大定府志

卷五十一

八

之俊秀子弟願入學者令入義學肄業其教習塾師不必另設卽令各府州縣復設訓導躬親教諭俟有文理明通者照依湖廣學臣潘宗洛所題不論土司族屬苗民卽由該訓導造冊呈送學臣考試漢民生童不許阻抑卷面不許分別苗漢取進之額亦不必加增惟以衡文為去取一體科舉一體廩貢將見漢民因有苗民之進取益加奮勵苗民以有一體科舉之優渥莫不鼓舞行之既久苗民漸可變而為漢苗俗漸可化而為淳邊未遐荒之地盡變為中原文物之邦矣倘果人文蔚起鄉試歲試再請增額以羅真才至於教職一官原以專



司訓迪今復設訓導旣膺義學之任如能教導有方使  
苗民文理優通克副賓興之選者臣等查明實跡卓薦  
獎勵倘有怠惰廢弛漫無啟發者卽行褫革以示勸懲  
至查土人無用流官之例不知起自何年臣嘗考貴州  
通志漢唐宋元明以土人用為流官者頗不乏人而且  
循良著跡忠貞足紀炳炳志乘媲美中州由此觀之何  
地無才何才不可用而斤斤以方域限之甚非天地生  
才之意也况以土人而用為流官身入中原禮義之鄉  
目擊中原文物之盛觀感興起唱予和汝行見碩廉懦  
立鄙寬薄敦又豈僅變苗為漢民哉臣謂土人不用流  
官之例似宜更正以昭我

大定府志

卷五十一

九

皇上立賢無方之大公以宏我

皇上覆載無私之深仁者也再查貴州土官世系悉皆楚豫秦

晉之人時因有功分封襲職世守其地並非本地之土

苗也其子孫族屬原係漢人自應仍照漢人之例一體

考試舉貢俾圖上進案查康熙三十六年間禮部議覆

前撫閣興邦題為謹遵

詔旨等事一案將黎平府學文武生員吳遇詔等七十一名以  
為旣係土司族屬卽係土司不準考試等因臣復何敢  
再為瀆請惟是粵西土官土目弟男子姪撥學與試得

領鄉薦土官如有過禁與試者定有處分現在遵行是  
貴州與粵西同一土官土目同一弟男子姪在粵西得  
領鄉薦仕進在貴州獨行擯斥化外不許考試阻其仕  
進錮其終身實堪憫惻臣遂逢

盛世恭遇

明君不揣冒昧仰請

聖恩將貴州各府土官土目弟男子姪及吳遇詔等七十一名  
文武生員一并準照粵西之例與漢人一體考試科舉  
庶仕進有階而不致向隅之泣則天末邊氓感戴

聖恩於生生世世矣

大定府志

卷十一

十

闕名氏

錄  
吏部原文

增設仁懷廳照磨請移大定司獄疏

吏部奏請為要地需買佐理酌請改設仰祈

聖鑒事文選司案呈內閣抄出原任貴州巡撫周某等奏前事  
等因乾隆二十六年十二月十一日奉

硃批該部議奏欽此會議得原任貴州巡撫周某等奏稱設官  
分職固有定額常經而因地制宜亦應隨時酌辦臣查  
遵義府通判分駐仁懷舊城緊接四川險要該地最近  
之仁懷縣城亦相隔三百八十里其餘府州縣五六百

里城內僅止通判一員管轄地方違濶既有錢糧商稅考成又有命盜詞訟案件如遇公出城池倉庫監獄乏員防守倘有人命相驗必須遠赴別邑報請代驗羊腸鳥道往來兼旬殊多不便據司道議稱遵義府通判遠駐仁懷地險孤懸自應添設照磨一員防範稽查始為周密查有大定府司獄一員獄務簡少該府經歷同城可以兼管請將司獄裁汰改設遵義府照磨一員與通判同駐仁懷稽查逃盜奸匪遇有命案通判公出卽令該照磨驗立傷單一函牒請仁懷縣代赴覆驗詳報以昭詳慎其裁汰司獄俸工養廉卽改給照磨支領惟大

大定府志

卷三十一

十一

定府司獄僅有皂隸二名照磨應添設門子一名馬夫一名所需工食查仁懷縣額設民壯十六名可以抽減二名改為門子馬夫工食俱無庸另議增添衙署一項飭令確估建造除行大定府查明司獄舊署可否變價若干抵用外如有不敷於本省從前裁空衙署變價項下湊支報銷其司獄照磨雖品級相等陞階各別未便以現裁司獄改駐應請將新設照磨於現在試用人員內揀選品級相當之員咨署嗣後缺出歸部銓選所有裁汰之大定府現在司獄曾力德留黔遇有相當之缺出咨補其大定府經歷兼管司獄印信另行咨部鑄給

經歷司獄印照例繳銷新設照磨毋庸鑄給印信等因  
前來查該撫等既稱遵義府通判遠駐仁懷地險孤懸  
自應添設照磨一員防範稽查始為周密查大定司獄  
一員獄務簡少該府經歷同城可以兼管請將司獄裁  
汰改設遵義府照磨一員與通判同駐仁懷稽查逃盜  
奸匪遇有命案通判公出即令該照磨驗立傷單一函  
牒請仁懷縣代赴覆驗詳報以昭詳慎其裁汰司獄俸  
工養廉卽改給照磨支領惟大定府司獄僅有皂隸二  
名照磨應添設門子一名馬夫一名所需工食查仁懷  
縣額設民壯十六名可以抽減二名改為照磨門子馬  
大定府志 卷五十一 十三

夫工食俱毋庸另議增添衙署一項飭令確估建造除  
行大定府查明司獄舊署可否變價若干抵用外如有  
不敷於本省從前裁空衙署變價項下湊支報銷其司  
獄照磨雖品級相等陞階各別未便以現裁司獄改駐  
應請將新設照磨於現在試用人員內揀選品級相當  
之員咨署嗣後缺出歸部銓選所有裁汰之大定府現  
任司獄曾力德留黔遇有相當缺咨補其大定府經歷  
兼管司獄印信另行咨部鑄給經歷司獄舊印照例繳  
銷新設照磨毋庸鑄給印信等語應如該撫等所請大  
定府司獄準其裁汰改設遵義府照磨一員與通判同

駐仁懷稽查逃盜奸匪如遇呈報命案該通判公出卽令該照磨一面驗立傷單一面牒請仁懷縣代赴覆驗詳報裁汰司獄俸工養廉準其改給照磨支領其應添設門子一名馬夫一名之處查黔省節年俸工奏銷冊造府照磨設門子一名皂隸二名馬夫一名府司獄設皂隸二名年給工食在案今該撫旣以仁懷縣額設民壯十六名可以抽減二名改為照磨門子馬夫工食毋庸另議增添均應如所請辦理照磨衙署準其確估建造司獄舊署準其變價抵用仍令該撫將所建照磨衙署應需工料銀兩并司獄舊署變價若干之處速急估

大定府志

卷五十一

十三

計造冊送部查核新設遵義府照磨準其於現在試用人員內揀選合例之員咨部署理嗣後缺出歸部銓選大定府司獄事務準其歸大定府經歷兼管其鑄給印信之處俟

命下之日行令該撫等擬定字樣造冊送部臣部移咨禮部照例鑄給頒發其舊頒印俟新印頒發到日咨送禮部銷燬至新設照磨毋庸鑄給印信大定府裁汰司獄曾力德亦應如該撫等所請準其留於黔省遇有相當缺出另行咨部補用等因乾隆二十七年三月十五日奉

賀長齡 字耦耕湖南善化縣人前任貴州巡撫

請議敘官民捐建大定義倉疏

為官民捐建義倉儲積穀石循例恭懇

聖恩俯準議敘事竊臣前於

奏報黔省添設義倉酌議章程摺內聲明大定府報捐穀

二萬餘石俟全數收貯續行奏

聞在案茲據大定府知府姚東之申報該府與前署府張

志詠徐鏐各捐廉銀五百兩共銀一千五百兩擇於府

城及各鄉適中之處建倉十一座共計四十三間貴西

道周廷授捐穀五百石民人汪大景等捐穀六千六百

大定府志

卷五十一

十四

七十六石零監生沙宗湖等捐義一萬四千三百四十

二石共穀二萬一千五百一十八石零已全數交倉收

貯開列捐戶姓名穀數造具廠口花名並印結倉收由

司道議詳請

奏前來臣查定例紳民人等捐輸穀石每石以銀一兩計

算十兩以上者地方官獎以花紅匾額一百兩以上者

督撫獎以匾額二百兩一千兩以上分別議敘等語今

大定府官民捐建義倉分貯穀石以備不時賑糶之需

洵屬急公可嘉自應

奏請獎勵用昭激勸除捐穀合銀不及一百兩者由地方

官獎以花紅匾額外其所捐穀石計銀在數千兩及數百兩之文武生員監生土目民人等二十七名仰懇天恩交部分別議敘至貴西道周廷授前署大定府事之都勻府知府張志詠郎忝同知徐鏞並現任大定府知府姚東之捐數皆及五百兩可否一並交部議敘以示鼓勵之處出自

逾格鴻慈再此項工程係地方官捐辦請免造冊報銷理合會同督臣桂良恭摺具

奏並繕呈捐輸姓名穀數清單伏乞

皇上聖鑒謹

大定府志

卷五十一

十五

奏

覆奏漢奸盤剝苗民疏

為遵

旨查禁漢奸盤剝苗民及銜靈索詐訟棍教唆等弊並就原奏所未及推廣查辦以杜滋擾而靖邊疆恭摺奏祈

聖鑒事道光十八年十二月初七日承準軍機大臣字寄奉上諭有人奏滇黔兩省外來客民流民盤剝苗人土司田產請飭查禁等語川楚粵各省窮苦之民前赴滇黔租種苗人田地與之貿易誘以酒食衣飾俾入不敷出乃重利借與銀兩將由典質繼而加價作抵苗人所與佃

種之地悉歸客民流民至土司遇有互爭案件客民為之包攬詞訟借貸銀兩皆以田土抵債種種情弊如果屬實不可不嚴行查禁著伊里布顏伯燾賀長齡即將摺內所指各情節悉心體訪嚴飭各地方官隨時查察認真禁止除客民流民已經置買田產不計外儻有狡黠客民人等侵占苗人地土及擅買土司田產即將田地斷還本人管業追償入官仍照例治罪至田土案件如有漢人霸佔苗業及夷苗誣控平民務當公平聽斷治以應得之罪毋得任聽胥役詐索客民唆訟以杜侵越而靖邊陲原摺著鈔給閱看將此各諭令知之欽此

大定府志

卷五十一

十六

遵

旨寄信前來臣等細繹原奏之意蓋以前撫臣嵩溥籌辦苗疆保甲將客民一體編查外來流民漸少又以苗俗本儉因佃種苗地之客民誘以紛華漸致入不敷出盤剝準折苗產漸歸客民其尤甚者土司與漢民每有田土互爭之案輒被胥役勒索客民從而包攬教唆借貸銀兩動以田土抵償應示以限制方可保全苗業預弭爭端臣等伏查前撫臣嵩溥查苗疆保甲之後所有續增流民置苗產以及棚戶佔墾盤剝準折等弊經已

奏明飭禁至今遵辦但須實力奉行不必更設科條徒繁案



牘惟查原奏流民漸少之說自今觀之蓋未嘗少其勢亦難強行禁止即所稱苗民習染紛華生計漸感亦不盡由客民之誘煽奚以明其然也人情莫不重去其鄉計無復之乃相率而轉徙方宜導以生路豈可轉行遏絕黔省固多客民興義府尤其淵藪自嘉慶年間平定苗匪之後地曠人稀每有黔省下游及四川湖廣客民攜眷而來租墾荒山俱係極貧之戶終歲竭蹶僅足餬口其力不能盤剝苗人且山土瘠薄墾種三二年後雨水冲刷倍形硤确仍復遷徙他往又他省客民往來滇粵兩省每由興義經過中途資斧匱乏留滯鄉場城市大定府志

者亦復不少前撫臣嵩溥摺內已詳陳之自臣長齡到黔以來興義各屬已無不墾之山而四川客民及本省遵義思南等處之人仍多搬往終歲絡繹不絕亦嘗出示飭屬嚴禁而不能止細求其故則以四川遵義人稠地貴而興義地賤也思南地利太薄興義雖瘠猶甚思南也然地多烟瘴新徙之民不服水土輒多死亡故雖地不加廣來者日多曾無人滿之患此種情形實堪憫惻而原奏乃謂客民獲利甚豐半皆廣田畝而峻牆宇毋乃偶見一二遂以概之千百若使目擊流民之苦必不忍為是言也黔不產鹽布疋又貴類皆挹注於他省

苗民錯居巖洞所饒者雜糧材木耳非得客民與之交  
易則鹽布無所資即雜糧材木亦無由錯售分餘利以  
供日用是客民未嘗不有益於苗且苗民務耕作而不  
知貿易客民耐勞而儉用多就穀賤之地以為家是亦  
未嘗不兩有益若謂紛華靡麗皆由客民導之以至窮  
乏則漢人中悉稱富戶今為貧民者正復不少又將誰  
咎盈虛消息物理之常即無客民固不能保苗民之常  
富也訪聞黎平之苗率多富實固資山木之利亦由善  
自經營豈無客民往來何以不能盤剝然則苗民貧富  
之無常猶之漢人耳臣等更即原奏所未及細察漢苗  
大定府志

卷五十一

十八

之情形尚有數條敢陳

聖鑒一則苗民實為漢民害也黔本荒服皆獍獠狉狍之所

居自元置宣慰使都元帥府始有貴州之名官職既建

乃有漢人經今五百餘年仍是苗多於漢查黔省上游

裸苗為多下游青苗狝苗為多苗民固近淳樸而狝苗

則兇悍難馴係五代時馬殷自邕管遷來其種有三一

曰補籠一曰卡尤一曰青狝貴陽定番廣順皆青狝安

順鎮寧則補籠卡尤也其俗以偷盜劫掠為事不但客

民不能盤剝即土著漢民猶畏之他如台拱清江黃平

等處之苗亦多沿路行劫滋擾客民控制彈壓均非易

易一則苗民自為害也漢苗固多爭控即苗與苗或因口角或因爭佃亦復互控不休甚至苗唆苗以控苗且勾串漢匪以控苗顛倒簸弄從中分肥刁詐殆難言狀一則土目土司之為苗民害也黔省上游多土目下游多土司土司係江西湖廣山陝江南等處之人土目則係從前土著及由滇蜀撥入之人苗人佃種土目土司之田歲上牛羊豬雞以為年例年租其土目土司之強而暴者輒虐使其苗又於年例年租之外多方科派苦累殊甚一則苗民之為土目土司害也緣苗民亦多狡狡或將佃種之田當與漢人土目土司所管地面甚寬

大定府志

卷五十一

十九

無由察知久且轉相盜當輒致迷失又歷年苗民應上條銀皆由土司交地方官轉解藩庫近則以土司浮收紛紛控省求改歸地方官徵收及準理飭辦苗民又相率抗糧地方官傳案不到仍責成土司土司不得不為之代墊若欲催科歸款則又以事歸地方該土司需索不遂藉端重徵具控其譎張為幻不必盡由漢奸亦有苗民無異於漢人而不相害者

國家聲教四訖椎結侏僂漸移舊俗其中殷實之戶亦多勤事詩書况苗學屢經添設擬科出仕正不乏人衣冠之族聯門閭而重婚姻此等即不當仍以苗民視之更

有苗民絕異於漢人而不能相害者熟苗之外另有生苗多在深山窮谷之中性情嗜好飲食居處皆與人殊漢民既不能入生苗亦復稀出雖有狡黠客民無所施其伎倆以上各情皆原奏所未及臣等惟恪遵

諭旨通飭各屬悉心訪查懲盤剝之習警包攬之風杜侵占之漸加以懇勤告誡使之歸真反樸不務奢華冀以鋤漢奸而蘇苗困而又將苗民之兇悍劫掠者嚴行究辦其誣控平民之案照例治罪則苗民之為漢人害者亦去苗民互控勾串唆使詭詐百端若能迅速聽斷不令胥役客民得售其奸則苗民之自為害者亦去土司無大定府志

卷五十一

二十

違例科派之事苗民無藉端挾制之心則土司與苗民之互相為害者亦去至於詩禮之家苗民亦同於漢生苗一種原不與漢人為緣固無庸議反者也又原奏內所稱胥役詐索刁徒唆訟各情形此二弊實生民之大蠹不獨有害苗民臣長齡到黔以後查辦衙蠹一百一十四名業經具奏在案又查辦教唆詞訟匪徒二十八名兇惡棍徒一百六十二名鎖繫鐵桿五百五十九名均經達部有案誠以黔省處在苗疆若非隨時隨事嚴示懲創何以除暴安良年來查看情形宵小尚為斂跡漢苗亦各相安復以各屬控案細加批對較之從前已

減十之四五惟是黔省山多田少民苗耕作已形不足  
又有遞年尋常軍流人犯現已積至一千七百三十餘  
名新疆改發人犯又積至一千二百四十餘名此等人  
犯或挈眷偕來或遇

赦願畱生齒日繁皆與客民無異雖向例各犯止準居住城  
內不許私住各鄉而生計維艱亦不便概行禁約稽查  
防範耳目恒苦難周臣等仍按照前撫臣嵩溥

奏定章程不敢稍涉鬆懈亦不敢過事拘泥惟有諄飭各  
屬實心實力設法查辦以仰副

聖主綏靖苗疆預弭爭端之至意所有遵

大定府志

卷五十一

三十一

旨飭禁並推廣查辦各緣由理合會摺縷陳伏祈

皇上聖鑒訓示謹

奏

喬用遷

字見齋湖北孝感縣人現任貴州巡撫

請議敘官民捐修平遠州書院祠宇疏

奏為官民捐修書院祠宇並捐田收租積儲義倉穀石循

例懇

恩俯準議敘事竊照平遠州書院年久傾頽州屬向未設立  
節孝祠均須修建以育人材而彰潛德舊有志書闕畧  
不詳亦宜重修以資考證應試文武生童類皆寒畯每

以艱於資斧裹足不前該州徐豐玉捐廉首倡勸諭士  
民踴躍捐輸共銀一萬七千五百四十九兩率同吏目  
馬文煥督理監修並派紳士李國勳等庀材鳩工謀厚  
光等採訪重輯將書院節孝祠落成志書修竣餘銀買  
田收租生息以為書院束修膏火歲修經費及文武鄉  
試賓興並津貼新進文武童生試資又松桃廳民邱裕  
賦將受分水田四坵計價以錢合銀五百兩捐輸石峴  
衛歲收租穀二十四石歸入義倉積儲遇穀貴時酌借  
以裕軍食秋成免息還倉該民續捐穀一十六石作為  
添修義倉之費造具捐數姓名冊結由司道議詳前來  
大定府志

卷五十一

十一

除士民捐數無多由臣督飭該州獎以花紅匾額外其  
捐數較多之民人邱裕賦童生謀厚繼等三十九名均  
與甄敘之例相符仰懇

大恩交部分別議敘以示獎勵至平遠州知州徐豐玉倡捐  
廉銀二百兩復勸捐督辦經理有方平遠州吏目馬文  
煥監修出力始終其事前任山西大同府知府謀厚光  
捐銀四百兩安南縣教諭黃永祺捐銀三百兩雲南易  
門縣知縣謀厚澤捐銀二百兩現任貴陽府訓導黃樂  
彬鎮遠府訓導丁世芬各捐銀一百五十兩可否一併  
交部議敘收租積儲義倉穀石並免造冊報銷出自

聖主鴻慈除冊結送印並將捐數姓名及募捐監工出力紳士咨部覈議外理合會同督臣林則徐恭摺具奏伏乞皇上聖鑒謹

奏

羅繞典 字蘇溪湖南安化縣人署貴州巡撫

奏為黔省礦務遵

旨開採漸有成效酌定章程奏祈

聖鑒事竊臣接準戶部咨開道光二十八年十一月十五日

奉

上諭開礦之舉以天地自然之利還之天下仍是藏富於民

大定府志 卷五十一

三三

如果地方官辦理得宜何至藉口於人衆易聚難散因噎而廢食者四川雲貴兩廣江西各督撫於所屬境內確切查勘廣為曉諭如有苗旺之區酌量開採斷不準畏難苟安托詞觀望如果不便於民或開採之後弊多利少亦準奏明停止至於官辦民辦商辦其應如何統轄彈治稽查之處各就地方情形熟商妥議定立章程具奏等因欽此仰見我

皇上經國裕民籌議萬全臣等曷勝欽佩伏查黔省向來水銀硃礦各廠計就廠抽課近來每歲不過二千餘金其銅鉛額課向歸另案核計自道光二十四年奉

旨密飭開採礦廠臣於藩司任內謹就廠務實在情形詳經  
前撫臣覆奏奉到

硃批不可一奏了事欽此欽遵數年以來通飭官民遍加躡  
訪據定番州報獲金鼇山水銀礦砂貴筑縣報獲白馬  
硃水銀礦砂節經咨部在案上年七月又據貴西道福  
連報有柞子廠附近清水站地方躡獲黑鉛子廠礦苗  
豐厚於黑鉛中煎提出銀脛色尚佳當經批飭按月抽  
課去後隨據署貴西道祝祐報解自上年七月起至本  
年正月止計半年中抽收清水站銀課已有一千二百  
五十餘兩若試採一年應可抽課二千五百餘兩並據  
大定府志

卷五十一

十四

貴筑縣報解白馬硃水銀課價一千餘兩定番州報解  
水銀課價三百一十兩統計每年約抽新課已增添銀  
三千八百餘兩外有永寧婺川等州縣初經躡獲水銀  
礦地畧俟抽課另行報部是增課雖止數處而廠丁及  
地主人等皆得仰蒙

聖恩分沾其利裨益無窮茲奉

諭旨諄諄臣惟有與署兩司等益加勸諭飭屬廣為採訪無

論採獲何項礦苗務須核實辦理不准畏難苟安如以  
後衰旺無常或溢流弊仍可隨時查看奏明停止至廠  
戶砂丁自當嚴明禁約現飭地方官常川查察酌定廠



規以十人或二十人為一班責成班長管束設立號簿  
開明姓名年貌並取具不敢窩匪甘結稽查彈治以重  
廠務而靖地方務求仰副

聖主藏富於民至意並據署兩司具詳請

奏前來所有遵

旨開礦漸有成效酌定章程緣由理合會同督臣林則徐恭

摺具奏伏乞

皇上聖鑒謹

奏

大定府志 卷五十一

廿五

大定府志卷之五十一終

知大定府事鄱陽王允浩原本

知大定府事河曲黃宅中重輯

條教第三 文徵二

張志詠

勸立義倉教

爲勸建義倉安貧保富事照得積貯爲生民之大命而制之最善者常平倉之外有社倉義倉凡當春籽種及歲歉賑濟皆取給於其中積豐歲之有餘補荒年之不足此誠藏富於民之善治也本府權篆斯郡半載於茲

大定府志

卷五

一

周歷四鄉親見民間瘠苦體無完幅戶鮮蓋藏上年幸值豐收尙且如此倘遇歲歉豈可問乎卽如道光十四年窮民饑乏草根樹皮掘剝殆盡甚至賣男鬻女流離四方猶不足以自贍而父子兄弟羸老孤幼枕藉而死者尤不可勝計見之者悻目聞之者悚心當斯時也貧者固多失所富者亦難自存本府念切民依恒思爲齊民籌備荒之計非建設義倉不爲功爲此示仰閭郡紳士商賈軍民人等知悉各里有力之家於人烟稠密形勢高阜之處建造義倉捐穀積貯以本里之蓄濟本里之饑當此年豐人樂之時各出羨餘量力捐助衆擎易

舉有備無虞庶幾貧富相安豐歉有恃仍俟捐有成數  
申詳奏請議敘各宜誼敦桑梓踴躍輸將毋負本府諄  
切勸勉之意幸甚幸甚

姚柬之

義學教

爲曉諭事照得本府新修義倉倉房添建補助亭一所  
本爲盤倉之需兼爲春秋暇日此亭無事與其寓人於  
室毀傷薪木不如聚童於學誦詩讀書茲本府捐廉於  
該處設立義學考取生員某某等教讀定於本月十二  
日開館爾該民等有願送子弟入義學習誦者屆期各  
大定府志 卷五十一 二

黃宅中

校刊聖域述聞成書發所屬州縣檄

爲札飭遵行事恭查乾隆六年禮部議覆順天學政錢  
陳羣奏行令各督撫轉飭地方官將各學官從祀諸賢  
諸儒神牌位次遵照大學成式書寫字樣東西先後序  
次安設庶足以光祀典而昭誠恪等因是從祀先賢先

儒位次禮應敬謹安奉毋令失序典至重也茲本府刊刻聖域述聞一書先後位次一遵大學成式札發該學收存備案遵照查明東西兩廡位次安奉神牌以昭誠敬至此書所載聖賢事蹟博採古書凡記載未純正者概未採錄漢唐以下一以正史爲據並於各傳增入從祀年代以備查考其不見正史者如隋文中子宋周張之父元儒陳澔明儒孫奇逢雖及他說亦不泛徵本朝湯陸二儒敬錄

國史本傳名曰述聞蓋不敢一字妄作此其編輯之體例也夫希賢入聖之方明體達用之學莫備於聖門諸賢

大定府志

卷五

三

莫粹於從祀諸儒歷代禮臣詳議而精擇之至我

朝爲大備師儒之官庠序之士於俎豆馨香之地切儀型則効之思既尚論而讀其書復拜瞻而崇其敬非惟遵奉前哲鉅典修明抑且烝進士髦聞風興起也爲此札仰該學知之道光二十九年正月二十日特札所屬州

縣學

勸民種樹教

爲勸栽樹木以利民生事照得本府兩年以來節次出示勸民多種青桐椴樹仿行遵義放蠶之法以爲瘠土救民之資事雖若迂心則甚切又念大定一郡土宜所

植如松柏杉漆桃李杏梨桂竹槐椿楓楠楊柳桑榆桐  
榭以及柑橘石榴枇杷核桃花紅冬青黃楊白果香樟  
諸木山邊屋角種植易生結果成林足資民用且種穀  
之利十倍而種樹之利百倍各圖生計人人皆知固無  
煩官爲勸導也第念種樹非難長成不易或爲人所翦  
伐或被物所踐傷恐其枉費人功以致地多曠土當茲  
春氣發生之始將屆雨水栽種之時勸諭六里居民切  
宜隨時樹藝爲此示仰各村鄉老各寨土目互相傳諭  
因地蒔栽隣里鄉黨守望相助如有牛羊踐履樵牧損  
傷甚或乘隙偷伐越界強砍者輕則公同禁約重則稟  
大定府志 卷五 四  
官究懲務期廣爲種植嘉卉成林勿負長官敦勸之心  
實爲閭閻久長之計刊爲印紙徧諭遵行特示

諭民三十條

一青桐樹放蠶之利遵義人行之有效大定連界亦可  
仿行本府前經出示勸栽且有輕罪拘押之人其家種  
樹多株者卽予開釋近聞義漸里土目安國泰栽種橡  
樹數萬餘株賞給銀牌以示獎勵至平遠一帶鄉村婦  
女紡織頗多各處俱能仿效則紡織之利興生民之計  
裕有力之家尤當創率也 一大定山高地瘠缺少流  
泉農人種植仰賴天雨宜於田旁修理塘坎蓄水備旱

灌漑有資水車水輪取水之法亦宜仿而行之 一鄉  
儆貧寒之家守節婦女無力上達者許該族鄰等具呈  
取結彙報請 旌 一人家役使婢女聞有老而無

配者彼亦父母所生可不憫其怨曠勸爾蓄養婢僕之  
家凡年至二十以上者宜量爲完配既役其力宜恤其  
身孰無兒女推此念以及勞獨天道好還必有善報昔  
漢任延爲九真太守駱越之民無嫁娶禮法各圖淫好  
無適對匹不識父母之性夫婦之道延使民皆以年齒  
相配其產子者始知種姓和氣感召風雨順節穀稼豐  
衍轉移風化守土之責願士民其體此心耳 一鄉民

大定府志

卷五

五

婚配年齒必須相當往往以少男娶長女致令不安於  
室私逃姦刃之案因此而起嗣後男女定婚責成媒人  
必要年歲大小相當書庚帖不許以夷俗雞骨爲憑

一陳氏雙孝子兄弟繼美載入郡志本府以教化爲先  
表其門閭以勸善也如窮鄉僻壤之人有宗族稱孝鄉  
黨稱弟者隨時查實一體表揚至山中愚民尤須使知  
孝弟二字方不敢爲非犯法 一窩賭吸烟棍徒勾引  
壞人子弟破人家財大爲地方之害除飭差嚴拿治罪  
外該鄉族約保人等誠諭稽查如不改悔指名稟解究  
辦 一稞夷習俗貪懶好酒一至醉鄉生波惹事彼此

相爭恃其酒性執械鬪殺每多釀命案此等惡習切宜痛改各保生命各寨土目互相勸誡 一詞訟之煩多由唆訟者從中播弄諭爾執筆寫呈之人如實有冤抑據情直敘本府必爲伸理斷不可添捏情節株連好人不獨審虛治罪且慣習刀筆陰險害人有隱惡者每受奇禍縱法網幸逃報應不爽若能勸息一訟卽是積一陰功願爾等思之 一漢夷民苗每因命案倚恃屍家始而糾集男婦多人坐索搔擾繼而搶擄家資牲畜此種惡俗實爲地方大害嗣後如有藉命案搶擄等事除命案分別真假訊辦外定將搶擄之人照律計贓究辦

大定府志

卷五

六

決不姑貸 一訪聞各鄉姦黠之徒或會充鄉約或藉稱差役挑唆愚民興訟有兩造願息而中間人要索背手錢播弄生事者所有訪出姓名俱已存記一俟犯案重懲不貸 一本府嚴懲誣告命案圖賴之風雖漸斂息而擡拷坐騙磕索敲釘錘等弊尙復不免嗣後切宜誠止痛改若有再犯必盡法懲治以挽澆風 一土目爭繼爭產多釀命案因財產而爭訟因爭訟而仇讎多係把事從中主持釀成大禍嗣後如有此等案件必究主唆之人從重治罪 一各里苗民頗稱淳良惟夷種

六額子羨民等素好滋事逞忿爭訟遇有雀角事件不

投約甲理處不聽鄉鄰勸息任意架謊朦控一經提訊全屬子虛嗣後爾等如有真正冤抑之事應告官伸理者卽將實情赴代書處作詞呈遞敢任情誣控嚴懲不貸一舞弄刀筆之徒多因習讀未成稍識字義不務正業包訟爲生或作歇家保戶遇有民間爭訟預爲探聽插入其中希圖漁利勾引至家多方唆弄愚民無知受其蠱惑或代作呈詞任意架捏更有房科學習借充清書爲名在外招搖包攬混寫紅白呈詞指引攔輿投遞現已查出數人嚴刑懲治嗣後爾等愚民切勿妄聽播弄致干究懲一夷民惡俗有焚骸火葬之事屢經大定府志 卷五 七

前府出示嚴禁如敢再犯從重治罪 一愚民治病有打通杆之說人有疾病延請端公用細藤條又入咽喉每致損傷人命糊塗妄爲殊堪憫笑又有用熬藥迷人者現在密訪慣做此事之人一經查實嚴拿治罪爾等愚民切勿被其所惑 一城鄉趕場交易往往使用假銀欺騙愚民又行戶作弊戥秤大小不一或以大戥稱入小戥稱出買賣時因此吵鬧易滋訟端諭爾行戶場頭互相稽查如有此弊隱匿不稟查出並究 一各鄉合庄禁止私宰耕牛此乃除盜之根其法甚善然或倒斃者亦不許藉端勒索致滋事端 一橋梁道路各里



附近地方隨時修理 以上各條本府不以法教先以言教讀書識字者轉相勸誡俾知去非向善人孰無良必有感動言若不聽法必難容凜遵毋違特示

書第四

王守仁

謝安宣慰書

某得罪朝廷而來惟竄伏陰巖幽谷中以禦魍魎則其分所宜故雖夙聞使君高誼經旬月不敢見若似簡抗者然省愆內訟痛自刻責不敢比數於冠裳則亦逐臣之禮也使君不以爲過使廩人饋粟庖人饋肉圉人代大定府志 卷五 八

薪水之勞自惟罪人何可以辱守土之大夫懼不敢當輒以禮辭使君復不以爲罪昨者又重以金帛副以鞍馬禮益隆情益至某益用震悚是重使君之辱而甚逐臣之罪也愈不敢當矣使者堅不可卻求其說而不得無已其周之乎周之亦可受也敬受米二石柴炭鷄鵝悉愛如來數其金帛鞍馬使君所以交於卿士大夫者施之逐臣殊駭觀聽敢固以辭伏惟使君處人以禮恕物以情不至再辱可矣

貽安貴榮書

減驛事非罪人所敢與聞承使君厚愛因使者至偶問

及之不謂其遂達諸左右也悚息悚息然已承見詢則  
又不可默凡朝廷制度定自祖宗後世守之不敢以擅  
改改在朝廷且謂之變亂况諸侯乎縱朝廷不見罪有  
司者將執法繩之使君必且無益縱遂幸免於一時或  
五六年或八九年雖遠至二三十年當事者猶得持典  
章而議其後若是則使君何利焉使君之先自漢唐以  
來幾千百年土地人民未之或改所以長久若此者以  
能世守天子禮法竭忠盡力不敢分寸有所踰越故天  
子亦不得踰禮法無故而加諸忠良之臣不然使君之  
土地人民富且盛矣朝廷悉取而郡縣之其誰以爲不  
大定府志 卷五

九

可夫驛可減也亦可增也驛可改也宣慰司亦可革也  
由此言之殆甚有害使君其未之思邪所云奏功陞職  
事意亦如此夫剗除寇盜以撫綏平良亦守土常職今  
縷舉以要賞則朝廷之恩寵祿位顧將何爲使君爲參  
政已非設官之舊又干進不已是無底極也衆必不堪  
夫宣慰守土之官故得以世有土地人民若參政則流  
官矣東西南北惟天子所使朝廷下方尺之檄委使君  
以一職或閩或蜀其敢弗行則方命之誅不旋踵而至  
捧檄從事千百年之土地人民非復使君有矣由此言  
之雖今日之參政使君將恐辭去之不速又可求進乎

凡此以利害言揆之於義反之於心使君必自有不安者夫拂心違義而行衆所不與鬼神所不嘉也承問及不敢不以正對幸亮察

又與貴榮書

阿賈阿禮等叛宋氏爲地方患傳者謂使君使之雖或出如婦之口然阿禮等自言使君嘗錫之以氈遺之以弓弩雖無其心不幸乃有其迹矣始三堂兩司得是說卽欲聞之於朝旣而謂使君平日忠實之故未必有是且信且疑姑令使君討賊苟遂出軍剿撲則傳聞皆妄何可以濫及忠良其或坐觀逗遛徐議可否亦未爲晚

大定府志

卷五

十

故且隱忍其議所以待使君者厚乃文移三至使君始出衆論紛紛疑者將信喧騰之際適會左右來獻阿麻之首偏師解洪邊之圍徐徐又三月餘矣使君稱疾歸卧諸軍以次潛回其間分屯寨堡者不聞擒斬以宣國威惟增剽掠以重民怨衆情愈益不平而使君之民罔所知識方揚於人謂宋氏之難當使宋氏自平安氏何與而反爲之役我安氏連地千里擁衆四十八萬深坑絕壘飛鳥不能越猿獠不能攀縱遂高坐不爲宋氏出一卒人亦莫我何斯言已稍稍傳播不知三堂兩司已嘗聞知否使君誠久臥不出安氏之禍必自斯言始矣

使君與宋氏同守土而使君爲之長地方變亂皆守土者之罪使君能獨委之宋氏乎夫連地千里孰與中土之一大郡擁衆四十八萬孰與中土之一都司深坑絕聖安氏有之然如安氏環四面而居有百數也今播州有楊愛凱里有楊保靖州有彭世麒等諸人斯言苟聞於朝朝廷下片紙於楊愛諸人使各自爲戰共分安氏之所有蓋朝令而夕無安氏矣深坑絕聖何所用其險使君可無寒心乎且安氏之職四十八支更造而爲今使君獨傳者三世而羣支莫敢爭以朝廷之命也苟有可乘之釁孰不欲起而代之乎然則揚此言於外以速大定府志

卷五十一

十一

安氏之禍者殆漁人之計蕭牆之憂未可測也使君速出軍平定反側破衆譏之口息多端之議弭方輿之變絕難測之禍補既往之愆邀將來之福某非爲人作說客者使君幸熟思之

與其濬

字淪齋河南固始縣人嘉慶丁丑會試第一甲第一名進士歷任湖南雲南山西巡撫卒

贈太子太保

與黃惺齋太守論水西事宜書

道光乙巳仲秋由滇赴晉相見於武陵舟次匆匆話別未罄所懷頃接惠書知履任大定已半年矣郡事雖繁勉力爲之措置當有端緒承示蒞官之後日日聽訟以

余在湖南所書清慎勤三大字揭諸廳事觸目警心足見勇於從善之意果能潔己以率人小心以臨政明作以有功持之以恒始終不懈吾爲大定之民稱慶也聞勸民種橡所示種橡養蠶賦拳拳愛民之心形於楮墨實深敬佩非僅藻繪之工而已過貴陽時見城外有君子亭表章陽明遺蹟心敬仰之陽明先生謫龍場時有與安貴榮三書人謂一紙手札勝於數萬甲兵今讀其文不勝高山景行之慕竊謂安氏世居水西今大定地也陽明先生雖未身至其境然安貴榮欽奉其言馴其桀鷲之志反逆爲順是其文德教思已行於羅施鬼國

大定府志

卷五

七

矣鄙意守土之官表揚賢哲樹之風聲乃爲政之先務盍擇善地建君子亭祀陽明其中俾水西人士知前賢餘韻流風至今尚在山川草木皆有光輝也吾友以爲何如

賀長齡

與大定府知府黃宅中書

僕忝連圻之任總制滇黔任重

恩高何以報稱所望兩省同官各修其職奉公守法潔己愛

民以匡予之不逮翹切何如僕出黔抵滇始聞足下自楚來黔計此時已履任視事矣僕撫黔九載地方利病

素所知者可明以告之黔省知府與所屬州縣分地而治其職掌如他省直隸州大定無附郭縣令詞訟尤繁地在滇蜀之交犬牙相錯盜賊逋逃時爲民害民俗輕生好鬪訟獄滋多有司戴星出入猶恐不治故爲守令者必嚴緝捕以治盜除暴所以安良也必勤聽斷以親民理訟所以平政也而其最爲閭閻害者藉人命以圖賴逞刁告以牽連惡習相沿尤須痛革坐誣於審虛之後不如嚴究於呈控之初告勿輕準準必速結早結一案則少一案之株連少羈一人則少一人之拖累足下試吏多年固知之深而行之力矣郡境悅服里以列夷寨

大定府志

卷五

三

有安萇受絕產屢滋訟端查辦十餘年至今未定務須親身履勘徹底查明所有充公租穀或歸入義倉收貯或添補義學修脯以地方之公項辦地方之公事誠爲美舉俟有端緒可就近稟商黔中大府裁酌行之僕每念黔省爲天下苦瘠之區積貯最爲要務邊氓僻陋貧不知學往年檄飭所在官吏籌穀建倉設立義學足下踵而行之千萬留意留書數箱資廣見聞又有

國朝

聖訓四十一册存貴陽府周小湖太守處簿書餘暇可取觀以增學識前年刻陳文恭公課士直解一書晰義極精

書院考課照此出題令多士熟讀尙可因文見道雖先  
儒嗤爲倒做而於人心可資警省不爲無補又清平縣  
有前明孫文萃公遺書公會典學關中著有課士規條  
取視而慎擇之亦有裨也聞招新化鄒叔績茂才在署  
編纂志書卽意徵文考獻固宜蒐輯見聞尤貴扶持名  
教厚扶弁盲容緩錄寄永昌漢回滋事現在幸已粗定  
而仇隙太深仍恐遇事輒發威寧閱武尙須少緩王英  
齋觀察不及作書布爲轉致稍暇當詳布耳

黃宅中

上喬中丞書

大定府志

卷五

四

蒙諭近閱 邸鈔劉侍御良駒因銀價太昂條奏銀錢  
並用欽奉

諭旨令外省各就地方情形悉心妥議黔省民苗交易向皆  
用銀自雍正年間鄂文端公議設錢局始兼用錢迄今  
城市交易仍以銀爲主銀貴錢賤自應亟籌變通當於  
出納之中權其消息應如何立法使官民兩得其便等  
因卑府到黔未久通省情形未能周悉不敢妄對謹就  
大定一府言之伏查寶黔錢局於乾隆五十二年

奏明於省城二十爐內酌撥五爐安設大定歲鑄一百八  
十卯有聞之年加鑄十五卯每卯鑄制錢一百零四串

除開銷工匠火食外歲入局錢一萬八千七百餘串計  
每年搭放大定平遠威寧黔西水城畢赤及安義長壩  
普安仁懷安南冊亨一十三處鎮協等管餉錢一萬七  
千二百五十餘串此卑郡出納之錢數也額徵糧米四  
千零六十七石支放營兵月糧每年有耗米變價銀三  
百三十五兩批解藩庫又有秋糧餘米變價銀數百餘  
兩批解糧道庫用鹽由捷爲縣五通橋販運入黔經過  
地方徵收鹽稅卑郡稅課除各項經費外歲解稅羨銀  
一千六百餘兩又每年額徵地丁銀一百四十二兩六  
錢畱支吏役俸工等項至應領之款有養廉銀一千三  
大定府志 卷五 五

百兩有採辦鉛價銀一千三百餘兩以及鋪夫工食監  
犯孤貧鹽菜米折等銀約有一千餘兩此卑郡出納之  
銀數也今以銀貴錢賤於出納之中權其消息如所徵  
稅銀銀錢並收每銀一兩酌收錢若干比較市中銀價  
量爲酌減於民甚便於官亦無大損尙屬可行至畱支  
項下亦可仿照所入之數銀錢並發惟用錢便於畱支  
而用銀便於領解蓋解銀領銀雖有火耗等費輕而易  
攜腳費甚省若解錢領錢上之收納既無存貯之所下  
之領解又增運腳之累無益於民而有損於官此卑府  
一隅之見未敢以通省概論也



守土三年於地方毫無補益祇有勤聽斷嚴緝捕兩事時時勉力爲之尤時時願我同官俱各勉力爲之蓋早結一案則少一案之拖累能除一盜則去一害於地方然必實心實力爲之方有實效也近讀陳文恭學仕遺規所載真西山先生與僚屬書云正己之道未至愛人之意不孚雖有教告民未必從願與同僚各以四事自勉而爲民去其十害何爲四事曰律己以廉撫民以仁存心以公浚事以勤是也蓋廉則身正而法不撓仁則法行而心不刻公則心平而事不偏勤則事理而民不

大定府志

卷五

十六

冤以此四者身體力行當隨時隨事共加策勵耳至於十害今昔不同以現在地方情形而論則有盜賊之害有抄擄之害有圖賴之害有擻拷之害有磕索之害有坐騙之害有刁民誣告之害有訟棍刁唆之害有差役滋擾之害有候審羈押之害若能廉以爲本仁以爲施秉公以爲措置矢勤以爲始終四事能行則十害可除約而言之總以勤聽斷嚴緝捕爲最要若緝捕不嚴盜賊橫行害固不可勝言聽斷不勤而所謂九害者層見疊出皆足病民官以爲無事而百姓日見其多事所謂爲政一日不勤下必有受其弊者古人閱歷之言吾輩

所當時時提醒時時奮勉也愚拙無能常深慚懼謬膺  
守土表率未能惟願諸同官不以爲迂而匡其不逮幸  
甚幸甚

張琚

論修郡志書

大方僻陋在夷土風荒畧徵文考獻草創維艱日昨鄒  
君叔績遇境乃知志稿已成行卽付梓名賢典郡俾是  
邦山川人物藉以生輝洵不朽之盛規百代之師範也  
僉蒙雲霄引掖欲使塵沙土礫附載珠船倍深慙悚敬  
呈數首仰求誨正倘以爲可存而附之卷末亦文翁樂

大定府志

卷五

十七

育之一端耳抑琚更有請者鄉先生有貢生何天爵名  
思貴者篤學好古頗多著述每見稱於當時名公今承  
旁搜博採擇而登之感且不朽琚昔者因俞秋農師獲  
侍教於門墻之末師嘗言試吏十年知交落落中丞賀  
耦庚先生獎翼於前又得大君子扶植於後自顧生平  
可以不恨今師已捐館年餘矣黔西人士遺愛未忘側  
聞紀其行實於惠人志中附入列傳豈獨門下士銜感  
己耶虔沐奉書不勝瞻悚之至

議第五

張介眉

詳覆大定更移鎮協議

康熙五十五年爲合疏邊疆確議情由仰祈

睿鑒事案準前任貴州提督張某揭帖內開竊臣蒙

恩提督貴州地方情形敢不殫心籌畫上報

聖恩高厚緣臣履任之初適遇 欽差朱廷貴會放

皇賞目擊黎平一汎地廣兵單不能彈壓乃大定一鎮與平遠

黔西畢節三協營各僅百里密邇接壤無需立鎮莫若

將大定鎮移駐黎平黎平移駐大定摺奉

旨該部議奏內閣議查此案事關更移鎮協不便遽議應行該

提督會同督撫確議具文到日再議題奏可也轉行大

大定府志 卷五

六

定文武查議具報酌奪覆題各緣由到州準此本州查  
得大定一州境之東南接州省龍場營等處地方境之  
西北接連威寧府滇省鎮雄府等處地方居民四鄉皆  
是獠獮又環繞大定者周圍四方五百里亦皆獠獮獠  
民戶口難以記數此真獠穴也自古以及故明從未入  
版圖我

皇上明聖文武德威遐布於康熙三年殄除安坤始改土設流  
分爲三州立牧以撫之現今獠民知義向風似與內地  
民無異矣然安於目前當揆其久遠大抵獠獮性情秉  
於強悍自來習尚專以爭鬪輕生忘死畏威而易於苟

德難以漸摩改觀此猥之性習不可忽視者一也至於地勢以天下而言崇山峻嶺惟黔爲最高險以黔而論自鎮遠而至省城自省城而至大定有上無下高幾接天在黔又惟定爲高險在定八里又有最險僻如所謂馬鬃嶺天生橋皆下臨數百丈之絕壁懸巖一綫一人子身側足難行之路猥民則行走如飛本州曾歷其地親見其險此地形當慎重者又一也蠻情險地似不可輕視勢宜彈壓據本州管見兵不可改鎮不宜移書生冒昧據實直陳希惟鑒察施行

陳繹

大定府志

卷五

九

經理大定條議

按大定僻處荒服本羅施之故國民性樸直鮮識仁義自編入版圖仁漸義摩忠孝成俗幾幾乎有仁里之風焉今又得執事勵精圖治以經理之賑孤貧而窮民有告重斯文而士氣奮興勤審結而罪無宿獄省刑罰而民心大悅清弊端而冤枉得伸嚴盜賊而閭閻安息種種善政不可枚舉是以下車未及四月而頌聲已遍八方如此經理復何議哉乃已治而若未治已安而若未安殷殷以經理下詢是誠望道未見與人爲善之至意也生縱識見淺狹不達經綸實願謹抒片詞以佐萬一

竊惟經理之要固自多端而目前之最急尙未舉行者有八生不敏請條議之

一勤月課以端士習從來風化起於膠庠而習俗倡於士子苟士習不端民風無由而正也然使徒下一令曰爾諸生當謹守臥碑先德行而後學問乃爲佳士諸生誰不唯唯而爲上者全未見其孰爲端孰爲不端縱三令五申亦不過具文而已議宜設課期飭學師諭士子至期齊集明倫堂或賦詩以觀其性情或考文以觀其素養或作策論以觀其經濟或劄及傳記以觀其才學於揖讓進退之間以觀其氣度於察言觀色之下以觀

大定府志

卷五

三

其正邪則端與不端者昭然於心目間矣爰別其淑慝嘉其善而教其不能則士之端者必樂而益憤其不端者亦必恥而更新相率而歸於端矣士習一端則人有矜式民風可得而正也 一立塾師以廣教育夫學校之設原以作養人才而杜異端也是安可以不廣哉故王者之制家有塾黨有庠術有序國有學蓋爲此也今大定府本城固已有義學矣獨是閭郡之民夷多漢少明昧不齊道路迢遠貧富不等其明而富者力能來城就師子弟得以聞道其昧而貧者苦於供給縱有俊秀子弟力不能來城就師終於耕鑿而已卽各設學而所

延之師大都唆訟包攬之徒日以稟報狀訴之詞課子弟夷愚無知爭相效尤風俗由之大壞訟端自是無休矣鄙議莫若量八里適中之處各設塾館擇本學品誼端方文理平通者八人而爲八里塾師使各里子弟便於就學其或幼穉路遠不能就塾館者許塾師各舉親信分寨教讀每季具其課程稟送其束脩供俸仍學東自辦勿缺如是則昧而貧者之子弟亦以聞道而唆訟包攬之徒不得以壞風俗而啟訟端卽夷苗獯狝亦常得見聞詩書禮樂而向化也 一勤勤儉以足民食嘗

觀大定八里之民勿論漢夷以及苗狝獯蔡富而安飽

大定府志

卷五

三

者十之二三貧而饑餒者十之六七其故何哉蓋由習俗使然也每見大定子弟有年至二三十歲尙未有職業者婚娶喪事有費至七八十金者士庶之家情侈若此卽富者亦且不免有終窶之嘆而况一於借貸者乎民鮮有食所自來也傳曰生之者衆食之者寡爲之者疾用之者舒則財恒足矣蓋言足民之道在於勤儉也然而民不能自勤賴上有以勤之民不能自儉賴上有以儉之此理勢之必然者議宜責成鄉保里甲各嚴各寨春夏勤於耕耘秋冬勤於收穫毋或游惰有游惰警懲之民必歸於勤矣婚姻不宜過奢喪事不宜越禮切

戒僭分有僭分者警懲之民必趨於儉矣民勤且儉家有餘財而善生焉百姓親睦和氣致祥何致有饑饉之嘆耶 一教紡織以資民衣孟子曰五畝之宅樹之以桑匹婦蠶之老者可以衣帛矣五母雞二母彘無失其時老者可以食肉矣此王政之大端民間所宜最急者也然大定雖入版圖本古蠻方夷漢婦女專以喂雞豕爲職業一家所畜何止五二則雞彘之利不待議者也獨紡織一事大便益於民生爲之可以拘束婦女之游心用之可以供一家之衣服誠女工之首務傳家之至寶也而城中四鄉夷漢民婦絕不以此爲事者無有董

大定府志

卷五

三

之者耳議宜傳城中紳士兵民有力之家作興婦女紡織未必無奉命不違者因而獎之勸之使本城四鄉相習成風由是而通商交易生發利息婦女顧利朝夕以紡織爲事何暇冷容遊戲閒坐笑談以致饑寒無計傷風敗俗也哉 一弭盜賊以靖地方從來爲政莫先於安民而安民莫先於弭盜盜賊不弭而欲民之安也豈可得乎然盜之起也有由而盜之止也有術誠得其術而行之則盜有不期止而自止者蓋盜生於遊惰長於無拘成於寬宥盛於顛倒何以言之先王之制士農工商冠則職業有等才力過人之子父母溺愛不明自幼

聽其懶惰游戲終日以飲酒賭博爲常長而任其放肆  
行兇鄉黨不敢指摘其咎旣而家財散落日思攘竊爲  
盜之事起矣不犯則益恣非爲犯則但予薄責而爲盜  
之心堅矣甚至巧計支吾反坐失主而爲盜之路熟矣  
因而邀盟結社牽引勾通而爲盜之黨熾矣於此而出  
示禁革良言化諭徒增爲盜者之一笑耳子產曰惟有  
德者能以寬服民其次莫如猛夫火烈民望而畏之故  
鮮死焉水懦弱民狎而玩之故多死焉鄙議與其沽有  
德之名以致民多死不若守其次之猛使民鮮死之爲  
仁也况大定民慢久矣卽有文王之德亦難使盜之止  
大定府志 卷三三 三

也夫惟猛以糾之坐及其同黨以翦其羽翼坐及其窩  
戶以洗其巢穴極法處治以懲其將來天下焉有不畏  
火烈之盜哉盜畏火烈民得安矣雖然孔子有言曰苟  
子之不欲雖賞之不竊是又弭盜之上焉者也 一獎

善良以勵風俗從來致治以整齊風俗以鼓勵善良爲  
先大定雖僻處荒服人才原不擇地八里之衆豈繫無  
人獨是大定原爲蠻夷舊邑人情尙利而不尙義好財  
而不好德且習染以攻發陰私爲知以求全責備爲明  
是以篤信好學守死善道者往往而鮮也卽閭閻之中  
見有村姑野婦俗子凡夫砥行勵名亦皆壅於上聞所



以編入版圖以來科甲中猶有二三人物而名教中竟無一人也倘彰善之典不行獎勵之政不舉則氓之蚩蚩何從而知彝倫天則之爲重忠孝廉節之宜敦哉今我

皇上有孝廉之舉執事悉心旁求不過本庠貢士生員而止而八里之善良湮沒無聞者不知凡幾也議宜徧諭八里鄉保頭人各寨悉心查訪無論村姑野婦俗子凡夫倘有克盡孝義節烈之人仰卽查核事實取據親隣甘結加結呈報再加核實如果全行無虧何妨具文上達倘止片善足錄亦應賜與褒旌致令草野聞知人人知大定府志 卷五十一 五

彝倫天則之爲重忠孝廉節之宜敦豈非帝王勞來匡直之意哉 一正經界以息訟端孟子曰夫仁政必自

經界始經界不正井地不均穀祿不平此誠萬世不易之論也夫民有不均不平之事則必起而相爭爭之不已則訟端自此而起矣是故欲民無訟非正其田土之經界不可大定當編里定甲之初田三萬七千有奇每畝納糧三斗自吳逆叛後人民逃散盡行荒蕪及至恢復勸民開墾賦仍照前額田畝僅得三分之一蒙各憲題請新懇減糧一半每畝納糧一斗五升聽民自首由是民樂開墾漸次申科將滿舊數然而經界則未嘗定

也自經界未定彼此相佔以致苦訟無休案積如山有  
由來也今值奉

旨編定田畝正君子益國利民之候也大定山高水冷土瘠民  
貧一歲之耕難給一歲之食議宜備悉定邑之水土氣  
候夷苗之窮苦艱辛詳明上憲又令戶書名協同鄉保  
寨衆登山酌量各戶田土多寡秉公分清經界或齊路  
齊溝或栽椿栽石依照四至造冊呈送勸民量力自首  
以增

國賦毋得勉強如是糧賦漸增小民安樂而且經界一正  
民無敢爭佔訟源旣絕訟端何自而起哉思將永及於

大定府志

卷五

五

後世矣 一設社倉以備荒歲嘗思陽愆陰伏天地亦  
無如何水旱蟲蝗帝王亦有預備故耕三餘一耕九一  
三凡以爲此也自漢有常平之設隋有義倉之興其所  
以爲荒歲計者無不周密詳盡後世效而行之自省會  
州邑莫不蓄積貯藏以備旱潦大定本城之常平義倉  
非不充實每遇歲荒出陳易新取給已裕如矣夫復何  
議哉獨是立法期於便民則古求其無弊大定地廣人  
稀分散八里至城有數百里之遠者常平義倉皆積貯  
城中倘遇荒歲近城者可以來城糴買而遠至數百里  
者豈能朝請而暮獲乎鮮有不爲荒歲困者鄙議莫若

於八里各寨效宋朱子之法設倉於里社之中令各寨頭人酌量每戶各捐穀若干蓄積貯藏於其中擇其鄉人之中年高望重矜實老成者掌之每歲出陳易新春夏給之於民定以二分之息秋收則會量其所出之息以償諸公而貯之於倉一遇旱潦卽以所納之息賑之而其本數仍存之於公以爲補助之用是則斂散有經朝請暮獲卽離城數百里之遠者亦不爲歲荒所困也安在既有常平義倉而社倉遂可以不設耶雖然是猶爲無餘之民而言也果其耕三餘一耕九餘三凶年亦不能殺而社倉之積貯寧有旣哉管見若此未識有一

大定府志

卷五

三

當於實用否

大定府志卷之五十三

外篇三

知大定府事鄱陽王允浩原本

知大定府事河曲黃守中章

論第六 文徵三

田 雯

濟火論

濟火者漢牂柯帥黑盧鹿水西安氏遠祖也深目長身  
魑面白齒以青布爲囊籠髮其中若角狀習戰鬥尙信  
義喜撫其眾諸蠻戴之聞諸葛武侯南征積糧通道以  
迎師遂佐武侯平西南夷擒孟獲封羅甸國王世長其

大定府志

卷五

一

土勒四十八部部之凡九扯更苴皆屬焉已乃攻普里  
諸種拓其境地賜鏤銀鳩杖嗣是而降唐會昌中阿俾  
率眾內附復襲王爵天成二年普露率其九部入貢襲  
封如故宋開寶中普貴納土來庭仍賜王爵元至大元  
年授阿蓋爲武略將軍泰定間賜名帖木兒卜花至順  
元年加資善大夫雲南行省左丞後以軍功授昭勇大  
將軍佩三珠虎符順元等處宣慰使加虎符大將軍羅  
甸侯卒贈濟國公明洪武四年以靄翠爲貴州宣慰使  
統四十八部正德間加安貴榮參政後世襲宣慰司之  
職蓋歷數百年而其祀未斬云論曰濟火一荒陲土帥

耳當武侯渡瀘之日孰為之計大義明王章者而毅然以助順樹勳崛起一隅為蠻王長其亦寶嬰青羌之倚乎不可謂不豪矣迨夫累世相承奄有爵土要皆以識機達變宣力効忠始終不失人臣禮故得以長奉西藩受恩罔替非徒以為甌脫而姑羈縻之也天啟壬戌之叛罪惡貫盈旋即挫衄崇明邦彥同時陣殲雖王三善之奮斬十萬秦衍祚侯良柱之夜拔三寨張雲鵬之八路進兵許成名之三方深入而發縱指示出奇制勝益有朱燮元之方略在豈曰無人歟何以南人復反不為益部之官屬而番將分茅大玷牂柯之鼻祖也語云順則昌逆則亡水西之子若孫其當知所鑒戒矣乎

大定府志

卷三

二

### 奢昏論

奢香者靄翠妻也翠仕元為行中書左丞明洪武四年與同知宋欽歸附以翠為貴州宣慰使欽副之翠死奢香代立欽死妻劉氏亦代立劉氏多智術時馬煜以都督鎮守其地政尙威嚴欲盡滅諸羅代以流官乃以事裸撻奢香欲激怒諸羅為兵端諸羅果懷怒欲反劉氏聞止之為走想京師上召問令入宮見高皇后復令折簡召奢香至詢故上曰汝誠苦馬都督吾為汝除之然何以報我奢香叩頭曰願世世戢諸羅令不敢為亂上

曰此汝常職何云報也奢香曰貴州東北有間道可通四川梗塞未治願刊山通道以給驛使往來上許之謂高皇后曰吾知馬煜忠無他腸然何惜一人不以安一方也乃召煜數其罪斬之遣奢香等歸諸羅大感服爲除赤水烏撒道立龍場九驛達蜀令安氏卽靄翠後也論曰烏羅之君長西土非一日矣一旦折而歸我豈其願哉終必爲患夫人而知之卽馬煜之忠明太祖亦諒之矣乃不乘此而翦滅之反自壞其長城僅令置驛以爲報者計之非不審也蓋以諸蠻之強梗由於山川之險阻財力之富饒則莫若置驛以通之且困之通之而

大定府志

卷五

三

險失矣困之而志馴矣然後爲我所制而無難此勝算亦遠猷也故除馬煜以爲生事戒而又以安遠人之心也若奢劉則可謂奇女子矣一乘間而遠徼一聞召而卽至先機之智應變之勇丈夫之所不能而謂遐方女子能之乎觀其置驛通道則又功過唐蒙矣然置驛而事由此定亦亂於此萌矣何言之壬戌之役乘奢蘭之釁連霑烏之黨雖潢池弄兵悍性不馴亦由置驛之後當時之官斯土者誅求暴虐有以激而成也安貴榮嘗請減驛矣王新建曾貽書以責之因伐謀之道然使當日稍寬恤之恩威並用亦尙至挺而走險若是哉此馬

煜之所以誅也

李化龍王三善論

紀平播之功曰李化龍死水西之變曰王三善其人同其事合其心一而要之用兵各殊故成敗亦異也方化龍之督黔以平播也與黔楚撫臣同心併力一出於剿既受命則移鎮於重慶而黔撫郭子章駐貴陽楚撫支可大駐沅州相犄角也必俟延甫四鎮河南山東天津滇浙粵西征調之兵大集然後啟行最慎重也分兵八路川師四路總兵劉綎從綦江入以參將麻鎮隸參政張文耀監之總兵馬孔英從南川入以參將周國柱宣大定府志

卷五三

四

撫冉御龍等隸僉事徐仲家監之總兵吳廣從合江入以遊擊徐世威等隸參將劉一相監之副將曹希彰受吳廣節制從永甯入以參將吳文傑宣撫奢世績等隸參議史旌賢監之而中軍率標下遊兵以應之黔師分二路總兵董元鎮統土知府隴澄知州岑紹勳等由烏江參將朱鶴齡受元鎮節制統宣慰安疆臣等由沙溪總兵李應祥統宣慰彭元瑞等由興隆參議張存意按察司楊寅秋監之湖廣偏橋一路分兩翼總兵陳璘統宣慰彭養正等由白泥副總兵陳良珙受璘節制統宣撫單宜等由龍泉副使胡桂芳參議魏養蒙監之以偏

橋江外爲四牌江內爲七牌五司遺種及九股惡苗盤據故也而紀律嚴黨與散矣部署已定大會文武於重慶登壇誓師諸道並進以抵婁山關爲期諭之曰關外且戰且招多不勝誅也關內疾戰勿受降師不可久賊詐不可信也又以劉綰素有威名薦綰於朝委以專制人或疑其夙與應龍昵則延入臥內輸心腹且以危言激之引其父顯九綵功爲比致令綰大慟願誓死報又以水西爲應龍婚媿也恐陰佐賊則走檄以詰之以故隴澄侈其修好之使安疆臣執賊二十餘人以明不背志氣旣一非同築舍之謀駐兵旣得其所治兵又有次

大定府志

卷五

五

第任用又得其人先剪其翼次伐其交是以海龍兵合應龍勢蹙投降之書立焚拜表之欺不售而倉皇自盡妻子併俘自出師至滅賊凡百四十有四日而事平也若王三善則不然初則奉命撫黔聞變募兵皆烏合之衆非久練也平越一戰而敗卽情縮而不前視重圍之困不啻秦人之於越必待舊撫李樑大聲疾呼而後勉強以應中情怯也乘西賊之敝一鼓而潰遂以賊爲易與而欲解赴調之兵驕必敗也率師輕進未幾而還再抵大方又欲反轡舉動擾也雖三路分兵而卒皆遠調師俱不和主客不敵形勢弗習也其所任則愴懦之魯



欽馬烟所信則詐降之陳其愚用非人也懸師虎穴弭  
節逾年中隔渭水之河聲援已絕儲糗六廣之岸轉餉  
多難失所據也督主撫而撫主剝心膂未齊前跋胡而  
後蹙尾進退維谷事權分也師老而財匱事拙而勢屈  
況爲陳其愚所賣烏有不敗者哉嗟乎黔地山川險阻  
異常狼子野心不知漢大未有提十萬之師而不爲餓  
糧計深全軍之入而不爲孤注虞者兵法云圯地勿戰  
圍地勿攻又曰兵貴有謀以多算勝自定其規模非可  
漫嘗於一擊也況水西之地十倍於播播猶八面圍水  
西止以一面攻播無遠近之援水西則有烏蘭之助化  
大定府志 卷五三 六

黃宅中

與義館學師論課學

郡城有義館三北門曰修來義館始於前署守徐玉章  
東門曰東昇義館西門曰西成義館始於前守陳熙俱  
捐廉發典鋪生息爲延師修脯之資又有南關義館由  
學經理鄉間義館五悅服里羊腸坦義館距城二十五

里馬場義館距城六十里義漸里瓢兒井義館距城九十  
十里嘉禾里上五甲虎場義館距城一百六十里下五  
甲候場義館距城二百里俱前守姚東之捐廉創設所  
以使城鄉寒貧子弟均得入學讀書也第恐教者不能  
實心訓課徒成具文因於新春封印期內面試館師并  
加訪察擇其學問通明勤於課讀者諷日開館又集先  
儒訓蒙淺近之語開列數條俾做而行之不獨有益於  
子弟且有裨於館師也 陳定宇先生云受人子弟之  
託須是以教人爲急然教人讀卽是我讀教人做文字  
卽如自做教人解書卽是自解教人熟記卽是自熟自

大定府志

卷五三

七

記教人便是自學如此力行不特人有長進我亦自長  
進教小童雖不能與盡解我却不可不自己曉得須每  
日隨人所上之書逐段自解不可徒讀其句讀不曉其  
道理如和尚念經也每日早起晏眠莫妄出與人說閒  
話惹是非待學生必正色端莊須是勤而有常謹而不  
敢輕易能守得勤謹二字萬萬無失 真西山教子齋  
規分爲八則乃蒙養最要之方爲父兄師長者均宜敬  
書座右時加訓飭勿以爲迂淺而忽之也 一曰學禮凡  
爲人要識道理識禮數在家庭事父母入書院事先生  
並要恭敬順從遵依教訓與之言則應教之事則行毋

得怠慢自己任意二曰學坐定身端坐齊脚斂手毋得  
伏蹙靠背偃仰傾側三曰學行籠袖徐行毋得掉臂跳  
足四曰學立拱手正身毋得跛倚欹斜五曰學言樸實  
語事毋得妄誕低細出聲毋得叫喚六曰學揖低頭屈  
腰出聲收手毋得輕率慢易七曰學誦專心看字斷句  
慢讀須要字字分明毋得目視東西及手弄他物八曰  
學書臻聚志把筆字要齊整圓淨毋得輕易糊塗 許

魯齋先生教小學生凡讀書倦時則令習拜跪揖讓應  
對進退之節每讀書不務多惟懇款周折若未甚領解  
則引證設譬必使通曉而後已又常問此章書義若推  
大定府志 卷三十一

之自身今日之事有可用否大凡欲其實踐不貴徒說  
也 呂新吾先生社學要略云每日讀書就教童子向  
自家身上體貼這句話與你相干不相干這章書你能  
學不能學仍將可法可戒故事說與兩條令之省惕他  
日違犯卽以所讀之書責之庶幾有益身心此法最爲  
切近卽如弟子一章先就本義講畢再將如何便爲不  
孝弟不謹慎不親愛不力行不學文反覆警戒嗣後遇  
學徒行事有合於孝弟等項者則指其有合於書中某  
句而對眾稱之如有所犯則指其不合於書中某句而  
對眾責之如此則講一章書卽受一章書之益卽知卽

行始基於此 唐翼修父師善誦法云先生講書至有  
關德行倫理者便說與學生知道要這等行纔是好人  
有關修己治人忠君愛國者便說你他日作官亦要如  
此欲學生書熟必當設籌以記遍數每讀十遍令繳一  
籌一者書之遍數得實不致虛冒二者按期令繳籌遲  
則便可催促督責之三者籌不容不繳則學生不得不  
勤讀以早完課程始一舉而三善備矣開筆作文須講  
明題目及來蹤去路一章重在何節一節重在何句一  
句重在何字看得融會貫通方可下筆破承只須彌月  
開講要做半年若開講未精遽做全幅中等筆性必致

大定府志

卷五三

九

生梗闕童子之文但宜隨其立意而改之通達其氣脈  
字句極能長發才思若拘題理而盡改之則阻挫其才  
思已後即不能發出矣 人知四六之文重在平仄而  
不知散體古文八股制義亦重之也音韻鏗鏘便覺朗  
朗可誦平仄不調詞句必不順適意雖甚佳無益矣  
謝退谷先生教論語云

國朝以制藝取士必於四子書命題蓋以士通於是書則  
其人必賢其才必可用也然則讀四書者當思其所以  
讀之故為制藝者當思其所以為之故而非可以苟逐  
時趨曲徇世好等於兒戲之為而已

國朝經學趨軼前古

欽頒四經三禮會萃衆說之長已稱極博學者讀經必先以此爲底本然後更求專家之學其或有處貧不能多購書及居山僻遠地者得此一書亦足以爲窮經之藉矣小學書雖非朱子親筆然所語皆樸實切近此却爲四子之階梯亦卽近思錄之階梯也不可不常讀今人讀書輒云爲俗務家計所累有妨於學豈知真讀書者正須一面讀書一面理事非俗務家計之累人也蓋閉門讀書不識世事則所讀之書每成無用終日理事而不讀書則所逐者俗情所理者俗事而已讀書而兼理事則

大定府志

卷五三

十

理事時莫非讀書理事而兼讀書則讀書時莫非理事往往有書理窒礙不通至應事而忽悟者亦有家事世事窒礙不行至讀書時始悟其處之失當者蓋讀書是致知理事是力行不致知無以善其行不力行無以進其知知行並進者聖賢之學也真學問人語教與學相依爲用者也故凡善學者必樂教人而善教者其人必好學姑淺言之今讀書人多不免於處館或以爲迫於貧而妨於學其實非也既處館則當以悞人子弟爲憂專其心於教教童子讀經書必先講說自家不了於口則無能講說不得不先自用心研求且有看書時自謂已曉

及至與人講說反覺口中詞理不順者則又不得不更加研審一番如此反覆則弟子所得者僅二三分而師之所得者已六七分矣故畱心教童子則經書自不至荒譬如教童子三人長者讀第三卷次者讀第二卷其幼者方讀首卷則此三卷皆在吾口耳中矣吾爲長者檢點第三卷方畢而次又及第二卷矣而幼者又及第一卷矣吾則不溫自溫不習自習何樂如之惟身雖處館而以弟子之功課爲厭物無可奈何苟且了局故頻年處館弟子無得而師亦無聊不數年間以求館之難爲怨望矣故貧士處館而立身行已於此覘焉前程通

大定府志

卷三

二

塞於此定焉語曰學不厭智也教不倦仁也由其不仁故終於不智

說第七

甯雲鵬

大定輿圖說

大定府禹貢梁州之界天文參井舊名大方在陸廣水之西故總名水西東連播蘭西枕古滇尋霑南抵會城兔場北距鎮雄鹽倉漢建安二年諸葛武侯帥師平蠻安氏遠祖濟濟火佐擒孟獲有功封羅甸王今府治卽古羅甸舊地也晉魏六朝中國雲擾安氏自恃險山大

箒不就戎索唐時亦屬羈縻迨宋開寶間普貴納土歸順仍襲藩封元授阿晝爲宣撫使加龍虎將軍卒追封濟國公明洪武初靄翠歸附授懷遠將軍世襲宣慰使宏治中土官安貴榮從征香爐山有功加貴州參政榮猶薄之上書乞減龍場諸驛事下勘議時王守仁以建言謫龍場貴榮素敬之遺書云使君之所以長保爵土者以能世守天子禮法若以直慰而冒參政之官以外藩而求幅幘之地則爵土既可增茅胙亦可改吾恐千百年之土地人民非復使君有也榮遂寢其事後傳安萬鍾萬鑑萬銓安仁安國亨安疆臣安堯臣八世而至

大定府志

卷五

七

安位位因稚同知安邦彥與蘭州酋長奢寅於天啟二年叛攻圍貴州陷安順畢節諸城乃命師征討削水外六目地改蘭州之鎮西敷勇二衛養龍息烽修文柔遠赫聲濯靈六所卽南抵會城兎場以北六廣鴨池以南地矣位仍襲水西宣慰使位卒無嗣眾目阿烏迷等議立支子安承宗而伐沙阿卦補慮等議立鎮雄土府子隴鴻勳更名爲安莫藩議不合伐沙補慮以囤積獻阿烏迷察架喇以土地獻臺臣會議宜乘此機改土設流以杜安氏患遂命黔撫朱燮元帥四總兵建立大方水西比喇三城谷里歸化二堡拒而守之未期年伐沙阿

烏迷合謀復立安氏事覺伐沙杓佐伏誅各目復叛鼓  
兵圍城糧盡援絕鎮兵撤回城堡遂陷復授安承宗延  
恩知府承宗卒子安坤承襲水西宣慰使加御營都督  
蔭一子中書舍人迨我

大清定鼎復開滇黔仍還舊制復頒給宣慰印信加都司  
簽書職銜乃安坤不圖報

國恩與首目察架喇安如鼎負險梗化康熙三年春

命平西王提師進勦戈矛所指首目授首安坤成擒改土設流  
劃分十一則溪爲三府改比喇爲平遠卽西抵古滇地  
界也改水西爲黔西卽東連播蘭地界也改大方爲大  
大定府志 卷五三 十三

定卽北距鎮雄鹽倉地界也各設流官鎮府分而守之  
水西之地咸歸版圖設鎮統經制官兵二千四百人駐  
大定而平遠黔西亦如之康熙五年秋雲鵬奉

命來守茲土維時巘疆初闢子遺甫定兵火之餘城郭不完倉

廩未建柞棧叢蔭荆棘滿目市野不分兵民無依始編  
城內坊廂東忠義坊南孝順坊西阜民坊北遵化坊繼  
編里定賦爰度地方遠近亦畫東南西北爲四鄉分八  
里府城東舊伐戈則溪編悅服樂貢二里府城南舊火  
著則溪編大有嘉禾二里府城西舊架勒則溪編永順  
常平二里府城北木昤則溪編仁壽義漸二里里各有



甲甲各有戶丈地受業得田三萬三千七百八十九畝  
每畝科米三斗得地二萬一十一畝每畝科蕎八升折  
米四升共計得秋糧一萬九百三十七石一斗八升以  
實軍糈民各盡力南畝兵各分守要隘兵民既安於是  
捐俸修治鎮府衙署鎮署建城東府署建城西文廟建  
城南城隍祠居中於府治前百步爲永順倉府庫亦名  
永順郊之南立社稷壇郊之北立厲祭壇建演武廳於  
城北龍山之陰東至水溝南至路橋西至路旁北至龍  
山脚設操馬牧地於城西之荒原週圍十里其餘佐署  
祠獄與府治相表裏者皆爲規畫定市廛疏水道民舍  
大定府志 卷三十一 四

營房一如制度城內居民解少惟卒伍比戶而居糞民  
散處山中僻就耕耨城因故址疊砌週圍共計九里三  
分一千六百三十丈九尺開四門東曰朝陽南曰來薰  
西曰寶成北曰拱辰官道置舖府前為在城舖自城北  
有闌鴉老塘歸化栗樹坪四舖自城南有路穿烏西二  
舖又南有比度六歸二舖以通郵傳自府城正東二百  
四十里至沙溪抵遵義府界自府城正南九十里至老  
龍橋抵平遠府界次南六十里至西瑛抵黔西府界自  
府城正北六十里至栗樹坪抵畢節衛界自府城正西  
三百二十里至扯處烏抵威甯府界其近威甯邊界扯

處烏野賊出沒之處商同總兵官於郎白馬鬃嶺以虜  
徂你架馬白得素水城等處地方各建營盤哨樓分經  
制官二員兵二百名汛防按季更換文武和衷協力調  
劑靈氣肅靖民各安生若生聚教訓有年亦可漸望改  
觀矣今採四至交界里數四鄉八里地名以及要隘奇  
險處所總具圖陳說

田 雯

葦器說

盤盂盅蓋之屬凡數種矣壺爲善桐酒乳茶注之提之  
等於滑稽鴟目也若碁局則遜楸枰之逸響矣戎宜預

大定府志

卷三十一

七

箭砲馬鞮囊之被之等於障泥玻璃也若鈿合又增陸  
離之采色矣用水牛皮牝者首牡者亞焉濶者貴狹者  
賤焉賢者上敝者次焉以水浸之燔毛剝肉取其澤且  
平也以火烘之龜文縷理取其乾且厚也以木張之以  
齧定之以刀削之而後膏以福髹焉膏之其功十也以  
沙覆之以土甃之以石礬之石出威甯而後繪以文采焉繪  
之其色四也四色皆檮漆成之首則黃蓋色之正者故  
首也蘇長公與人論菊謂如叔向之取醜蔑是也黃以  
石黃絳以灌口砂碧色合靛青石黃而一之羊肝色兼  
黃硃靛而三之鑲車鐵筆花鳥賦形斲輪承蜩之技也

雕蟲鏤卉運斤成風崔青蚓邊鸞之手也又水西有乳  
漆器其制度略同獨繪事各別不謂鬼方人有此活巧  
耳

四十七

開赤水河說

赤水河者其源自萬山中一線溪流由畢節縣直通仁  
懷猿猴舊河可達川江第自赤水之天鼓巖起至猿猴  
之雞心灘止共計六十八灘巨石巉岩聳峙中流萬仞  
之山壁立兩岸灘高浪激勢險路紆以故自古未有通  
舟楫者乾隆十年督部院張公因滇黔銅鉛每歲由陸

大定府志

卷五三

六

路輸運進京節節皆崇山峻嶺鳥道羊腸駝載艱難脚  
費浩大且黔省不產食鹽須從川地肩挑背負運至猿  
猴轉販請將赤水河道疏鑿開通使入京之銅鉛客商  
之鹽貨俱由水運上可節省國帑下亦利濟民生具疏  
入告經部議準隨卽勘估具題借動閒款銀三萬八千  
六百四十二兩五錢零上游自赤水河天鼓岩至新灘  
共二十七灘委大定府知府王允浩分辦下游自鹽井  
等灘至雞心等灘共四十一灘委遵義府知府陳玉璧  
分辦於乾隆十年十月初一日興工至乾隆十一年閏  
三月初一日工竣經督部院張公親行履勘題報續因

河道初開商舡畏縮不前官爲試運節省無多乾隆十四年十一月內撫都院愛公以此河果否於滇銅黔鉛運務兩有裨益現在河道是否深通抑須檢修委予率同畢節縣凌均前往勘明詳報遵卽於是年十一月十九日親往會勘自赤水河天鼓岩至白沙河六十餘里其間有張會新亮長灘老虎等灘水高石大弔放艱險雖老虎灘而下瓦窰大河口王家野猪等灘數里舟可通行第畢節至老虎灘無陸路可通故須以白沙河爲口岸舡貨皆於此上自白沙河至魚塘河河身稍窄中有紅石梁猪捲門廟兒碓窩等灘亂石堆積水勢陡險

大定府志

卷五

七

舡戶輪流弔放一日止可行二三十里自魚塘河至新龍灘三百餘里河寬水平舟行無碍新龍雖名一灘實則接連六灘每灘相去止一二丈下又緊連上長中長下長三灘一連九灘相接中間並無停撓歇氣之所舡頭駕抬舡尾駕舵之二水手瞬息一氣撐放三里餘之九灘安能有此長力所以每多失事厥下又有殷鬍子沱大白汾小白汾文公下灘上灘螺螄等灘中間殷鬍子大小白汾及文公上灘秋冬水涸平坦可行然文公大灘黔岸形如刀削蜀岸有文公廟一所缺口窄狹巨石屹立河中水大則浪高難行動經累月守候水小則

岸無緯路每舡須四五十人方得弔過螺螄灘亦甚危險歷台盤子虎跳石滋灣洞黃連大洪直至二郎灘始覺寬平故發運京鉛宜於新龍灘起岸從陸路運二十里至二郎灘下舡自二郎灘抵猿猴雞心灘一百六十里中間如游洪羅妹虎腦黃泥等灘雖稍陡峻但河寬水平舟行無虞總之極險之處須行盤運次險及不險之地仍用舟載自乾隆十一年起至十四年三月底經運過鉛三百四十七萬觔每百觔節省銀二錢一釐四毫計節省銀六千九百八十八兩零業已咨明戶部而閩井鹽價亦覺漸平現在詳請增引者多於窮壤小民大定府志

不無裨益勘畢當將河道情形詳報在案幸今

皇仁浩蕩河神效靈近復飭差訪查河中除設立官渡以濟

行人及民渡有關往來耕種者取具保結準其撐駕其餘偏僻港口非係要道恐有奸匪暗渡悉行禁止外現在河之上下往來載物客舟名曰舡舡約計一百有零艘每艘可載鉛一千餘觔自魚塘順水至新龍灘水腳銀四兩二錢自二郎灘順水至猿猴每千觔水腳銀四錢若載鹽則每艘可載九千六百觔自猿猴上水至新龍灘每包脚銀二錢新龍灘上水至毛台村每包脚銀三錢五分察此日之情形似覺於國於民俱有成效但

他處之山乍高乍低石皆堅確此河兩岸盡屬高山石獨破碎而鬆動他處之土黃泥凝結此河一帶盡是黑灰沙土土鬆則石易墜兼有居民耕種山土人牛懇挖石卽滾下再閱各有灘之處傍卽有小溪山溝一遇山水陡發沖激沙石填積灘路難保開者復壅通者仍塞也是必定爲歲修之法每年冬令水涸之時飭該地方查有淤塞之處卽細勘估詳於節省項下動支僱夫檢備工完報銷立定章程庶前功不致廢棄而利賴及於萬世矣爰爲之記以志之

靖道謨

大定府志

卷三

十九

大定輿圖說

大定本水西烏撒地可渡河界其西南三岔鴨池諸河界其東南赤水河界其北大小天生橋落折渭河諸水分流其中東西五百八十餘里南北六百六十餘里山箐阻深巖洞幽邃幅幘之遼濶形勢之險固黔中諸郡始未有過之者自

本朝討定二安開設四府各置重鎮以控制之後改黔西平遠爲州隸大定府旋改大定爲州隸威甯府後以大定爲府威甯爲州所轄三州一縣西威甯北畢節東黔西南平遠府居其中藩籬密而呼應靈措置最爲盡善

府治爲昔之大方城安氏之巢穴也鳳山東翔五老西拱六歸南環氣勢雄偉宜自漢至明時代滄桑而濟火之封相承不替也黔西昔之水西平遠昔之比喇堪織金杓裏諸關箐昔時羅鬼所負隅也威甯三面接壤滇南烏門山徑崎嶇石龍蜿蜒起伏昔之烏撒府也畢節當滇蜀之要衝七星關扼其西木稀關障其東舊畢節赤水二街也水城居郡治之西南漢夷雜處複嶺迴溪築城設官以資彈壓誠桑土綢繆之至計矣

賀長齡

耐煩勞說與所屬府州縣官

大定府志

卷三

二

陳文恭公曰一郡一邑何事不待理於我何人不仰望於我每日所事非關百姓身家性命卽關地方風俗人心其中情僞百出疑難多端小心翼翼猶恐有誤豈可有厭煩之心惟曰孜孜猶恐不及豈可有憚勞之心故人謂居官則可免煩勞不知正爲居官則不能不煩勞亦不敢不煩勞也看案而耐煩勞則原委透明審事而耐煩勞則虛實可辨立讞而耐煩勞則供勘明切檢驗而耐煩勞則屍傷明確後來案無疑竇鞫因而耐煩勞則反覆研訊不事刑求真情可得批詞而耐煩勞則批斷切中小民不致守候再告稟覆而耐煩勞則確切對

鍼不致答非所問踏勘而耐煩勞則界址分明堂審更有把握籤票而耐煩勞則票內字句輕重名目多寡俱有斟酌胥役不能朦混而里民免無端之驚擾意外之株連耐煩勞以興利則利雖難而必可興耐煩勞以除害則害雖大亦必可除固有官司耐一時之煩勞而百姓受無窮之福澤卽有官司厭一時之煩勞而百姓受無窮之擾累者矣況事雖極煩雜自有端緒能耐煩勞則心與事習理得心安久之將有不煩而得不勞而理之效耐煩勞卽所其無逸之意然非平日實有勤恤民隱之心臨事未有能耐者卽偶耐於一二事終亦難以

持久故必先辦一片愛民真心方能始終無倦州縣之於民猶父母也幾見父母之爲其子而有不耐煩勞者哉無他心誠求之耳文恭此說誠洞悉吏疵民病而有慨乎其言之也而篇中不及緝捕一層蓋當時盜案尚少耳今則生齒日繁物力日貴飢寒所迫法亦難禁則惟有以民衛民力行保甲之一法而已然民不能自相使必須藉勢於官官亦不能遽使其民必須與民相親爲民任事使吾民感我之恩喻我之意上下交孚歡然若一家父子而後保甲可行何者賊亦吾民耳蹤跡往來窩巢寄頓民無不得而知也其魚肉柔良使稍有衣



食者皆不得安枕民無不欲得而甘心也特以差役從中庇護民不得見官而言情卽有控賊者官又多爲差役所蒙以致民則抑鬱而無聊賊更肆行而無忌此地方所以日見其窮而人心風俗因之益壞也若官民聯爲一氣則民之耳目皆官之耳目而見聞無不周民之手足皆官之手足而指使無不靈民有所靠官得所助以之集事無事不辦尚何尙小之能爲患乎此黔省目前急務也而其要祇在能耐煩勞之一念因就文恭之說引而伸之高忠憲公有言人生作令率爾放過真是寶山空回一生令名百年血食方寸有無窮之歎子孫

大定府志

卷五三

三

有無窮之報不過三年中一念自持而已懿哉斯言願與同志共勉之

攷第八

郭子章

莊躑牂柯攷

司馬遷稱莊躑范煜後漢書云莊豪馬端臨說頃襄爲是威王爲非莊豪爲是莊躑爲非然馬氏又云豪卽躑也考范書與註無豪卽躑之說不知馬氏何據雲南通志又曰豪躑裔也則又不知何據賈誼賦曰謂跽躑廉兮李奇註曰跽秦之大盜躑楚之大盜此以躑爲盜之

始也考遷固煜並無此說顏師古註云躑音居略反使躑爲盜不一引証之又不知李奇何據夫陌柳下惠弟其人甚明奇以爲秦人其疎可知又惡知不以陌故連及躑耶正德間雲南欲祠躑以此故不果尚書三元美云楚有兩躑一莊王大盜一莊王裔孫將軍平滇自王者此又不知何據然亦足以明王滇之躑爲非盜矣予謂遷固旣訛頃襄爲威王又惡知不訛豪爲躑故作滇黔志者當從范氏莊豪爲正又牂柯二字史記作牂柯班范二史作牂柯異物志曰牂柯繫船杙也韻書曰牂歌郡名通作牂又作牂歌通作柯近有作牂犸者直音

大定府志

卷五

三

曰牂音作牛肉重千觔犸音哥郡名非之非矣當從兩漢書牂柯爲正

### 田 雯

牂柯江攷

漢武置西南三郡一爲牂柯牂柯者繫船杙也華陽國志稱楚頃襄王遣將莊躑伐夜郎軍至且蘭椽船於岸步戰滅夜郎後人以且蘭有椽船牂柯處乃名其地爲牂柯史記云牂柯江廣數里出番禺城下後世求其地而不得遂以爲在定番城南源出蒙潭流大破鷺至泗城州通番禺入南海而郭青螺又引漢書郡有牂柯江

通番禺城下光武時牂柯大姓自牂柯江入貢之語以實之不知定番雖通粵西而番禺則屬廣東其城南之水僅僅一綫時斷時續未聞有以舟楫行者何以云數里之廣而當時大姓又何以由此入貢亦未詳於志文之故耳按且蘭卽今之遵義夜郎卽今之桐梓則牂柯江卽今之烏江自遵義湄甕至印江入思南城西之巴江水其地有牂柯城舊址漢牂柯守陳立據思邛名夜郎王將兵破之牂柯舊治旣在思南則牂柯之江宜在思南而其椽船之處不在巴江亦必在印江蓋印江與湄甕接壤而湄甕則且蘭舊地椽船於岸或卽此也若大定府志

卷五三

五

定番則去且蘭數百里且隔烏江何處椽船而步戰而牂柯大姓又何以舍楚蜀大道紆迴兩粵然後入關以致貢哉然則史記之言出溯其源也漢書之言通論其流也後之人旣不詳於本文又不明於道理是以有此誤也

晏斯盛

黔中水道攷

自莊躡略地椽船且蘭而牂柯江始出然循江循沅前後漢書異指江沅番禺莊躡唐蒙殊歸桑欽酈元西南未覈山溪分合略而不詳予旣著牂柯江論復據遊覽

所經考證圖志記其水道存隅識焉黔處萬山中形勢  
紆迴分著微渺所爲茹納羣流吞吐谿壑達江赴海緯  
眾水而經之者曰烏江曰盤江曰濛江曰銅仁江曰鎮  
陽江曰清江曰都江烏江卽夜郎水出修文縣西北之  
陸廣河其上自威甯州之八仙海營菩薩汎露州各溪  
澗流出過畢節縣西南七星山下爲七星水有關曰七  
星關溯威甯道滇南者多濟此元馮福可詩曰點蒼何  
蒼蒼環以西洱河百年雨露恩詎敢煩天戈轅門振烏  
撒衣帶踰牂柯巨險久已平故門尚陂陀云胡七星名  
亦復重不磨此已知其微塞矣今有橋曰七星橋明嘉

大定府志

卷三

二十五

靖間道人黃一中建橋西南有黑章水注之或曰卽墨  
特川元大德五年劉國傑破蛇節宋隆濟於墨特川倘  
此地耶又東流至大定府西南有落折河自府城西北  
二十里當兩山間破地吼出南流來注之又東過府治  
南東流右得以則河又東左得烏西河又東爲六歸河  
又東右有簸朶河合武着墮極織金等河水自平遠州  
界黑胯牛場汎東流來注之又東北有西溪河合楠木  
溪水東南流來注之又東至黔西州東南爲鴨池河有  
渡曰鴨池渡兩岸如劈崇崖如雪黔西大定要津又東  
至修文縣西北是爲陸廣河距修文五十里舊爲水西

驛道有渡曰陸廣渡明王文成公曉發詩有曰白鳥去邊迴驛路青崖缺處見人家謂斯處也有水自安平縣東南界東北流爲落陽河又東北至清鎮縣城西爲滴澄河又北與安順府東南之九溪河北界之三岔河谷龍河下流合而東北流來注之又有三潮水自修文縣北流來注之又東左合白花箐水又東左合沙溪水有渡曰黃沙渡又東有羅傅大河自永甯縣東南過遵義府西南流來注之又東過修文縣養龍司北是爲烏江唐李學士白流夜郎有烏江詔別宗十六環詩所謂白帝曉猿斷黃牛過客遲遙瞻明月峽西去亦相思者蓋大定府志

卷五三

六

其地云今有渡曰烏江渡關曰烏江關黔屬要津又東得刀靶水又東得養馬水又東至開州東北遵義府綏陽縣西南有渡曰茶山渡有水自桐梓縣西南正安州西至石子坡南過遵義府西南入湘水右合綏陽縣北之源溪水朗水傘水厚水南流來注之又有三江水自湄潭縣北合窄溪渡上關花水湄溪大河溪馬渡溪角路溪大溪諸水從廢容山司至望浦合流北來注之又南有渡曰落汪渡右合渡口水又南有洗泥河水注之東南至巘門有南明河水來注之南明河出貴陽府廣順州東北阿沙坝龍潭合濟番河會一宿河尤愛溪上

馬橋河四方河過中曹司至府城西南左受黔靈山諸泉水及澤溪貫城河水東過府城南右得富水又東南得龍洞河黃泥哨牛渡河諸水東由粗子口喇平司迤北至巴香合平伐三岔河八字河所匯貴定縣城西之甕城河再過平越府西界之清水河一曰皮隴江者東北經閩州東南由天星橋入平口棉花渡而東北會於巖門巖門在開州東甕安餘慶二縣西北有渡曰巖門渡爲黔楚蜀通津波流湍激合沓湖澎回眾壑之關竅亦一川之區要矣又東至龍泉縣西南有渡曰葛閃渡又東南有甕水高坪水袁家渡水白厓河水匯爲江界大定府志

又東過婺川縣東左有豐樂河得煎茶溪水登龍河水  
合洪渡河倒羊溪水東流注之又東過婺川縣東北界  
而達涪州爲涪水通於蜀入於江唐史稱城樂縣西一  
百五十里有涪陵水方輿勝覽稱思州有巴江水者是  
也盤江廣輿圖以爲牂柯江水出滇南小金沙江至威  
甯府界東南流爲可渡河有橋曰可渡橋山曰分水嶺  
威甯舊烏撒衛也明鄭畋曰子弭節西南抵烏撒普德  
歸驛驛門對可渡河堦詢水所從候吏稱水在西百里  
注壑而出流爲盤江又曰越衛城北二百餘里有七星  
關河源芒部界濱城海子通水西境會可渡爲盤江第  
大定府志

卷五

三

山水峭險狻猊叢居以是人無因而至據今七星關水  
爲分水嶺所界東出烏江不注可渡又小金沙江一名  
北金沙江來自吐番由雲南麗江府之塔城關入中國  
經鶴慶姚安武定東川諸府至四川之叙州府與岷江  
合入於東海與盤江之從粵以入於南海者源流迥異  
則鄭氏後說與廣輿圖所載俱舛矣可渡河又東南流  
迤西至木東汎有花魚碛水西來注之又南至龍場汎  
有水自曲靖府界流來注之又南至安南縣東北有落  
白河自曲靖府界東流來注之又東至永甯州西安南  
縣東是爲盤江有橋曰盤江橋爲大滇孔道兩山夾行

水勢湍駛不利操舟亦難架石明參政朱家民治鐵爲  
綆懸兩岸間覆以板東西各建樓堞行者賴之尋爲賊  
毀

國朝經略洪承疇統大兵定滇滇此復完之至今歲用修  
繕不廢盤江又南至普安州東又南至九盤江迤東至  
花江汎南有白水河得永甯州北之關嶺埧陵橋水南  
流至鎮甯州西而南合菜子河水至甯谷司又南合永  
豐州西北之打罕河南來注之又有拖長江自普安州  
沙泥崖東南流來注之又有卜者河軟橋河板橋河東  
南流注之又南籠府有都城河自安南縣界得江西坡  
大定府志

卷三

三

水至高武汎西合馬畢河南流合魯溝河過普市台大  
坡哨水東過府南境而東流注之盤江水又南至永豐  
州西南而東南過泗城府入於粵達於海濛江出定番  
州之濛潭俗亦稱牂柯江水水東南流有玉帶河從州  
北二里來注之又東有洗馬河從盧番司東南流注之  
又東南有環帶江合金石司之廻龍江羅番司之羅番  
河流注之又東南有雙峽水自小龍司東南流折而西  
注之又東南流有繞翠江從卧龍司南流注之又東南  
有小溪水自洪番司南來注之又奔龍江自大龍司合  
大龍河東流注之又東南有底方河自方番司南合小



番河雲溪水並注之又東南有冷水河從小程番司南合連江水東流注之又東南有腰帶河水自廬山司南合擺游河東流注之遂東過泗城州而歸於粵銅仁江又曰大江出西陽司界過提溪司西有提溪出濫泥山引流東南注之又東至省溪司南有宇羅水流來又有甕溝灣水自思州府西都平司南而東流過府城南又東與星石江合流爲施灣而東流來注之又東至沅州而入沅水以達於長江清江古曰劍江又曰長江舊陷苗境舟楫不通雍正七年總督鄂公爾泰巡撫張公廣泗奉

大定府志

卷三

三

旨清登夷人歸誠

題請開濬自都勻府至湖廣黔陽縣總一千二十餘里過行無阻江有二源並發都勻府山澗中繞城西南過都勻副司界左倚楊安汛右表琵琶木老牛角高基諸塘迤東至東嶽廟前又東過八寨協營前協有城雍正九年新建前面太平汛鷄買螃螬甲些代犁後負楊排大肚小肚左倚烏哇楊烏巴告鉄陀者良右夾楊堯斗魁龍井寨洞延屬亦一聚矣自此而北左得舊豐甯司水迤東過麻哈州東南又東至清平縣界受平越府三江口水三江口者麻哈江馬場江羊場江也麻哈江一曰

兩岔江又曰算水一發州西樂平溪一發州東香鑪山  
東北流合勇勝溪凱還溪舟溪江山河北流至平越府  
東南馬場江發府治西北從金橋東南流而注麻哈江  
羊場江發府治東北二十里南流亦注於麻哈江是爲  
三江口其左有橋曰葛鏡橋距府城五里爲滇黔孔道  
三江口水東流過楊老驛南又東至清平縣南界而注  
於清水江江水東至黃平州西重安驛南有重安江合  
高溪水自黃平州西而南流注之又東南過巖門司南  
又東過甕坝汛南凱里汛北而東過舊偏橋衛東南至  
於丹江營北有九股河發源九排大山自鷄港台拱東  
大定府志 卷五三 三

北流又有丹江河自凱里流來過楊條與九股河合爲  
小江從西南流來注之小江兩岸容山司屬又東至下  
秉汛南稿貢汛北經交架董隴八稿八亮柳受而東至  
清江鎮北鎮城雍正九年新造鎮左爲董兜南脚右爲  
南埃階東後接公鵝堡汛前夾柳利柳羅董敖寨洞連  
屬實一江之控制矣清江自此又東至下革東有水自  
上旁洞該捷交蔑烏順南琴西南來又有水自古州界  
之宰磨柳受下及旦西南來又有水自白羅宰統南來  
會流爲烏沙河東北流注之由此迤南包白堵伐迷發  
號遺賴培兜柳戶俾刀培牛而東至柳濟汛南流沿排

敖柳再趨甲柳傍柳受排交南孟黃寨而東至天柱縣界之茅坪右合亮江小滴水東至沅埕塘塘崖絕壁有字摩挲可觀明永樂十二年總兵梁福等進討諸苗還所記也又東南過沅口至黔陽縣南入沅水而達於楚江古州江亦曰都江舊臨苗境雍正七年總督鄂公巡撫張公奉

命清釐夷人歸誠黔粵舟行無阻其上源有邦水河出都勻府東南合三道河流入獨山州至爛土汛右合馬場水左合爛土司西南溪水東流爲都江其汛左有城門坡右有水巘塘西有獨山司東有巴開打鋤等寨明宏治五大定府志

卷五三

三三

年副都御史鄧廷瓚鎮遠侯顧溥討爛土蠻蓋斯處也又東歷三脚塋小打孟南歷拉攬打略柳登三汛經來牛寨而至來牛營營臨江北岸自營而下有風柳溝小溪北來注之沿楊翁楊邦牛羊場隴寨平宇平裡賞耗俾背八匡而至高舊營南其北有小溪注之營臨江北岸歷高孖高表而東過定旦汛汛在南岸沿寨比孟冬滾董妙有八圭革赧至俾開汛歷黨略俾開滾左而至都江汛經寨沈孟潘蜡子而東至古州城西有溶江水自清江台拱界南瓦山流出行數十里經冷衣下合崩坡塘水經八架會於孖有過平昂稿科至古州城西北

有車江水自清江高亮山流出經官州朗洞寨蒿寨側  
又有水自黎平府屬之上洞流出經育洞巴王會於山  
州過列樂鄉月寨日寨田寨麥寨頭藏怒寨合於溶江  
下至古州城繞州城東南與都江會州城舊為諸葛營  
枕山面水土田平行饒澤黔中一沃壤也宋咸平元年  
古州刺史向通展入貢明洪武五年江陰侯吳良三十  
年楚王相王都督楊文皆用兵於此雖稱平定亦屬羈  
縻今雍正七年總督鄂公巡撫張公宣暢

朝廷德威悉歸誠樂附因以其地建城城北接黎平府界

有八匡冲登風坳利洞高洞東暨寨麻左襟溶江右帶

大定府志

卷五

五

都江左為高文高武高同高寨八鐸俾隴佳兩佳化謝  
能黨剛九溪龍早雞底雞弄右為喇候烏恩擺因怎冷  
領講養赫歸奴滾縱蜡岑人烟綿絡阡陌綺連幾既庶  
矣自此而東南經獨石蜡亮流至八及寨南有水自苗  
古九得來注之沿傳洞亭洞平雜孖温上下蘇洞平江  
寨至下江營又有小溪曰孖女江自東郎官雄流出由  
孖温南來注之而東南經蜡鵝扒沙郎洞巨洞至丙妹  
汎北有冷裏及黎平屬之溶洞古州之八孖永從之平  
舍丙妹等寨郎洞下有小溪曰孖覽江自寨正寨平流  
出北行又八孖之上有曹平江自黎平府之曹滴司流

出南行並流注之又東南過懷遠縣界過相思石碑二  
寨經車寨梅寨沈口南下而入於粵達於海總諸水經  
流七達長江者四歸粵海者三舊五新聞二

### 靖道謨

#### 夜郎攷

且蘭夜郎皆南夷名史記云西南夷君長以十數夜郎  
最大是且蘭非夜郎匹也楚莊豪循沅水至且蘭楸船  
於岸而步戰遂滅夜郎以且蘭有楸船處乃改其名爲  
牂柯豪旣留王滇夜郎且蘭仍自立爲國漢武平南夷  
置牂柯郡領縣十七後漢領縣十六皆首敘且蘭而夜  
大定府志

#### 卷三

#### 三

郎反爲屬縣晉永嘉二年分牂柯立夜郎郡領夜郎四  
縣於是夜郎始列於郡劉宋蕭齊皆因之隋地理志有  
牂柯郡復有牂柯縣而夜郎之郡縣皆無梁陳周書俱  
不志地理遂不知廢自何時也唐以隋牂柯郡之牂柯  
縣置播州而縣有三夜郎之名武德四年析夷州之甯  
夷縣置夜郎貞觀元年州廢縣亦廢八年析巫州之龍  
標縣置夜郎十六年開山洞置珍州亦置夜郎縣長安  
四年以龍標所析之夜郎置舞州天寶元年更縣名爲  
峩山龍標之夜郎當在今黎平鎮遠之間夷州之夜郎  
當在今石阡思南之間珍州之夜郎則今遵義之正安

州桐梓縣矣巫州夷州之夜郎或廢或更名珍州之夜郎置之最後而自唐迄宋名未嘗改於是人止知播州之為夜郎而亦不復知夜郎之大矣漢書云唐蒙從巴蜀祚闢入遂見夜郎侯又云夜郎東接交趾自西徂東奚啻千里亦無怪當年夜郎之自大也

### 辯第九

#### 鄒漢勳

#### 鬼方辯

鬼方元明之儒多以為即羅氏鬼國然古無是說也易曰高宗伐鬼方三年克之又曰震用伐鬼方三年有賞

大定府志

卷三

三

於大國虞翻注云鬼方國名于寶注云鬼方北方國世本陸終氏娶於鬼方氏宋衷注云鬼方西落鬼戎於漢則先零羌是也漢書匡衡傳衡上疏云詩曰商邑翼翼四方之極壽考且甯以保我後生此成湯之所以建至治保子孫化異俗而懷鬼方也應劭注曰鬼方遠方也後漢書西羌傳曰武丁征西羌鬼方三年乃克故其詩曰自彼氏羌莫敢不來王及武乙周古公子季歷伐西落鬼戎注前書音義云鬼方遠方也竹書紀年武乙三十五年周王季伐西落鬼戎□□十翟王是則先儒之言鬼方者或以為遠方或以為北方國或以為西羌究

未有云西南夷者攷西南夷以鬼爲名亦起於唐時唐書南蠻傳敘白水蠻云夷人尚鬼謂主祭者爲鬼主每歲戶出一牛或一羊就其家祭之送鬼迎鬼必有兵因以復仇云又云烏蠻其種落分七部落一曰阿芋部居曲州靖州故地二曰阿猛三曰夔山四曰暴蠻五曰盧鹿蠻二部落分保竹子嶺六曰磨彌斂七曰勿鄧俗尚巫鬼無拜跪之節其語四譯乃通大部落有大鬼主百家則置小鬼主勿鄧地方千里又遍檢其篇內有鬼主之號者兩爨蠻白水蠻之外又有黎州南婆鹽十鬼主戎州管內有馴騁浪三州鬼主嵩州又有夷望鼓路西

望安樂湯谷佛蠻虧野阿醯阿鷄鉤蠻林井阿異十二鬼主考馴騁浪即今屏山縣地黎州即今清溪縣地勿鄧即部川即今越嶲廳地嵩州即今甯遠兩爨在今雲南府曲靖府是則唐代有鬼主之地於今爲屏山以西越嶲冕甯以東清溪以南雲南省之東偏皆是蓋鬼主本烏蠻白蠻之稱也唐書又云鬼主阿佩內附會昌中封其別帥爲羅甸王世襲爵此即羅氏鬼國之所始而阿佩即烏蠻盧鹿部也宋史黎州諸蠻傳亦云夷俗尚鬼謂主祭者爲鬼主故其酋號都鬼主其有鬼主之稱者由後兩林邛部川及姚州僕夜自號至天鬼主皆烏

蠻也然唐宋兩史咸不以烏蠻卽古之鬼方元范匯作八番順元宣慰司題名記始云八番順元相傳爲夜郎牂柯之表殆古鬼方之境歟是則羅氏鬼國之爲古鬼方說自元人起古無有也要之鬼方之說當以先零羌爲定今之青海二十九旗卽其地烏蠻之地於禹貢爲梁州黑水東北之境在周寶黎微盧彭漢之所統轄非鬼方也

解第十

鄭 畋

牂柯江解

大定府志

卷五

三七

牂柯江名始見於漢史近羅念菴作廣輿圖謂烏撒七星關水卽牂柯江源折流爲盤江經泗城州稱右江達泗城會番禺入海圖解有齟齬處然大要卓然得之顧質之人鮮有能識者則以地淪於甌脫而人壅局於觀聽也故作牂柯江解崑山子田余弭節葢度盤江云江廣僅百餘步自貴筑入滇路未有不濟盤江行者沿江上下絕擊汰之跡水勢批巘瀄汨土人謂水漲時漂巨木撞舟峭壁箐嵐入跡罕入下流至打罕縣泗城界舟船始通焉此余愿普安斜出霑益境趨烏撒衛校士抵烏撒普歸驛驛門對可渡河瑛河之南霑益境也河之



北烏撒境也驛抵衛城八十里詢之候吏云河水在西  
百里注壑而出從此而東盤江乃此水之注也越衛城  
二百餘里有七星關河詢之故老云七星關水源出芒  
部界濱城海子通水西境會可渡河為盤江地第山水  
峭險狹狻叢居以是人無因而至總前二說固未晰知  
牂柯江所在而牂柯江為盤江則無可疑者按遷史牂  
柯江者莊躄兵滅夜郎椽船處也高戎本古夜郎國今  
自瀘戎入滇路未有不由七星可渡行者當唐蒙風論  
南越也越人食蒙蜀蒟醬蒙用蹤跡之夜郎臨牂柯江  
南越以財物役屬之以疆漢巴蜀之饒固可賂誘夜郎  
大定府志

卷三

三八

為置吏浮師牂柯江出越之不意制越之奇也武帝由  
是拜蒙為中郎將從巴蜀荏關入遂見夜郎侯多同聽  
蒙約束還報以為犍為郡發巴蜀卒治道自犍道指牂  
柯江是時通西南夷道戍轉相鑲數歲道不通西南夷  
又數反發兵興擊費耗於是罷西夷獨置南夷夜郎兩  
縣稍令犍為自保就至唐時因以播州之珍州為夜郎  
後人止知珍州之為夜郎不知古夜郎從高戎直通甌  
駱地方數千里也蒙初至夜郎多同問蒙曰漢孰與我  
大以道不通故名自為一州主不知漢廣大令人泥區  
區之珍州為漢夜郎又窘步蹊符疑指牂柯江其亦昧

莊生秋水之見矣然當漢四道伐南越也使馳義侯因  
巴蜀罪人發夜郎兵下牂柯江咸會番禺乃今盤江灘  
瀨猶惡須無人行豈今古時異勢殊邪抑當治道時二  
歲費劇夷之力師過不無罌箴盤剝之苦至打罕乃得  
沛乘舟楫故兵遲至而南越已平邪載考八校回軍時  
卽擊滅曾反殺漢使者且蘭遂平南夷置牂柯則自烏  
撒逶迤而南皆其地舊載雲南廣西府亦牂柯羈縻屬  
也泗城以北如都勻等處皆牂柯界內矣是時印符冉  
驩君長聞南夷得漢賜過厚皆求置吏比南夷乃使司  
馬相如往賓之於是關隘斥南至牂柯爲徼則越雋等  
大定府志 卷三十一 三九

郡界接三部也然則牂柯江之源委其亦昭然矣夫山  
川經絡化工神運余嘗用是而求之自岷山之陽至於  
衡山蛇蟻虬從從衡迤南五嶺皆律卒東蟠五嶺者漢  
入南越有五道行西北山峻轟然非無可梯正以夷荒  
非通道之所耳以此見牂柯膠戾之山巋然爲神州之  
拱臂也荒徼山蹊以地圖察其阨要不過數寸其間相  
去數百千里生長其地者尚未能習其險易也唐蒙浮  
舟牂柯之策誠爲鑿空初時臣民驚疑蠻夷煽動然勞  
師殫貨卒置郡如堵雖來喜功之譏自是華夷一統亦  
足徵武帝善任成功矣夫唐蒙通南夷之二郡犍爲牂

柯也相如通西夷之二郡越嚮益州也而沈黎武都等郡不與焉真雄風哉禹列九州梁南肇有益州昭神州又益一州也益州列郡屬矣昆明重建益州郡昭益州又益一郡也其視東晉不競委神州於劉石僑州名以削弱不亦大相逕庭歟嗚呼亦可以觀盛衰之世變也余於是重有感焉

大定府志卷之五十四

外篇四

知大定府事都陽王允浩原本

知大定府事河曲黃宅中重輯

記第十一上 文徵四

王守仁

靈博山象祠記

靈博之山有象祠焉其下諸苗夷之居者咸神而事之  
宣慰安君因諸苗夷之請新其祠屋而請記於予予曰  
毀之乎其新之也曰新之新之也何居曰斯祠之肇也  
蓋莫知其原然吾諸蠻夷之居是也自吾父吾祖邇曾  
大定府志 卷五十四 一

高而上皆尊奉而禮祀焉舉之而不敢廢也予曰胡然  
乎有庠之祠唐之人蓋嘗毀之象之道以爲子則不孝  
以爲弟則傲斥於唐而猶存於今毀於有庠而猶盛於  
茲土也胡然乎我知之矣君子之愛若人也推及於其  
屋之烏而况於聖人之弟乎哉然則祀者爲舜非爲象  
也意象之死其在千羽旣格之後乎不然古之桀鶯者  
豈少哉而象之祀獨延於世吾於是蓋有以見舜德之  
至入人之深而流澤之遠且久也象之不仁蓋其始焉  
爾又烏知其終之不見化於舜書不云乎克諧以孝烝  
烝又不格姦讐腹亦允若父已化而爲慈父象猶不弟

不可以爲諧克諧於善則不至於惡不底於姦則必入於善信乎傲象亦化於舜矣孟子曰天子使吏治其國象不得以有爲也斯蓋舜愛象之深而慮之詳所以扶持輔導之者之周也不然周公之聖而管蔡不免焉斯可以見象之既化於舜故能任賢使能而安於其位澤加於其民既死而人懷之也諸侯之卿命於天子周官之制其殆倣於舜之封象歟吾於是益有以信人性之善天下無不可化之人也然則唐人之毀之也據象之始也今諸夷之奉之也承象之終也斯義也吾將以表於世使知人之不善雖若象焉猶可以改而君子之修

大定府志

卷五

二

德及其至也雖若象之不仁而猶可以化之也

陽明先生文集有靈博山象祠記爲安宣慰作也宣慰之境土於今爲大水平黔四邑地及貴陽修文安順清鎮二縣之西北境六城志乘之所紀咸無所謂靈博山者蓋地隨時而異名或紀載不備也象封有庠見於孟子然不知其地之所在史記正義引輿地志云零陵郡應陽縣東有山山有象廟王隱晉書云此本象陵縣北東五里有鼻墟象所封也水經注湘水篇云應水又東南流逕有鼻墟言象所封也山下有象廟言甚有靈能興雲雨余所聞也聖人之神曰靈賢人之精氣爲鬼象生不慧死靈何啻乎則是象之封在應陽也今爲永州之東安又按史記正義引括地志曰鼻亭神在營道縣北六十里故老傳云舜葬九疑象來至此後人立祠名爲鼻亭神此當在今之道州柳子厚集言零陵有鼻天子神是則永道之間多有象遺蹟而外此則未有聞焉近世廣輿記云安氏爲傲象之遺種其說不古然以水西地有象祠徵之或有不誣也或曰營之爲字從邑自縣名之外別無它訓字又收於說文說文之字咸本史篇營

之爲古國邑名久矣營廡音近本象傲之所封故獨有其祠若應陽之鼻墟黃溪之鼻天子廟營道之鼻亭神則奔舜喪所經恩之蹟象化於舜卒爲善人如陽明先生之云故所經恩輒有惠愛百姓爲之立祠善長子厚之論尚爲明而未融不必泥也象之封在營則東會九疑之葬道出應陽泉陵之間尤爲允當廣輿記之說其或可存乎若羅長源之以象氏爲象封者直無稽之言不必深辨也靈博山雖不知其處所要當在水西境內故錄之於此以俟博識

### 鄒德溥

### 郭青螺祠記

貴筑介在要服古夜郎羅施之地後漢武侯擒孟獲濟濟火從之以從征功表王羅甸則今安氏遠祖也安氏立武侯廟於大方前爲關侯廟巍然兩峙水西隔烏江大定府志

卷五

三

一衣帶便是播州播酋楊應龍梟獍負險逆顏行王師屢征不克聖天子赫然震怒拊髀思安攘臣廷推秦和郭公才猷將略足膺重閫萬曆二十七年春三月奉敕開府貴州兼督理湖川軍務夏四月匹馬入黔黔中物力單弱一切兵食仰藉楚蜀協濟綦江一陷全貴陷危公請增兵益餉以充兵實計募兵守偏橋等十二處要害以遏寇衝調補文武將吏參劾規避以嚴紀律身先臨賊以倡勇敢總督長垣李公移駐重慶請上方劍與公協心朋力而軍政肅然矣明年二月公誓師四月進兵首摧賊鋒宣慰安疆臣斬關先登弟堯臣佐之大水

田一戰獨寇七路自興師至壁海龍至纔百餘日六月  
應龍伏誅剝屍傳首妻孥田氏朝棟等七十二名檻俘  
闕下是役也貴州斬獲首級四千八百六十生擒首從  
一百五十八俘獲賊屬男女一千一百一十招降播民  
二萬九千八百五十奪獲賊仗不可勝紀天子賚軍興  
百四萬金公僅用其半漕糧三十萬鍾用十之一餘悉  
還帑藏恬然奉身而退溫旨款留以定播地經理郡縣  
新設遵義平越二府正安黃平二州遵義桐梓綏陽仁  
懷湄潭龍泉甕安餘慶八縣改置安化貴安二縣播地  
方平皮林復熾賴公餘威進勦擒斬俘獲與播略相當  
大定府志

卷五

四

未幾議播水地界公與新城王司馬公議令疆臣入苞  
茅代播輸將於黔而沙溪仍舊又未幾議鎮雄公命堯  
臣挈妻孥還黔代兄爲宣慰而鎮雄還隴人言公慮遠  
謀深功高事苦然哉先是公以二品誥命改結京銜廕  
仲子生員孔廷入監讀書及敘播功升右都御史兼兵  
部右侍郎廕長子孝廉孔建男武舉承昊世襲錦衣衛  
指揮僉事三十五年公陳情終養至九疏上不得已準  
養親以俟起用遂得舞斑衣於膝下朝夕承歡至三十  
八年五月大事已襄榮膺卹典四十年五月敘路山二  
苗功晉兵部尚書兼都察院右副都御史賜緋魚服給

三代誥命孫吳晉錦衣衛指揮同知世襲公乃建忠孝寺於里以報君親恩四十一年皇太后頒賜藏經救賜寺名大忠孝禪寺公在黔十年始終出處忠孝大略如此黔人思公恩建生祠祀公者七所俱載祠錄乃宣慰安君堯臣獨建祠大方名曰懷德與諸葛武侯壽亭關侯鼎足而三惟生祠之建自昔有之石慶爲齊相齊人高其行有石相祠欒布守燕燕人服其廉有欒公社至荀勉朱邑之遺愛童恢韋義之異政載在史冊班班可考而未有專祠殊方者尤未有特祠於宣慰者有之自今郭公始宣慰率羅甸人合武侯關侯郭侯而並祠之

大定府志

卷五十四

五

真可謂懷德矣夫德有厚薄懷有深淺尸而祝之社而稷之春秋俎豆之懷其機也淺郭公曰忠順宣慰亦化而忠順無迂纖毫郭公曰仁厚宣慰亦化而仁厚無隕蠕蠕仁義道德之懷其懷也深畏壘之細民竊然祠庚桑子庚桑子不釋然曰是妄鑿垣牆而殖蓬蒿也何也爲淺也物不答施於天地而天地亡恫子不謝於父母而父母無憾何也爲其深也羅甸人無庚桑郭公而天地父母郭公是名曰感其感無心是名曰宮應角應其應無跡懷之摯也祠以柱史南海馮公奕垣左方伯通政使宣國趙公健配享蓋左右郭公施德於黔者例得



並書

黃元治

平遠風土記

康熙二十有二年癸亥余奉除書判平遠冬十月抵任越明年甲子春正月府改爲州余與太守孫茲菴先生遂皆以二月去計余受事僅百日於茲土無毫髮補益而諸苗及父老以余二人連去相嘆惜於此見荒徼人心猶足以爲善余冀官斯土者仁漸義摩導苗民於爲善之路爰取風土略記之以告後之君子平遠爲水西安氏比喇地自康熙三年

大定府志

卷五十四

六

上命吳三桂平水西奄有其地遂建置府治與大定黔西威寧並稱新疆而平遠實爲三府寇東連新貴南距鎮寧東北爲黔西界西爲雲南霑益州界城北五里即大定界又北爲威寧界惟霑益州爲最遠截彼補此地可三百里云其城土牆厚尺許高不能丈遇霖雨即頽塌修補無虛歲虎豹麋鹿亦時時遊城中府廳皆草舍背負石山巔巖峭拔如劍豎戟張衛衙之牆以竹鱗隙珊瑚內可窺而盡川堂而外梁柱傾欹門壁空洞兵家鷄鴨犬豕悉雜入而臥於堂上其往來街市者或憚紆途則往往徑此以取捷莫能禁止其經制城郭官廨乃如此

府故有黷宮自逆賊折毀兵復乘之遂蕩然無有一存者先師木主寄於僧寮過者傷之諸生文武可六十人非土著皆散處他郡邑其城居者五六人耳學校人文如此其寥落也境內頗多田因田制里有九城東爲向化里又東爲懷忠里界新貴爲興文北慕恩南太平迤西爲敦仁崇信去城皆不遠獨時豐歲稔二里懸於西北與霑益州隣往往有鞭長莫及之嘆歲徵糧額八千石經亂荒蕪今視前額減已過半矣未二十年而田賦增損已如此城中皆兵惟東西二門外流氓落落十數家至羣苗則皆僻居溪洞籠箐中如鳥獸之巢穴不

大定府志

卷五

七

可以近人苗非一類若羅鬼若犵狁若白苗黑苗花苗若祭家子龍家子狝家子犵狁種有五羅鬼亦分黑白猓猓二種安氏黑猓猓也其白者下安氏一等如今頭目阿五是獨狝家子中頗有知文墨者其最桀驁不馴則爲羅鬼諸苗莫不畏憚尊奉之其文字語言不可曉字多方形間亦有能爲漢語者飲食起居諸苗亦相若惟衣裳顏色則各從其類如白苗白衣黑苗黑衣是也其男子非充隸役不薙髮髮上束復以青布疊寸闊自腦後經兩耳結於前餘其半並髮紉之作尖髻坐額上盤曲如螺面垢不甚澣衣止齊膝膝以下布裹之草履

足背類象皮帶朱髹附帶又有皮夾袋袋外插短刀肩不能擔凡薪米之屬悉背負善走躡懸巖捷於猿鳥結寨而居屋以草編箐爲牆梁柱無鑿柄以葛藤裹束其椳椽無衾枕褥簾眠則藉草天寒則披蓑夜則燒煤稍富者得衣氈然無袖拗其左右使圓之以襯兩肩至胸項之間結以帶頗力耕耨熟則翦其穗束而跨諸屋梁俟極乾舂而糶之或以換鹽布自飯稗米土碗出門則以竹篾結兩兜如碗大一盛飯而一覆之以繩繫腰上遇澗泉則以小木瓢汲淘而下得鹽少許置掌心舂之味甘於肉矣見官府故作畏謹狀其心至詭譎不可測

大定府志

卷五

八

然諭以誠信亦每每折服其技善殺弩及烏鎗連刀挾仇怨以殺人父母死無棺夾以兩木板而橫葬之擊鼓吹喇叭親戚宰牛羊鷄豕以助名曰作慶勢挾弱苗苛索所有名曰扯手其婦人衣長領裙襖百疊文如錦如繡而粗澁又如氈氈亦草履頭髻或中或偏或貼雲於額或髮際橫一梳而罩以青布無婚娶禮女子踏歌男子吹蘆笙和之音調諧則配合行必以羣或採茶採薪採野菜背負如男子此諸苗之俗如此其山盤裹層疊峰巒多倒側極類苗子撮髻環城諸山巖而少樹豐茅曲塢虎豹穴之冬則沿山而焚千嶂如炭山之陰即茂

林翳天人跡罕到山鬼往往吟嘯於其間雲罩巔頂即大雨雨必連旬冬則白氣彌山望之如雲寒凝草樹皆成冰如瑤花玉筍堅厚圓潤絕非雪比土人謂之凌山多怪石如百獸蹲舞首昂尾掉欲起而搏人又多怪洞恢敞屈輿中有深潭爲蛟龍窟宅頂懸石乳狀類難名巖隙漏天陰濕鬱蒸以故多雨其水惟簸朶河最大深數十丈沉碧不流臨之冷人毛骨兩岸危峰礙日密樹蒙烟虎嘯猿啼人聲斷絕雖高卓之士過此不能不悄然而悲矣至穿城一水發源鳳凰山下行數里水忽斷溪底攢石聳角穿空翔飛兩岸者如大風吹烈燄而捲

大定府志

卷五

九

狂瀾也溪自城南入接東南兩龍潭水合流出北門又合別流東北行十五里復忽斷高山阻截水乃厚蓄其力衝山腹而洄之遂貫穿以行漁舟然炬入窮之莫如所底山水之怪險有如此其產則漆雄黃黑鉛皮器小馬熊膽麝香鷄蹤鸚鵡白鷗箐鷄鷄長尾白羽而黑其邊周圍如淡墨之所畫極可觀然苟蓄於家見人輒避又有黃白桔梗柴胡白芨菜似野芹土人采而蘘之謂之羅鬼菜白芨根似葶薺苗婦取以浣衣甚潔白其花似蘭而色紅亦最艷然而不香此與箐鷄羽毛徒有文采而皆不適於用也其道路關隘則紆屈羊腸苗賊嘯

呼剽掠出沒如鬼蜮東路由威清入有象鼻嶺險絕嶺下則簸彘河渡河爲雷打坡坡頂大寨名崖上兵踞崖巔下跨大河以探象鼻則威清之路可以無梗東北路來自黔西者爲紅巖爲猓結河河之南爲沙塘崇坡密箐行者膽掉從大定入爲北路自比渡坡過六歸河南上青岡嶺嶺上逼天飛鳥欲絕說者謂屯兵白沙塘東渡猓結以扼紅巖之險結壘而戍青岡北阻六歸而策大定兵據比渡坡以爲藩籬如此則三府相爲犄角賊不敢出兔窟而陸梁矣府治南南行爲鳳凰山高三十里頂平闊山麓坦衍穆將軍戰壘在焉由鳳凰山六十

大定府志

卷五

十

里至鎮壺三岔河即吳三桂積米接濟平遠兵糧處今其倉尚在以鳳凰山爲首象鼻嶺爲尾連帶黔大以爲羽翼則平遠腹心可帖席臥矣其要害大略如此至諸苗各有寨寨有頭目阿五爲之魁阿五者安坤奴也坤死五逸出迨吳三桂反五欲挾還水西地亦稍爲之助適穆將軍提大兵恢復新疆五乃翻然出迎捐米數千石餉兵將軍以爲功故自是遠近無不知水西有頭目阿五者先是安坤妻祿氏烏蒙女也安坤旣誅祿氏逃入烏蒙垂二十年矣三桂滅阿五乃奉其母潛自烏蒙歸舊巢謂祿氏有遺腹子名勝祖云未幾有誣阿五謀

反者大定張總鎮逮而鞫之謂其罪當誅祿氏急乃懇  
總鎮實誣枉總鎮竟削職而阿五晏然

天子復念捐米功授勝祖宣慰司銜阿五六品長官司銜此  
甲子年平遠府改州時事也大抵苗獠自漢唐以來未  
嘗郡縣治也及今建置未久又煽於逆氛雖已平復然  
欲其一旦皆帖然而臨詩書禮樂之範此實難矣當置  
郡之初設知府通判推官以治之未幾推官裁而知府  
尊崇佐以通判仍足以樹恩威而廣彈壓矧又有協將  
屯重兵鎮之故諸苗俯首以就羈紲不敢動乃前之議  
者謂挈土地還之可坐而受其貢獻今之論者又謂滇

大定府志

卷五十四

十一

黔已蕩平兵應裁平遠兵二千二百裁四之一然既建  
爲府矣苗獠亦赤子也已視爲子苟有以子不肖不習  
知詩書禮義將舉而度外置之彼如出柙之虎兇弄其  
毒弩長刀之舊技攘臂而咆哮其孰能禁之且府又改  
爲州矣彼視州官不能如太守之尊崇此其心亦稍稍  
菲薄之而勝祖阿五又以受宣慰長官之銜諸苗繫心  
此其勢又足以抗衡拔其抗衡之勢而行以菲薄之心  
使復無重兵彈壓之官長將有所難堪此如水行亂石  
中心激而為波濤高隄厚岸彼猶將薄之顧可自撤其  
防耶是惟官斯土者清儉持身行仁希義推誠以感動

之而鎮將復時加訓練積威聲而強根本則患消於水  
萌澤流於漸染庶使其趨善如歸而化詩書禮義之俗  
歟

羅英

鄉征記

余去家九年矣每一念至輒不勝鄉國之思歲庚申五  
月余遊六廣十九日鎮西佐戎秦子襄遣使持緘來告  
余長子湘琳爲逃卒所羅余偕江若心膽墮地是夜傍  
徨不寐江若時守濯靈湘兒丈人行也語余曰計莫若  
單騎往探二十晨起二十四抵西溪道路草莽惟塘卒  
大定府志

卷五

十二

數輩執兵而立夜宿乾堰山魑啾啾偕行無翕目者二  
十五經叵羅箐麓叢中人骨累累人言去年守戎張某  
者帥勁卒五百人執芻糗夷賊伏藥弩一軍盡沒後經  
是者非數百人控弦持刃莫敢過午至九里箐見殺人  
血新喋於石眾股栗西抵大定有尸陳於隍三兩婦人  
哭其側訊之即前路新血喋於石者入城井市零星老  
稚菜色二十六午至歸化橋遇賈鹽陳某者余鄉人也  
備問湘兒對曰某適自彼處來知無恙奈朝夕糜食何  
余疑始釋晡抵阜橋步至磻溪翹首隴塋白楊衰草淒  
然淚下入關城關基瓦礫确确屋焚灰撲面而演武龍

山悉戰北逃卒營壘劔目豎眉橫欲搏人余憐之急自  
鎮南經通津無一衛中人至武安始見襍藍面鵲幾老  
人坐顏檐嚮卷憫切余前揖若人欠身蹙額瞠視曰而  
非奏五耶城郭依然人民非舊死者物化生者流離而  
來胡爲者相對泣數行下是夜宿英濟廟廟風爲壯麗  
觀時營火延燒殆盡詰朝二三老來視曰自而去年歲  
幾何人事不可復識矣吾衛洪武二十一年建三百年  
中遭兵火八未有甚於是者正統十四年蠻寇乘虛攻  
城先指揮林晟母蔡夫人拒退之城鄉安堵加故通津  
門石記可考也嘉靖壬子芒奴率眾至城下圍三日守  
大定府志 卷五  
三

戎李宗祐設伏郎機圍解大變莫如天啓壬戌安商叛  
樓車軍器山積穀米紅腐守民十倍於降而太平久文  
吏相習不知兵城陷然洞如朱昌左所旱屯砦如北望  
屯如五百戶皆嬰守自固崇禎己巳賊復至丁丑方總  
戎殺伐沙諸彝復叛城潰不去者紳士民三十餘家而  
鄉無恙甲申流寇泊永寧烏蠻乘入城子女少壯被擄  
衰老置烏撒鄉無他虞丙戌城復己丑流寇從滇至城  
潰士民走避朱昌洞破子女被掠紳士放置城中遠  
鄉居民皆在室丙申秦晉搆城陷鄉依然丁酉孫可望  
據戈犯滇兵北城潰村堡雞豚鮮有失戊戌白文選提



師駐畢縱兵掠糧城潰遠近避山箐亦無逃散失所者  
本朝已亥城復至今十有五六年民用安康咸熙然有樂  
生之心矣無何康熙癸丑冬滇兵起用度不敷正賦外  
有借助有變價有門攤有加派有預征有賸費有糴採  
硝磺鐵冶站馬長夫徼至柴炭柳灰繩蔴無一不呼民  
民舐死猶強應也戊午岳衡敗湖南半壁瓦解逃卒彌  
埜所在殺長吏奪民妻戕民命了無忌憚遠縣衛所協  
守之兵尤而效之民生用是益不侔吾衛實邊地省會  
文武諸大僚威令不行鎮是者貪淫無厭初強民僕爲  
兵一僕人妻子六七口盡去田土荒什七繼下鄉括借  
大定府志

卷五

十四

殷實大戶金帛少拂意輒中害之夜則塗面執火燒劫  
兵媼白晝成羣入民室大索米士民求安一刻枕不可  
故五所五十屯田十鋪兩站盡逃無孑遺土田荒遍矣  
三百年兵火入未有甚於是者也余曰是害殆不止吾  
畢爲然滇黔蜀粵南楚莫不然至兵媼索米之害甚有  
千百爲羣擄剝府州縣正印官衣冠毆打至寢室者此  
亦惡業氣數使然耳第衛軍即兵也吾衛設兵起何年  
曰爾坐吾語女吾衛潁川侯前鋒冊載五千七百有奇  
朝廷休養二百餘年益不下五萬眾城成屯此甲冑器  
械藏於庫是時指揮十一掌印一掌操一掌鎮撫一掌

協巡印總領屯司糧操司兵馬鎮撫典刑名巡協捕盜  
賢者以次而升不賢以次而降其下千戶十有五職  
鋪二職站五掌左右前後中所印亦視賢愚爲升降五  
所下百戶五十百戶各總旗二人小旗十人正軍百二  
十人餘丁十人或二十人不等依等授田旗軍畝二十  
四上軍畝十八餘丁畝十春秋兩操備無事屯有事掌  
操者督之或戰或守上下一心無敢有越厥志者是以  
八罹兵燹而民卒無恙設兵自近始兵民乃異視然是  
時有備兵使者鈐其上別駕頡頏射其下主兵無能爲  
陵夷至今兵憲裁別駕移駐安寵世襲指揮罷不用司

大定府志

卷五

十五

民社者守戎佐守戎者千戎一皆聽命駐防無敢執一  
言相左時有傑出者指陳其弊中有司之隱情乃上畏  
功令下隔左袒司敕者先置之罪褫我衣巾者有矣以  
故軍民無主生計日蹙勢不至逃亡不已君子不以養  
人者害人豈可以衛民逐民乎事久必窮窮必變變必  
通常事者鑿其窮變通焉衛其瘳乎曰變通奈何曰升  
吾衛爲郡割赤水爲縣隸焉俾遊武不致于有司之職  
然後下令廣招揀勤撫字入營之奴僕給之營占之基  
業還之顛連無告者賑之鴻雁整將望哲人而翔矣  
不然碩鼠逝去言施邦族何時哉二三老言畢復墮淚

起立握余手曰此吾鄉三百年興衰始末事也而謹識之庚申五月二十七日記

奏五氏曰畢節元氣起者四衰者四資始賴川侯傅公友德培於指揮林公晟唐公諫休養二百五十年家給人足冠婚喪祭有禮膠官有士天啓壬戌蔣邦彥壞之繼復於兵憲鄭公朝棟鎮雄女知府隴應祥指揮王公九如崇禎丁丑伐沙壞之甲申烏蠻搶處烏又壞之再復於都督高公啟隆同知蓋公世祿指揮章公世勳丁酉賊將劉光典壞之戊戌白鞏昌又壞之再復於兵憲王公國鼎參戎冶公秉忠守戎林公必達己亥來十四五年間幾踵隆萬風乃已未庚申賊防楊鴻材大壞之然前之壞敵克我也將誰尤若鴻材之壞祇欲強兵弱民及民逃而庚癸莫繼兵亦旋潰城卒莫守是壞自我也夫國家設兵原以衛民鴻材用兵反以逐民謂之何哉余聞滇陷之日鴻材被殺子爲人役妻女被人遮淫天道好還不爽如此後人亦可以少鑒矣雖然此亦氣數使然吾於鴻材壞壞何咎焉第繼鄭公高公王公之芳軌而復滋

大定府志

卷五

元氣者伊何人余焚香旦暮望之

遊惠泉記

余往讀邑乘有所謂惠泉者馨其名莫審其地自感人  
生寄形寓內不能遍嶽瀆而搜奇廣吾浩然之氣發爲  
文章徵爲事業恥矣康熙己巳初秋乃至城東三里巨  
山之麓武略將軍王氏宅後有水泉自石穴湧出穴高  
三尺廣半之顏曰惠泉旁勒三槐拙叟仲讓書下錫武  
略將軍泉左高臺一梨棘雜藤芒繞覆之隱隱斷石殘  
碑也泉右石刻二字皆漫幻不可識初讀之獲敘說三  
句曰予旬宣之暇偶得一觀賦二律獲詩三句曰石中

湧出泉應遠曰稻田六月不妨晴曰城市山林三故宅  
乃作力剗之磨之洗之歷三時光瑩滑澤沒字碑雲漢  
爲章矣讀之乃惠泉亭記正統己巳二月學博孫隱先  
生之所撰墨庄道人林晟之所書三槐希元子仲讓之  
所建而金陵劉禎之所勒也

宋起

威寧風土記

粵稽威寧古禹貢梁州之界壤接滇南巴蜀爲西南要  
地舊名巴凡兀姑後名巴的甸自脊烏蠻居之晉屬朱  
提郡歷唐而宋號爲烏撒部至元始內附置烏撒路招

大定府志

卷五

七

討司尋改軍民總管府明洪武十五年置烏撒衛隸雲  
南都司永樂十二年改隸貴州都司領千百所伍建學  
宮祠堂廟宇城垣計千八丈二尺城堞千五百三十  
周匝九里三分築以石高丈五城樓四座至天啟壬戌  
四彝搆逆圍城九閱月城樓學宮祠堂廟宇燬爲灰燼  
軍民遭其屠戮城垣悉以傾頽城郭所伍軍屯村舍寥  
落無居人歷久方得結廬聚處漸次蕃息我

朝定鼎於康熙三年遣大師討平安逆以地設威寧府與  
烏撒衛同城文武兼制時威寧大定平遠黔西四府並  
稱新疆二十二年改平遠黔西二府爲州屬大定府二

十六年復改大定爲州裁畢節赤水二衛爲畢節縣永  
寧衛普市所爲永寧縣共三州二縣均屬威寧焉烏撒  
衛亦於是年裁歸府轄其繞城西南北三面俱有海田  
廣袤數十餘里在昔可耕自壬戌變後人民故絕沙淤  
水衝平陷淹沒迄今鞠爲茂草郡民牧馬其中大氏威  
地人性野樸俗尙勤儉以牧羊爲產地土瘠薄終歲資  
蕎麥爲食近城百里不產稻穀地氣多寒四時如秋冬  
楊升菴過此有歲際豐亨惟麥飯時無冬夏總羊裘之  
句適中一線官道制設六驛站一十八鋪上抵雲南霑  
益高坡界相去二百八十餘里雍正八年割可渡河之  
西附雲南以河爲界撥

大定府志

卷五

六

去二站六鋪離城僅九十里下抵平山鋪界相去百八十餘里向屬

衛轄四面夷獠乃府治之幅幘所轄牽連窻遠約計五

百里今約二百八十餘里分爲十里在城曰全化霑益四鋪爲宣

化今裁可渡以西屬宣威  
僅前所一帶爲宣化東鄉曰遵化德化南鄉曰致

化性化西鄉曰大化廣化北鄉曰歸化順化每鄉設巡

捕一人今名里長二人皆能通夷語以之督糧而兼彈

壓城中山頭有九文武衛署各建其巔府署即昔烏撒

衛也舊府署通判居之衛署在南門內康熙十九年被

苗燒毀僅存二堂五間今修大堂儀門漸次告成爲顏

額曰化夷非敢謂夷卽能化聊以明夙夜之期望云爾

黌宮因兵火之後經前守率領經教捐俸募造先師正殿以及兩廡在明人文蔚起考其名宦鄉賢未嘗乏人

今之人文雖曰寥落諸生文武計一百餘人今四從而

陶淑鼓舞自不難於振興之也苗獠之種類不一若羅

鬼若革老若白苗黑苗花苗若蔡家仲家龍家此就昔日府屬

所轄而言今州僅轄羅鬼土老 所轄而言今州僅轄羅鬼土老

黑耳子花苗童家種家六種 革老種有五羅鬼亦分

黑白二種諸苗獠飲食起居亦相若衣服顏色則各從

其類如白苗之衣白花苗之衣花是也衣止齊膝膝以

下白布裹數層而赤其足男女皆然富者披氍二尺餘

和寒暑雨斯須不去身諸苗獠龍皆帶刀弩然苗性忠

大定府志

卷五

十九

厚盡力耕耘獠龍性剛暴性亦龍見牛馬則盜之嗜飲

貪殺不顧利害有所捕輒逃匿山箐見官府故作畏謹

狀其心至詭譎不可測然諭之以忠信亦每每悅服婚

姻皆以牛馬行聘人死火化骸骨殺牛以祭名曰作夏

諸獠持鎗相送千百成羣官府莫能禁止諺獠之俗如

此雖沐化已久其桀驁之氣猶未盡馴昔以威靈命名

良有以也是惟官斯土者清儉持身布德行義體

聖主仁育斯民之意推誠以感動之庶幾漸摩日久而化爲

詩書禮樂之俗歟至於山川形勝前臨可渡後倚鳥門

峰巖有千尋之險松濤同萬壑之聲鳥徑崎嶇羊腸曲

折恐更甚於蜀道也城東北山下有靈泉候清俛濁昔  
云有龍潛焉離城八十里瓦甸站北有插鎗巖嶙峋高  
聳昔諸葛武侯南征關索插鎗於此土城西五里有龍  
爪石巉巖眩異上有龍爪痕三東關外有湧珠泉噴泡  
如珠昔賢題曰珠泉玉液近城正南有六道橋烟柳可  
觀昔賢題曰六橋烟柳北門外有三江市東曰鐵鎖孤  
舟城南八里有龍潭灣其深莫測歲旱祈禱有應城自  
西而南百五十里有九十九水曲折濼洄匯於可渡河  
河之東岸奇峰峭立削壁天成曾留仙筆水流雲指揮  
李文龍復鐫山高水長四字觀者嘆其陟絕莫不驚羨

大定府志

卷五  
二十

田 雯

苗俗記

焉此皆境內奇觀也爲述其略以備參考

十年幼學曾披山海之經早歲登朝親與享王之會以  
云觀記未若今茲離城十里之區便是三苗之種既無  
姓氏之譜系孰察其詳賴有父老之流傳嘗聞其略試  
言大者莫過羅施即問從來亦稱鬼國長身黑面依然  
豺虎之倫刷齒縛屨本是斲彫之習布囊籠髮而爲角  
肩被羊皮鳩杖鏤銀以稱苴頂冠竹笠食無兼味盃盃  
皆用漆皮病不延醫禳除但從祈禱行軍則率然相應

掉尾斷頭作字則蝌蚪遺文稱先則古千人持鐵張蓋  
可以招魂比屋交關刻木堪爲約信重巖密箐白云虎  
豹在山勁努長矛豈畏車騎滿野烏蠻如此羣獠可知  
腰圍纏幅布不假鍼工喪祭競屠牛祇思斫膾茹毛飲  
血蠕動之物咸嘗飾蕙結螺野植之竿共繞圍爐卧寒  
夕夢魂飛去不向衾枕搜求席地宴嘉賓竿酒傳來亦  
自觥籌交錯新鬼大而舊鬼小語任奚婆赤降殃而白  
降祥卜憑鷄骨持斧林間翻拾橡驅牛坡上且高眠醉  
歌諸葛之銅鑿金賽社冷吹媧皇之管連袂踏歌短袿  
纔至耐難拖六幅瀟湘窄裋僅齊腰豈識五銖霧縠然

大定府志

卷五

廿一

而盤絲繪蠟亦自可人抹粉塗朱常多憐已銀環雙姍  
妥酷似簾鉤鬢髮一蒙茸全資馬鬣雖采蘭贈芍爲古  
聖之不刪而踰禮蕩閑亦國人所其賤欲鳴雛雁先榮  
奔鷄總之文物未加遂爾教化弗及畢方獨脚時現如  
鶴之形履警雙精徒弄吹燈之伎欲寫鬼方之變相難  
費鉛素以接求聊爲雜俎之詞用發掀髯之笑

鮑尚忠

平蠻記

烏蒙土司祿萬鍾居滇黔川蜀之界沃野千里有鎮雄  
爲之唇齒雷坡爲之輔佐水險山高標長馬疾爲聲教



之所不及自謂永固無虞招集亡命凡三省盜賊網販  
莫不投其巢穴緝捕無由時或出而刼取害莫甚焉我  
少保大司馬鄂公節制滇黔拯民水火遣將出師以除  
暴虐逆敢閉關抗敵有參將哈元生親冒矢石匹馬單  
刀飛入大關斬其酋首目成破竹之勢於是萬鍾納印  
投誠此雍正五年三月事也予方任事黔西羽書絡繹  
催調兵糧而捷音忽至於編里甲籍田疇置烏蒙鎮  
雄府州設重鎮以彈壓之詎萬鍾遽繫滇南厥妻陸氏  
招集逃亡突起草莽之中刼郭副將殺之飛報滇黔文  
武激烈我少保聞報赫怒會兵進征此雍正六年春正  
大定府志

卷五

三

月事也予奉檄運糧赴軍至大定畢節與諸同寅各司  
其事時楊大方伯永斌鎮守威甯命予往八仙海子查  
威甯烏蒙跼路催督士卒糧餉雖未嘗披堅執銳而兵  
鋒正急曉夜靡甯仰妙算神謀於帷幄賴雄兵猛將於  
疆場陸氏就擒餘氛盡息歷三月而返父老紳士咸頌  
首曰米貼旣平則盜賊販棍更無所歸今而後閭閻得  
安枕無憂者皆少保之功德垂於不朽也雷坡之土司  
者萬鍾之姻婭也攘其螳臂逞志川疆於斯不戢必啟  
烏鎮之患我少保深謀遠慮期會川黔三路進勦此雍  
正六年秋七月事也我黔省張大中丞調思南大守劉

洪銅仁太守姚謙總理烏蒙糧務予運糧赴烏兩太守  
曰自此以達溜簡江乃滇黔士卒之咽喉糧草之命脈  
也其即往返稽察莫辭勞瘁予啣命即往甫至江口復  
得羽書云畢節介令染瘴垂危惟此糗糧繫三軍之命  
非剛毅急公見危授命之人斷難肩此重任跼路猶小  
事也可急駐江口隨收夫運無負重托予乃寄身於絕  
壑仰觀夫溜簡江在涼山之下自上瞰之懸絕萬丈山  
巔水涯寒暑迥別徒步扳緣神搖汗浹負米折腰一步  
一跌予至江濱身無存歇斬木斫荆居巢處穴江水湔  
湔無舟無楫大索橫空兩頭牽繫穿一竹筒繫於胸脇  
大定府志

卷五

七

推而過之人如飛越是曰溜簡未之聞說一有不虞形  
銷骨滅運未到來逃走弗迭堆米荒沙焦心嘔血爲覓  
舟航紅液沸熱庶免逃亡筋疲力竭拊而勞之乾喉敝  
舌腸用肉充氣將酒接如哺嬰兒得其甯帖薄暮無人  
瘴氣慘切但聞喊聲搖星撼月詢其從來蠻夷作孽窺  
我餽糧欲行偷刦我無旅兵更鮮尺鐵星光黯淡山路  
險窄奔騰瘴霧時聞粳稻之香飛鏢荒沙目耀黃金之  
色面頰黧而鬚白自生翳而力竭歲暮除夕僕夫盡瘁  
定尉汪周從事軍前馳書報捷曰首首被擒瓜牙受縛  
矣易日而糧止易日而師旋矣人夫散站馬撤而凱歌

載道矣予乃交糧移冊仲春之杪事竣得歸蓋已閱六月矣經畢節會介邑侯病愈執予手曰君竟得無恙耶曩者君三日不至吾不復有今日矣予自西溪而返父老童穉莫不喜動顏色及見余之面目則又愕然而驚愀然而憫也予曰邊徼肅靖蠻烟盡息將來擊壤之日不減羲皇上人酌父老酒而歌之曰秋風清兮戰馬嘶金沙江上揚旌旗子荆江口瘴烟迷江風吹霧襲征衣青天白日散雲翳千山萬壑明朝曦誰調玉燭勝燃犀光普六合照元黎祗席之上咸熙熙與爾父老酌金卮

平蠻後記

大定府志

卷五

苗

烏蒙既定以劉起元爲總兵官設重兵以守之起元撫綏無術夷情不堪故土日莫莫黑夸等約中秋後五日爲亂有密報者起元不信未五日而逆眾大至起元勢促率二將官散以金帛誘以美言逆眾不聽數其惡而迫之及劉馬二將見殺起元急同汪將官潰圍而出逆眾襲殺汪遊擊於馬鞍山劉起元楊守備於荔枝河城中劉通判賽知縣李教官劉知事陳司獄及眷屬等俱死於難兵民商賈得脫者僅三百人其餘盡剽逆眾之刃司獄陳天錫憤起元之不能整禦也殺其妻妾擊賊而死遊擊劉眠旣被殺其妻張氏曰吾命婦不可死於

賊手二女宦門未可辱也乃殺二女以三歲幼子囑妾楊氏曰爾當保孤繼絕遂自殺楊亦隨亡有僕匿孤草莽中後得而撫之少保聞報飛調安籠哈總兵梧州協徐副將爲中軍由响水稻田垵而進調靈益威甯兩參將康世顯曾長治爲先鋒由催住松林而進調安順安籠兩遊擊王友文王弼爲右翼奇兵由黑夸抄截左脇調參將梁虎駐威甯相機策應調遊擊雷應萬守長勝寨遊巡調遊擊李世祿守得勝坡應援調總兵官魏翥國總兵鎮雄一路參將韓勳洗奎鄉施額法馮等處由龍硯山左均出入仙海子會齊我張大中丞會同提

大定府志

卷五

五

督復調各協營官兵分割鎮烏二路知會蜀兵由東川梁山進攻其後少保以誤用劉起元引罪請解任督師上不許先是鎮雄參將韓勳率兵四百會逆夷十倍於奎鄉大戰一日夜克之總統烏蒙一帶兵馬哈將軍九月二十日兵次稻田垵逆眾用逸以待勞之計夜劫我營將軍紀律嚴整兵不亂動相拒至曉逆乃散去土目阿底者不下二千人懼逆屠戮暫從至是來歸將軍會兵進攻身先臨陣飛馬上坡值酋首黑夸卒至鎗透將軍獸壺將軍還斫下馬寸磔之逆眾乃潰遂由得勝坡進次以那逆眾數萬據住前山我兵數千寡不敵眾乃令遊擊

王友仁參將康世顯曾長治伏山右左將軍統正兵赴敵逆聚如蟻忽我中軍砲响左右奇兵抄出逆眾大駭棄械狼奔我軍襲之無敢有回顧者毀逆營八十餘座殺逆遍野過松林阨要如入無人之境至烏蒙見疊尸流血穢氣滿城因進札鳳凰山大定太守陳公知予溜筒江之役罔顧鋒瘴轉運有法頗著微勞九月望日檄予赴軍前值張大中丞以起運兵糧爲重飛騎促回羽檄予歸料理糧務見界連境之處民情騷惑隨卽安撫且圍練鄉兵給以器械繕葺城郭舉凡善後事宜籌畫停妥而總理糧務賈副使即檄予赴烏蒙二木那收放

大定府志

卷五

廿六

分勦各路兵糧行至松林餘逆四起圍繞周匝幸畢赤營千總黃宣帶兵百人登高曰事急矣吾捨命以殉連放平夷大砲予乃得脫殫心盡瘁以供其事將軍分兵四出若驅熊虎以聞犬羊誅剿兩月靡有孑遺鋒燭盡息授將軍雲南提督旋防貴州賜金萬兩從征將士賞賜有差參將韓勳授安籠總鎮旋改古州副將徐成貞授烏蒙總鎮將軍復駐烏蒙三月然後歸予自庚戌十月從軍至辛亥四月之抄事竣得歸第見東阡西陌易耨深耕白叟黃童壺漿竹馬忽憶外無城郭內無垣墻寒冬臘月蠅蚋撲面舉步觸體遍野骨骸杯水半血陣

風盡腥未睡輒驚欲食先嘔之境不禁黯然淚下也予  
三次從軍於斯爲最此一役也冒險相從者金陵陳敬  
王也會計出納者從事胡琨周泉羅璟張翰等也奔走  
効力者民壯高捷羅正李玉袁一龍蕭一鳳等數十人  
僱馬募夫續運不絕者鄉約龍應奇等也代拆代行上  
下無悞者州尉佺鏞也行者守者各盡其職斯半載以  
來厥事有成不可不略紀之也

### 鄒之嶧

總督鄂公平蠻記

大臣分奠河山疆理方嶽固將爲邦國興大利除大害

大定府志

卷五

廿七

變元化樹績旂常不僅位望尊顯牙纛旌旄炫耀一時  
已也滇黔古南彝地三代時未通中國漢諸葛武侯討  
孟獲擒縱凡七服其心而旋師不置守衛夫亦以荒服  
之外未可遽以文治治也歷唐宋元漸入板圖明洪武  
初傅友德沐英等討元梁王至滇戡斬之友德凱旋沐  
英留鎮始開滇黔兩省而黔統制於滇制良善矣但版  
圖雖入而各土府酋長尚皆世守其土比我

國家定鼎七十餘年風動時雍薄海內外絃黃之地咸重  
譯來臣而滇黔久隸中土意無復有狡焉啟疆煩我士  
馬者乃彼彘裸鳩舌侏僑不通文告之辭莫與冠裳之

會出入巉崖密箐以劫殺聚黨插血要盟謀叛爲務而烏蒙土府舊隸川省去會城益遠桀傲尤甚焉今

上御極二年軫念巖疆簡賢拊治以少保鄂公總制此邦入滇

之曰廉訪要害謂土司跋扈非申以威不可於是承順者撫之令歸流以絕其漸強梁者則加之兵宣威舊屬安目公至則設州焉撥雲霧而覩文明雖萬世猶將食德於無涯也乃烏蒙地界三省壤接宣威燒殺劫擄被其害者數百年公以梟頑不戢文教終阻乃於雍正之五年遣將討之擒獲土酋祿萬鍾方議改土歸流而米貼復叛雍正六年二月又調集各路兵討之兩月蕩平

大定府志

卷五

七

以隔省不便控制因具題以烏蒙改隸雲南設府置知府以下流官兼設東蒙雄威鎮重兵彈壓東陞設鎮雄營西陞設大關營永從縣法制之善有不可易者八年八月遣孽祿萬福糾眾復叛殺傷鎮府文武等官數十員屠戮居民慘虐不可言九月復陷大關營永從縣賊勢猖獗且逼視威甯公赫斯怒爰檄安籠鎮總兵哈君指授方略總統滇黔蜀三省大兵窮搜逆黨不遺種類三閱月而凱旋猗歟休哉一舉而靖萬載蠻烟一日而造千秋福命規爲者在萬世不僅目前籌畫者越尋常不謀小效功在社稷名壽山河所謂大臣不當如是哉

至公之文章經濟德盛化神人則周公召公出則方叔  
召虎此自炳耀寰區垂名竹帛者也不敢復贅云

### 總鎮哈公平蠻碑記

天生一代偉人必樹一代鴻業非偶然也烏蒙雄於西  
服負固非一日矣雍正二年今提憲總統哈公方蒞威  
甯中營爲遊戎下車日即慨然有剿滅兇頑之志五年  
烏蒙叛少保鄂公夙知公智勇俾公討之尅日進發烏  
蒙逆賊不自知爲釜底遊魂乃敢逆我兵於鳳凰山公  
與戰賊潰走復據大關公單騎破其屯賊轉走匿公連  
追破之關月擒獲土酋祿萬鍾及諸逆黨凱聞

大定府志

卷五十四

七

皇帝嘉悅擢公尋露營參府六年土酋米貼又叛害我副將郭  
壽域少保鄂公復撤公援之賊聞公至走據門坎屯公  
與十八騎攻破之旬日而擒首惡凱聞晉安籠鎮總兵  
八年遣孽祿萬福糾眾復叛攻陷烏蒙府及大關營永  
善縣殺傷文武官自總兵劉公以下數十員城中兵民  
屠戮殆盡時公陳請陞見方治裝北上而警告至矣少  
保鄂公知非公不克勝任因飛檄留公總統滇黔蜀三  
省大兵討之十月軍次得勝坡叛目黑寡阿底營長也  
驍勇爲諸彝冠僞爲從我軍狀來迎公公不意其叛方  
止馬與語忽運矛刺公公引弓射之應弦而倒時我軍



未集所統兵不滿五百而彘以數萬計圍公三匝滇黔  
震搖威宣一帶居民驚惶莫措公獨從容鎮靜略無懼  
色惟堅壁時出疑兵賊終不敢逼十月我軍大集公方  
陳兵賊望之不戰而潰公馳逐斬首無數賊遂走匿公  
散兵捕緝閱月悉平吁烏蠻三叛而公三平之公之功  
亦偉矣哉然是役也人知汗馬之勞戰勝攻取之略而  
不知其功在震區知安邊之績除兇伐暴之勳而不知  
其澤流奕禩蓋得勝坡決戰之日羣彘側目向非我公  
一戰而勝之則滇黔震動西南之憂未已將復有驃信  
之事蜀楚廣越其不獲甯處矣此公之功在震區者也

大定府志

卷五

三

且此邦居民世苦兇彘之害公一旦而清之不惟見在  
生靈身沾活命之德抑且子孫世世永享樂利之休此  
公之澤流奕禩者也所謂一代偉人必樹一代鴻業不  
信然歟爰述顛末鐫之於石非敢曰以報公也抑使我  
輩後世子孫讀之知吾儕之保有室廬獲生聚於斯者  
皆公之賜云

大定府志卷之五十四終

大定府志卷之五十五

外篇五

記第十一下 文徵五

知大定府事都陽王允浩原本  
知大定府事河曲黃宅中重輯

姚棗之

重修大定府署碑記

大定府古夜郎國也漢書地理志犍爲郡下應邵曰古  
夜郎國也顧祖禹曰在今四川敘州府瀘州及嘉定州  
眉州皆其地牂牁郡下應邵曰臨牂牁江也而未言古  
夜郎國夜郎縣下應邵曰古夜郎侯邑西南夷傳夜郎  
大定府志 卷五十五 一

侯多同聽唐蒙約還報迺以爲犍爲郡發巴蜀卒自犍  
道指牂牁江是夜郎國漢以爲犍爲郡漢地理志首縣  
卽郡治犍道犍爲郡治曰指牂牁江不言下牂牁江是  
夜郎國不臨牂牁江之一證也此元光年間也下言會  
越已破漢八校尉不下中郎將郭昌衛廣引兵還行誅  
隔滇道者且蘭斬首數萬遂平南夷爲牂牁郡是且蘭  
國漢以爲牂牁郡元狩年間也牂牁郡臨牂牁江是且  
蘭臨牂牁江夜郎國不臨牂牁江之一證也昔楚威  
王使將軍躑將兵循江上畧巴黔中以西軍至且蘭椽  
船於岸而步戰旣滅夜郎以且蘭有椽船處乃改其名

曰牂牁其時楚都郢循江上必由大江溯銅杜灘至涪州城東北西逕武隆慶縣南西北至彭水縣南又至酉陽州西南境又東至葵川縣境皆巴蜀境也又東逕印江縣境又繞思南府境又東北逕石阡龍泉境又東北逕餘慶縣境又東南逕遵義府境又東北逕烏江烏江以上舟楫不可通故楸船於此處蓋且蘭國地也故顧祖禹曰牂牁郡本南夷夜郎及且蘭地今遵義府以南至思南石阡等府皆是其地傳曰西夷君長以十數夜郎最大是夜郎西夷也傳曰發南夷兵且蘭君恐遠行旁國擄其老弱乃與其眾反是且蘭南夷也西南之夷

大定府志

卷五

二

不同牂牁郡之非夜郎國又一證也且蘭去夜郎尚遠故必舍舟步戰然則古夜郎之國其在今修文以東普安以西奄有大定北至敘州乎故曰最大也然傳言建元六年番禺令唐蒙使南粵食蒙蜀枸醬問所從來曰道西北牂牁江江廣數里出番禺城下蒙至長安問蜀賈人獨蜀出枸醬多持竊市夜郎夜郎者臨牂牁江江廣百餘步足以行船南粵以財物役屬夜郎西至桐師然亦不能臣使其時捷爲牂牁俱未立郡也後世求其地而不得郭子章以定番城南水當之黃宗義田雯又以烏江水當之鄭收以北盤江當之洪亮吉俱以爲不

然而以都江當之余按鍵爲郡之水惟符縣温水可達  
番禺符縣下班固注曰温水南至鬱入黠水黠水亦南  
至鬱入江江延江也此温水南入岷江之道也牂牁郡  
鐔封縣下班固注曰温水東至廣鬱入鬱水廣鬱縣下  
班固注曰鬱水首受夜郎豚水東至四會入海古之番  
禺甚大今四會水亦經今番禺由東莞入海俗所謂西  
江也此温水東行入番禺之道也傳所言臨牂牁江夜  
郎者未言都邑江廣百餘步漢尺抵今尺七寸百餘步  
江不甚廣其可以行船亦不必大船也今之由黔達粵  
之船尙名桐梓壳桐梓船也非巨艦也江出番禺尙稱  
大定府志

卷五

三

牂牁則當日牂牁江蓋巴黔桂林之水凡可以達粵者  
皆以牂牁名之也而温水不可名牂牁江乎夜郎臨温  
水不可謂臨牂牁江乎鄺道元吉豚水東北流逕談藁  
縣東逕牂牁郡且蘭縣謂之牂牁水又逕中溜縣南與  
温水合温水出牂牁夜郎縣逕談藁昆澤味母單母掇  
律高鐔封來唯等縣如東至鬱縣爲鬱水洪亮吉考今  
南盤江出今雲南霑益州爲漢宛温縣屬牂牁郡逕雲  
南宜良州北爲漢滇池縣地屬益州郡逕路南州西境  
爲漢味昆澤地屬益州郡逕雲南澂江府治河陽縣東  
境漢俞元縣地屬益州郡河陽縣爲漢母單左近地屬

牂牁郡逕彌勒州西境寧州東北境爲漢賁古地屬益州郡逕阿迷州廣西州廣南府西北地不能指其稱名要皆益州地也下至廣西南寧府境合鬱江定南盤江爲溫水其符縣之溫水不著蓋蜀漢時分犍爲立江陽郡符隸江陽中失本土寄治武陽劉宋符豎皆省道元作注時不能指也南盤江所歷之道與溫水同豚水不能至犍爲郡惟溫水則經符縣則傳之前言夜郎臨牂牁江後言伐南越兵夜郎兵下牂牁江皆可通是臨者溫水下者溫水均是溫水爲牂牁江之一證也今大定府南至安順府鎮寧州界二百六十里北至四川永寧

大定府志

卷五

四

州二百五十里西至雲南東川府界五百二十五里東至貴陽府修文縣界二百三十里又北至四川瀘州三百里至四川叙州府一百六十里東北至雲南昭通府五百四十里以溫水爲牂牁江考之其歷雲南境者爲多大定接壤雲南遵義距雲南中隔大定郡然則遵義以南之爲且蘭叙永以南之爲夜郎亦無可疑矣至漢地理志夜郎縣下應邵曰古夜郎侯邑此非古夜郎國也傳言平南夷爲牂牁郡夜郎侯始倚南粵南粵已滅還誅反者夜郎遂入朝上以爲夜郎王是其入朝也正如鄒子之從帑於邾錢俶之入宋國已亡矣故下言賜

滇王王印復長其民夜郎無此文也又下言西南夷君長以百數獨夜郎滇受王印滇小邑也最寵焉滇有邑互文以見夜郎亦必有邑但較滇稍大耳是夜郎去國而稱邑在元封二年其稱夜郎侯者從其朔也其去立牂牁郡之歲已十餘年去定牂牁郡之歲已三年去立犍爲郡之歲已二十餘年矣郡立二十餘年且未重定又未復長其民是夜郎國之爲犍爲郡久矣不得以夜郎縣有豚水入鬱可以達番禺豚水今都江不得至犍爲而以建元元年唐蒙所開之夜郎臨牂牁江者爲夜郎侯邑也洪亮吉以當牂牁江亦誤也然則夜郎國不大定府志

卷五

五

在豚水之上亦不在且蘭之地且非漢牂牁郡地非在今之修文以東普安以西鎮寧遵義之北直北至叙州府之地乎今大定府境東北五百八十餘里南北六十餘里西北有畢節宋之前爲羅施鬼國元之八番順元宣慰司明之畢節赤水二衛也西南有威寧六朝以前爲巴兀姑巴的甸唐之烏些宋之蠻夷烏撒府元之烏蒙烏撒宣慰司明之烏撒府也東有黔西南有水城唐之羅甸國宋之羅施鬼國元之順元宣慰司明之安氏水西也東南有平遠明分黔西地爲水西宣慰比喇壩府境則割水西烏撒之地而立焉明隸貴州四川

兩布政司幅員之濶巖洞之幽關梁之險儼然一大都會也府治爲安氏大方城鳳山翔其東五老拱其西六歸環其南延江周其北又儼然一山川形勝也以僻陋在夷聞人賢士足未嘗履其地無文獻之可徵不能定爲漢之何郡何縣然以漢西南夷傳地理志考之其爲犍爲郡之南屬縣無疑又烏知非古夜郎侯建國之都城乎夫夜郎牂牁江聚訟已千年而余蒙

聖恩畀守定郡間繹書傳足歷險阻而後夜郎國與夜郎邑分而後溫水與豚水分而後牂牁江之上游下游定然其始自華陽國志莊蹻畧黔中以西一語發之知夜郎

大定府志

卷五

六

國牂牁江必在黔西斷不在黔東之獨山州三角屯等地矣府治西南向而坐於寅甲之間震艮不分東西莫辨且傾圮官無治事所余爲更寅申水出乙大門視昔而稍狹大堂仍舊而增高建一坊額曰知人安民二堂因舊額曰鑑心堂爲治事所三堂內闢一齋屋三鑑額曰汎若不繫之舟爲公餘讀書所署之西建一齋一亭一軒一廬一館齋曰五柳十竹余所植也亭曰西笑軒曰挹爽廬曰抱邨館曰察眉邨眉余體也笑挹抱察余用也爲宴會賓客所請於布政司得銀一千二百六十兩五錢四分五釐以養廉三年坐扣償之共用銀一

千八百七十八兩四錢四分九釐不足者余益之工興於道光庚子二月成於八月督工者大定府經歷吳疇余弟陝西縣丞俞官人陳發木工楊石工陳瓦工熊例得并書余惟夜郎之地讀史者莫能指其疆域而通志之荒畧不必言卽若黃若郭若田若洪諸君之書皆不足以盡信因爲述自秦漢以來府治之本末且紀重修之日日以示來者是爲記

吳嵩梁

創建玉屏書院碑記

竊惟政先化俗學以儲才黔西舊有獅山書院規模太大定府志

卷五

七

狹新場距城較遠負笈尤難本州擬於東山及新場各建書院一區俾得就近肄業庶幾人才日盛民氣日和潛消鼠雀之爭廣被菁莪之化惟是東修膏火所費綦繁置屋買田必須經久除本縣自捐廉俸外所望紳士商民協力同心共勦盛事取擎易舉有志竟成好見拔崇科第澤庇子孫吾民之慶亦本州之幸也

福建

滿洲正藍旗人  
現任貴西巡道

新建

皇殿碑記

欽惟



聖朝厚澤深仁無遠弗届臣民感戴厥滋臚愉各直省中一郡一邑例皆建立

皇殿以資大小臣工舞蹈拜颺藉申望

闕抒誠之禮兼勵士民戴高履厚之思典至鉅也連於道光丙午冬奉

命巡察貴西丁未春蒞任循例謁

壇廟尚均整肅惟供奉

萬歲牌於

廟宇之中典禮殊爲有缺且威寧雖州治實則鎖鑰滇黔鎮道咸駐州城尤非他郡邑比詳加諮訪始悉舊曾

大定府志 卷五

八

建設年久失修相度原基亦甚狹隘因卽捐廉爲倡商諸文武寅僚共樂贊襄旋擇宏敞地址鳩工諏吉越五月而告竣

殿宇崇隆

宮牆巍煥元朔

朝賀卽趨踰於其間遙觀厥成爰記建修始末並望後之代任者隨時葺理以垂永久於億萬斯年也偕同捐廉者爲威寧鎮總兵官善祥署威寧州知州徐豐玉左營遊擊達凌阿署右營都司任方太理得備書時道光二十八年三月朔日分巡貴州貴西兵備道福連謹記

廖大簡

貞女記

貞女者畢節縣黃繩謀女郎文熊妻也少嫻內則通孝經章句讀列女傳能屬文及笄昏有日矣文熊隨宦河南寶豐縣以疾卒女聞訃泣血久之文熊柩歸女泣告其父請於舅姑自爲文以奠斬衰而哭之辭甚哀其文曰嗚呼惟君髫齡實爲我儀未經定情旋即辭世命之維艱至於斯極妾以弱質少依父母行年十七禮聘於君命遭迤邐昊天不弔君適豫省因病殂謝傷哉聞訃念茲伶仃維日飲血晨夕摧心依身慈母荏冉五載今

大定府志

卷五

九

母又逝此身何依觸景涕零何所控訴嗚呼夫子君以成童妾以少女未待巾幘旋見夭折生不見面死不見棺顧影惘惘情何以堪君之靈車今返鄉土心有所係身有所屬於是涕泣於父母膝前籲懇於翁姑堂下乃命衰經匍匐靈帷嗚呼夫子於今已矣幃幃寂靜呼號無應惟是父母之命始之終之繼自今惟以未亡人之身謹代子職事奉翁姑以終罔極君如有靈其知也耶女自誓不嫁歸邱氏奉舅姑修婦職惟謹廖大簡論曰或云醴女未廟見而死歸葬於母氏之黨示未成婦也又周官媒氏掌萬民之判禁嫁殤者未聞夫死而終身

不嫁者豈古人不之重歟曰非也聖人以五禮防萬民之僞而教之中期通乎人之情而已不苦人以所難未昏而不嫁人之所難也倘能矢其志而遂其願又何非君子之所取耶是在恒之大過曰恒其德貞婦人吉聖人取其從一而終也如衛之共姜柏舟自矢曰之死靡他之死靡慝貞女其早有感於此而必能安其志而恒其德也謹記其事以告諸採風者

黃宅中

大定府廳事題名記

昔魏鶴山先生有言官寺題名惟氏名歲月非有一詞

大定府志

卷五

十

之予奪也而是非之心人皆有之習其名而識其人必曰某賢有行某好學某善其職否則曰是不肖不學蓋於進而怠其事者也居官者自修自明固不爲人作輟而瞻望於前顧忌於後是亦修省之一助也余守大定因志乘缺如採搜文獻得前守王君允浩志稿重加編輯溯自康熙三年知府甯雲鵬以後至今

上道光二十八年凡本任及署事者共得七十二人既登諸志書又題其名於廳事之屏俾後之官斯土者續書姓名里籍及在官歲月久暫不至湮沒且顧名思義日修其職官無曠而泊克修以仰稱

朝廷設官之意所謂修省之一助不誠然歟夫知府古謂之郡守郡而曰守則一郡之民生保障惟守是賴府而曰知則一府之風俗利病所知必周今吾檢點一身傍惶四境所守者果能使物物得所乎所知者果能使人入得情乎吾朝夕從事於茲靡惴惴焉不稱其職是懼蒞事何勤何怠爲政何得何失是非之本心吾自難昧吾惟課其實而已矣而敢爲名乎哉

屏山書閣記

道光二十年同年友姚伯山東之爲大定太守於廳事側葺屋三楹屋前荒園舊栽五柳又種新竹十數竿額

大定府志

卷五十五

七

曰五柳十竹高齋其楹聯曰只因樹好方營室特放墻低爲看山然齋前樹木遮映望西山未全見也其後五年余來守郡治事之暇相齋旁隙地添建小閣額曰屏山蓋城西諸嶺橫峙閣前如列屏風每當天日晴朗遠瞻天末雲嵐吞吐巒谷隱見千形萬態畢獻於几席之前一郡形勝可以一覽而得可不謂壯觀乎顧以一室言之山之環列於閣前者家之屏也以一郡言之山之設險於境內者國之屏也以一省言之水西據行省上游烏撒諸山枕其後比喇諸山拱其前則西北一隅之屏藩也以天下言之定郡爲黔中要地西通蜀山扼其

吭南接滇海拊其背則西南萬里之屏障也詩曰之屏  
之翰百辟爲憲今之郡縣比古諸侯官所居之地曰治  
所治得其道則四境之利病無不悉四民之疾苦無不  
知猶觀山於軒窗之內雖遠亦可見也治失其道則堂  
上達於百里堂下達於千里猶設屏於門闥之間雖近  
亦不見也然則居斯閣者當思一身之治不治關乎一  
國一國之治不治關乎天下行有不得反求諸已其所  
以奉典憲而守屏翰者早夜孜孜求如韓馮翊之閉閣  
思過猶恐不遑況敢效汲長孺之臥閣而理哉今伯山  
已作古人五柳亦就枯矣乃補植新株以志遺愛且爲  
大定府志

卷五

十一

文以記其年月云道光二十有八年歲在著雍渚灘陬  
月郡守黃宅中記

吳瑞徵

君子亭記

水西自蜀漢濟火臣服中國千有餘年雖代隆爵位特  
化外羈縻酋帥而已及明正德間安貴榮出負桀驁之  
資加參政衛袞哀然與諸大夫埒遂肆請減駟動止自由  
微王文成公書折服之駸駸乎成跋扈之勢通志所稱  
一紙賢於十萬師者信已文成謫龍場倡明心學貴陽  
諸郡至今崇祀之報功也然吾謂公於水西厥功倍於

貴陽消其兵革安其民人固當世世祀之惜三百年來無舉其事者夫貴榮於文成渺不相涉也而粟馬金帛致敬盡禮何哉誠以文成忠信篤敬之學過化存神使貴榮之意也消耳文成在貴陽有君子亭遺跡遊者輒低徊留之今太守黃惺齋先生典大定之四年建亭於城北沿君子之名以奉文成祀且揭與貴榮三書於壁欲士民曉然於文成之當祀而學必至於過化存神而後足爲君子也亭成謹述其緣起如此

鄭珍

陽明祠釋奠記

大定府志

卷五

三

道光丁未九月二十九余至黔西治謁新昌俞先生詰旦適爲明王文成公生日先生偕校官師及州之士釋奠於東山陽明祠祠蓋叔自前牧東鄉吳公至是實始修祀事事竣遂讌祠下十柏山房先生首唱四詩紀盛州之士咸詠而和之僉謂子曷言之若余不敏沐浴文成公之教澤又幸獲觀諸君子從州大夫雍容進退之美則豈宜以言不文默默者乎夫徒祠焉而不思所以祀之此有司之闕也取祀焉而不思何以祀之抑亦吾儕之懼也人之俎豆前哲與烝嘗其祖宗等耳秋豚冬鴈豈誠畏其餒哉祖宗賢而苟子孫不肖雖日薦三牲

鬼吐之矣何論前哲我文成公之講學陳清瀾張武承陸稼書諸先生辨之詳且著矣此嚴別學術則爾至其操持踐履之高勲業文章之盛卽不謫龍場吾儕猶將師之矧肇我西南文教也今吾黔蓋莫不震服陽明之名而黔西與遵義於龍場僅隔一延江其希嚮之念宜愈於遠大賢之居者俞先生鼓舞斯邦而俶斯舉殆所云因而導之爲勢易歟然余竊謂人於前哲當毋徒震服其名而貴致思夫其學致思而得其人之眞躍躍然有神與之遊者如是乃爲能師其人程子敬邵子者也不不甚重其說易朱子敬張子者也不不盡醇其正蒙

大定府志

卷五五

十四

斯程朱之所爲程朱歟文成公殆張邵之亞歟當日旣不以吾黔爲天末荒徼而陋之夫豈不殷殷後世之有學爲程朱者歟吾儕欲報文成公之德其竭志盡力當於是乎在若僅百拜而酒脯之曰吾後生小子之忠敬已至也是則文成公所不屑吐矣又豈俞先生今日此舉之意哉願與諸君子共勗之諸君子必更有以繩楚余也退因書以爲記

紀畧第十二

謝 瑄

新闢水西紀畧水西之地山川險隘林密菁深行者登

天一夫防守萬民難進古狝狔蠻王把瑞踞於平遠西南城外一里故基猶存男着短衫出必披氍毹女披大被中通一孔繡五色花紋於上從頭套下掃地曰袍傳至把幕蜡男女好飲飲未酪酏弗已一臥數日方起起而復飲當是時其部下土目盧鹿者乘醉弑奪至濟火少多智謀聞諸葛武侯南征助糧通道先鋒佐征擒縱有功加封羅施國王唐會昌中阿珮率土內屬仍襲王爵宋開寶中詔諭普貴王位元阿蓋授武畧將軍加昭勇大將軍順元宣慰使後以軍功又加待衛龍虎大將軍佩三珠虎符賜名帖木兒不花羅甸侯之職卒贈濟國

大定府志

卷五

五

公明洪武四年靄翠歸附賜貴州宣慰使五年請討隴居不許三十年叛討平之翠死奢香代立時都督馬煜守貴州庭辱奢香意逼其叛欲盡滅之奢香懷忿誓不殺煜不歸遂同劉氏馳入貢自陳守土功及馬煜罪狀上曰朕爲汝除馬煜何以報我香叩頭曰貴州東北有間道可入蜀願刊山開驛以供往來於是召馬煜數其罪斬之封奢香順德夫人歸開西路獻畢節等三倉應走龍場等九驛十八站馬加土同知一員設一學於貴州新城正德中安貴榮從征香爐山有功加貴州布政司參政萬曆二十八年總督李化龍巡撫郭子章討播



檄水西兵大戰於大水田破之楊應龍投首安疆臣增  
官進秩天啓元年土同知安邦彥請勦蜀蘭州奢崇明  
實藉此治兵謀逆二年二月叛圍貴州十二月圍解三  
年進師六廣徧裨姚盱等死之冬十一月巡撫王三善  
總兵馬炯等一百二十員率師進勦由遵義直抵大方  
漢把陳其愚詭計詐降四年正月糧盡師旋次內駐師  
潰死之崇禎三年遣漢把左之賓乞撫疏聞許之遂割  
安氏水外六目之地置數勇鎮西二衛于襄修文赫聲  
濯靈定南威武息烽柔遠八所十年土目化沙臥道爭  
襲相構各獻土地請設流官總督朱燮元議設州二十  
大定府志

卷五

六

隨砌築水西比那大方三石城谷堡歸化二堡以副將  
方國安鎮守之未幾化沙杓佐等復叛圍大方國安誘  
斬化沙潰圍出尋撫定之仍不設州十六年改宣慰司  
爲新貴縣學順治十五年經畧洪承疇平滇黔時僞將  
艾能奇劉文秀等據守中路師不得進招水西引路安  
坤差漢把曾經引大兵由西路小徑而進勢若破竹滇  
黔底定疏叙坤功賜袍帽靴鞮彩幣二十疋宣慰使印  
信一顆康熙三年坤見石城有礙令拆燬之密差漢把  
鄒瑜詣僞御營十三家約與勾連請得西義將軍印信  
藏匿僞匡國公皮熊並前朝不得意之英雄輩黨羽結

連開造軍器操演士卒同謀不軌

上命吳三桂督雲貴各鎮兵討之安坤安如鼎等伏誅皮熊不食而死坤妻祿氏投烏蒙不納奔東川四年設平遠大定黔西三府十一月隴草阿沮白泥復叛討平之十年賴穹俄凹等叛總督甘文焜撫安俄凹喇穹不服除之十九年土目安武安其志等叛一攻大定城一掠平黔四野及恢復飾爲內應獻穀三百石報効思欲歸其故土往東川接祿氏並東川前妻子更名安勝祖綏遠將軍雲貴總督蔡毓榮疏敘賜安武長官司號紙勝祖復宣慰使不許干與民事二十二年改平黔二府爲大定府志

卷五十五

七

州二十六年又改大定爲州隸威寧府轄勝祖安武自得號紙無日不垂涎覬覦故地姦淫濫派靡所不至三十七年天厭其惡安武勝祖母子相繼絕焉紀其源流宣慰部下地十二則溪分封則有四十八日擢百二十罵夜千二百夜所猶之成周封建之地如七十里如五十里也分理則有更沮木魁擢魁補木器脈備所九扯九縱之名統率則又有罵色木拔黑乍之類受品有階敘勞有動而義類依倣先朝舊例滿三年一普夥普謂稱犵狁謂祭獻犵狁先靈不忘根本以野牛野馬祭告後加各彝陞轉名位男則披氊暑以四方小羊皮代

之女則披狔狔大袍祭祀臨民皆披此以為公服有文  
字著有通卦史鬼兵等書好戰鬪少則躍馬橫戈壯則  
鷹眼難馴每一代盜截聰俊男子頭一顆獻狔狔鬼謂  
做人頭鬼代代如之溯其情勢水西扼滇楚之喉當粵  
蜀之要劫掠為風豺狼成性構怨爭奪頑硬難馴兼之  
漢奸教猱升木土目負嵎鷓張非如中州蚩氓申以法  
令而畏威施以惠澤即懷德也論其風俗犬羊一類婚  
姻止忌同姓嫁娶不分尊卑姐妹之女親弟兄得而娶  
焉凡其女官出外選俊秀男子背頰兩手托股而走無  
所避忌至若夫死不嫁聘族人上門名曰坐後生殺予  
大定府志 卷五

六

奪女官主之不論年齒惟聽獅吼倫常倒置亦其常耳  
第可取者縱使其主癡聲瘖瘖甘心竭力臣事而不欺  
殺洗折賣而不怨長子襲官衆子稱爲黑種黑種即宗  
人之說白種即衆庶之謂自漢唐宋元明來皆因其渠  
帥統率之亦不過奉正朔而已至我

盛朝大闢疆土建置沿革盡入版圖是瘴雨蠻烟之地化頑  
梗爲善良安反側於衽席然其中苗獠雜處不止九焉  
捏架健訟往往無忌紀其地則崇山深箐田多石土多  
瘠紀其人則椎髻環眼病不藥治惟宰殺牛馬豕羊禳  
之紀其種則九種之各分區類以別習尚各殊非若附

郭漢民多是流寓耕讀紡織尙從淳龐之治也

## 高拱

### 撫夷紀事

隆慶庚午貴州土官安國亨安智各起兵讐殺撫臣以叛聞請討之已撫臣去太僕少卿阮文中代之阮來謁事予語之曰吾聞安國亨本為羣奸擬置宣淫播虐遂讐殺安信以致信母疏窮兄安智懷恨報復相讐殺無已其交惡互訐皆讐口誣辭不足憑乃安智不能勝國亨撫臺欲為智伸意固善然卻為智所欺而擁兵居省又為智所絀而謀動干戈則多事矣國亨不服拘提見大定府志

卷五十五

十九

撫臺右智疑畏不敢出而撫臺遂奏以叛然乎哉夫叛逆者謂敢犯朝廷背法為亂者也今夷族自相殘殺未犯朝廷縱拘提不出亦只違拘違拘何以為叛逆乎乃遂輕兵掩殺彼夷民安肯束手就戮故各有殘傷然亦未聞國亨有領兵拒戰之迹固可訪而知也而今必以叛逆論之亦甚矣君行矣宜廉其實而虛心平氣處之若果如愚所聞則當去其叛逆之名究其讐殺與違拘之罪彼當必出身聽理一出身聽理便非叛逆只以其本罪罪之當無不服方為國法之正天地之公也阮至竇訪得其實果如愚言乃書報予並陳處置之畧然徂

於浮議不敢哭變前說語多依違予乃復書曰天下事有必當明正其罪者有罪未必真人臣當自為處分不可於君父前過言之者若中原之民敢行稱亂如此則所當上告天子發兵征討滅此而後朝食者也若夷民異類順逆殊塗雖有覺隙本非叛逆之實則人臣當自為處分不可過言於君父之前何者君父天下之主威在必伸有叛逆便當撲滅可但已乎而乃事非其真釘入其罪則將如何處也安氏之亂本是安國亨安智夷族自相讐殺此乃彼家事非有犯於我者何以謂之叛逆而前撫臣乃遽以叛逆奏君父在上既聞叛逆之說

大定府志

卷五十五

二十

則法所必行豈容輕貸而安國亨本無叛逆之實乃禍在不測但圖苟全地方官更復不原其情遂至激而成變乃又卽以為叛逆之證可恨也今國亨上本訴冤乞哀懇切叛逆者若是耶而地方官仍復不為處分仍以叛逆論之遂使朝廷欲開釋而無由國亨欲投順而無路亦已過矣且安智國亨之讐也非我族類而乃居於省中謂何安智在省則讒言日甚而國亨之疑畏日深國亨之疑畏日深則智之禍愈不可解是挑之使鬪而增吾多事也故愚謂安國亨之罪固非輕而叛逆則不然安智當別有安插而省居則不可惟在處置之得宜

耳以朝廷之力卽族滅安氏何難顧事非其實而徒勤  
兵於遠非所以馭夷狄安中國也願執事熟思之也時  
彼中號令未明安國亨疑長益甚拘提益不出聲音恐  
軍門以勘問誘我出殺我又恐安智兵來掩殺乃日擁  
兵自衛於是阮乃疏請兵糧為征勦計而書來計事予  
讀之曰嘻阮子誤矣安國亨所為不出者疑畏深也今  
明旨旣下事在必行是真以叛逆處之矣處以叛逆彼  
將叛逆自為也將不逼而使真乎且彼夷酋耳而勞師  
費財卽族滅之何為況未必然則惡可己其說長矣是  
不惟致彼以假為真而我亦終當以假為真也時在閣  
大定府志

卷五十五

三

思之環牀而走同官者曰公何環牀走予曰思貴州事  
耳欲從之則非計欲無從則失威曰然則當何如予曰  
今撫臣疏請兵糧征勦安國亨亦有奏辭辯誣乞哀甚  
懇固各有說也吾意欲並行之而差一風力給事中往  
勘若無叛逆實則只治其本罪果有叛逆實卽發兵屠  
戮未晚彼安國亨聞勘官且至必以為吾身在勘軍門  
當不敢殺我我出聽理乃可以自明彼若出聽理則不  
叛逆自見而乃治其本罪當亦甘心亂或可戢胥曰善  
予召職方鄭中至授之意遂題覆得請而以吏科給事  
中賈三近往勘予復面授方畧乃國亨聞朝廷勘其事

科官且來果喜曰吾生矣夫吾豈叛逆者哉所以不出聽理者恐軍門誘我出殺我也今既有旨勘則吾係聽勘人軍門必不敢殺我吾乃可出聽理明吾非叛逆也蓋逢人卽告之語達京師先是阮開以五事一責令國亨獻出撥置人犯一照夷俗令賠償安信等人命一令分地安插疏窮母子一削奪宣慰職銜與男權替一從重罰以懲其惡令該道曉諭而國亨母子狐疑擁兵不出如故至是乃始將漢夷犯人王寶吳瓊阿弟等獻出而母子自出聽審供稱其餘人犯俱死逃及奏事未回非有隱庇又稱願認於六犯名下賠償銀六千兩又大定府志

卷五

五

稱敵殺官兵是時國亨在蘭州與奢劾忠講理不知安總兵統兵殺死夷目以朶楊生阿烏等此伊父兄弟男子姪率衆衝敗官兵奔過浮橋淪死願罰銀三萬五千兩又稱願將內列安插於阿德織金二處疏窮安插於臥這內列著令退閒將安國貞頂替頭目以後再不敢搆兵讐殺又稱願草管事令男安民權理公務於是國亨卽輸銀四萬一千兩送官聽處乃疏窮安智猶堅執不從聲言必欲殺安國亨母子將地方改土設流乃已阮乃處其用事撥置之人智始伏遂差衛官三員押發智與夷目漢聰等五百餘名並軍器輜重俱背負出城

赴臥這織金等處安插蓋科官未至而事已定矣乃科官至中途而還於是阮乃上其事曰安國亨一介小醜叨承世官奸雄類於豺狼詭論同於狐鼠橫行暴虐不守王章大肆克殘戕害骨肉縱兵鄰境積多不赦之辜召禍門庭皆是自作之孽寵嬖倖而私通婦女信羣小而載弄干戈安智避難潛逃尤極窮追之慘官兵迫巢討罪致多拒敵之傷迹其背違多端誠於法紀難貸該臣欽承明旨參以部咨訊之多官酌乎輿論反覆兩人顛末事果出於有因毒祖屬於曖昧殺叔起於讒疑拜將封官既無事證可指斬關掠地又無形迹可稽拒敵

大定府志

卷五十五

三十一

損兵供自畏死激成而首惡已獻納銀罰治皆照夷俗價贖而羣犯就擒繼思國貞釋自拘囚而無恙知未怙終安智疏窮插之原罔而有歸可因解忿卽今遵此五章尙可寬其一死乃若安智野悍無知昏庸特甚初懷報弟之冤而播弄官兵繼奉安插之後而屠掠夷目跡亦彰於肆惡罪不下於國亨但念其流離蕩析之中不失為骨肉報憤之志今奉委官解散彼亦息忿回巢情既可原罪當薄罰若王喬吳瓊阿弟王寶吳彩吳鶴駕劉禮等或投夷散亂或拒敵朋姦自其撥置之禍一死不能盡其辜揆其情犯之殊首從亦宜別其等今議造



謀首禍者據法加上刑結夷生事者引例分其贖遣  
要皆反覆憲章推用情理於刑期無刑之中寓治以不  
治之意無非體聖世不怒不殺之武而曲全之以並生  
並育之仁也且釋一門之隙可以免數省兵糧調度之  
勞宥一人之死因以免衆姓玉石俱焚之烈不惟桀鷲  
怙勢者為之逡巡而旁觀倖利者悉以斂戢生靈寧謐  
邊圉奠安是皆仰仗皇上帝德誕敷天威遠播執政面  
授方畧本兵區畫機宜聖明俯從部議特差吏科給事  
中賈三近啣命會剿先聲所至逆賊破胆是以畏威懷  
德向化輸枕不煩兵革自爾帖服者也伏乞勅下該部

大定府志

卷十五

七

再加查議上請將阿弟行巡按御史處決梟示王喬吳  
瓊固監會審詳決王世臣等編發烟瘴地面充軍安國  
亨祿氏應卒務卒白孺等姑置不死着令國亨退閑待  
立有奇功另處其糧馬公務責成伊男安民同祿氏代  
管仍安官二員一任大方一任臥這以遏二家隙端事  
寧之日撤回自今處分安插之後如或國亨故再懷隙  
殘害安智及或安智挾讐拽兵報復俱聽臣等遵照明  
旨行會總兵官動調四省大兵夾剿改土設流以為桀  
鷲蠻長之成乃按臣亦奏同阮指又稱安智既與國亨  
相忤難以屬管准與母疏窮回原管地方安插令伊子

安國貞管催一應錢糧公務云云詔下兵部議議上得旨安國亨克惡干紀本當動兵勦戮既投見伏罪遵奉約束并祿氏等都且饒他一死安國亨著革了任閑住令伊子安民代管宣慰事安智也著閑住安國貞代充頭目如再違法搆亂定行處治不饒其餘依議欽此兵部又奏敘功曰巡撫都御史阮文中開五事以責成致二克之警服多方指授雖出諸黃閣之臣百爾經營竭其赤心之義并其餘官舍人等通宜分別賞賚得旨重賞文中餘各賞有差乃後月餘安智疏窮奏又至復辨前事乞改土設流浮言且籍籍起予計貴州至京遠

大定府志

卷五十五

五

甚今前旨下纔月餘安能使得往還此必安智用事之人潛住京師隨便爲謀者非必來自智也遂令通政使拘投本者執送法司究問果有智用事二人係罷閑官乘有罪亡命投智者特令久住京師謀事今本實代爲者智尙未知也乃問發充軍去浮言遂息先是巨寇者念據險擁衆萬餘人僭號稱王設官拜將宮食服用擬諸乘輿時發兵搶掠安順一帶地方民夷患苦三十餘年有司匿不以聞阮欲發其事勦除之書來計事予復之曰此賊稱亂旣久朝廷弗得知君乃欲發其事而勦除之可謂忠矣調度旣周方畧旣定便當舉事吾其佐

君成之阮遂發兵征勦至是擒者念斬之平其餘黨掃  
其巢穴土地悉歸州衛版圖深山窮谷無復遁逃淵藪  
而夷獠傍觀亦皆震懼阮奏上其事以為聖武布昭天  
威遠播密勿樞垣指授所至兵部覆上詔陞賚阮及各  
有功官有差而阮則啓敘先後事歸功於余乃復之曰  
安氏之亂既定可免百萬生靈之命而今復建奇勳  
除數十年僭王之叛逆蕩平鬼窟廓靖妖氛俾王化宣  
流萬里之外罔弗恩洽實社稷之功也因當勒銘銅柱  
追跡伏波以示後世願不俾歟僕言有偶中蓋所謂心  
誠求之不中不遠者顧何力之有焉自是境土謐寧生  
大定府志

卷五十五

三六

民安業兵無征伐之苦官免奔命之勞上下恬熙與中  
華埒矣予乃為紀其事

孫應鼇

中丞沙城阮公撫定水西受賚紀事

大中丞沙城阮公拊循貴陽之明年處置水西土酋安  
氏警服西南底寧疏於朝部書公勞奏上天子喜降溫  
綸褒與特賜兼金純幣甚厚報既至藩臬諸大夫暨都  
護將軍咸欲揚休紀績文語清平人孫子應鼇俾載言  
以賀藩大夫曰安氏世祿羅施至國亨殘害安信與智  
構怨誠有罪往歲我軍軌迹之失國亨因陳兵衛守罪

彌著自公臨池是邦察知幾微才決遊及之餘識出漏  
船之表剖判禍福聽許凜雪約法既布咸遵要求方今  
聖神天覆悉主悉臣四夷款塞父子請貢粵酋納土祖  
孫並戮何有茲醜公獨測念無辜者衆薄好生之懿慎  
玉石之慘容與談笑措一方赤子枕席之上罔驚近名  
罔競勇功公實有焉昔畢公伊東郊道兼保釐召穆平  
淮夷命首旬宣繼自今吾儕肅將執事羣黎和安可以  
言保宥慝不作可以言釐政施環匝可以言旬治理昌  
正可以言宣皆公力也臬大夫曰高皇帝創三尺法懸  
衡天下畫一來世孰敢逆節國亨有罪不在繼嗣公禱  
大定府志

卷五十五

三七

其爵仍昇其子原安智復讐之釁矜其情優其後劃其  
疆界俾有寧宇執其釀患之姦黨渠魁誅殺脇從流徒  
剪其羽翼剔其心腹國亨拜將稱王圍城鳩祖事無憑  
依無簡覈者不文致案問仍重其罰錐輸諸官空其畜  
貨杜絕二家隙孽設其成糾其邪萌公鑄堅制變銖分  
靡爽遵朝廷紀綱如在天上若從中植表而外四維之  
經緯絃結不牽且搖古所稱文武為憲公其以之都護  
諸將軍曰公初至經畧戎務考山川發問諜探要領峙  
芻粟遶士馬亟罷僨事之舊將請更易東南名將劉君  
總提軍旅蒐羅部曲材官各得獻名設策風稜抗乎雷

靈義問昭乎日月國亨聞之大懼因稽顙轅門據暴哀  
慄免於殄滅夫持君之命違而征之展武之經服而舍  
之某等候事指使不暇給何能裨成算萬一於是鼇再  
拜復於諸大僚曰由藩大夫言見公篤於用恩由臬大  
夫言見公精於用法由諸將軍言見公嫻於用武鼇受  
一塵為公氓不能覩其大惟生長斯土習聞已往任展  
案錯事之得失參考鄉鄰修治齊政之宜否竊窺一二  
之細貴陽綦布星列莫匪夷酋苟干冒國典不式王命  
叛侮毀常利在威克乃爭強奪職骨肉私憤自相傾伐  
第因時輯柔不足煩國家刀利在德綏德先威為不競  
大定府志

卷之五

五

德行於威之中善用威者也則鄧襄敏昔攻都勻鄒莊  
簡昔破爐山是已威先德為不仁威行於德之中善用  
德者也則公今撫水西是已鄧鄒所處皆弱夷兼值時  
勢之易公今處勢之難名與鄧鄒齊勤勞實且過之抑  
威克者事顯易知德綏者功深無迹故公之功視鄧鄒  
猶廣厚不可量數後世之師若我三公皆可辭永世  
服美無斁矣諸大僚聞斯言將無曰由治屬士民言見  
公明於相時審於因地哉然卒不能出於諸大僚所交  
語也

大事紀序

國有志乘海內皆然紀事編年青螺始創蓋取春秋之義踵而行之其旨遠其意深矣所以訟獄必書兵戎必戒古人謂獄弭兵寢盛德之至良有以也烏蒙遠在遐荒未聞禮教仇殺劫殺習以爲常彼此告訐各逞胸臆拘提化誨負固冥頑致蒙

蜀省撫都院年 特疏糾參

聖天子恩威互濟赫然震疊爰

遣大臣來黔會勘滿漢大臣一乃心德仰體

皇上好生之心不忍遽加誅戮差官化論祿鼎乾猛然醒悟

大定府志

卷五

五

改過自新匍赴行營與祿世華兩造和息輸糧納貢匪  
頌是程建學明倫沿消種類

聖明在上宥茲一方俯協彝情網開三面准予結案蘇乃蒼

黔息事寧人永敦世好從此文身馭舌之輩沐衣冠而  
盡入版圖椎髻卉服之流覩文物而咸知揖讓豈非事  
之大善歟昔郭青螺先生作黔志而以大事紀冠於前  
所以志源流也今覲作邑志而以大事紀統於後所以  
志勸懲也俾後之覽者知畢節彈丸小邑而遇此兩省  
大案四路官員兵役之繁興供億之困累實烏蒙階之

屬也若非

皇上如天之仁

各憲矜全之德則祿鼎乾以井庠之見螳背當車其不免於滅亡者幾希然則凡爲土司土目世受

國恩者宜以此爲鑒各安住牧兢兢自守克供厥職罔敢隕越時凜

天威於咫尺庶幾子子孫孫勿替引之矣是爲紀康熙五十四年仲夏月朔一日

謹厚光

平苗紀事

南籠府

平靖狃苗始改名興義

狃苗叛逆其賊首曰韋朝元卽七

大定府志

卷五

三

緒鬚也居西鄉之洞洒嘉慶元年四月南籠郡謠傳有仙大仙姑爲民救災難二年正月五日朝元遂蠢動焚普坪六日遂圍南籠府城蔓延及於我州州之西南苗匪亦作不靖肆行焚劫居民避難者紛紛入城時城中兵皆以征紅苗調往銅仁留城及防汛者不滿二百刺史周蒙香與協帥胡千峯相爲運籌嚴飭各城門盤查入出復諭紳士招募義勇以資捍禦又諭知土弁楊標安文德所管夷衆甚多恐爲賊所勾誘隨軋飭勦賊立功受賞兩家眷口亦令先送入城安置又申文告警旋派武舉李興邦程侍廷帶兵十餘名往三分河一帶探

聽知賊勢甚衆四月十四十七十八等日連報三岔河  
糯東坡猓猓坪各處焚掠二十一日賊焚劫至豬場距  
城僅四十里城中益加戒嚴諸紳士率衆晝夜守陴刺  
史與協帥暨廣文君陳二君沿街巡查二十四日有挈  
帶家眷狀若逃難而來者詰之色覺皇遽難民數十前  
識之云此卽三岔河之王珍曾同賊匪焚劫某等俱親  
受其害旋警其行李果有擄得財物立即寸磔以殉家  
眷照例監禁又拿獲爬城賊犯金無毛身帶紅鬚火藥  
與王珍約同來城欲於二十七日爲賊舉火作內應者  
審實亦伏誅二奸匪之被戮固快人心然其機亦殆哉

大定府志

卷五

三

岌岌矣賊無內應未遽攻城顧猶垂涎各鄉財物仍焚  
掠未已五月初七日東路苗匪約數百人至小虎場欲  
肆焚劫守備張雲鳳帶兵往捕炮擊當先數賊立斃衆  
遂驚潰旋復逃竄與西南賊合五月十一日銅仁之兵  
回營十二日胡協帥派巡營李友良莫天民帶領兵勇  
偕土弁往西路勦捕追賊至普供二塘十六日賊由西  
繞南與官兵土弁打仗多被擒獲十九日威寧鎮七總  
戎督兵來援於石鼓寨洞中搜獲苗匪七十餘人二十  
八日攻克豬場熊家場白馬洞諸賊時西路黑騰汎把  
總黃藩領兵來南於白泥會軍連日進勦賊勢窮蹙投



降者不少六月九日午時有賊匪頭裹白巾手執白扇  
自稱仙大仙姑率衆約千人突前攻營官兵用炮轟擊  
賊大呼云打不著炮果擊不能中隨以犬血破其術李  
友良李如春率同兵勇士弁等爭驅前敵七總戎所領  
援兵亦隨後風捲而進鎗炮迭攻戈矛奮舉斬馘無算  
追逐數里餘賊跪懇求降隨奉大憲準撫賊遂平撤兵  
後營員立戰功者俱經嘉獎土弁楊標安文德議敘守  
備職銜紳士譔克述張瑄議敘六品頂戴兵勇等悉賞  
賚有差其陣亡者亦與各難民分別撫卹一切部署周  
妥故雖被瘡痍閭閻仍安堵如舊六月十九日大兵至  
遲處死

序第十四

孫應鼇

西征雜述序

西征雜述爲吾貴督學使明卿吳公行部羅施所得諸  
什中間指陳山川風土因以寓懷紀事貽諸將來足爲  
西南山水增光兵憲使沈公從善梓而傳之有以也余  
嘗覽柳子厚永州柳州諸著凡談永柳遺跡必舉爲故

計後圍一百六十餘日先平各路八月十

實古今聞人有經遊題品後之欲藉名高者咸引以爲  
重大都若此獨惜子厚以彼其才顧少壯嗜進累於王  
叔文韋執誼坐廢遂不振余每讀所賦解崇懲咎閔生  
夢歸等篇哀憐之今明卿直道守節冠冕一世秉正衛  
善贊毀無所撓骭權貴銜忌罔能踏躓光明俊偉之業  
蒸蒸日起鬱爲海內儒宗不但以文詞稱雄回視子厚  
所自立奚啻倍蓰什伯益信士君子當見微而知清濁  
此身一敗百美崩解不可苟然已也余又反覆子厚洎  
公著作私評之子厚研精於色澤公脫穎於風骨又各  
似其爲人夫色澤者采飾具足真宰罕存風骨者氣志  
大定府志 卷五 三

時萬歷紀元秋中日

吳國倫

西征雜述自序

予以校士取道水西九驛渡赤虺河畢事四衛往返幾  
二千里皆羅夷故墟云四衛在漢唐時稍通爲滇蜀道  
民夷雜處獨九驛闕自我高帝奄有黔筑之後至今夷  
部落如初特爲中國役屬耳轍跡所經奇詭不可名狀  
蓋居然遊燧人以前而與茹毛衣皮者伍也又氣候不  
齊嵐瘴颶疾以屏然病軀嬰之萬一無幸何論險阻摧

折哉昔博望侯侈大夏司馬中郎張西夷彼其意非不  
廣夫我則不暇矣爰有雜述敬俟觀風

大定府志

卷五

書

大定府志卷之五十六

外篇六

知大定府事鄱陽王允浩原本  
知大定府事河曲黃宅中重輯

傳第十五 文徵六

過靜和

潘蒼巖傳

從來物尚特生人固介立學爲已不爲人古者也今亦有之如潘君蒼巖近是道光元年余知黔西州事甫下車切切然以作育爲念於士林每物色焉適因公下里有地名新場者民居稠而紳士亦衆抵行館舉貢生監大定府志 卷五十六 一

請謁者數十輩列坐其次因問以讀書首重人倫今同輩中有果克敦孝友者乎曰惟蒼巖先生可烏乎知之曰內外無間言又問士人先品行次文藝今同輩中有果不愧文行者乎曰惟蒼巖先生可烏乎知之曰門人日益親又更端問以秀才處鄉曲戒武斷今同輩中有果不干外事者乎亦莫不曰惟蒼巖先生可又烏乎知之曰平生無訟事蒼巖何許人曰郡庠生名以溶篤學有孝行一言一行俱不苟今恭逢

皇上特恩詔舉孝廉方正現擬公呈呈到曰懇俯察焉時猶恐紳士之半出其門下或阿所好也及遍訪輿論州壤

推風余亦以爲不舉則已舉必於是厥後蒼巖鄉居其門人爲致余意來見古貌古心作止語默迥超時俗又且樂易和平雅有光風霽月之概予微風以紳士公舉之言蒼巖拂然曰鄉黨中品評原無足據向者

睿皇帝御極之年先有是議已曾一一止之竊謂孝廉方正四字深不可以淺者當之也四字精不可以麤者當之也事乃寢茲蒙垂拔卽以四字自勵俛焉孳孳可耳若夫選舉之典則皇然不敢受請辭欣勉之辭益力嘻異矣鄉里推之有司許之膺

大典享盛名人之所羨獨決然去之豈非純乎爲己而無

大定府志

卷五

二

一毫營逐之念者哉嗣余由施秉至開泰轉署修文與水西接壤問蒼巖已古矣嗚呼蓋棺益以論定沒世豈等無稱余之舉蒼巖事未行心自在也故爲之傳

行述第十六

李華封

榮祿大夫兵部尚書諡恭勤顯考雲巖府君行述

嗚呼痛哉何天不弔府君竟捨不孝華封等而長逝耶

府君起家微曹荷

聖明特達之知不次遷擢敷歷中外四十餘年政績彪炳嘖嘖

褒區卽

予告家居海內識與不識皆延頸企足望府君之再出而竟奄然長逝耶癸丑之秋府君嘗抱篤疾怡然靜攝言笑若常不匝月而小間迨冬仲則精采如舊不孝等竊冀過此以往將登大耋享期頤爲

國黃耆何意改歲未久猝邁閔凶嗚呼痛哉不孝等復何以爲人耶府君勳業著於

廟廊他日自當昭垂

國史至於秉心純潔居家孝友以及鄉隣問姍睦任恤或非遠近所能盡知倘百世以後湮沒無傳不孝等之罪上通於天矣是用吮血和墨麤識梗概以備搢紳先生

大定府志

卷五十六

三

大人採擇焉府君姓李諱世傑字漢三號雲巖先世居江南自高祖指揮公隨征張獻忠沒於陣高祖妣汪太夫人攜子姪卜居於黔遂爲黔西州人逮府君已四世矣府君生而敏慧凝重未及冠如成人好讀書而不屑屑於章句惟以講求經濟爲務先王父甚奇之聞先慈高夫人賢爲府君聘焉旣成婚王父遂以家政委府君而專心舉子業雍正己酉以選拔詣京師家本寒素府君侍奉祖妣張太夫人負米百里外備極艱辛如是者六年菽水無缺以故王父無內顧憂肆業成均報滿揀發兩淮補富安場鹽大使府君隨叔父竹溪公奉張太

夫人赴任擢擋署內事一如在家時暇則手一編吟誦不輟將告歸就試王父謂曰人苟抱先憂後樂之志何論品流昔黃次公入穀補官起家卒史卒爲西京循良之最在盡其職而已汝年將壯宜早自効遂以俸餘爲府君援例謁選得江蘇常熟縣之黃泗浦巡檢巡檢故分司民事府君至屏苞苴理案牘決斷若流不決旬而政聲鶴起一時有青天之目故相國尹文端公制府兩江語人曰此今之仇覽朱邑也而參知滋圃莊公巡撫江蘇眷遇尤渥委司都廳府君以溫顏遜辭承上接下無所失意三年薦擢金匱主簿適新疆例開莊公謂曰

大定府志

卷五十六

四

觀爾器局他日名不在我下但階資甚淺無所設施盍勉圖之惟時諸同官亦咸樂飲助遂加捐知州督撫疏請畱江委用得

諭旨而莊公旋去繼之者爲桂林相國陳文恭公知遇無異莊公倚如左右手補泰州知州涖任之日州人皆曰此常熟李青天也令行禁止治行爲大江南北第一其時先王父以七十致仕偕張太夫人就養海陵入境聞頌聲四起知府君才能舉其官意甚安焉會奉各直省保舉堪勝知府之

命文恭首薦府君擢鎮江府知府渡江日童叟歡迎其豪民擢

吏皆屏氣斂迹僅及兩期而南徐大治時以駐防兵生齒日繁例應裁減府君悉心擘畫咸中肯綮不動聲色而旗民安堵又慮已裁者或有失所按其戶口捐給衣糧並請於大吏分撥各衙署與之職役全活無算乾隆三十年恭屆

翠華南幸南徐爲渡江首郡府君仰體

聖慈凡一草一木不以累及小民而一切所需亦無不立辦逮鑾輅經臨耕者歌於隴賈者舞於市府君率耆老子弟辨香跪迎呼

萬歲

大定府志

卷五

五

天子嘉之是年三月擢安徽巡道南徐之民若失慈父母然治關權三年商民相慶咸惴惴然慮府君之去也而先王父遽捐館舍府君辮踊盡哀匍匐歸里喪葬酌今準古無不協於人心焉讀禮竟入都

簡任四川鹽驛道視事甫七日旋擢四川按察使蓋自是而嘗春日隆矣當是時金川蠢動肆掠邊圉

朝廷命將徂征分西南北三路進勦府君總理南路軍需駐僧格宗賊人攻圍甚急府君督率臺軍與同甘苦悉力堵禦相持二十三日殺賊百餘人生擒潛伏縱火者十六人賊始退將軍阿公相傳令撤臺移駐章谷府君



奉檄卽行無一耗散者阿公相具奏

聞當蒙

賞戴花翎凱旋敘功升授湖北布政使雷川辦理報銷府君矢  
慎矢勤會計悉當務持大體而鮮有漏卮事竣

陛見欽奉

諭旨巡撫廣西府君既任封疆每語人曰受

思愈重則報稱愈難繼自今不復知有我躬矣在任八月以張  
太夫人艱歸哀禮兼盡如前喪服未闋

命署湖南巡撫旋調河南值大雨時行黃水漫溢決隄數百丈

府君會同

大定府志

卷五十六

六

欽差阿公相晝夜駐工拯災黎察奸吏儲芟榘集畚鍤疏引渠  
勞心勞形靡有暇晷河水乃慶安瀾四十八年

特授四川總督既至蜀事無巨細凡有關於國計及吏治民依  
者罔不親裁復時與諸寮案諄諄講畫必期於妥協而  
後施行以故大法小廉爲天下最全蜀郡縣庫有朽貫  
倉有紅粟恭請

欽派大臣盤查蒙

諭旨嘉獎會有城工府君親臨督辦務在察浮冒以歸實用以  
是鞏固倍於舊而經費有贏

皇上御極之五十年恭逢

國慶府君以年屆七旬得與千叟之列暫卸督篆入

朝預

宴

賜上方珍綺而回真

異數也次年調任兩江甫視事卽患足疾不得已以解任請  
諭令在任調理值河南水漲決南岸而府君疾未瘳與安徽巡  
撫合兩江制府書公河督李公相度機宜黽勉籌辦工  
既竣而臺匪起

詔以福公相佩大將軍印統八旗勁旅渡臺進勦府君病新起  
不敢稍自暇逸督率員弁料理過境兵丁及運臺之米

大定府志

卷五下

七

所至秋毫勿擾江南父老咸相告曰幸吾父母重來也  
時不孝伯兄華國擢守漳州辦理臺灣軍務卒於詔安  
軍臺府君無戚戚容辦事如故提督陳公札來欲調兵  
赴臺協勦府君計曰臺匪不過小醜跳梁耳

天威一震如摧枯拉朽何必增兵且沿海居民易動難靜一  
聞徵調或因疑生畏必致竄徙紛紛勢且不戢誰執其  
咎因札覆停止仍具摺奏

閩荷蒙

溫旨獎勵未幾而捷音果至然積勞既久舊疾復作遂有失察  
稍曠缺額之案復蒙

特恩寬宥僅停支養廉三年又以兩江地廣政繁軫念病軀恐辦理未能周密仍調回四川府君聞

命感泣力疾啟行旋蜀之日歡聲載途政令悉仍其舊不孝華

封之子再瀛赴試南官榜發下第

皇帝謂府君係總督中得力之人

賞給進士一體殿試

欽陞禮部儀制司主事府君具摺謝

恩因手諭再瀛勉以實心報

國他事不問也嗣值後藏巴勒布夷匪不靖府君聞警星

夜兼程而行督辦軍務以其地風土迥殊足疾大發步

大定府志 卷五

履維艱復以解任請奉

八

旨特派

御前侍衛慶公及

御醫胡公赴川診視並

賜人參一觔而疾不愈遂於五十五年解任進京奉

旨補授兵部尚書許於

紫禁城乘坐肩輿每

召見則

諭內侍扶掖焉是年再瀛卒於京不孝華封係浙江候補知州

應赴原省奉

旨改授員外郎留京侍養蓋

眷顧之隆大臣中所僅見者繼因兩江總督任內有失察句容縣侵蝕錢糧之案府君自謂疎玩辜

思罪無可逭部議已上迺蒙

皇上特旨免其治罪以原品休致衰老餘生實蒙

再造舉家焚頂泱髓淪肌於八月恭祝

萬壽後治裝出京不孝華封隨侍瞻望

闕廷依戀何極既就道所過郡邑多舊寮故吏贈遺一無所受旋里之日宗黨咸來問安府君一一以禮相接無少貴倨之容窮乏者矧之俊秀者教之杜門埽軌當道

大定府志

卷五

九

惟通聞問而已嘗謂不孝等曰凡人可富貴亦可貧賤韓魏公作畫錦堂似未免客氣余功名不及馮伏波而其誠兄子一書實先獲我心汝等當服膺勿失也不孝等退而謹志之府君自懸車以來優游四載雖足疾如故而神明不衰不孝等謂可長奉晨昏私心竊喜詎今年正月間兩足起泡微作楚狀至十九日忽命家人易褐衣扶掖下牀整冠服端坐於几顧不孝等曰汝等但當勉報

君思不墜祖德毋使余銜恨九泉也言訖瞑目而逝嗚呼痛哉府君歷官五十年膺封疆者二十年前後蒙

賜御製文集詩石刻

御製詩凡七

御製贊一

御製論一通鑑綱目養政圖燈聯詩時晴齋法帖各一他若福字如意壽杖朝珠等不可殫記生平陳奏蒙

特旨俞允及部臣議行者不下數十事其尤著者如撫河南日因青龍岡漫口勘明歷次的增夫料價府君專摺懇請多分年限攤征以舒民力卽奉

特旨全行豁免共豁免銀九百四十五萬三千兩有奇督四川

曰奉

大定府志

卷五

十

旨籌辦楚省來川販賣米石事宜府君以爲鄰封告糴自當接濟況奉

旨軫恤災黎豈宜自分畛域但小民趨利如鶩知楚省歉收現有商來川販米勢必囤積居奇以索貴值不糴固於鄰封無濟增價以糴仍於鄰封無濟也於是一面飭令沿河應糴之府廳州縣宣示

聖天子軫念民生普濟宏敷之至意剴切勸諭使各化此疆彼界之見將平時積貯及本年收穫米穀量存本家一年口糧外其餘悉行發糴以濟鄰省民食一面具摺奏請飭令沿河應糴之府廳州縣開倉碾穀以備民米偶有

缺乏之處且示奸民以無奇可居自必源源出糶價值不至加昂楚省米庶足用奏上蒙

硃批所辦甚妥誠堪慰矣更當實力爲之既而浙省亦遇偏灾委員來川告糶府君奏言浙江距川遙遠非如湖北商人陸續前來尚可稍需時日者比若令地方官在於本地零星購收未免遲緩且民米現有楚省商民採買又令地方官收買市價必至騰湧既無益於浙省反於楚省有礙請將近處各州縣碾備楚省販糶之米先撥出十萬石以應浙省之用俾得迅速運回接濟其碾備楚省官米尚存五萬石至民間之米則全以備楚商之糶

大定府志

卷五

十一

是湖北武漢等府得此官民之米兩應其糶自足敷用設或一時不能湊集臨時再酌量動碾亦尚容易如此辦理浙省委員既可速行交兌而楚省採買仍不慮短少卽市價亦無慮加昂似爲彼此均便奉

硃批所辦好督兩江日遵

旨由江南上海出口運撥川米協濟臺灣軍糈一事府君奏言此項米石運至泉州廈門交收碾轉盤量恐多拋撒隨照江省辦運之例製備麻袋於上海過載時量米一石用麻袋一隻裝貯川省委員交竣事卽令回川至江省接運川米仍照川省數目分爲九運每運派委文武

員弁兵丁管押前進此後續到米船卽照此章程辦理  
趕緊盤量過載不使稍有停滯其空載米船嚴飭文武  
員弁催押出境以便後來船隻停泊不致擁擠至需用  
船隻現同浙江巡撫督屬無分畛域竭力趕催務期足  
用不稍貽悞奉

硃批好爾等皆勉力可嘉蓋府君之能佐

聖主愛民又每事能上合機宜如此至籌辦一切吏不能欺而  
民得實惠皆以爲府君之識力實有過人者焉今貴州  
巡撫馮公魯巖以府君卒聞於

朝卽日奉

大定府志

卷五十六

十一

上諭原任兵部尚書李世傑前經簡任封疆宣力有年辦理地  
方事務認真整飭今聞溘逝殊堪軫恤所有應得恤典  
著該部察例具奏欽此逮部議上蒙

賜諡恭勤並

賜祭銀十二兩葬銀二百兩建碑銀三百五十兩及

諭祭文渥蒙

寵眷優隆不孝等聞

命自天感激無地雖銜環結草無以仰報萬一也府君生於康

辛

熙五十五年正月初九日未時享壽七十有九歲嗚呼  
痛哉府君一生嚴以律躬恕以接物人有小善必津津

樂道之其不善者亦慙阻自廢退身歷七省位愈顯而德愈恭燕見寮屬語不及私而無疾言遽色待子弟僕御亦然惟墨吏則嫉之若讐自太守以下非檄調不得詣省會其有因公至省一面之後即促之歸若有事按部肩輿而外惟僕從數人或少有滋擾則譴責立至以是傳誦藉藉達於

### 禁庭蒙

諭旨褒獎謂任封疆者當以爲法府君每語人曰廉美德也然非儉無以養廉故居不華屋食不兼味近體之衣不用縑帛室無珍玩之物竹几絕牀葛幃布衾泊如也或有

大定府志

卷五

三

勸畜姬媵者府君曰吾黽勉夙夜精神猶慮不給復何能分與粉白黛綠者耶門戶之事概不與聞先慈高夫人獨立主持巨纖畢舉以是融融偕老雖暮年猶相敬如賓居恒不談巫覡不召俳優喜培養士類所至以振興文教爲己任觀察蕪湖時建中江書院延名宿主之六郡知名之士咸聚其中科名鼎盛由是而始及制府兩江見貢闈號舍卑淺而度板僅敷其半或秋雨連綿則水及於脛府君捐貲增設以滿爲度江南士子至今誦之黔西舊有書院以經費不足漸至傾廢府君旋籍後捐腴田二十七畝謀於有司修葺完好延師督課名



曰文峯他所興築皆有裨於通邑者而適適然不居其功嘗曰吾志在利人濟物嘗恐不滿其量敢望聲施後世耶胸次之光明磊落類如此案牘之暇不孝等過庭起居則以立身行己及異日居官之要懇惻開陳尤以統袴膏粱爲誠凡延授子弟經者皆一時名宿不孝華封兄弟父子倖得成名實有所自今者箕裘未替而枯槁徒存搶地呼天曷其有極嗚呼痛哉府君通籍後疊遇

覃惠高祖諱蔚伯前明襲指揮曾祖諱攀麟樂道不仕祖諱植雍正己酉選拔貢生授兩淮富安場鹽大使皆

大定府志

卷五

十四

誥贈榮祿大夫妣高氏先府君卒

誥封一品夫人府君兄弟四人長諱世倬候選主簿次卽府君三名世任歲貢生候選布政司理問四諱世俊江西饒州府經歷同居友愛至老彌篤生子二長華國乾隆辛卯科舉人歷任廣西永康州知州升百色同知以府君迴避改廣東借補揭陽縣知縣升羅定直隸州知州保舉堪勝知府奉

旨派往臺灣辦理軍務升福建漳州府知府卒於官娶原任浙江富陽縣知縣常熟張公福敏長女次華封乾隆甲午科舉人分發江蘇以知州用歷署泰州邳州知州寶山

宜興知縣亦以府君迴避至浙江署理杭州總捕同知  
未補缺丁內艱服闋後隨侍府君進京改授員外郎娶  
丁丑進士原任貴州龍泉縣知縣候選員外郎海寧張  
公起鳳次女繼娶乙丑進士原任江西按察使福建廖  
公瑛次女孫九人華國生者四再沂候選布政司經歷  
娶乙未進士現任掌福建道監察御史常熟張公敦培  
次女後府君七月卒再濂國學生聘原任廣東鹽運司  
同知甘泉羅公興堯次女再澣國學生聘戊子科舉人  
現任四川眉州直隸州知州江寧涂公長發長女再汾  
業儒未聘華封生者五再沫乾隆丙午科副榜分發江  
大定府志

卷五十六

五

蘇侯補直隸州州判娶原任浙江紹興府知府滬池席  
公椿長女再瀛戊申科舉人己酉科

欽賜進士

禮部儀制司主事娶江蘇儀徵附貢生吳公崇桂長

女先府君卒再沛國學生聘江蘇元和國學生嚴公鶴

涇長女再潞國學生聘侯選布政司理問常熟張公敦

坤次女再沔再沖俱業儒未聘孫女九人一適庚子進

士翰林院編修武進劉公汝馨長子候選州同知嗣富

二適己丑進士現任山西汾州府同知丹徒程公沅長

子河南候補經歷秉鏞三適乙酉科舉人原任廣東番

禺縣知縣武進許公承志長子國學生紹言四適壬午

科舉人原任浙江鄞縣知縣陽湖錢公維喬長子國學生中缺五適辛丑科傳臚翰林院編修國子監司業江寧秦公承業長子甲寅科舉人繩曾六字辛卯科舉人河南候補同知錢塘嚴公守田長子炳七字候選從九品畢節邱公翰次子庠生杰皆華國所生一適現任戶部右侍郎畢節韓公鏞長子樹猷二字現任內閣中書山陰何公金長子浩不孝華封所生曾孫四人之鈞國學生聘己酉科選拔貢生同里張公初銘長女之鏞國銑業儒未聘皆再沂所生之錦聘候補鹽運司同知休寧程公元淮次女之銓尚幼未聘皆再涑所生不孝等

大定府志

卷五

六

古凶餘生語無倫次伏冀搢紳先生大人錫之銘誅以光泉壤不孝等感且不朽

銘第十七

邱禾寶

封亞中大夫貴州宣慰使安君墓志銘

使君肖岳公以許公狀若兄泰階行蹟遣人乞志銘於愚曰安氏菴有水西夏稱鬼方漢爲羅甸昔授王號唐宋以來歷承褒寵逮我明皇御世其祖靄翠率土先歸授宣慰使更世及延至貴榮君以懋功擢大參返龍源公育三子長諱震民號如山次泰階公又次肖岳公卽

今持狀乞銘者也如山早逝泰階生而岐嶷週之辰羅百物試之惟攜篆與筆父母鐘愛之就外傳時傳謂世官髦士非尋章逐句埒乃摘經史之忠孝廉節諸大義彙成帙授之使誦越月舉所授詰之無愆忘年甫衰餘龍源公卒當事請授執事明天子可之泰階公曰吾以黃孺膺龐爵君恩是親恩也敢忘三春報哉遂備述世系數奏鳳闕欽奉俞旨封其祖仁者爲亞中大夫祖母祿氏爲淑人乃龍源公母鳳氏皆得如之而內子瞿氏並從夫之貴焉且格外賜泰階公金帶一束緋衣一襲錦緞諸物猗歟休哉一時恩光奕世榮耀古羨出將入大定府志

卷五

七

相安氏世得之矣無何播寇跋扈奉命聲討鳳淑人躬理芻糧轉輸而以軍旅付之泰階公及今肖岳公時方初夏泰階負質清癯指揮馳騁爲炎燭酷燠所困嵐烟瘴雨所苦患目劇甚維時大司馬中丞直指暨藩臬諸公皆使人問疾醫來者相屬於道又於軍中得女訃報諸軍哀哀請暫旋泰階公拔劍叱之曰昔章昭達因喪明而致身通顯富鄭公亡兒女而奉使虜庭一相一侯流芳百世吾將師之以報朝廷誓不與賊俱生豈更以身家事介胸臆廢君命哉且疾且哀從戎如故肇驅兵直搗海龍賊屯僅旬日而天險破賊族赤矣黔敘之曰

皆一目而神彌全殞一女而家不顧是母是子難兄難弟蜀敘之曰大水田之塵戰潰賊腹心桃溪衙之焚燒亂酋手足其揄揚褒嘉爛然於露布簡牘者蓋累千百言播冠甫平藺奢內訌日尋干戈擾攘者十易草木上下文案磊磊如山泰階侍恭藩洪公往治之彼甲點乙狡此息彼作卽挾揮霍之技者亦末之何泰階臨勘厚金帛以彌強捍捧盟盤以堅信義無俟片言迎刃而解錙銖不煩矢鏃不遺而坐致西南於寧謐者泰階公之力也未幾山苗路苗黨而梗道滇楚之間阻闕不通於時泰階公已抱病矣直以委命難辭力疾往捕而獻叛

大定府志

卷五

六

獻馘不可指計諸苗遂喙然陳伏而行旅居民安堵無恙藩臬諸公寵錫尤加泰階賦性仁慈敷政精明糧賦無逋奸宄屏跡事母尤孝政無巨細悉稟命行或蒙訶責凜凜夔夔俟怒霽得溫語而後退及鳳不祿哀幾毀骨痛至嘔血苦塊皆赤勺水粒米不入口者屢日已而左右婉勸始進糜粥菜羹迨歸窆之辰牲牢豐潔諸品燦盈四方來觀者無不揮淚尤篤友于待今尚岳公恩禮甚沃休戚相依公生于萬曆九年辛巳正月初二日卒于萬曆三十六年戊申十一月初六日歷年二十八歲葬於雨龍山之麓螺師塘之游枕寅趾申公乏嗣其

位則弟肖岳承之公之忠愛孝弟卽厭飫經史列名薦紳者亦不能遠過故志而銘之以垂不泐銘曰將門黃鬪闔外白眉三箭亂定一戎功歸忠愛孝友金藏彥威綸音寵錫奕世交輝陟此寅岡靈鍾虎邱仰彼申岫瑞顯公侯時維小山敬承大猷貽厥仲容接武悠悠日月同光乾坤不朽

姚東之

鶴冢銘

威寧刺史周鑑泉同年餉余兩鶴與人不知飼也餓至八日一餓死一僅存一息哀其侶之失也亦不食越日死余瘞而封之小滄浪亭之側識其碑曰鶴冢且爲之

卷五

九

銘曰

猗靈禽之矯矯兮孕仙胎於延水胡不縞衣而遇蘇仙兮乃墨係而見獲於周史造檻車兮俾汝止路迨遙兮遠千里吭不能引兮足不得跣渴不飲河兮饑不飼批罹八日之困苦兮而乃至於死也悵尺書之招致兮徒增余之悵也滄浪之水清且淪瘞汝於側兮招汝魂爲文以識兮表汝貞魂歸來兮覩此珉

賦第十八

黃宅中

種橡養蠶賦

閩人劉祖憲橡繭圖說云橡爾雅謂之櫟山東關中謂之榭貴州謂之青桐其木可薪炭其子可飼豬其斗可染皂其葉可養蠶管子云十年之計樹木而橡則四年便可養蠶他樹必沃土易長而橡則瘠土皆宜今遵義一郡橡繭之利甲於黔省蓋自乾隆間太守陳玉璽教民蠶織至今賴之大定界連遵義種橡亦宜惜僅供薪炭之用不知養蠶因作賦以風焉

繁黔嶺之荒寒莽童山兮岌岌地不產乎桑棉利孰興於鄉邑彼木有材維橡可拾沃沃葉新森森林立秋風

大定府志

卷五十六

二十

颯兮黃殼乾春雨滋兮青林濕屋多依樹蝸舍頭低人似采桑蠶筐手執蟲食葉以眠三結緯絲而縷十

緯絲以十

一結懿夫陳太守之治遵義也惠懷閭里巡視陌阡憫

胼胝之婦子殫力作於石田夏灼膚於烈日冬裸體於

寒天挾纊忻忻其有幾緜袍戀戀以誰憐乃周身之布帛居奇貨於市屢良田青疇桑柘之林巖崖不植是以

紅女機梭之法里巷罕傳無衣褐而嗟歲暮有筐綾而頌宰賢莫鴻嗷以綏輯課蠶織爲最先看他陰滿榭林

富吾民者惟此物遂爾風行棠舍志遺愛兮想當年橡

之所植瘠土偏宜種和豬血栽種時先將橡子用豬血調和則易發生名假

虎皮欄椶種不一有虎皮青實倂榛栗薪柞枝辨釋名

於檟檟讓佳卉於桐椅如檣材散似櫟陰垂旦旦伐樵

童之斧朝朝供爨婦之炊予取予求不汝瑕疵也其菑

其翳時惟作屏之豈知斯材之利用荒乃式穀以蕃孽

叢可放蠶蔽芾不殊樾蔭良能作繭堅韌還類縲絲時

則野屋春深山村雨霽鹿眼籬編馬頭神祭蛹殼籬承

烘房戶閉調火候之融和謹所宵之防衛蛾乍出頭蟬

如脫蛻雌有偶而秀分眉蛾出時大者為雌小者為雄

雄盡雄者眉蠱雌者眉秀無論雌使自相配偶婦攜籃而花插髻革棚竿影偵鳥雀以驅

除山谷人聲怕猿猴之傷噬行來椽林深處短條縮以

大定府志 卷五 主

長條食到椽葉稀時日計餘於月計爾乃葦箔晒晴叢

祠搗鼓煮繭人忙提絲手數乙乙千條庚庚萬縷絡線

導筒煮繭畢以所抽之絲套在紡身在戶安綜馬而籤

撐線馬以竹管為之長二尺二寸時竹劈開一尺三寸

所以套經以小竹籤撐其中使開口以穿線線線以苧為之

聽鳴鷄而燈炷男繅鞦而身嫻線線線以苧為之長二尺

三女拋梭而力努成章與蜀錦同誇入市共吳綾爭估

染五彩之輝煌走四方之商賈使非椽山之徧地能栽

椽木之良材早樹則蠻烟焚雨之鄉乃亂石荒榛之士

繭種難成蠶絲莫吐草衣卉服誰變椎結於夜郎保障

繭絲孰追循良於名父也大定地隸羅施昔稱盧鹿與



遵郡今比隣豈山蠶之難育或載績於苧麻或剥皮於  
樓竹或貿布而紡綿或買絲而難穀弗婁弗曳幾等諸

於樞榆以薪以蒸顧載芟夫橡樹胡不易種於茲邑樹

樹栽培幸觀成效於他年家家杼柚同歌五袴境內少

牛衣夜泣之人不及十年水西多繭館春榮之木內小註俱

出橡繭圖說及遵義府志道光甲申貴州安順府安平

縣令劉祖憲以大府趙遂樓制軍程鶴樵中丞吳荷屋

方伯鈞屬吏勸民種橡以至上機成綱釐爲四十一說

繭圖說自辨橡種橡以至上機成綱釐爲四十一說

各一圖刊爲印本棉布民間蓋推遵義陳太守玉璧遺

法也乙巳冬余守大定山郡苦寒境內貧民冬月多裸

身赤體走冰雪中心甚憫焉前署守徐玉章教民紡

織間有從者而地隣遵義種橡亦宜橡俗謂之青桐樹

春土荒山皆可種植諸生羅詩林向余言其家養蠶可

以其法推而行諸境內萬松書院傳確園院長又以劉

### 大定府志

卷五十六

三

大令橡繭圖說印本見亦喜而錄之因出示勸民栽種  
青桐樹期爲永久之利夫十年之計樹木而橡樹則三  
四年即可成林放蠶利饒而效速官斯土與居斯土者  
可不汲汲以圖之乎丁未三月集試郡屬童生以種橡  
養蠶賦命題擬作一首以示勸勉之意非  
敢較工拙於文字也惺齋黃宅中并識

### 何思貴

黔西州  
優貢生

### 水西賦

繁安氏之故地作黔邑之新疆界連清鎮境接大方有

仙人搗馬之跡有印山浮玉之祥去京師七千九百餘

里以立國延濟火一千四百餘祀而始亡懿夫水西之

爲地也彈丸黑子拉朽摧枯曾何足齒惟是唐宋以來

普貴封王阿蓋順理霽翠以下或授大將軍或爲安撫

使綿綿延延以至於此洎乎天啟崇禎之間流寇內訌  
軍威小弱安位崇明造變肆虐武侯祭星之地柴弩縱  
橫文成講學之區氍衫繹絡維時雖以張雲鵬之六面  
加兵許文成之三方進薄固未能犁其庭而掃其穴也  
洪惟我

國家

聖神文武小姑息之南宋卑怯弱之漢唐既底定於華夏遂  
有事於蠻荒截長鯨之鬣鬣剝妖狐之腎腸化頑梗爲  
禮義變樵卉而冠裳如今日之所謂黔西者也爰爲之  
歌曰水西之地兮有郭有城水西之野兮有稻有杭獅  
大定府志

卷五十六

三

山之蔚然而深秀兮及龍水之瑩然而澄清士馳名於  
廊廟兮民盡力於桑耕夫何安氏之作孽兮不獲享乎  
千萬世之太平豈物極之必反兮抑亦愧乎其祖奢香  
之神明

大定府志卷之五十七

外篇七

知大定府事鄱陽王允浩原本  
知大定府事河曲黃宅中重輯

詩第十九上 文徵七

李京字景山河間人大德中官烏撒烏蒙宣  
慰副使又見職官傳詩一首○以下元

過七星關

七星關上一回頭遙望鄉關路阻修欲向雲山攀北斗  
不辭鞍馬過南州兩巖墜壁連天起一水漂花出洞流  
聞道清時無瘴癘行人經此不須愁

馮福可詩一首

大定府志 卷五十七

七星關

點蒼何蒼蒼環以西洱河百年雨露思詎敢煩天戈  
門振烏撒衣帶踰牂柯巨險久已平故關尚陂陀云胡  
七星名亦復垂不磨

白經詩一首  
以下明

梁臺

地老天荒遺舊臺礎殘碑斷鏤新苔禽聲時作笙簫響  
花影留爲錦繡裁

林

晟正統中畢節衛指揮  
又見耆舊傳詩三首

豐樂鄉

野老杖藜山徑裏  
牧童吹笛晚風前  
要知擊壤聲中事  
社酒新筍樂醉眠

靈峯

靈峯秀異卽蓬萊  
蒼翠玲瓏似翦裁  
紅樹白雲圍禁竈  
琪花瑤草足丹臺  
採芝人語松邊徑  
騎鶴仙留石上苔  
際此悠悠忘世慮  
絕勝劉阮到天台

秋暮東關晚眺

平原極目望長天  
宿鳥歸鳴楓樹前  
雙井曲流禪榻外  
兩橋橫鎖衛城邊  
居民南北隨行止  
爨戶崎嶇幾萬千  
草木已今霜降後  
一番新景待明年

大定府志

卷平七

二

王守仁

字伯安號陽明諡文成餘姚人  
正德初謫官龍場驛丞詩一首

六廣曉發

初日曔曔似晚霞  
雨痕新霽渡頭沙  
溪深幾曲雲藏峽  
樹老千年雪作花  
白鳥去邊迴驛路  
青巖缺處見人家  
遍行奇勝纔經此  
江上無勞羨九華

楊

慎字用修號升菴成都人嘉靖初  
謫戍金齒流腐黔中詩十八首

赤虺河行

君不見赤虺河源出  
芒部虎豹之林猿  
獠路層水深雪  
不可通千尋建木撐  
寒空明堂大厦採  
梁棟工師估客  
穿蒙龍此水奔流似  
飛箭縛筏乘桴下  
蜀甸黯淡灩澦

險倍過海洋流沙爭一線誰驅烏鵲役龜鼉秋濤夏潦  
息盤渦柏亭雲屏濟川手奠民枕席休干戈安得修爲  
夷庚道鐫刻靈陶垂不磨

雪關謠

雪關謠述途人思何將軍也將軍名卿成都人

雪山關雪風起十二月斷行旅霧爲籌水爲臺馬毛縮  
鳥鳴哀將軍不重來西路何時開

烏撒寒

烏撒天元雲簇雪爲林水爲谷祝火龍髯縮金烏足鳶  
跼溪毒淫羊腸坂詰屈四載難以乘橈五技詎能緣木  
獨行畏畏况瘁人向曉欲投何處宿

大定府志

卷五十七

三

羅甸曲四首

山圍羅甸國水繞滴澄橋橋下東流水可惜無蘭橈  
蠻樹不凋葉蠻雲不放晴長亭望不見何處是查城  
寒鐙闕孤館陰雲鎖重城長夜恒思曉久雨恒思晴  
林間山胡鳥聲聲啼我前何似故園裏花亭聞杜鵑  
翠屏山

水峽風烟接大洲翠屏青嶂遠丹邱當年若使王猷見  
那有輕回雪夜舟

羅甸吟

苴蘭方號鬼貴竹甸名羅牛泔枉稱海駿坂猶題坡林

餘楚筆輅枝識漢牂牁久成勞行慟天高奈若何  
繩橋

度索尋糧國升猱引狄形俯窺愁淨綠仰睇失空青  
雨過苔緇濕風來箐霧腥天將限夷夏何用罪坤靈  
層臺驛

陡坡千百磴破店兩三家濕竈薪無焰磽田飯有沙  
瘦兵宵泣血猛虎晝磨牙行路難如此羈愁一倍加  
箐口關

箐口關何險山頭路更賒凌兢磨旋蟻屈曲陣蟠蛇  
官舍惟孤舍人家無一家客心何處切夕照閃歸鴉

大定府志

卷五十七

四

畢節簡蔡席二廣文

鶉衣裹凍身荒館夜難晨冷榻誰相伴寒鑪獨可親  
窮途千慮失天遠四愁新夢裏兒童戲醒來倍愴神

烏撒喜晴

易見黃河清難逢烏撒晴陰霾既已豁險道况復平  
蜀日杳千里滇雲惟十程江花與江草異國看春生

山行口占

曉霧迷山徑蠶叢覓去踪拂衣依翠竹攬轡遶蒼松  
澗口波聲急枝頭鳥語冲浮雲頻聚散舒捲任西東

烏撒九日

百年身世苦辛行九日登臨感慨生鴻雁未傳滇海信  
茶英偏動蜀山情空庭露白羣鴉散古木霜黃獨鶴驚  
尊酒相思搖落地江湖不隔夢歸程

七星關橋

架閣盤巖嵌碧空驅山鞭石讓元功金梁玉柱撐天漢  
雪浪銀濤抱雨虹襟帶平分黔蜀險名關合占楚滇雄  
登來彷彿臨雲浦不信飄流遂轉蓬

程

建昌人嘉靖中官  
鎮遠知府詩一首

龍潭夜月

玉盤出東海到處清光被况直山上池久爲靈物寄水

大定府志

卷五十七

五

輪浴金波靜影沉空翠怪得潭底蛟擬作明珠戲

萬士和

字思節諡文恭宜興人嘉靖  
中官貴州提學副使詩一首

烏撒道中

地當高處峯隨轉雲到窮時路更賒夏半火刀方布種  
晚來牛馬不歸家瘴烟寒鎖蠻村樹嵐霧晴迷客子槎  
干羽未能馴鬼國祇貪關市重鹽茶

周文化

貴陽人嘉靖四十三年舉  
人官鄧州知州詩一首

鴉關

戟列峯屯俯萬山雪乘鴉翅馬蹄艱一爲行省冠裳地  
便是雄圖鎖鑰關使者銜恩通十部中郎飛檄走諸蠻

棄繻叱馭無人說何用長纓過此間

吳國倫

字明卿興國人隆慶中官貴州提學副使詩十九首

夜宿陸廣驛卽事成短歌

霖潦瀰瀰我行遲遲惡木參天狼狽晝啼陰陰空谷館  
人何之荆莽在戶不堪不離蝸煦我釜豺踞我垂僕夫  
變色魑魅以隨刈薪措林杵麥爲糜永夜難旦風雨淒  
其失路奚悲絕糧者誰薄言詠歌聊以樂饑

陸廣道中

龍場西去羅鬼巢亂山無名倚天高聖朝鑿險通九驛  
欲令徼外無腥臊石徑崔嵬藜莽布獸蹄鳥跡看如故

大定府志

卷五七

六

經過百里無人烟但見千巖萬巖上黃霧單車摧折奈  
遠何攀梯躡磴迴盤渦氣候毒淫風景惡陸廣山前陸  
廣河瘴波洶洶排山出兩岸猿聲哀落日驛署孤懸虎  
豹宮人家半徙蛟龍窟虎豹蛟龍謾陸梁摩挲寶劍騰  
精光不須結履從章亥赤足猶堪步八荒

宿谷里

石門風高千樹愁白霧猛觸羣峯流有客驅馳暮未休  
山寒五月仍扳裘飢鳥拉沓搶驛樓迎人山鬼聲啾啾  
殘月炯炯明具鉤竹牀無眠起自謳

飯水西驛



相逢水西境大半鬼爲人鳥言難可解卉服日以親雜  
繪裹頭銳如嶽鐵距杖材猛相剝掉頭不應舍長呼望  
見前旌亂吹角道傍側目窺繡斧將前復卻舌盡吐驛  
亭跪進燕麥羹飽食且忘行役苦

次奢香驛因咏其事

我聞水西奢香氏奉詔曾謁高皇宮承恩一諾九驛通  
鑿山刊木穿蒙茸至今承平二百載牂柯燹道猶同風  
西溪東流石齒齒嗚咽猶哀奢香死中州男兒忍巾幗  
何物老嫗亦青史君不見蜀道之闕五丁神犍爲萬卒  
迷無津帳中坐叱山川走誰道奢香一婦人

大定府志

卷五七

七

飯金鷄驛

金鷄山頭金鷄驛空庭芳草平如席瘴雨蠻雲天杳杳  
莫怪金鷄不知曉問君遠遊將底爲脫粟之飯甘如飴  
閣鴉行

我行渾入蠻王壘蠻兵被毳行且呼指點羅夷諸種落  
延袤千里依皇圖歷歷重柵臨斷浦湮壘木樵密如堵  
乃耕餘力射獵還磔鷄賽鬼搗鞞鼓蜀賈無時市蒟醬  
漢使不復問邛杖櫛下騎嘶笮馬肥圍中醉擁麋姬唱  
閣鴉回首復嶺橫連雲不斷如長城此中藏甲不知處  
云是先朝靄翠營靄翠曾懸列侯印翊我高皇威獨震

遙傳一檄定西南世世稱藩無血刃豈其苗裔食故疆  
金紫蟬聯澤未央莫以彈丸誇險阻修文天子今堂堂  
阿落密歌二首

鼓子花開六月寒烏丸稻熟且加餐南人新解巴渝曲  
荻管聲聲蜀道難

滇人未盡蜀人過車馬如繩奈轆軻莫以相逢非故舊  
三杯同買聽夷歌

象鼻嶺

山形如象鼻礪道擬蠶叢筏渡千巖底車旋萬石中短  
亭微上月鳴瀑遠生風白髮悲行險乾坤一轉蓬

大定府志

卷五七

八

夏還過白巖

赤水不勝葛白巖重拭衣纔嬰瘴波毒忽失朱夏威氣  
候乃如此風土難可依飄飄遠遊子役役何時歸

赤虺河

萬里赤虺河山深毒霧多遙疑驅象馬直欲搗岷峨筏  
趁飛流下橋穿怒石過勸郎今莫渡不止爲風波

赤水公署作

突兀壘山合參差雉堞低人家懸碧石公署出丹梯夜  
靜水聲亂日高雲氣迷牀頭白麈尾愁絕自提携

赤水苦熱

何事炎蒸候遨遊赤水邊密雲浮瘴癘長日警烽烟屋  
角雙厓墮城心亂瀑懸何當御風去高步雪山巔

林憲副仲清許少參應衡西巡至畢節各以書來述所  
經諸衛旱暵狀及三月安莊雨雹四月烏撒雨雪之異  
殊有憂志愴焉答之

金轡牂柯問俗行窮鄉四月少春耕不辭瘴癘經蠻府  
旋紀灾祥問董生赤旱未蘇天雨雹朱明何自雪成霰  
憑誰敢測陰陽令千里投書淚滿纓

寄懷仲清應衡

夜郎西指箐連雲萬嶺盤紆九驛分日落蠻王深閉壘

大定府志

卷五

九

雨來山鬼亂呼羣蠶叢誤擬通秦道鳥語誰諳諭蜀文  
五月輜軒馳未已瘴烟何處不愁君

抵畢節

九驛途窮役未停荒城到客雨冥冥銅符扼險依三蜀  
鐵柱臨關鎖七星虛擬輜軒能問俗且隨童冠一傳經  
攬衣空館微吟好郭外羣峯遠案青

在畢節簡沈從善兵憲

百雉城開九驛西千家黯澹石林棲觀風漸與烏蠻近  
辟瘴仍愁赤水迷苜蓿雨肥初縱馬稻花風暖共占雞  
非君鎮靜多籌策何得夷方息鼓鼙

過層臺驛

野潦奔鳴石徑斜，疎林殘日見田家。  
編籬半護邛王竹，築塢新移望帝花。  
荒徼萬山連蜀道，遠人重譯問京華。  
鄉音斷絕愁如夢，何處風高急暮笳。

過白巖驛

故阿落密地

箐林幽窈石籠從，永日馳驅傲未窮。  
驛道久通滇蜀使，居人猶雜漢夷風。  
巖間板屋依雲架，塞外芒山人雨空。  
赤水寧辭三峽遠，雙魚爲寄楚江東。

江盈科

字進之，桃源人。萬曆二十九年以大理寺寺正卹刑雲貴詩四首。

黔中雜詩

錄四首

大定府志

卷五十七

十

羣峯莽互插天遙，旂曉都從一望銖。  
蠻語兼傳紅犵狓，土風漸入紫薑苗。  
耕山到處皆憑火，出戶無人不佩刀。  
一自播兵蹂躪後，幾家茅屋人蕭條。

何處關山是盡期，馬啼終日歷嶽寄村墟。  
寂寂寒炊火，野鎮蕭蕭閃戍旗。  
天斷不聞陽雁過，雲深只有嶺猿知。  
我期漢吏寬文網，莫把繁文縛屬夷。

地險人稀物態涼，蕭疏羸馬與牛羊。  
綵繩貫貝苗姬飾，蠻錦裁衣衛士裝。  
絕壁燒痕隨雨綠，隔年禾穗入春香。  
民間蓄積看如此，那得公家咏積倉。

一山如戟一如環，列瘴層層杳莫攀。  
風雨豈無魑魅嘯，

月明應有鶴笙還花苗所在營三倉草檄誰人諭百蠻  
見說赤九時報警天涯壯士盡凋顏

林堯俞

詩一首

聞黔中平志喜

皇風式九圍聲教暨邊鄙由來西南夷難用漢法理其  
居雜編氓其道羈縻耳撫馭乖所宜騷駭孰爲弭黔本  
隸鬼方滇蜀相唇齒各自有君長號令一齊止昨者糾  
諸樊西川亂無紀況乃支奢酋水蘭負堅壘目覩貴陽  
城壘趨同折筆我軍寡且弱日夕呼庚癸相距及歲餘  
如肉置諸机疾聲望外援割髮而噬指幸然揀兵至背

大定府志

卷五十七

十一

城拚一死又逢賊氣情乍合便披靡既以解重圍亦足  
療瘡痍雖未極兵威庶幾禡不軌斯維社稷靈人力詎  
至此但此全城功愈云李與史願懷往事真勿生戰勝  
喜如聞老鴉關去城僅五里

黃龍

遼東人崇禎初官  
貴州參將詩一首

福泉樓

一片孤城接太清參差樓閣與雲平露栖叢桂寒仍發  
風動飛泉石自鳴異域不妨頻中酒更深何處忽吹笙  
故侯馬鬣空秋草笑指浮雲萬感輕

吳偉業

字駿公太倉人  
本朝爲祭酒詩一首

○以下

本朝

過可渡橋

盤江西遠七星關可渡河邊萬仞山隴上舊傳收白帝  
南中今喜定烏蠻龍坑壯馬堪馳驟鷄足高僧任往還  
辛苦武侯停節處殘碑零落草班班

彭而述

字禹峯鄧州人康熙二年  
官貴州按察使詩一首

水西行

惟

皇神武誓長征天策羽林上將營特遣將軍授廟畧鐵騎十萬  
水西城指揮如意真無比叱咤之間風雲起雕弓在箠  
箭在腰笑謂鼠子不足弭苗壘何堪作戰場瑯洞蠻窟  
大定府志 卷十七 十三

不可量混沌以前未見此密林深箐何茫茫鑿山創道  
填鼓吹馬上兜鍪裹糗糲大者牛車小負擔日爲君王  
開土地延袤四府多膏田烏蒙鎮雄與東川此輩婚媾  
相犄角古來結聚西南偏昨者露布三大捷或化鯨鯢  
或反接從茲一鼓須蕩平遐荒裔土歸臣妾甌脫自此  
供職方縱橫千里多稻梁天子萬壽弗而康獨攜長劍  
掃糶糠

闕撰人

詩二首一出畢節志舊題爲方萬策作一出  
大定志舊題爲吳國倫作皆非也今缺其名

氏而附於康熙之  
初以俟知者云

七星橋歌

山如峽兮石如碣石巔樹古水巖折井冽泉寒雨雪霏  
雄關百雉峰之缺萬仞鬼竄人跡稀獨臨縹緲看奇絕  
白雲夾道護旌車朔風吹衣翦舊襜北望青山飛鳥外  
一片瘴靄狐狼穴曩時伐鼓下榆關邊上羽書飛不輟  
詔書數道天兵下大將再呼羅夷滅一自置長易郡名  
封豕長蛇心膽裂太平萬古樹高標漢代奇勲日月挈  
九里箐行

大定治東二十里九里深箐如櫛比蜒蜿長岡紆復迴  
幽森邃壑迤以遞高峯削成雙壁立赤日空行一線晷  
汗湍淺溜沿路旁亂石礚呀自中起前年過此仲夏中

大定府志

卷五十七

三

炎天汗馬嘶陰風樛枝接葉鶯巢暗顛棘叢罍虺穴封  
猿猱悲嘯似稚子鶴鶴吞聲如老翁武夷九曲未若此  
窅然世外遊崆峒東出黔中此劇要西通滇海亦區輿  
况復郡縣俱誠平更兼閭閻樂覆幬開山大力少五丁  
視塗司里有夏道天險平之守在人怪不翳苗一除掃  
今來谷口春未闌稍稍蘇薤清蕪繁惡竹萬竿見已翦  
崇柯千尺未全刪大木那堪尋梓氏一炬何不師烈山  
從茲萬古照天日豁然開朗宜民蠻

朱

珍湖廣人康熙初官  
畢節教授詩一首

九日登松山

踏破山頭亂石堆，搜奇覓句漫銜杯。蒼松不改千年色，叢菊爭隨竟日開。塔上殘碑留歲月，城中羌笛起樓臺。同人莫道鴉棲晚，猶帶南天夕照來。

林必達

侯官人。康熙初官畢節衛守備，又見職官傳詩一首。

七星關橋

西南形勝古荆梁，天險都從此地藏。關似玉門多部落，橋如棧道渡羊腸。祀星誰灑殘碑淚，築壘徒邀夜月涼。不盡波濤頻作號，祇今金鎖扼南荒。

黃元治

黟縣人。康熙二十一年官平遠通判，又見職官傳詩六首。

抵平遠有感

大定府志

卷五

古

蠢茲苗蠻，鄉結砮彌。山谷刀弩不離身，殺人如刈穀。有明三百年，弄兵屠貴筑。憑險恣鴟張，王師翻敗劔。養癰迨於今，一朝潰其腹。安氏烏在哉，濟火無遺族。山川隸版圖，建郡設民牧。衙署覆以茅，垣墉編以竹。城中虎豹遊，堂上鷄豚宿。表裏洞重開，冰霜照幽獨。寄語諸苗蠻，誰非赤子育。靈頑均一視，疑畏復何蓄。

由鳳凰山至熊家場

鳳山高在天，直上三十里。我馬如鳥飛，凌巔不移晷。搔首問鳳凰，羣鴉翕集此。林木蔽天幽，虎豹分投止。成壘畫角吹，西風颯然起。陰森不可留，前途復爾爾。逶迤數



十盤回望路如咫，忽逢石洞穿斜陽。射其裏村酒欲留，連僕夫去如矢危。坡當馬胸暮雲隨，馬趾安知前有卍。鷄聲動余喜人烟，三五家溪山繞窻。几却怪山腹虛吞咽，一溪水。

東山寺

最愛秦僧撲開山，此挂瓢烹茶分洞口。種竹護巖腰鉢，懶城中託香勤殿上。燒朝朝鐘磬下清響，喚蠻苗自熊家場曉發至定南。

侵曉沿溪發，寄欽仄。逕懸水聲轟石縫，霧氣壓巖顛。馬慣登危嶺，人頻倚半大。忽逢開霽色，午度岔河船。

大定府志

卷五

三

贈平遠孫茲菴使君一首

宦途到處有餘清，儒者風流善用兵。可識九重承

特旨曾經百戰，捍孤城玉麟。付下蠻疆闢畫隼，旗飛瘴雨晴。怪得水西天乍暖，隨車春已轉。憑鷺

鷺足前驅綠箐，鼓卑棲真與拙。鳩同維桑自許垂嘉蔭，偃草何能佐下風。和到陽春慚郢客，擲將金石謝興公。更隨五馬登臨處，百尺龍潭映碧空。

孫 奏

字茲菴高淳人，康熙二十二年官平遠知府。又見職官傳詩三首。

平遠田家

田家何所事，終日在耕桑。朝課瓜果實，夕餐禾稻香。蟲

聲驗晴雨草色分陰陽婦子勞筐筥主伯慰壺漿共賴  
明昭賜頽粟已登場租稅詎容緩負戴輸官倉昨聞胥  
吏過無復擾蠻鄉

平遠城外晚眺

平林秋暮暮徙倚對晴峯高鳥孤雲外危巖密樹中荒  
烟吹巷白落日映山紅憑眺思何極微風動碧空

平遠道中

捧檄來邊地單車獨遠征羊腸擁茂草馬首託荒城嶺  
隔山雲斷烟皆驛樹平清貧吾有素持此樹蒼生

劉惇

直隸人康熙三十年官平遠  
州知州又見職官傳詩四首

大定府志

卷五十七

十六

平陽道中

一路經行鳥道斜雲烟迷日少人家可憐平地多荒草  
惟有青山媚野花

醒睡亭

醒睡亭前列畫屏公餘閒步聽流鶯醒酣把酒諮民社  
不愧浮生無所營

雙潭對鏡

十畝橫塘水寒光映碧山雲開月淨夜恍惚玉連環  
三石連標

峻嶒屹立接三台五色雲根連理栽漢使不須浮碧海

此中便是小蓬萊

張大受

字匠門嘉定人康熙五十九年官貴州學政詩二首

大定使院偶成二律

萬里西南勢獨高，橫巖疊嶽點秋毫。  
版圖最後今成賦，冠服初新古不毛。  
野館奇花朝日映，山城老樹朔風號。  
揄揚風雅開烏撒，白髮荒陬敢告勞。

越磴穿林到此州，平生馬跡快奇遊。  
天連六詔雲斜度，地扼三巴水亂流。  
居雜民夷常食稗，氣寒春夏只披裘。  
讀書久負經綸志，忠信能孚百種酋。

張

鯤思南人拔貢康熙官畢節教諭又見職官傳詩一首

大定府志

卷三十七

十七

七星關

七星何事久留名，舉碼峯頭望遠旌。  
天造雄關凌北斗，地連洱海想南征。  
心存漢業終難遂，功在蠻鄉尚可成。  
惆悵當年擒縱處，書生無計請長纓。

程萬夏

字石樵雲南府人康熙五年舉人又見流虜傳詩一首

豐樂鄉

落落烟村四五家人，歸亂後種桑麻。  
平疇望野田多沃，山澗分流水自斜。  
嘉穀自來逢稔歲，輕徭無事到官衙。  
蓑雲婦子何知識，祇覺秋來樂自賒。

羅

英字奏五康熙初畢節歲貢又見督舊傳詩一首

重九後一日復登松山

昨日登臨興未賒重來高閣望秋華只須共說初十好  
不許題詩道菊花

十有遺音唐人每用之丹鉛錄言之詳矣此非錯用仄音

孟傳

康熙初舉節歲貢生詩二首

通天洞

石廠高門別一邱碧天如蓋日當頭四圍峭壁橫空斷  
半峽清流截底收龍馬藏河誰月旦鳳麟隱羽幾春秋  
於今禹穴頻開復岫嶠奇文讀不休

撐天砦

撐天箇箇是男兒上得峯來頗自疑孤掌已曾高別岫  
大定府志

卷五十七

六

一肩何必倩人持草埋雉堞干戈靜香動梅花雨露遲  
敢借太平新物色同來絕巖坐題詩

劉玉泉

字源公大定人康熙三十二年舉人官夏縣知縣又見者舊傳詩六首

清虛洞

大定城西五里

古洞隱城西奇勝殊難狀引人不知疲繚曲幽而曠選  
地坐移時清虛號不妄高處別有大曲梯達其上當門  
茂花木列石宛屏幃爽氣沁人懷自在俗情忘

閩風臺

萬壑羣山簇高高敞此臺誰會遺世立我儼御風來烟  
瘴消都盡榛蕪懇已開一鐫恣憑弔儕輩漫相催

遊西山觀音閣

梵宇蒼苔古曾遊記昔年地偏塵自遠僧老口無禪高閣吞寒霧荒林遠暮烟撫茲衰盛迹自在讓金仙

東山寺

昔愛東山好今來莽棘榛綠苔生壁舊青草揜階新寺寂僧無事爐寒佛有塵蕭蕭香積地冷落幾經春

登南山玉皇閣

偶來登傑閣望古意茫然羅甸昔時國梓柯何處川居高能遠俗地僻可逃禪徒倚忘歸去林中清磬傳

雨龍山

大定府志

卷五十七

九

高處登臨意渺漫飄搖忽若立雲端御風直可排閭闔倚杖何須跨羽翰一水東西流不舍萬山重疊引遐觀青天尺五殊容到愧抱塵情未敢干

王之鄰

平遠人康熙三十五年副榜詩一首

東山寺

竟日山扉靜閒情月挂瓢僧居孤洞口寺結半山腰飯已胡麻熟茶將松子燒晨昏清磬下直此悟心苗

湛

淳字元亮平遠人康熙五十四年進士又見耆舊傳詩一首

水西篇

鴨池渡過登雄關層層石磴摩青天回看江水碧玉帶

才以翠嶂浮晴烟東西畫界一水阻盧鹿窟宅紛綿延  
北連三巴西六詔夜郎自大由何年往者明祖初定鼎  
願置九驛奢香傳貴榮妄謀請滅驛陽明片紙溫犀燃  
封狼生羆曰邦彥與奢陽惡陰勾聯深坑絕壘憑險固  
長鎗硬弩資凶頑犯滇犯蜀困金筑漲空虐焰幾無前  
太原中丞誤深入王公三善逾年弭節無聲援雄兵十萬內  
莊沒以身殉國垂青編桓桓山陰朱司馬元變出奇制勝  
功名全苗薶髮櫛遺孽盡渠長裂壤安窮邊區區安坤  
謀叛逆前車之鑒懜懜焉

皇朝赫赫布

### 大定府志

卷十七

三

聖武犁庭掃穴文命宣置兵置吏規制備不苛不欲官司賢  
勢弱不能就羈絡力小容易加箠鞭至今帖伏八十載  
絃歌響徹長林間衣冠漸變瓊笠陋山川立覺雲霞鮮  
喬木幽谷迥異處斷頭掉尾空成言諺云水西羅鬼斷頭掉尾安氏  
不絕僅如綫一順一逆存亡懸一語更寄撫夷者服人  
以德毋忘旃

劉明儒

康熙末畢節歲貢又見者舊傳詩一首

### 遊靈峯寺

竹院逢僧話塵心頓已消談空花雨亂觀世浪風飄俗  
願無時貸浮生苦自焦暫依清淨地懶步出溪橋

晏斯盛 新喻人雍正八年官貴州學政詩一首

還自大定道中喜晴

初聞簷溜歇鳴雞忽見簷間山岫齊日壓曉雲低伏壑  
天涵秋水渺平溪履行石脊硜銀齒馬出泥渦散鐵蹄  
游歷多從衡較暇好乘新霽問蒼黎

陳惠榮 字密山雍正中官黔西威寧知州大定知府後升至貴州布政使又見職官傳詩二首

題文廟桂

淵明籬下幽人菊茂叔池邊君子蓮不及宮牆金粟影  
長留青翠記 堯年

好栽泮壁宮中桂不種元都觀裏桃願附當年端木後  
大定府志 卷五

桂林期共楷林高

鮑尚忠 大興人雍正五年黔西知州詩二首

題文廟柏樹

經尋枝葉漸青葱傍桂分香攬德風莫羨嵩山曾受爵  
佇看老幹矗長空

凡材那許得齊肩已見凌霄志節堅寒暑不移蒼古意  
好同檜樹引長年

謝 黔西人雍正五年祺明通榜詩一首

魁樓

見說奎樓勝今乘興一觀置身臨斗極側足步雲端劍

彩彤霞合毫華紫玉攢振衣千仞上誰復問塵寰

洪

楷 畢節人雍正十年  
舉人詩二首

遊響水灘

晶簾斷處獨徘徊觸石洪濤聲似雷愧我無能推既倒  
任人乘勢決將來山空不礙熊狼伏樹老何妨霜雪摧  
世事匆匆流水去年年澗畔有花開

過觀瀾亭有感

觀瀾亭子淨無塵極目奔濤白似銀水到滌回纔蘊藉  
人從委曲見精神局中勝負難爲解事後推敲定有真  
逝者如斯長不息誰於物表悟甘辛

大定府志

卷五十七

三

鄒之暉

威寧人  
詩一首

十月再遊桃溪

木落山空此再遊探奇敢憚人山幽巖頭霜淨藤蘿月  
水底星搖薜荔洲世事過時皆是幻吾生老此又焉求  
不辭努力攀援上直到靈源最盡頭



大定府志卷之五十八

外篇八

知大定府事鄱陽王允浩原本

知大定府事河曲黃宅中重輯

詩第十九中 文徵八

詹彬宣城人乾隆六年官大定府通判  
署平遠知州又見職官傳詩一首

遊東山作

比喇諸峯多積突惟有東山號奇絕雲霞變分樹離奇  
石谿碍兮徑幽折左顧巖泉起五龍右瞰奎光映金闕  
當前城擁萬家烟背後洞凝三伏雪誰構層樓在半空  
疏櫺曲檻何玲瓏我來放眼一遐矚時維三月春光濃  
大定府志 卷五十八 一

綠烟紅雨劇烘染蝶板鶯歌相依從谷風習習吹我衣  
披襟當之殊融融此境歷來誰賞識別駕黃公推第一  
曾聞著屐幾回登畱得新詩在禪室憑欄展卷恣吟哦  
允與參軍同俊逸欲和陽春讓未遑香厨徒倚勤吮筆  
忽焉亭上起鐘聲夕陽影裏萬峯明紛紛歸鳥鬧林塢  
半規新月來依人雅愛此時好風景欲行未行有餘情  
賦就一詩歸去晚家家燈火明江城

馮光宿 乾隆六年官黔西知州詩一首

觀農臺

州署後有石屏巍然偉麗可觀因簿書鞅掌未得登

眺公冗暇時偕諸友盤旋而上壁鑄民依在目四字  
乃陳大方伯治州時所題余忝步後塵聊成一律非  
敢媿美前徽而方伯實心實政可法可傳用書石以

誌云爾

愛民前哲是吾師少長登臨一賦詩廬舍參差山翠落  
川原環繞樹雲移吹幽喜說冬三戍擊鼓歡歌臘八時  
共樂昇平堯舜日梅花香信嶺頭知

鹿驄豫

阜陽人乾隆十四年署平遠  
知州又見職官傳詩一首

過七星橋

絕磴懸巖跨彩虹馬嘶人語沸濤中  
牂牁險阨千山斷  
大定府志

卷五八

二

滇蜀勾連一線通林表時飛蠻洞霧關前  
還屬繡旗風  
艱危徒負馳驅志誰繼南中戰伐功

葛峻起

字眉峯虞城人雍正十一年進士官工科給  
事四川學政乾隆十九年遷雲南學政詩五首

過九里箐

寒林落木雨淒淒箐口雲深望欲迷  
莫道蠻中無好景  
人家半在竹林西

西溪

一渠流水急潺湲西崦人家遠暮烟  
鳧雁滿塘雞犬靜  
武陵何必訪神仙

落腳河望蠻洞諸山青碧交錯璀璨奪目因而有作

重岡疊抱鎖烟鬟白石嵯峨翠黛間天畔油雲嵌半嶺  
瓊瓏直似點蒼山

過七星關

征旆去悠悠寒山動旅愁疎松臨野岸古寺枕荒邱  
漠雲生履茫茫雨濕裘七星何處所橋下水空流

關外

爲孔明祭  
七星處

黔西州謁黃虞菴先生祠

水西名宦有遺祠駐節前來奠一卮昔日明公曾誓志  
至今父老尚銜悲巖疆到處勳猷遠青史千年姓字垂

猶有甘棠留蔭在摩挲老樹不勝思

州署前有公手植  
槐四株皆合抱後

大定府志 卷五

三

人思之懸鐵牌於上  
書黃公遺愛四字

陳紹虞

字芥舟崑山人乾隆十三  
年署大定經歷詩一首

與友人約登山雨阻不果

巍我高閣矗前陵約伴尋芳記未曾客裡有詩酬歲月

雨中無夢到峻嶒身沾飛絮依垂柳馬怯衝泥掛短藤

自笑迂疎惟用拙只將獨醉謝良朋

吳

紀安順人乾隆中官  
畢節教諭詩一首

題蟠龍山盲僧禪房

高岡繞閣外形勢似龍蟠樹密鳥堪宿僧盲意自安  
禪房如斗大天籟發雲端莫謂淒涼甚無求是達觀

赫霖泰

鑲黃旗滿洲人乾隆四十二年官黔西知州詩三首

秋日觀農臺成晚眺

築臺署西角朝暮縱目遊不徒縱目賞還因矚田疇民  
樂吾與樂民憂吾亦憂前年雨澤少稍稍薄獲收民心  
未憂饑我心已爲憂今歲雨應候高下同繁稠過腰菽  
粟長齊肩穀穗鈎黃雲烘落日流覽極山幽我心先農  
樂農心更樂不

登觀農臺口占

觀農臺上望農田一片黃雲蔽陌阡遠近嵐烟秋色裏  
前山樵唱夕陽天

大定府志

卷五八

四

遊十柏禪房用徐明府韻

寂寂空堂勝景多參天古柏翠交柯曇雲繚繞籠蓮座  
花雨繽紛襯碧莎洗去冗煩遊興爽却開塵霧覺心和  
禪機不解無爲法慧鏡從茲着意摩

德

隆滿洲人乾隆四十五年  
貴州糧儲道詩一首

遊東山次孫陳二學使原韻

十柏屏開古色環獅山佳處結禪關傳燈初地川原外  
步屨春風咫尺間病後探奇方戒酒客中攜友且看山  
貴陽亦有凌雲寺記得城東數往還

任鎮及

乾隆四十九年署  
黔西知州詩一首

遊東山

古寺隔重關登城不之見迤邐出東門渺然通一線未  
至開寺林先到文峯院生徒羅兩庠與之窮經傳既乃  
抵柏屏把酒重開宴繞砌綠差差蒼冥渾一片佛本尙  
虛無余亦何所羨談笑絕世塵至理能遷變暮當秉燭  
還衆賓猶依戀漢芝詩先就文壇殊酣戰曲高和愈多  
詞意冷然善以茲紀勝遊爲素不爲絢命僧懸之壁敢  
作羣公殿

李雲霑

詩五首

烏撒秋日雜咏

大定府志

卷五十八

五

山海環城匝地青淒風哀雁不堪聽巒深日吐巒烟黑  
箐密時藏毒霧腥萬里襟懷收健翮一年消息閉重扃  
秋來最是淒清處霜霧梧桐月滿庭

星分井鬼屬蠻天改革興亡幾百年浪說文翁敷惠化  
漫言韋帥攝腥羶佗關廢趾誰曾見烏撒遺風此尙傳  
日暮何人弄羌笛數聲吹徹舊山川

郡城環繞悉羣巒巖箐叢深不設關革犛負鹽歸尙去  
羣童驅馬向村還雨添澗急聞流水葉墜林疎見遠山  
無限閑愁消不得却來家信一開顏

九日烏撒道中

山椒足馬正重陽背負朝曦未覺涼  
襖被行沾山草翠  
鉤鎌看刈晚禾香  
消除歲月歸雙鬢  
收拾烟雲貯一囊  
野老漫驚成白首  
如能贈酒尙千觴

霧峯齋

小築幽棲傍鹿羣  
風光細與綠蘿分  
穿林客至肩紅雨  
採藥人歸袖白雲  
好句每從天外得  
妙香時自性中聞  
醍醐日泛長松下  
半醉烟嵐看夕曛

錢青選

字瑾巖號漱石江南陽湖人見滇南詩略

黔中雜咏二首

關山極目杳蒼蒼  
鳥撒東西古戰場  
野廟名仍祠濟火

大定府志

卷五

六

土人祠武侯勝朝恩許賞奢香  
奢香者明水西土酋竊以濟濟火配翠妻翠死香襲職鎮將  
為君凌辱之欲激其反香七盤路狹烽烟靜  
走訴於朝平變道以報九部苗空  
雨露長搔首  
我來求軼事  
可憐千古屬遐荒

銀汞丹砂貢賦均  
山川寶藏日相新  
誰言國計征輸急  
我見民間稼穡貧  
十月畊山先布火  
三冬得雪半生春  
監門尙有陳風責  
願與幽風一例陳

路 卽

字毅齋畢節縣人乾隆戊子舉人官浙江黃巖縣令詩三首

德溝山居

富貴浮雲薄悠悠  
浪世過無錢入市少  
有酒賦詩多踏  
月尋漁火  
隨樵聽野歌  
個中真樂處  
任我日婆娑

過了關嶺在畢節縣西里

曉度了關嶺關上有人家  
茆屋連雲結柴門放鶴斜  
老翁行荷笠稚子饋烹茶  
借問今朝業鋤桑並種麻

路斯京畢節縣貢生

投宿靈峯寺

落日岫山鳥倦飛投林幾陣  
遠鴉歸人行斷壁穿雲緩  
寺背深松露角微驚客犬鳴  
巖棧樹荷樵僧叩夕陽扉  
禪房好借留清夢息得紅塵  
半日機

路孟遠畢節縣進士官山西榆次縣令詩二首

芍醬

大定府志 卷五

七

不隨百甕列珍羞美芋生從異地留味譜鴛鴦難寫照  
詩徵魑魅亦風流故鄉秋老灰同和苦酒香含雪共酬  
幾畝靈苗多種得好將雜俎細推求

雞糞

茸茸如蓋繞山城若個鄉關取次評  
千朵筠藍傳畫意一肩曉市聽秋聲  
甘同鬆織難專美采向且蘭獨擅名  
幾度園林頻指點瓜壺風景助詩情

余上泗字鳧山鎮寧人乾隆二十五年舉人四十四年官黔西學正詩百一首

古柏行

東山寺裏十株柏十指排並如編柵  
日華流翠錦屏張

雲氣籠陰天女隔雨潤日暄足元氣千枝萬縷通血脉  
夜深盤踞有鬼神山空慘淡搖魂魄根莖直下通九泉  
凡木弱植徒糾纏駢枝接葉何濃厚不與人世同鮮妍  
大夫枝撐岱宗頂將軍樹壓華嶽顛分君十虬相與敵  
伯仲許之誰不然憶昔曾探蜀中奧蜀人以柏表行道  
迥殊趙衛榆柳行四時鬱葱回大造昂藏各見整精神  
婆娑應無虛覆幬祇今相逢古刹頭對爾良符心所好  
雖然埋沒墊城東霜皮鉄骨搖層空大氣應須拔地軸  
高標那復愁天風鬼國尙留羣幹直神林會與衆仙通  
莫爲逸材惜梁棟還能保節陋梧桐

大定府志

卷五十八

八

蠻峒竹枝詞一百首

風烟濟火舊巖疆禮樂千村變卉裳際得承平遺事遠

部人猶自說奢香奢香者羅鬼竊翠妻翠死奢爲女官領其衆用續珠計面上訴都指揮馬

燈罪而誅之威震一時每歲貢獻不絕上報禮最厚贖珠亦女官

婢子分行捉繡袍廳前移步曉雲高女官舊向圖中見

指顧江山亦自豪羅鬼長死耐德卽爲女官耐德其妻也織錦爲長袍其袖甚大左右二女

捧之而行

警插山花死不饒盤龍雙綰妬雲翹長裙大袖堪教舞

却向春風讓細腰羅鬼婦女中分其髮而盤之長衣大袖着細摺長裙多者至三十六幅

青巖石壁路橫斜峒裏雕題古未差似解壽陽妝製好



額間長暈墨梅花

羅鬼女子額間手臂多刺墨爲梅花狀所謂雕題之民是也

斗大纏頭黑面肥

提鎗上馬疾如飛日斜飲罷不歸去

再向山間殺一圍

羅鬼男子以布纏頭籠髮其中好獵馬上揀長桿鏢倏忽迅疾故其兵能

冠諸

甲冑奔騰映日新繞山行處更揚塵焚骸未識藏何所

擊鼓招魂葬主人

羅鬼長死聚千百人甲冑馳馬以錦緞被屍焚之招魂而葬

重信尊盟義最深渠魁他日已成擒爵湮祀絕孫支在

愛戴還能不二心

羅鬼尚諾重信愚而蠻主虐之至死不敢背改土後尚奉之如初

巖間自古好樓居屋角開門韋戶疎婦女慣操機杼事

雲山四壁掛犁鋤

種家有補籠卡尤二種風俗頗相類依山爲樓名曰偏架樓只於屋角間

大定府志

卷五八

九

門出入婦女均

百摺長裙拂地拖穿絲挑錦似雲羅細抽禾稈編花履

逞得風流異樣多

種家婦人裙多至二十餘幅細摺絲紋皆其自織履用布亦編稻草爲之

長髻軒然一尺高耳環如釧更輕佻馬郎何處山歌起

稗草迷茫不耐蕩

種家女未嫁者腦後髻高尺許耳綴大環凡苗女謂所歡者爲馬郎

綵帕腰纏各艷妝山頭共覓選婚場月明跳舞叢人裏

拋擲花毬打愛郎

種家女腰用綵布一幅圍之婚姻先苟合置場野外以綵布爲毬相戲視

所歡者擲之贈以花巾

婚姻仍復倩媒求不管花巾月下酬顏色自誇阿妹好

聘牛多索兩三頭

種家稱女子爲阿妹男女情穩然後議婚以女之顏色爲聘牛之多寡有

要至二三  
十頭者

衝炎鋤土最高峯雨汗如珠色倍濃傘蓋不施頻曬日

何曾經改玉芙蓉种家在火烘播東等烟瘴地方者即所謂補籠也女子多姣好出山鋤地

數經烈日而色不變

瘴雨雲天暑不銷年年霜雪未曾飄冬來採得春花戴

漫踏高枝摘海椒海椒即秦椒俗稱辣角原係草本火烘所種經冬不凋有高至八九尺者

地氣使然也

征商遠出播東南一片崇山入瘴嵐聽說夷風今漸轉

筒中少有蓄金蠶种家蓄蠶夜出飲水有金光一道故日金蠶若久不傷人雖至親亦毒之

以洩蠶怒其害最深

大定府志 卷六

十

日烈風狂暑氣催隴頭撐傘罩嬰孩汗珠濕盡前坡土

纔放歌聲對月回

摺疊花巾作蓋頭逢春遠谷任攜儔山中野菜名羅鬼

採得盈筐當晚饅前胡苗俗呼羅鬼菜种家採以充蔬漢苗皆然而其名則自种家始也

侏儻對客語如熬壁後烹鷄喚小男看待官人惟啞酒

持竿開取兩三罈用揀梁等為之蒸熟入罈封固愈老愈佳剗竹空其節插入罈中吸而飲

之號啞酒苗類善造者多种家家無不蓄

鄰居三五共盤桓柳重烟濃曉色寒自向深山為節氣

滿天風雨送油團种家三月三日用米粉團油煎之號油團相遺

魍魎應從此輩欺時看鷄骨代靈龜病來不假神農藥

只擬鄰村召鬼師家為最往往以此破產種

日日撩裙浸水田橫擔盞簍插秧還細淘烏米包如枕

收拾犁鞭過小年神家以六月六日為小年其日食糗

謂之枕頭粽

婚葬依然有舊規山中禮樂亦何虧祇疑陋俗無絲竹

忽向蠻村聽鼓吹神家善鼓吹漢人多賃之

叩户人來喚老鴉蓬頭伸頸應聲差問他老豹無言語

斜指樓東第五家人呼神家嫗為老鴉翁為老豹皆蠻語也

掘地偶逢先代物須知此事已朦朧直傳諸葛行營在

銅鼓千年出土中閑掘地得銅鼓即以為孔明所遺多索重價

大定府志 卷五八 十一

刺繡工夫迥絕儁嬌嬌不作漢家羞閨張棋局邀鄰女

又向籬邊賽擲毬青種家女子白皙聰慧工繡善奕以擲毬為樂夜則共馬郎宿父母知而

不禁

白面纖腰窈窕娘把槽打樂任相將所私嫁後往來絕

疋布從今遺外郎白神家女子纖身雪肉每歲孟春擇地為場以大木空其中曰把槽男女持竹片以擊曰打樂所私者謂之外郎出嫁後婚

家以苗布遺外郎自是斷往來樂苗聲音勞

巖間背水趁腰支落葉山風面面吹石路參差行步緩

啣梳髮髻半邊垂花苗婦人以馬鬃盤髻上重於半邊籠以木梳取水皆用桶背負而行

選得寬場豎一竿乘他明月夜團團今宵幾對聯夫婦

信是吹笙引鳳鸞花苗選場豎竿男女跳舞得意者奔之女執響鈴遠竿跳舞得意者奔之女

袖裙皆  
緣花邊

圍竿錦袖各成行  
竿頂蟾光照影長  
郎抱簾笙休得意  
響鈴聲與鬪低昂

吹笙月下見人無  
投石山頭擊草廬  
有事正勞阿嫂怒  
閉門推出小姑姑  
花苗男女情穩者男子每夜吹笙於女屋後招之如久不出則投石擊房父母聽其去而不禁

赤脚登巖不被創  
草枯牽犬獵山岡  
禽心那解湯王誓

密網還從四面張  
登山網禽花苗最善

昨宵虎跡過山邊  
怪道房中犬未眠  
傳禁夜來休出入  
窩弓安得寨門前  
機弩即窩弓諸苗皆有惟花苗常善用之

大定府志 卷五十八

十三

竹笠無時不著頭  
隨他轉徙倚山邱  
不知腦後緣何事  
直到成婚髮始留  
青苗男子戴竹笠居無常所未婚者剪去腦後髮娶乃留之

渾身一色靛青蒼  
額上亭亭角正方  
未向麻姑稱弟子

九華巾是道家裝  
青苗婦人以青巾籠髻上作九華巾

短短衣裳過膝難  
各牽鬪牯出牛欄  
田中博得今朝勝  
百十成羣拍手看  
白苗擇牯牛角端正者卜日邀隣之有牯者鬪於野勝則用之以祭

無袖花衣兩幅裝  
短裙細摺手中長  
春來獵得山禽鳥

不祭先人不敢嘗  
東苗婦人花衣兩幅僅遮前後春獵於山獲禽必先祭祖宗而後食

場功既了賽豐年  
衣帽純纒各導前  
童女童男皆綵帶  
一時團遶向村田  
西苗收穫後祭白號擇善歌者二人各著大幅纒衣引於前童男女數十

綵帶  
隨之

短裙穿袖體難周三五成羣野飯牛忽聽山灣銅鼓響

一齊叉手上巖頭短裙苗裙止一尺但圍私處而已

宋家華胄似遙遙却拖淳風俗未澆新婦入門先進盥

和郎沐浴過三朝宋家蔡家二種相傳皆宋人蔡人爲楚所俘放之南徽遂流爲夷新婦入

門先進盥於舅姑三日之內夫婦皆沐浴而寢

男子長襟女短襟語言多似漢家音行人指笑楸梧裏

馬鬣封高學士林宋家人死封如馬鬣多知禮畏法者也

婦女翹然戴角冠笑他道士禮金壇苧麻織就親裁剪

一口鐘裙勝綺紈蔡家婦人冠用青氈爲之狀如牛角裙如桶無摺俗謂之一口鐘

大定府志 卷辛八

十三

夫亡殉葬事全非不顧夷風與今違邈取六親如小戰

山頭奪得女郎歸蔡家夫死以媢殉葬婦家捨去乃免今此風少息矣

日劇山園種白麻嫁衣製出野人家六親聽說歸期近

齊到門前看打牙死狫不一種衣皆葛衣葛麻爲之布甚粗有將嫁去其前二齒謂之打牙

死狫誠所謂鑿齒之民也

採葛沿溪石路遙機頭夜織趁良宵額間綠髮從中剪

雙鬢條條耳後飄婦人剪去額間髮者名曰剪頭死狫

裝頭環綴海巴牢裙染羊羔五色毛却怪男兒氈一片

匪袍翻得號披袍男子以氈一幅空其中可容頭入前短後長謂之披袍死狫婦人首綴海

巴裙染五色羊毛爲之

堪笑鍋圈頂上留病來禱祀未嘗休鬼師箕內無他供  
五色裝絨飾虎頭婦人亂髮以布束之如鍋圈號鍋圈  
之穰穰病者延鬼師以五色絨飾虎頭

結屋依巖號土民謀生常是水中身解衣不怕三冬冷  
入得深潭捉巨鱗善入水嚴冬不畏謂之

杯飲汗尊上古求衣羶席地亂歌謳紅匙團飯何須箸  
入口翻能滑不留羶食皆無箸用

糍糕摺疊號羶衫歲首相遺共解饑別有如箕輪補那  
與君貧富莫相詬羶衫歲首相遺共解饑別有如箕輪補那

白不能摺羶俗陋而貧不及羶衫歲首相遺共解饑別有如箕輪補那  
狎家多富卡尤狎家亦稱補那

大定府志 卷之六

螺髻軒軒狗耳珠爛斑衣絲自爲都滿頭薏苡如編貝  
更羨鄰家五色珠龍家婦人髻如狗耳狀謂之狗耳龍

捺莽頻穿仗力饒科頭束髮出山椒有時淵底探魚窟  
任教人呼水獺猫狗耳善入水滑若梟

峯頭劇藥倚長鏡編竹苦茅總大凡平素不嫌衣盡白  
居喪反見著青衫馬銜龍家衣尚白

鬼竿擇配多相似緇布冠巾迥不侔馬鐙由來承足底  
如何籠上婦人頭婦人冠如

日黑燈青祭鬼時楮錢焚處野雲迷周遭布地鷄豚酒  
鏡插隨方五色旗木老祭鬼用五色絨

丁香耳墜作連環布額條條鬢髮懸腹背兩邊皆刺繡  
胸前一幅掛銀錢羅漢苗婦人髮散結胸前刺繡一幅

嫁女端然擇外家無人方喫異親茶頭邊沃水纔三日

又要煎湯濯鬢鴉羅漢苗嫁女先外家而後他族數日必煎水洗髮

伐鼓鳴鈺集市人將軍臉子跳新春憑誰認得楊家將

看到三郎舌浪伸土人歲首跳神以爲儺所唱皆楊家將有六郎七郎八郎之稱

草履輕盈細耳工擔頭肩糞趁東風婦人勤苦男兒樂

葉子紛紛賭賽同土人婦女草履耳織細花男逸女勞肩上出入無空者

懸罄空空一室孤衣冠不與漢家殊丸泥亦可封門戶

杜若溪頭下網罟群獍即揚荒播之遺民也荆壁草門出入以泥封之多以漁獵爲事

大定府志 卷之八 十五

椎髻渾如螃蟹壳兩簪橫縮壓烏雲滌場既了無他事

日檢枯枝供夜焚土人婦人髻如太平冠而色黑故人謔爲螃蟹壳

任籍懸巖鑿戶棲攀蘿上下倚雲梯如何親歿還歌舞

只怕來年杜宇啼牯羊苗多於懸巖鑿戶而居高者百仞親亡不哭笑舞爲樂至次年聞杜

鵲聲始號泣曰親不復矣

姬復由來賦性柔染工更見出夷儔獨憐女子年方少

便向山間卧竹樓天苗多姬姓以爲周之後婦人工織善染女子十五六卽構竹樓野外處

之

短短衣裙紡織精房中機杼細經營由來此布稱難得

到處爭傳谷蘭名谷蘭苗人短衣工紡織其布精密謂之谷蘭布人爭購之諺云欲作汗衫

褲須得  
谷蘭布

不是燕山屠狗人，籬間操刃喜留賓。草衣木食還先古。

醉後縱橫卧月明。

平伐苗祭用狗賓客相待亦用狗男披草衣著短裙婦人衣短衣著桶裙

好鬪輕生意，未忘書聲往往出。幽篁若教離却山巖裏。

誰向衣冠認紫薑。

紫薑苗與九名九姓同類通漢語喜讀書考試見者不識爲苗也但狙詐

好鬪猶是  
其苗性耳

一任雲霞繞四周，籬垣不具處山頭。高坡漫道謀身拙。

逐鹿還須讓犵兜。

犵兜苗好居高坡不籬不垣常逐鹿羅雀爲食

點綴花裙繪出妍，男兒輪與婦人賢。懶於耕稼勤於獵。

但著蓑衣過歲年。

蠻人男子衣草蓑性最懶喜漁獵

大定府志

卷五八

十六

丁冬細響鼓腰長，燕會偏饒野菜香。屋角朝陽初射入。

家家始聽搗捶塘。

八番苗刺木爲臼曰捶塘臨炊始取稻把入臼搗之宴會擊長腰鼓爲樂

白頭巾破白衣頰，扶岸攀蘿過水隈。草屋山腰童下指。

呼爺牽犬背茶回。

白羅羅羅鬼下姓也衣襟皆用白在龍里貴定者多以販茶爲業

衣冠端是有禽心，獷悍流風迥至今。聽說官家公役到。

後門移出上山林。

楊保性多狡獷遇官事差提往往抗拒不出

晨昏夫婦不相違，水上鴛鴦作對飛。那解南荒山谷伴。

朝朝同出又同歸。

峒人夫婦出入必偕

山中鹽酒不相親，捉得鏢鎗健有神。採摘茅花聊絮襖。

阿兒直是耐寒人。

峒人食辟鹽醬禦寒以茅花爲絮貧富皆然也



愛著青衣短似襦逢年醞酒祀槃弧家家剝樹成長根  
引得山泉直到廚猛人居處必擇溪邊近水者以大樹皮接水至家不用桶汲常採藥行醫  
歲節祀槃弧

曉出山頭結髻尖負煤歸去更擔鹽何當數刷先人骨

須待長官下令嚴六額子男結尖髻人死葬年餘取其骨不潔又取刷之真骨洗而刷之至數次人病則謂先人惡俗也近稍收斂

先骸不滌意如何此輩淳風應自多想為衆中稱白額

却來頭上綰青螺白額子男子綰髻狀似螺其俗同六額子惟不洗骨

熨人荷畚出林臯熨婦開機織小絲惟有熨童無箇事

野茶花外拾松毛熨人在普安州近雲南境多松樹山茶凡狝家狝狝羅羅不能相識者常

大定府志 卷五八 十七

以熨人通之

土甌木杓瓦為壺飯後晴明日未晡水旱稻梁收拾遍

籬邊剖竹製魚罟魚家蠻好魚蠟

尖頭鞋子細花裝偏向鄰家約女郎半里如雲藍蓋傘

擔龍攜酒送新娘六洞夷人婦好服顏色衣裙及細花尖鞋出嫁鄰女數十人各攜藍布傘

送至男家三晝夜則攜新婦歸生子後方行聘偕反奩資有數十疋布者

語音嘈雜不堪親結屋深山號野人襟袖無端將素綴

怪來鴉鵲是前身鴉鵲苗女子以白布紉兩袖及胸裙亦如之故名

房中纔聽泣呱呱便教床頭臥丈夫飲饌反勞妻子供

不知乳哺待君無郎慈苗婦產子以夫抱處牀上彌月不出戶產婦乳兒畢出外力作飲食

以供其夫俗之  
顛倒無過此者

永是深山陋質流腰支難問綺羅謀機中却有攢花錦

南北官人到處求

苗錦製造頗工皆苗婦爲之洞  
苗織者爲洞錦帕皆精細也

鼠牙雀角偶成嫌持杖操戈鬪正酣不是女郎親出勸

誰能談笑解兜炎

紅苗相鬪必婦人  
出勸然後能解

贖金操勝好居奇日向途間掠小兒不及女紅勤織經

燈前夜夜作班絲

紅苗掠人男女必索金贖取  
衣用班絲女紅全以此爲事

銀圈壓頂耳垂瑤飯裏團團糯稻香盤有山蔬類苦淡

蕨根漬水代鹽嘗

黑苗所居之地難於  
鹽用蕨灰漬水代之

深巖巨壑久相延禮義乖違陋俗然姑女定爲舅家婦

大定府志 卷五

六

無兒還索外甥錢

黑苗婚嫁姑女定爲舅媳舅無子必  
重賂於舅謂之外甥錢黑苗卽爺頭

苗一種下  
戶爲利患

甕中醋菜自爲良酸臭蒸騰未可當盡道仙廚無此味

官家何事不堪嘗

醋菜以牛馬骨入甕中爲之以  
酸臭爲佳黑苗善此种家亦然

額邊高插白翎兒出入那曾問嶮嶮有事吉凶何處卜

還來盆內鬪螺螄

黑苗頭插白翎好擄掠最凶悍有  
事取螺螄二枚入水盆中觀其鬪以

卜吉  
凶

不平鳴處事難休牛酒攜來怨欲酬岡上數聲長鼓過

一時圍繞聚堂樓

黑苗於高岡上建樓曰聚堂高數層  
用巨木挖空懸樓上曰長鼓有不平者

備牛酒樓下擊鼓各寨聞聲集樓  
下聽寨長決之事畢饗以牛酒

月場絃管鬧紛紛搖曳歌聲響過雲何事偏遺六百戶  
至今猶道馬將軍車寨苗男子多技婦人工繡前此馬  
三保之兵曾遺六百人於此與苗人  
爲婿遂成苗故又  
稱六百戶生苗

三數人撐一弩開筒中毒箭久安排下山渾似猿猱疾  
纔向前村射虎來九股苗造強弩名偏架長六七  
尺三人共張之矢無不貫者

腰圍鐵片口啣刀木桿長牌左右操陣上不須同輩出

隻身敢與老黃麋九股苗最凶頑出戰渾身鐵裹官兵  
雖衆隻身出敵苗呼官軍爲老黃

刀劔蠻平到處收高城遠築受降樓烽烟五十年來靖  
不敢生心瞰古州紅黑九股苗爲害最深經  
朝廷大創後皆寧帖安息矣

依巖架屋自爲尊密箐崇林種子孫聽說夜來多虎嘯

大定府志 卷五十六

十九

夕陽纔滅正關門

冠履何曾與世多三間茅屋罩藤蘿客來一片聲音亂

幼女開籠放白鷺

蒙髻鬢鬆背小兒叉囊交口任提攜救軍糧出無人市

遠向長街賣刺梨救軍糧叢生多刺結紅珠甚艷多子  
味澁不中吃相傳武侯南征兵乏食

採之濟飢故名刺梨實如杯  
形而小周身皆刺味多酸澁

幾重嶺樹夾蠻庄婦女逢春不肯藏聞道前村花鼓鬧

背兒看賽竹三郎竹三郎卽竹子所生三子死  
配食其父蠻人祀之者多

飯後牛羊散滿山日光斜照翠微間兒童團繞吹烟火

一曲蠻歌起白鷗

隔籬呼伴出荒廬暖日烘門笑語徐一樣撩裙拖細網

田間爭澆棒頭魚田間蚌蚌號棒頭魚苗婦網而食之

就地燔柴便作爐客來圍繞架枯株喚將牛角頻釀酒

解向尊前唱鷓鴣凡苗皆不用鑪客至架柴於地以牛角勸酒

逢年最喜試衣新遠郭穿衢不避人要識儘堪圖畫處

如雲爭看太平春予居家時每年裝春臺閣周圍數十

太平景象也

胡遜郡人詩一首

題陳孝子守墓

空山老樹集羣鳥三尺蓬蒿孝子廬苦雨淒風苦塊冷

大定府志 卷五十八 二十

天寒夜永夢魂孤白揚蕭颯悲聲遠楓葉飄零血淚枯

愛敬不因存歿異人言無間滿當塗

陳匡世字向安一字二濠崑山人紹虞之弟詩八首

水西雜咏八首

層嵐疊箬古羅施羽扇風流此出師曾佐七擒封漢爵

至今俎豆武侯祠水西武侯廟內傍列有濟火像

君門萬里獻奇功蜀道崎嶇九驛通不道蠻荒一苗女

居然巾幗丈夫雄謂奢香

尋釁無端試扑鞭十行王詔內中宣君王自有籌蠻計

枉殺邊臣却可憐謂馬燧

電躡雲騰去不還霧烟空鎖養龍山一從飛越登天廡  
寂寞人間十二閑

明奢香進良馬首高九尺長丈餘賜名飛越峯命學士宋濂贊之

講席謨猷出緒餘文昌一介比雙魚應知椎髻尊儒學

留得瑯琊三道書

明水西警陽明先生三致書於安宣慰

虎狼驕悍控西疆奮率三軍出貴陽千古傷心誰與似

忠同韋祭死青塘

平蠻節鎮擁旌旄戰馬初停血洗刀築得梵宮飛一錫

丈夫能事便禪逃

絃歌禮樂與書詩無復當年宣慰司從此版圖同一道

西南文教化諸夷

近年來苗人中採芹者頗多

大定府志 卷五八

三

唐

材字半壑嘉定人

七星關謁武侯祠

牂牁巨浪斷崇山丞相祠堂控百蠻銅鼓春喧千社雨

靈旗夜颺七星關名垂伊呂身先病敵遇孫曹勢轉艱

今日風流巾扇盡英雄下馬淚潸潸

高仕徵

句容人詩一首

靈峯道中

欲覽靈峯勝遙窺一片雲崇巒皆疊疊羣木若欣欣曲

徑高兼下流泉合復分小蓬萊處近花鳥自紛紛

左

詩 桐城人 詩二首

東壁軒

爲愛招提境新成東壁軒烟霞凝遠岫花草滿平原地  
僻鐘聲靜林疎鳥影翻時來星嶽下趺坐每忘言

南將軍祠和唐半壑韻

孤城捍敵共稱奇匹馬求師計竟遺墮指明心今古慟  
捐生全節鬼神悲浮圖誓箭當年迹荒服靈旗此日祠  
泉下賀蘭如有覺也應跪讀表忠碑

顧

鑄嘉定人  
詩二首

遊七星關

亂石鎖巒方七星落大荒洪濤湧峭壁孤嶂架危梁橋

大定府志

卷八

三

董令漢相勳名遠武侯於賢侯惠澤長山頭立馬望曉

色正蒼茫

南將軍祠和半壑先生韻

百戰孤城值數奇將軍牙帳帳空遺漫傳張許登壇誓  
忍聽盧龍笳鼓悲斷指秦庭甘共死招魂天末建孤祠  
畢陽萬里睢陽外猶記當年逸事碑

簡貴朝

字晉卿大定人乾隆二十四年舉人  
官濟寧州同又見者舊傳詩一首

靈塘

出郭陟高原芳塘做幾畝澄澈天鏡垂照影淨塵垢游  
泳固云適灌溉况可取寄語農圃人汲引慎勿後中更

產香草質與蘭蕙偶蕪穢渺難雜采采意已久美人遲  
肯來相關問然否

吳應鴻字儀九大定人乾隆中進士詩一首

登閬風臺

縣圃定何處閬風今有臺誰當搔首問我且振衣來

李枚詩一首

奎樓

傑閣凌空入紫微憑臨北斗近光輝白雲愛客常爲侶  
留臥青山不放歸

周景益字星頤嘉慶初官黔西平遠知州又見職官傳詩十二首

大定府志

卷五八

二十三

苗平十二律

宦蹟平生水上鳧罡風吹到日南隅  
探花狔鳥歸詩卷兩郭山村入畫圖  
地與羅施分鬼國人從濟火啟蠻都  
年來風土吾能慣祇是豚魚信未孚

百年安枕好山溪烽火驚傳過水西賊目韋起孝等逃受興義賊首七絡

鬚逆令倡亂鎮寧郎岱間煽誘平遠州境苗夷焚掠邊界烽火逼城萬瓦魚鱗飛燄入三

更鵑血帶烟啼已聞新鬼號風露是處空山動鼓鼙此

事量來關浩劫微材何以拯羣黎

經生初佩雀鏤刀慷慨登陣氣自豪魯國虎臣原在泮

秦風板屋盡同袍旬日間招集各路義勇數千人以文武材士爲之督率學博尹陳二君與

諸紳士乘時危始見  
城守陣

君恩厚士奮全憑衆志牢矛戟居然成一隊六千君子本吾

曹

髯翁超邁六韜沉

謂胡千峯協帥

江上尊鱸思不禁時已乞休未報國

有人焉曾贈策臣今老矣敢投簪指揮略定旌旗變誓

誠無多帷幄深祗爲此邦遭閔厄天留雙鏢作甘霖

夜靜軍書手自裁燭花初綻捷音來

裨將李君如椿直搗南路賊巢賊衆

分竄與東西兩路合張君雲鳳黃君藩先後殲之日報斬馘賊始乞降其亡命者併集於南

妖氛雨

洗東西路露布星馳左右臺蠢爾游魂供掃箒幡然革

面戒掀脰負隅賸有南山賊又報軍門細柳開威寧援兵至

大定府志

卷六

二十四

煨燼餘凶一戰收鷄奔豕突盡俘囚揭竿自擬王侯

種遣謀誰爲鬼魅謀

起事初有奸民王珍爲賊耳目充難民入城於四月二十七日欲舉

火內應甫至門卽爲邏者所獲一訊而伏轆裂以殉早爲積薪防厝火敢將疎網

漏吞舟

韋起孝爲降鞫實伏誅

從來兵法攻心貴更與將軍借箸籌

魏絳和戎記舊聞撫綏無術遂紛紜小臣罄竹難書罪

上將摩巖自勒勛

七總戎事定卽去

廢壘漸收豺虎蹟晨風猶

聚鸛鷺羣犬牙處處防邊亟赤子難辭供頌勤

詔書寬大許歸誠軍府傳來播告明已用三驅防盡殺特開

一面賀更生

時三公仲苗中有被誣爲賊黨者杏一悉心實係良民稟經各大憲批准安爲招撫

十行禮纒趨塵拜萬頃滕畦帶雨畊自是



至誠干羽格不須更築受降城

儒服談兵衆所呵青山不改舊關河事平以後憂方大  
戰勝而還痛轉多原野鴻碛殊未息門庭虎踞待如何  
履霜應識堅冰漸芻牧誰司兩鬢皤

勇退誰爭一著先髯翁聞報許歸田忍拋組甲辭諸將  
笑看純鈎記少年他日無忘同與難此行何必異登仙  
伏波不畫雲臺上却在家家團扇邊邦人繪定遠人關圖爲千峯賦

村村板板動秋風蒿目惟憂杼軸空虎旅散歸爭賣劍  
罷遣各龍驤投老善藏弓  
都閩表君亦以老繼千峯而去短長略著迂

疎効尺寸休論鹵莽功閑閣靜思當日事心香一瓣懺

大定府志 卷五八

二五

蒼穹

計前後械送叛苗伏法者三百人

五湖烟月舊魚磯滿鏡風霜志事違諸道經營猶帶甲

九重咨儆正求衣刻殘高燭符書積典盡寒袍賓從稀直待

天山全定日洗兵好唱凱歌歸

和隆武

字塢之正白旗滿洲人嘉慶二年官黔西知州詩一首

遊奎閣

奎閣崢嶸踞嶺巔閒遊縱目意超然萬家烟火城中市  
百頃桑麻郭外田鬻序有人敷雅化襟懷無累謝塵緣  
大家共醒邯鄲夢任號詩仙與酒仙

劉永安

字古山鑲紅旗人嘉慶六年署黔西州知州詩一首

遊東山尋菊步德野溪原韻

何事琴堂算海沙呼朋且與入烟霞  
醫人俗骨無仙藥  
延我餘年有菊花  
籬畔踏將殘葉滿  
山城歸去夕陽斜  
尋芳不是偷閒客  
轉眼浮生兩鬢華

李鑾宣

字伯從號石農山西靜樂人乾隆戊辰進士官雲南巡撫有堅白石齋集詩二首

黔中雜咏十六首

錄二首

一髮南荒路黔中古夜郎地聯川粵臂勢扼楚滇  
吭濟火君羅甸仙姬孕竹王勝朝徵軼事詔許賞奢香  
黑白羅施部青紅狃裝簾鈎環作珥推髻布爲囊  
跳月蘆笙咽彎弓藥弩張朋來同啞酒酒味亦醇良

大定府志

卷五八

二六

吳榮光

字荷屋南海縣人嘉慶己未進士官湖南巡撫有石雲山人詩稿詩一首

跳月詞

苗俗於月下踏歌野合謂之跳月

晚風涼透銀纓絡老蟾下地窺夜約水東水西同一聲

人滿山頭春滿壑溶溶雲氣照侏儸明月當頭二八時

蠶繭蟻蛛花並蒂馬髮螺髻草相思醋缸幾世合歡酒

天若有情無好醜烏杯歛灩醉連肩紫糯團團香在手

漫說更直與卡尤從今不用索婚牛百裙裙端藏錦袜

萬株竿裡認花迷蘆笙吹暖雞毛色

未婚者以雞毛挿頭沙鑼銅

鼓齊無力烟圍土薦馬郎房牽袂歸來呼耐得耐得

嗟乎星光露寒秋復春何不綢繆歌束薪

程恩澤

字雲芬又字春海安徽歙縣人嘉慶辛未進士官翰林侍讀學士詩一首

水西懷古

奢香辱遭裸撻銀刀健兒怒植髮欲擒馬督碎其骨贖  
珠聞馳止之彼激我叛將我夷遂彼詐謀開邊陲不如  
走訴金闕下帝知我忠定我赦我以邊功破彼詐卷裾  
走馬七千里珠拜帝庭帝心喜飛書詔香香乃來啼裝  
印面東風哀倚欄宮人發長歎昔曾嬪貢恣首祭誰教  
甌脫兩玉人金約欵傾鬢雲亂馬督伏誅宣慰歸宮袍  
珠珥相追飛九驛驛民隨指揮赤水烏撒連長圍古來  
英雄貴見機成大功者忍詬譏君不見錦繖高錦車遠  
大定府志 卷之六 二十七

落落千秋不通款同時乃生奢與劉銀釵叩鼓黔山秋

吳高梁

字蘭雪東鄉人道光十年官黔西知州詩八首

明順德夫人奢香墓詩

順德夫人宣慰使大節千秋功萬里華年十四嫁通侯  
二十孀閨守孤子四十八部九部兵一日不戢邊患生  
丹闕恭承天子詔銀甸坐鎮夫人城馬燈何物稱都督  
撫馭乖方恣貪酷陰謀激反殲諸羅命婦公然受廷辱  
熊羆十萬氣可吞誓死不負中朝恩贖珠同心出奇計  
奢助偕行叩九閭沉寃上訴高皇帝哀感六宮亦流涕  
願誅一將定蠻天願鑿千峯作平地雪棧雲林路險艱

碧鷄金馬阻層巒一自龍場開九驛頓忘鳥道極千盤  
旌旆如雲送歸國珠冠霞帔邀天澤世世分茅賜姓安  
吉語分明喻磐石譙國前有馮夫人石柱後有秦將軍  
生平巾幗籌邊壯身歿恩榮諭祭文五百年來陵谷改  
一杯荒土嗟猶在不念三珠舊虎符誰勒豐碑禁樵採  
馬鬣崇封表廢阡護持終賴裔孫賢新祠築近埋香地  
合種梅花作墓田

奢劉兩宣慰使謀開龍場九驛歌

牂牁江水流千里水西水東割疆紀羊場險惡無人通  
校尉不還節度死安氏宋氏世居之世官襲職宣慰司

大定府志

卷十八

二十八

不謂兩家有節母奇功乃在未亡人當日起覺烏都督  
明室椒房之親臣欲使西南盡州邑貪功激變生烽塵  
奢奔告劉劉智捷相與走報高皇闕請除此賊安遠人  
龍場九驛開神力金馬金鷄平如坻烏撒烏蒙都坦夷  
君不見石柱女官秦良玉請纓曾建元戎轟捍禦疆場  
大敵功何如奢劉安邊幅及今皇華歌載路伊誰不誦  
兩宣慰此邦名宦永千秋春秋俎豆報奢劉

州署後山散步小憇觀農臺

官舍如村舍開門卽後山緩行紅樹下深坐翠微間谷  
暖羣鶯出田平一鷺閒遙看荷鋤者日暮踏歌還

拜順德夫人墓

錦繡朝天劍倚霜殿前雪涕見高皇能銷邊患收都督  
爲戢軍心服夜郎九驛路開山失險一抔人拜土留香  
崇祠未建吾滋愧衰草寒烟淚數行

留別黔西士民

束髮讀漢書慨然慕循吏謂士不虛生有才合經世召  
杜龔黃間一席容位置差勝文章家雕蟲矜小技不幸  
以詩名早應

行殿試廿年甫一科卅年艱一第薇省與槐廳豈非清  
要地不能主文衡不敢上封事浮沉冷宦中旅進復旅  
大定府志

卷五八

二十九

退下直有餘閒於物無少濟恭維

兩賢王

定即  
鄭即

玉牒命編次書成敍微勞出領專城寄風願求一抒發  
剛驗初利遮眼皆簿書關心惟撫字誰知掣肘多內省  
增吾愧抗懷希古人拊膺但流涕

黔中古羅甸州在西一隅幅員七百里山多少田廬其  
民亦習苦土脈非膏腴暫晴卽憂旱積潦難爲疏方春  
杏花坼旌旆風徐徐循行歷阡陌誘勸開溝渠連年值  
屢豐民氣獲漸紓官糧自投櫃佃戶皆完租惟念黔興  
里沃壤今爲湖十年有積欠八口無斗儲賑卹且不暇

何忍聞追呼請豁念未能中夕增嘆吁吾俸幸不薄秋  
徵況有餘以羨補不足且復寬須臾

陽明有洞室講學傳良知龍場昔遷謫化行及蠻夷行  
經六廣河曉發留新詩文放啟多士此地宜專祠東山  
頗清曠古柏大十圍爲公建傑閣英靈或鑑茲其下  
闢講堂授受循遺規近城負笈多遠者難追隨爰就玉  
屏山再擴精舍基開門俯流水積翠來簷楣肄業旣得  
所努力當及時深造責有得倖進非所期典謨出經濟  
煌煌

天語垂相國阮雲臺先生恭奉文成一瓣香追溯由吾

大定府志 卷五

三十

蒞官逾二載初無矯矯名雖云安吏隱漸亦諳民情山

田墾益寬溝水無妄爭室家感和氣三子聞學生州民

富妻夏氏連科屆鄉舉余忝襄文衡部下領秋解庠序

一產三男多歡聲辛卯壬辰得士周際雲李同動一朝飛羽檄受

代辭州城士民走相告攀轅淚縱橫謂失慈父母何以

保孩嬰謂失老經師何以求準繩嗟我官實曠自守徒

碌碌所愧乏寸效所諒惟樸誠歲暮天苦寒風雪阻前

程感汝意良厚涕汗方交榮願汝士篤學願汝民力耕

後來有賢牧教養當繼成

郎葆辰 字蘇門浙江人道光中  
官貴州糧儲道詩六首

黔中雜咏

四圍邨落翠微間  
民計曾無半刻閒  
放蕪客尋新長樹  
黔民多種蠶樹  
皆於山上育蠶種  
喬人上未開山  
山中民皆以  
蕎麥飯度日  
沿巖小草花  
偏艷遍地危坡石  
總頑荒寨夜深聞  
犬吠有人踏  
月趕場還  
苗人村落謂之寨  
趕集謂之趕場

塾老黃冠笑語親  
相逢多是太平民  
政如虎猛終非福  
官亦雞廉不礙貧  
火耨刀耕風自古  
蠻花瘴草物皆春  
屈人作息由來慣  
誰向桃園更問津

信步清遊任所之  
偶尋古蹟便題詩  
白雲芳草陽明洞  
大定府志 卷八  
三十一

流水桃花蜀相祠  
連日雨風茅補屋  
幾家門戶竹編籬  
歸來天氣初晴候  
帶濕烟痕正晚炊

奉檄千山萬壑中  
閒來倚戶驗民風  
留賓呷酒筠筒碧  
黔民宴酒瓶置席  
上中貯細竹  
喚婦舂糧稗子紅  
民苗  
客有以筒互相呷  
飲謂之呷酒  
紅稗子作飯  
有山  
中皆終年不米者  
有屋石皮沿路蓋  
無衣柴火合家烘

誰非覆載生成內  
邊徼還疑造化窮

南明河上住年年  
風景依稀在目前  
盈渴皆因無本水

炎涼不是有情天  
兩大便漲不日即涸  
無論冬夏冷熱無常  
層巖上越盤盤

嶺碎石中開薄薄田  
十二郡城三十縣  
女墻多傍亂山

石田收取幾多糧卽遇豐年也類荒難保孤邨無盜賊  
須防破屋有牛羊賊窮多竊牛羊老農盼得秋瓜熟稚女擎來  
野菜香最是棉花聲價貴只尋山繭製衣裳

姚柬之

字伯山桐城人道光十九年官大定知府詩五首

遊黔西開元寺十柏山房有懷前刺史吳蘭雪

開元寺裏有十柏漱翁於此營雲宅摹碑植自康熙年  
幹不青銅柯匪石我命禁體索羣詩緣木求魚豈易獲  
霜皮黛色古今同每樹相離約一尺鸞翔鳳舞列作屏  
露葉風枝如界畫清風明月有時來影重參差陰重積  
慨我衰庸百不能偶遊勝地懷三益詩成俯仰皆陳人

大定府志

卷五八

三三

獨立斜陽耀金碧

少馬亭

十柏山房粉牆東小亭直立凌虛空攬屏紀自丙戌造  
溯與漱翁生歲同漱翁已死亭未朽可知雲物如蒼狗  
似爾才華沒九原龍鍾我愧爲衰守人生行樂須及時  
心爲形役又何爲文章寂寞身後事閒步荒亭且賦詩

葡萄泉

我尋延水初發源湧珠寺看葡萄泉明星錯落珠勻圓  
蝦鬚鱗眼相鈎連吮沫衝破琉璃天忽然迸散隨風烟  
一月倒印千萬川葡萄之名何取旃遊人臨淵口流涎



無窮巨細出形相瓌瓌瑤瑤光新鮮影浸珊瑚照齊齊  
恍移大宛登華筵挹之釀酒好顏色此味應問酒中仙  
道人日汲此泉水匏尊細嘗然不然黔西巨賫不探討  
俗名驚動兒童喧歸來掩戶自歎息關谷漢水新添箋  
葡萄一斛換涼州事出宦者無足尤煌煌旌節賜連帥  
乃復上與張趙儔遠除賁助三千萬不必自殺清者羞  
價諧西園猶可說割裂城社稱時求翻車渴馬省滯費  
何異謬說桑林稠曾嵩錢多至太尉崔烈銅臭官司徒  
葡萄小物亦階屬馬直仰葯張鉤收嗚呼何不喚起儀  
狄作大酋汲泉釀酒詒公謀

大定府志

卷五八

三三

山行宿阿五鷄場坵

暮宿山家山徑紆四圍叢翠繞吾廬桂殘猶有香生乳  
柿小堪儲葉肆書菜割鎖籬薦秋果花名梭米煮霜蔬  
衰年一飽無餘事塵榻歡吟燈上初

示土目

萬山叢裏闌蒿萊脂粉奢香亦霸才後裔尙稱宣慰使  
傳聞詔下閭風臺明洪武中詔封奢香爲宣慰使也矜文字如蝌蚪製  
有樽罍象鼎鼎好我知書常載酒余識夷字土目畫堂

頻見子雲來

俞汝木

字秋農新昌人道光二十七年署黔西知州詩九首

下鄉勘獄自新開田至遇木洞路上得詩四首

寒風颯以厲陽鳥遠遁迷石細路復古木葉增蕭蕭荒  
村三兩戶所見殊寂寥籬角一犬吠牆頭羣鷄號入門  
見破窻暗室增蟪蛄挑燈作夜饌味薄酒不醪

只此一飯耳得飽萬念消可堪負擔叟終歲猶腹枵渭

河入延江盤屈出雲霧連山作獅狔攫爪目狺怒肆彼

斌與龍謂揚斌與應龍於此焉割據安氏卅八部蒙蔡更負固

峩峩大方城豈不堅若鑄何以九道驛僅有奢香墓奢香墓在大定城北

定城北皇路坦以平我其行也住

明旦出門去積霧彌山岡不知徑東南但訝山河長昨

大定府志 卷五八

三五

宵雨微渟僕夫仆且僵况彼朔風厲道遠不及將三堰  
計朝飯遇午方裹糧行行日又夕燈火馳荒莊非爲官  
長窮正慮村農忙

遇木好場市古名遇母洞中有無懷民自言居此地耕鑿安

吾真是日見楊武舉德高及其子逢春所恨少不學未免辜厥身國家

奮武衛何嘗區斯文三子及一弟名亦列搢紳朝獵飽

翔翼暮網窮潛鱗既耕亦已種坐享無邊春惜哉髀肉

生老矣今六旬楊生今年六旬

宿上龍寺

水西諸寺推東山南明皂角皆等閒是誰開闢上龍寺

僧言創自康熙間是山僻處衆山裏四面排列千烟鬢  
大方峩峩拔天起逶迤一脈從東環坡陀蜿蜒高復下  
孕此一角蒼龍鬱青桐叢叢竹隱隱窳蔭松檜無愁顏  
佛殿千聲諷彌勒僧廊四壁圖神姦追陪旁舍得二子  
涂生耀陳生大章來謁 懸指垂創皆辛艱此僧苦行世已少何必  
枯寂緘禪關雲堂霧室皆幻耳卽此所歷真仙班香積  
之厨功德水甘泉一勺塵懷刪是時冬初木葉脫新月  
初上蛾眉彎齋魚粥鼓動夜半令我歸去思茅管

宿金銀山

畢節縣界

百重高嶺一荒村冰柱凝檐雪滿門鄉夢支離來倦枕  
大定府志 卷五八 三五

酒懷蓬勃入孤樽地當黔蜀家偏遠山有金銀氣亦尊

試問勞勞塵客駕何如茅舍結雲根

旅店悉係茅舍

黔西郭外東山王文成公祠創自前刺史吳蘭雪先生  
越十四載祀事缺如道光丁未余承乏斯土秋九月三  
十日值公生辰率州人士釋奠祠下禮終遂燕於十柏

山房粗草四詩藉攄鄙意

錄三首

有明中葉昌文運自得姚江道脈新帳望龍場一洒淚

飄零鴻跡已初陳何如此地開壇席

祠建於吳澈翁且與先生

薦藻蘋太息瑞雲呼不起

先生生日有瑞雲罩樓上因名雲後更今名

入門

敬爲肅冠巾

西風寒日照林崖落葉蕭蕭又滿階黃菊遲開九月晦  
清尊計作百年偕擬為先生祠依僧舍今無主會屬吾  
儕亦大佳難得及門田播至文章急與埽優俳門人鄭子尹適

時日

一尊遙映夕陽紅滿座胸懷太古風名士忽來袁彥道  
詩人今見李空同檻前十柏千城選坐上千秋氣魄通  
還向宣尼尋道體良知無負五更中

丁嘉葆

江蘇武進縣人官詹事府左庶子提督貴州學政

按試大定贈黃惺齋前輩二首

簪毫早入玉堂東天遣栽花滿縣紅海嶠移繁紆艾綬  
大定府志 卷五十八 三十六

沅湘流澤遍蘭叢班春遠蒞苗蠻界來暮先歌竹馬童  
我愧相如徒擁傳卻欣化俗有文翁

領畧清談似飲醇知公仁恕滿懷春專城仍有親民責

大方無附郭縣太守親理民事行部偏來問字人勸課耕桑期務本時勸  
民栽橡 苳鋤稂莠助搜珍君先於郡試時 剔除積弊甚多 即今

丹陛徵賢切可許遐陬借寇頻

和俞秋農女本刺史龍場題壁次韻

石徑千盤嶺樹蒼藍輿行過野花香州廳芳績棠兼桂  
黔西州廳海棠 邊郡新猷橡代桑水西無蠶桑之利太  
獨香旁植大桂 守黃惺齋前輩欲仿  
導義之法勸民種橡 秋近高梧看落葉明日 山多早  
繭且示所作橡繭圖賦

穀漸抽芒長官事事周民隱比戶咸歌降福穰

大定府志卷之五十八終  
大定府志

卷十八

三十七

大定府志卷之五十九

外篇九

知大定府事鄱陽王允浩原本

知大定府事河曲黃宅中重韓

詩第十九下文徵九

胡枚

疏梁園浙江石門人乾隆乙卯進士貴州學政

按試畢示諸生

平生欣賞得知音子和方占鶴在陰靜養若雞徵道力  
細論如髮見文心無瑕最是藏懷玉有志終爲躍冶金  
偏愛瘴鄉風物好一番桃李已成林

賢關濟濟盍簪儔

大定府志

卷五十九

聖澤涵濡遍遠陬織得蠻花成錦繡采來峒諺入歌謳

恩容使節三年住功計耘田百穫收漫道識途推老馬先鞭

定付與驊騮

賀長齡

字耦庚湖南善化人嘉慶戊辰進士前任貴州巡撫

贈何子貞太史卽題其使黔草

昔我來京師得與司農游君時方妙年清輝耿雙眸逮

我宮交浙司農乘使輜親君鎖院中相助勤爬搜乃弟

接席坐堦簾無唱酬

專心校藝竟日不交一語

布衣猶曩時高鑑懸

清秋中間詣深造實事惟是求形聲與義理金石窮雕

鏤遂邀

君相知特達聲光適

廷對策爲儀微相國所激賞

元老篤愛士護惜何其

周謂余往語君動必與禮謀君豈徇俗者期無微玷留

時君有世父喪而詞林故事初到館須通

翰林人材藪

謁諸前輩余適在京故相國語次及之

華實當兼收  
廟堂方簡賢授札延枚鄒疊被文綺

賜兩試君皆優

帝謂汝可使往哉踐前脩一出踰閩嶠珊網羅文蚪今來利

西南詩筆光星郵忠孝鬱至性一卷三綱繆行身式曾

閱餘事兼韓歐茲乃士之鵠大可回頽流走也愧未學

無能事薪樵輦悅且弗飾矧乃文德揉九年徒苦口起

大定府志

卷五

二

衰悵無由裒然鉅牘出詫覩篇章稠

四書文經策共六十餘篇爲黔中闡

藝所天光倬河漢王會駢共球遂使枵腹果無或魚珠

投從此士氣奮不負皇華誨余旣藉補過君亦資紹裘

司農八掌文衡

歸謁亭林祠傳衣到黔

新葺 陔亭林祠

更杼

夙昔學以揚

天子休論交在紀羣意重語不偷勗哉善自愛元化無停軸

宋翔鳳

字于廷長洲人見官湖南新寧知縣

記水西風土詩

謹按水西故土司安氏地今爲大定府治歲在丙寅

余三至貴州適家君權水城通判周旋官寺行及一

年山川在目詠歌寄懷有此篇云爾

蠻山路百折裸獮生其間羣苗此種貴約束如漢官各  
私一土地奴使諸苗蠻有女不敢嫁有粟不敢餐皆以  
奉頭目毋許少畏難爭訟鈞金輸曲直兩不寬啞酒盛  
牛角拜跪拖銀環借問此風俗積久非一端云皆露翠  
裔至今多姓安自改土歸流後土司子孫皆號土目仍  
世有土地人民焉夸人就其目相訟兩  
家皆出銀數兩然後論其曲直夸人造酒熟後各持  
細竹筒就甕吸飲謂之啞酒以獻其目則以漆牛角盛  
之夸人男女皆

帶銀環以重爲貴

蘆笙二尺餘參差六竹管長聲黃鍾濁短聲清徵散舞  
來隨節族吹去別促緩苗女共苗男明月山花滿郎腰

大定府志

卷九

三

衣帶長兒東花帚短相見兩相歡烏鳥意難斷苗俗男  
女未嫁

娶者於正月八月月滿夜會於山下男吹蘆笙女

唱歌曲相悅則解男衣帶以爲記先野合而後歸

圓木製食器上蓋下有足晨朝設饌飲祭祀盛脯肉萬

山藏夸寨然松作明燭照此丹漆器絕非今世俗悠然

思古風無爲感窮谷康成禮器圖飄零久難錄

青金謂之鉛自古產黔中邊氓搢山足燒鉛和鑄銅歲

歲有官額家家覓良工鉛多富官橐鉛少民益窮此非

種五穀所收自難同況迺真鬼窟人命齊沙蟲前聞把

總關萬人埋地宮水城威寧產鉛歲額四百餘萬助水  
城兩年來所產輒不數把總關威

寧鉛廠名聞某年以  
山空陷傷人極多



地鄰巴部山小馬跨最閑一人換一馬交易兩不慳高  
峯馳若平深谷下未艱窮谷絕澗中時聞藪慝姦萬人  
足藏納一夫亦當關恐有私鑄徒將亂官鑪鍔官私試  
較量形模同肉園睢盱當化日法律乃敢干入市見布  
粟吾滋憫愚頑巴部地名在滇黔蜀三省之間山勢僻  
者以馬相易入者輒不能  
出私鑄之徒以爲淵藪

黔地多頑山黔天多瘴雨西來訪羅甸同此一風土草  
屋厓上開板牆泥下補夸風問羣柴謠俗方近古巴僮  
及楚豎巨猾作貪賈彼苗恐無知姦心化椎魯沉闖深  
谷中漸漸無猛虎朝朝負擔人往來不可數

大定府志

卷五九

四

威寧州七星橋

百尺浮橋兩渡經潺湲水響不堪聽江通巴蜀天成險  
巖挹星辰地最靈丞相祠荒秋草白蠻人洞僻暮煙青  
大星落後秋風冷鐵柱何人許勒銘

蘆笙曲

蘆笙苗樂也其俗於正月中男女攜笙於山頭競吹謂  
之跳月相悅則以聲通意云

新樣製蘆笙吹來藉通語脉脉明兩心對對小兒女  
春林發新聲滿山有明月吹得羣花開不許羣花歇

吳文昭

字南壁大定貢生

烏蒙馬歌

我聞溼洼余吾生天馬似儻權奇世所寡又聞西北大  
宛來汗血騰黃驤裏稱奇絕豈知天生神駿不擇地雄  
姿更有烏蒙異怪問此馬何由良蠻人爲我言其詳游  
牧攻駒原有術寶嗇其母駒必強駒生三月差絕足子  
也母也兩繫束懸隔山下或山巔故使不得遂所欲餒  
駒者久方逸之望母所在奔而馳上下上習乃熟力  
增才鍊何險危從知駒良亦藉學秀靈惟人胡弗覺信  
能奮往如駒然那見蕩平愁孽畧俊物由來爲世寶馬  
乎莫向烏蒙老升沉顯晦自有時世間良樂原不少吁

大定府志

卷五九

五

嗟乎世間良樂原不少

安家元

更名塗辛字白  
西水城生員

奢香夫人獻龍場九驛

開闢功何偉奢香驛路平朝天曾奏對貢道遂由庚柔  
遠無煩力綏戎不用兵世官宣慰襲順德誥封榮娘子  
軍誰帥夫人績獨成至今叨俎豆崇祀在忠貞

昭勇將軍安觀參政安貴榮父子平西堡獅子孔

疆場紛多故藩臣贊出征鎮蠻資戰力克敵擅勛名忠

孝人家世攻同父子營四旬持久策二萬最精兵白石

崖垂破黃巾賊竟平至今存奏牘九陞荷褒榮

黔撫陳  
儀上共

功於朝

傅汝懷

字淵伯夔安人時掌萬松書院

春暮同訪濟火峯歸飲萬松齋懷古

羅甸國已更濟火峯傳久蠻長乃英雄崛起佗融後功  
德在此邦表表名不朽亦若望都縣得號因堯母前年  
訪君墓荒荒莽何有今日再探尋忽使大疑剖王封極  
尊崇奕葉克荷負封樹縱尚質豈無一杯守或丁改草  
餘凌夷類培塿峯矗城東偏坡佗富巖數墓定居其間  
萬松山左右安得有力人彰善深樂取天傾孰補之所  
恃煉石手歸合從遊子遙遙酌清酒心固知同然盛事

大定府志

卷五元

六

果能否

重登濟火峯訪珍珠泉

東峰再登陟仍爲濟王來徑小紛蓬顆年深泯劫灰幽

將窮日腳險直破雲堆喜到珍珠井差云得意回

洞洞中有井水不常出出則瀆湧成池壘壘如貫珠是年此邦必大稔當春秋試必有獲雉者乃一方瑞兆也

書李永華處士行略後

翁也今端人言行率師古投分逾一載見輒傾肺腑嘗

於羣萃間卓然挹風矩使我中心藏况耳冀論許內修

敦孝友外交克推與里閭觀而善可否待之剖諸子守

義方名業自茲樹

諸子紹勳踐成等皆能敦士品

遺事傳美談夫何俟

揚詡亭亭歲寒松砭砭狂瀾柱從之幾溯游宛在永延  
佇

冬日大定卽事

欲雨不雨當巖冬俯仰四顧常濛濛僉云山高簇雲氣  
歲十一二峴昭融此是古時羅甸國聲教遠隔天南東  
蠻烟瘴霧所時有誰與草昧開鴻蒙鬼方之伐固荒遠  
唐蒙莊蹻虛遺踪側聞丞相南征日濟火歸義真英雄  
論功行賞爵第一茅土世世專王封保有南服大啟宇  
累代納貢都從同勝國奢香女中龍朝天開驛偉厥功  
詔書褒賜襲宣慰舉赤樹衛張華風奢香歸誠後旋設  
華節赤水二衛明

大定府志

卷五九

七

代人文

稱盛 區區邦彥妾思逞貴陽西來城里空亂定罪但

坐首惡貸位效順仍酬庸

宣慰安位年幼叔邦彥爲同  
知挾位應奢崇明之變圖貴

陽者數年殺掠極慘及平以位  
幼被挾仍世襲事具黔蜀通志亦越三傳及 昭代闡

哉坤也迷牢籠 天戈所揮地郡邑德憫世祀延乃宗

洎勝祖絕官始廢

聖王之思何其醜

順治中平漢安坤投誠鄉導論功仍其職  
賜資甚優康熙三年烏撒土知府安重

聖姑坤同叛討平之坤等伏誅因郡縣其地十三年吳

三桂反坤妻祿氏率子勝祖督土兵助討且獻糧餉事

平論功封祿氏柔遠夫人勝祖復襲宣

慰司三十六年勝祖歿無嗣土官始廢爾來烟瘴已銷

盡屹然都會稱要衝星陳雲爛時則可無斯虎陪夔

龍所見將毋氣磅礴儻有人焉彰毓鍾

赤水

源從漢海北流滙蜀江東遠水垂天碧飛瀧返照紅尚  
存諸葛壘難沒濟王功千古堪憑弔浮生奈轉蓬

惺齋太守招寓屏山書閣校藝得句

屏風昭儉宜碧山柳州之記良不刊佳處大有那用買  
誰令孤負殊赧顏竭來羅甸越三載底事浮沉恩塵海  
古今上下何茫茫消受忽邀真賞在河曲先生古儒者  
建一麾馳五驄馬經術飾治仍風流燕寢凝香盛文雅  
興賢典重諸童試匝月瑣廳招論次妍媸雜進防照泮  
桃李初栽抱春意頻張鐵網珊瑚收暇倒清罇煩勸酬

大定府志

卷五

八

得樹老屋溯踪跡

屋爲前太守姚伯山先生招課兩公子處

屏山新閣容夷

猶閣面河西諸山宛如列屏地同荒

徼吾非極白雲藩籬亦時有着

我其間可乎否今日居然落吾手縱橫一覽蹠筮蒼

翠萬狀開重壑卻記泰山高巖巖快引此心同落落

黃宅中

字惺齋河曲人見官大定知府

郡城文武官署皆西向以鳳山諸嶺發脉自東西望五

老峰如拱而立所謂鳳山東翔五老西拱一郡之形勝

也姚伯山太守

名東之桐城人

於廨右闢地構屋五楹額曰西

笑亭春雪乍晴青山如笑開軒縱目懷抱爲一舒耳

郡廨羅諸峰環若翠屏繞亭對西山開一覽收衆妙朝

來爽氣撲向夕斜暉照山月窺窻妍山風弄竹嘯方春  
晴雪消忽覩青山笑五老齊顏開軒眉宛相肖

五柳十竹高齋亦姚伯山太守所題也又書楹帖云只  
因樹好方營室特放牆低爲看山齋前植柳藝竹森列  
成林墻外遠山前後映帶今爲郡署宴客之齋

五柳如高士十竹如君子當年磊落人列植羣材美偃  
室有澹臺得一已足喜吾齋何多賢森然各秀起清風  
掃庭除好山照窻几門前餘地寬補種新桃李

伯山太守題所居讀書之室曰汎若不繫之舟余欲以  
且住爲佳四字易之因用其意書之南軒且以自勵

大定府志

卷五九

九

歐陽畫舫齋以舟名其室爲文以記之千古傳妙筆使  
君讀書軒耽吟常抱膝太守又以抱膝名其廬官如不繫舟放懷

忘得失我居此軒時似君在官日君已收帆歸我方鼓

柁出茫茫萬頃波杭之以葦一官舍等驛舟速送流水

疾郡守七十二姓名僅可述郡無志乘檢省志及署中案牘自康熙三年設府後

郡守可知者得七十二人誰留去後思循良與古匹郡守入名宦祠祇寗公雲鵬徐

章公玉側聞先正言反躬踐其實苟存愛物心所濟良可

必見在莫蹉跎艱難亦靡恤且向南窻下陳書誦無逸

時手鈔周書無逸篇

朱子謂一日立乎其位則一日業乎其官呂新吾先生之言曰學者窮今博古涉事籌今只見日之不足

惟恐一登薦舉不能有所建樹仕者修政立事淑世  
安民只見日之不足惟恐一旦升遷不獲竟其施爲  
此是確實心腸真正學術爲學爲政之得真味者由  
是言之官舍譬如舟也居是官者譬如操舟之人也  
一日在此舟則一日操此舟賴此舟以濟者咸託恃  
於操舟之人焉敢不兢兢業業盡力盡心思有以善  
其事哉既爲俚句又錄先儒之言用資觀省蓋余之  
居是室讀書於斯治事於斯非若舟之汎直同艤之  
繫也已道光丙午清  
明前三日惺齋謹識

鑑心堂

王太守緒昆以三字額於廳事余日聽政斯堂

敢說明如鏡惟憑照不私堂虛迎月早吏集散衙遲得  
失徵三鑑閑存凜四知此心常自訟捫向五更時

萬松書院舊以松山得名今附郭諸山皆童惟城南玉  
文山松林佳蔚乾隆十五年郡守王允浩移建書院於  
大定府志 卷五九 十

此所謂文隆書院是也四十八年郡守永福移置城中  
道光十三年郡守王緒昆又加修葺俱仍萬松之名而  
其地實無一松茲聞譚鏡亭名文藻六龍山莊松樹極多  
乞數十株植之院中既植而春雨渥滋生機暢茂傳確  
園院長賦詩紀事因以俚句答和

靈虬乞得出山莊爲護新陰傍講堂三徑盤桓陶令宅  
鏡亭大令宰福建政和縣告一經教授鄭公鄉確園以  
歸優游林下已二十餘年  
書聲夜答風濤細翠色春添帶草香我願育才如樹

木百年翹秀滿門墻

城北十五里地名閣鴉又二里有橋鄉民劉長龍砌石

築路以利行者道旁有碣題曰太平橋

道左碑留字猶看姓氏新鄉民知好善橋路便行人澗水湍波激寒山草木春好培崖畔樹長此護貞珉

渡落折河石橋至雙山

一水縈衣帶雙山劈劍門梯懸峰路仄水激浪聲喧板

屋橋頭市茅檐樹外村街民迎長吏牽輓上雲根山路

橋市居人助輓肩輿上嶺行數里乃止

距雙山十五里有地曰瓦廠塘瀦水數里若仿湖湘間

車水法汲以溉田瘠土可沃而居人不知也因作俚語勸之

大定府志 卷五

土

雙山十五里地名瓦廠塘水塘深且濶碧影涵天光近

水田廣斥未知灌溉方吏拙憫農情艱難話耕桑我昔

過湖湘車水徧江鄉踏車入田水夏種秋豐穰黔山少

流泉涓滴珍瓊漿茲水碧如玉盍以澆稻梁倘能食其

利一隅民小康慇懃勸父老聊憩村舍旁

仁育里鷄場

萬嶺盤旋上場開野市平鷄鳴山店曉馬放草坡晴古

路修苗寨通衢入水城吾邦鹽鐵貨販此經行鉛廠

城運畢節州鹽自畢節販水城路必經此

雞場下嶺過黑猴箐山徑尤奇險貴州通志載大定有九里箐箐羅箐鬼箐



箐以列箐籠幾箐隴跨大箐而無黑猴箐之名余過總己河由雞場下嶺詣小田壩勘驗經此奇險難狀

我走躡籬箐曾歷羊場壩看山郡城南奇狀心已詫西

北躡萬峰憩宿幾村舍凌晨過雞場危徑緣石罅陟岡

椽升木降阿魚貫下石怒狖蹲穴樹密猿避射翳日古

林稠蟄雷暗泉瀉犴狢山薪樵裸獾木屋架自從羅甸

開廬鹿通華夏盧鹿卽裸獾祇今狨狢居也雷雨露化

雨霽出西郊十五里過橋至對江屯落折河水西南流過對江屯會六歸

河入平遠州界

西郭迎朝爽東峰出曉瞰野烟青罩地蠻樹綠遮村溪

漲蛟龍吼山猱虎豹蹲宿雲含雨意猶傍石巖屯

# 大定府志

卷五

三

悅服里馬場憩補助亭地距城七十里舊多大箐老林漸就開闢今則居民環聚百餘

家比屋成市場東嶺下有黑鐵田壩黑鐵者古夷民也

其人昔居於此面黑如鐵象以是呼之康熙間初定水

西設此官於老塘鋪距馬場五里後改駐白鋪移老塘

於此曰黑鐵塘鄉民聚集交易之地曰場各處場期以

十辰日輪值分配夷民呼甲子則以十二辰配象爲言

如子日場期呼其地爲鼠場丑日場期呼其地爲牛場

此地逢午日相聚貿易故曰黑鐵馬場也郡守桐城姚

東之建義倉立補助亭以亭爲義塾教鄉之貧民子弟

命秀才林煊課之皆有新植黃楊二株色頗蔥茂

已闢青箐地猶留黑鐵名市場開值午倉庾救呼庚勸

學移邊俗烝髦望後生階前新種樹遺愛表桐城

馬場下嶺渡木空河

路似羊腸繞山如鳥道懸峭峰尖露頂撐石怒張拳嶺

斷舟橫渡波迴浪拍船又緣危徑上隔岸鎖秋烟

瓜種河晚渡自總已河流入木空河過義仲河法起河會白舖河入六歸河惟總已河有橋餘皆

渡舟

飛泉一道瀉崖陰帶水迴環繞翠岑兩岸奇峰青突兀

千章古木綠蕭森舟隨樹影移溪口石激波聲出浪心

路指羊場上高嶺渡河上嶺至羊場十里夕陽回首暮煙沉

補六堡行溪谷間穿石洞過嶺至石浪廠

耕樵便是葛天民松竹陰濃蓋四鄰黃穗壓塍新穀熟

青苔蝕樹老皮皴深村有屋山當戶野水無橋石渡人

最是探奇巖洞裡怒濤噴雨出龍津

大定府志

卷五九

十三

羊場填義學

城南二十五里地名羊場填先是鄉人以未日市集

交易故曰羊場後以其地乏水汲飲於數里外趨市

者苦之徙其市場南八里今號爲野填場是也而羊

場壩之名如故其地四面皆山東北一峯尤峻俗名

大坡羣峯羅列衆木菁葱西北三里有洞岬然深五

六十丈山民愚樸耕而不讀太守姚東之憫其俗之

貧不知學乃建義倉儲穀又於倉側立補助亭卽亭

爲義塾命秀才譚國昌爲童子師聚而教之鄉之貧

寒子弟皆得入焉夫十室之邑必有忠信此地居人

寥落而洪氏兄弟顯於鄉閭廩生洪玉隴進士洪玉珩壘篋繼美力學成名空谷爾音先聲克振環堵之中必有嗣其音者昔許魯齋先生教蒙古幼穉子弟待之如成人愛之如子因覺以明善因明以開蔽相其動息以爲張弛課誦少輟卽習禮或習書算少者習拜跪揖讓進退應對誠心迪誨髦士蒸蒸吾願爲人師者是則是傲也

蝸舍新書塾羊場舊地名芝蘭培子弟几杖事先生養自童蒙正風由里舍行是然空谷裏金玉有佳音

簸羅箐興隆寺有碑曰吳公殺虎處

大定府志

卷五九

十四

碑載吳公名廷龍字宮雲別號丹山浙江山陰縣人而不著其官爵相傳簸羅箐舊有虎患行者恒懼其害寺僧如松憫白骨暴露墟莽間時出收而掩之康熙間吳公爲武官征滇過此逐虎殺之其患乃絕蓋是時水西平道路初通也黔西人何思貴題聯語於寺門曰 聖世平蠻得有大方成顯郡吳公殺虎爲無苛政轉傷人山半叢祠香火甚盛俗謂簸羅石著有靈驗過者爭禱祠焉其言怪妄難信吾謂公靈爽所憑或有然歟

射虎爭誇李北平將軍義膽亦崢嶸當年小試英雄略

此地歡傳道路清巖雨洗零磨劍石林風怒作控弦聲  
興隆寺外碑三尺合爲丹山表姓名

扯瓜河宿野人家

距木空河二十五里

階前水碧映柴扉門外山高隱夕暉野特還家雞上柵  
有人攜鋤種田歸

嘉禾里山多泉水引以溉田種稻農利頗饒山中壤塍  
畦畛修治亦勤地在郡城西百里外

梯田上峯頭墾自山腳起

山田墾闢層壘而上遠望之如梯級

胼胝亂石

間土确田無水行行郡西鄉云是嘉禾里時聽泉流聲

琮璫崖谷裏秔稻資灌培塍畦復整理穎粟成佳實里

大定府志

卷五

十五

名表厥美山深城市遠勤樸良可喜春野無閒人畚鍤  
到婦子願爾力耕餘家家衣食紀菽粟如水火仁讓興  
於此

蔣孝子行

道光丁未夏水城暴雨水漲發飄沒民舍居人多溺  
死有蔣元清者負其母逃仍不免已而水退掘土得

元清屍猶背其母面如生觀者泣下昔曹娥救父死

而不舍其父今元清救母死而猶負其母純孝之心

古今豈有異哉倪藹人司馬旣紀以詩又具其事牒

府爲給純孝非愚四字匾額并綴俚句以彰孝行

蔣孝子殉母死吁嗟孝子胡爲死負母求生竟死矣水  
城丁未夏大水罹其患者溝壑委元清其名蔣其氏倉  
皇負母跳波起陽侯厄之怒不已水吼蛟鼉命螻蟻母  
手抱兒兒背倚兒背如舟浪中駛母兮勿怖兒在此兒  
今與母同死耳我聞爾死心骨悲爾溺莫援守土恥司  
馬作詩爲爾紀憐而瘞之表厥里古有曹娥稱孝女蔣  
家男兒今并美

北郭外烏龍坡有順德夫人奢香墓歲久湮沒道光癸  
巳郡守王緒昆清其遺址立石墓道吳嵩梁刺史以詩  
紀之詩藏阿戶安氏耦柏山房余謂安氏固夫人後而  
大定府志 卷九 六

濟火乃其鼻祖宜建濟火專祠水源木本不可忘也  
巾幗傳芳節車書達遠陞樵山標禁石松隴立豐碑旣  
表奢香墓宜修濟火祠倚蘭光奕葉俎豆此邦宜  
水西謠十八首

羅甸王 表忠義也水西安氏其先蜀漢時蠻長濟  
火助諸葛武侯南征獻糧通道有功命世長其土唐  
會昌中阿佩率衆內附封羅甸國王天成二年普露  
入貢襲封如故宋開寶中普貴納土來庭仍賜王爵  
南人不復反諸葛善用兵偉哉盧鹿帥薄伐佐南征到  
今傳濟火婦孺知令名血食千餘年世享封爵榮水西

祀名宦六代揚賢聲

黔省通志載大定府名宦自宜配濟火以下至霽翠祀者六人

武侯祠萬古留精英

宣慰司

嘉順化也明洪武四年以霽翠爲宣慰使

翠死其妻奢香代之請効力開西鄙遂通烏撒道設

龍場九驛奢死子安的襲世爲安氏正德間安貴榮

從征香爐山有功加貴州布政司參政欲請減驛王

陽明先生以書諭之遂止

國朝順治間安坤投誠予世襲康熙十三年吳三桂反

坤妻祿氏子勝祖率水西兵隨師進勦事平封祿氏

柔遠夫人安勝祖襲宣慰司三十八年勝祖死無子

大定府志

卷五

十七

改土歸流

女官恰英舉萬里朝天子參政禮儒賢心折書一紙東

川祿氏孤繩武仍繼起助順平逆藩荷戈戮封豕

朝廷視邊陲近如門闥裏改土設流官十甲編六里

府轄樂貢

悅服嘉禾大有仁育義漸六里里各十甲

土目稱官家

苗寨佃戶呼土目爲官家

苗裔猶

安氏舊時蠻貊邦今與鄒魯比

墾山土

憫農勤也山民墾種嶺脚坡頭層疊而上

遠望如階梯之級然地高而确絕少流泉農人終歲

勤動日胼胝亂石間惟恃天雨以活嵐瘴之氣陰鬱

上蒸霧雨泱泱朝昏時見故黔人有漏天之語漢志

謂郡國磽陬無所蠶桑牂牁多雨潦其地最貧信然  
老農忙墾山婦推率蚤作曝日南山陽寒冬赤兩腳揮  
鍤沙礫間礮礱石參錯畸零不成田春種秋亦穫雲梯  
萬層接草屋數椽縛山高乏泉水磽确地皮薄十日夏  
無霖裂如龜背灼天活瘠土民霧雨時時落

紡棉車 勸婦功也郡無桑棉不知紡織道光五年

徐南垞太守名玉章浙江烏程縣人權郡事捐製紡車數百架

分給貧戶給棉花一觔募織師教之其利漸興秀  
才林煊爲余言馬場紡織貿易多於城中而村寨苗  
婦績麻泉爲布處處有之後徐君而守土者可不以

大定府志

卷五

十八

是爲急務乎

卒歲無衣褐幽風嗟婦子邊郡乏蠶桑卉衣而草履心  
儀南垞翁苦心教閭里買棉製紡車分給窮巷裏使之  
習紡織生計憑十指貧家婦率女富家嫗課婢處處機  
杼興人人衣食紀敦俗勸民勤要從婦功起

種青桐 興蠶織也橡樹俗名青桐葉可飼蠶櫛櫟

之類也裁宜瘠土三四年後便可放蠶乾隆七年山  
東歷城人陳玉鑿守遵義見郡多橡櫛謂民曰此青

萊間飼蠶樹也乃致蠶種徧諭村里教以放養繅織  
之法橡繭之利自是遂興大定界連遵義種橡亦宜

其栽樹放蠶之法備詳劉梅溪橡蘭圖說鄭子尹標  
繭譜

橡葉可飼蠶其材同柵櫟俗呼青桐樹沿山栽歷歷當年陳太守富民課蠶績至今遵義綢工與蜀錦敵荒郡乏棉桑無襦寒女感胡不飼橡蠶橡土宜沙磔賢哉劉與鄭圖譜縷分晰種之三四年青青葉可摘

劇罌粟 除非種也鴉片烟一曰阿芙蓉西洋以此毒中國

功令禁之甚嚴土人種罌粟花取汁熬膏絕類鴉片山僻小民以此射利犯有司觸禁令不顧也道光二十年

大定府志 卷五

九

中丞賀耦庚先生疏請劇罌粟種木棉刊蠶桑編木棉譜通頒各屬飭有司實力奉行爲民除害興利蚩蚩者庶其革心乎

園中淡巴菰烟品資日用幾等茶與酒取攜朝夕供何物阿芙蓉重洋來呂宋嗟我醉夢人甘爲鴆毒中蠶徽乃効尤罌粟土多種花時取其汁煎熬上品重趨利忘其害觸罪繁獄訟煌煌中丞疏申法警愚憲願言去非種嘉穀勤培壅永懷壽陽公樂府天下頌

壽陽公樂府天下頌先生督學浙

江時作新樂府三章勸士無吸洋烟天下傳誦

雙孝閭 勸孝弟也乾隆間大定府學生員陳純陳



繹兄弟均以孝稱郡志載雙孝子傳余輯志藁讀其傳文因表其門曰雙孝子閭爲鄉里勸焉

鄉國傳孝行墳麓並繼美至今閭巷間猶稱雙孝子孝子豈爲名嘖嘖挂人齒當年兩青衿膠庠駕芳軌潛德發其光式廬表厥里守土勸邦人聞者宜興起

節孝坊 嘉貞節也郡城內外通衢多建石坊上書節婦姓氏及其守節年歲石柱鑄頌揚聯語閭里之榮風化之美也

聖朝重教化

旌善到巾幗九天日月光下照蓬茅宅請看大方城羅施古

大定府志

卷五十九

二十

夷貊今也官道旁華表列如戟輝煌書姓氏雕琢若圭壁風雨休剝殘雪霜洗潔白鬱鬱澗邊松青青陵上柏不改歲寒心常護貞女石

補助亭 修惠政也余師賀耦庚先生撫黔九載飭屬吏裕倉儲興義學留心教養署大定府事張志詠徐鉉知府姚東之先後勸民積穀建義倉於六里倉側立補助亭以爲義塾擇師教貧民子弟後之人推而廣之以養以教惠莫大焉

我觀補助亭有懷前太守立塾義倉旁擇師誨穉幼有倉儲粟穀荒年飢可救有塾養童蒙寒微出孝秀瘠土

勞思善豈必待庶富於此養而教媮薄歸淳厚所期後  
來者次第整荒陋作室美輪奐垣墉毋棄舊

採鉛廠 重鉛運也興發廠開採白鉛始於乾隆四  
十三年發價收買供運川省嘉慶元年因缺產停止  
川運僅供貴陽大定錢鑪配鑄四年洞礦益空申請  
封閉貴陽府局歲運白鉛由威寧州媽姑廠採辦大  
定府局歲需鉛八萬觔領價收買而例價不敷頗爲  
官累貴西道領運京楚鉛有媽姑廠柞子廠福集廠  
三處採運近則興發廠亦俱開採運利而小民之衣  
食於鉛廠者亦多矣

大定府志

卷五

五

厥貢鐵銀鏤賦出梁州土滇黔銅鉛場採運領官府滇  
銅輸

上京萬里駛川艤黔鉛到瀘州買舟募蜀賈山陬硎穴  
開挖礦鑿槌斧所求地產豐憑爾人力取豈獨資一州  
鑄幣治鑪鼓轉運濟公家力作瞻貧戶

挖煤峒 嗟苦作也郡地苦寒禦冬之計全資煤火  
煤產山中鑿峒求之取不盡而用不竭土人謂之煤  
炭藜炭於鑪謂之煤鑪也然挖煤於峒苦難言狀每  
值嚴冬擁鑪而坐念爾挖煤負炭之人未嘗不心惻

惻也

寒風襲破屋煤火燃昕宵天活此方人德產鍾岾巖千  
斧敲石罅一竅開山腰歲長入漸深峒穴窺迨遙瑩瑩  
石如鐵鑿鑿紛出窰銅山取易竭利用茲獨饒官廨圍  
鑪坐冬裘煖於貂良夜卧溫室不知檐雲飄可憐負炭  
人偃僂恒折腰更有挖煤夫力瘁顏色焦

磨香車 思水利也山中松樟楓楊諸木均可磨屑  
爲香居近溪者引澗水激輪其法如水磨而製特巧  
捷謂之磨香車山民頗得其利使造作水排引以灌  
田或爲水碓便於日用其利不更溥哉

人家藏嶺樹澗水瀉山谷砌石浪穿渠激機輪轉木維  
大定府志 卷五九 二二  
山有嘉卉操斧入林麓劉削收衆材香塵碾似麩恰教  
水運車前却等推穀磨成金屑碎藝向玉鑪馥那須人  
力施坐收功效速此法蓋廣行水利好興復以之製水  
排旱溉田中穀又或爲水碓閒春溪上屋波及惠無窮  
勤將陂堰築

蹲鴟頌 廣民食也史記云岷山之下野有蹲鴟蓋  
蜀土產芋形圓而大狀若蹲鴟謂之芋魁其子繁者  
畝收百斛可以充糧食而度饑年郡西嘉禾里種芋  
頗多正月布種五月熟採功省而利饒俗名洋芋或  
曰種宜瘠土陽坡又名陽芋附根結實形圓大而子

蕃衍所謂蹲鴟者皆其類也因勸廣栽以充民食愛  
茲土物頌以美之

春分種蕎麥穀雨種包穀不如栽陽芋一畝收百斛正  
月土鬆覆五月卯抱熟圓實結纍纍蕃衍採盈掬我聞  
嘉禾里塔蔣徧山谷四鄉勤菑畚八口佐饘粥

豺狗行 去民害也豺狗似狼時出噬人或傷畜物  
村民見者羣起逐而斃之其患乃息吾謂強盜之爲  
民害甚於豺狗除之雖不能盡治之則不可不嚴也  
村人逐豺狗四鄰荷戈走謂逞饕餮心橫肆貪殘口攫  
我牛羊羣野牧警童叟甚且入藩垣傷生泣孺婦嗟爾  
大定府志 卷五  
三

狗盜雄諸偷聽指嗾爲害勝豺狼縱容誰之咎勿爲太  
叔寬使聚萑苻藪逐惡如鷹鷂惠人稱衆母  
舉孝廉 勸吏胥也府刑房書吏之老成良謹者每  
聞其家子弟身列膠庠名登賢書且有一門競爽花  
萼交輝接踵而舉於鄉者或謂刑曹利於科名吾以  
爲吏胥修善之報古今不爽觀漢史載于公治獄所  
謂公門中好修行也因取桂林陳文恭公所編在官  
法戒錄命諸吏鈔而誦之俾知惡不可爲而善必昌  
後咨爾在公尚慎旃哉

于公駟馬門早爲子孫祝陰德如耳鳴爲善天所囑我

願刑曹吏以此爲私淑守土慙涼德祇虞官謗速佐我以惠民爾亦昌其族一編法戒書展卷焚香讀心地培善根燕翼有貽穀請看連理枝相將賦草鹿

錮奴婢 矜冤獨也蠻婢有力善役使畜之者旣壯而不使適人苟合生子亦奴隸之昔任長孫治九真駱越之民各因淫好無適對匹使以年齒相配柳子厚治柳州其俗以男女質錢子本相侔則沒爲奴婢爲設方計書傭以贖拙守不才無此施設惟勸有力之家役其力而恤其身使及時婚配德莫大焉

烏蠻赤脚婢垂老爲人役生子亦人奴身錮主人宅吁

大定府志

卷五九

雷

嗟爾無夫何以有子息試問主人翁主人不省識人孰無兒女此事損陰騭少小役其身旣長宜婚匹九真年齒配柳州書傭贖作歌勸富人哀哉此冤獨

諭土目 恤苗佃也苗人佃種土目之田歲上牛羊

猪雞以爲年例年租土目有婚喪事又量納銀錢食物俗謂之紅白扯手至其強而暴者科斂其苗而又虐使之佃戶不堪其累則私質所佃田於漢民之黠者因而興訟故苗人之私典佃田由土目之不恤佃戶也水西有四十八土目安氏而外沙楊潘陸皆裸羅裔也其次爲黑種又其次狝家狃猪花苗青苗白

苗蔡家子龍家子六額子皆役使於土目佃其田者皆曰佃戶

土司改流官土目仍世業同爲太平民治以官府法自享租賦餘何憂土田陋不知恤其傭貧者日匱乏鞭箠如牛馬誅求到雞鴨書券潛稱貸移戶換牌甲以此訟端生頻煩判牘押候主侯疆以恩意須周洽爲歌載芟詩侑爾筒酒呷釀酒于甕以細竹吸而飲之曰呷酒

變夷俗 宣風教也苗蠻之俗男女未婚者春月會集吹蘆笙跳月相悅則私奔不禁至有兄弟死而納其妻者其家父母主之謂之轉房喪家屠牛擊鼓歌

大定府志

卷五

五

舞作戛其尤甚者焚尸於野招魂而葬之夷俗悖禮傷化風雖漸移司土者所宜戒休董威胥爲變革也跳月會男女婚配無禮儀轉房尤悖戾獸行人所嗤哀喪反歌舞作戛已非宜而况以火葬慘傷胡可爲獯羅古荒裔百年風化移凡此蠻夷俗有司宜正之熙陽照昧谷草偃和風吹吏職在奉宣歌謠爲訓詞

道光丙午二月八日登玉文山高閣

周莊王九年四月八日悉達太子生卽釋伽佛以夏正考之實今之二月八日遼史禮志所載甚明梁芷隣中丞詩所云佛誕自應歸夏正花朝恰已近春分

是也城南王文山林木蔚然爲禪居勝地是日春晴  
暄朗登閣遠眺

佛日天開朗仙樓客縱觀軒窻松外敞城郭畫中看晴  
野添新綠春耕破曉寒社公前夜雨叱犢出烟巒

清明祭厲壇於北郊

萬里羅鬼國今爲文明鄉和氣化災青歲事恒豐穰清  
明重播祭壺榼邱壠旁憐彼無祀魂青燐慘不光有司  
舉舊典籩豆列壇場是日風暄暢芬苾羣幽饗

皇仁澤枯骨朽草齊含芳震雷昨發聲陰鬱開蠻荒一雨洗  
瘴癘百蟄熙春陽還向先農祝來牟祈降康

大定府志

卷五九

五

夏至後連晴旬日山田已憂乾旱節臨小暑澍雨溼雷  
曉出城南行三十里青峰滴翠綠野含滋農叢牧笠出  
入雨疇烟窪間宛如圖畫一路野花爭笑林鳥弄歌薄  
暮而歸紀以俚句時閏五月十四日也

久晴不雨三農憂辛勤曝日芸田疇久旱得雨三農喜  
歡呼荷鋤分渠水歲事關心量雨晴長官憂喜如農情  
憂時常多喜常少占雨愛聽布穀鳥山高地确稀流泉  
三時待澤憑蒼天天憐瘠土民勤苦綏我蠻邦屢豐年  
春蕎夏麥收穫畢秋禾蒔土新苗茁玉蜀黍抽三尺高  
水稗秧插萬行密烟蓑雨笠畫中行野人惟知牧與耕

農唱牧歌山鳥和中含樂歲承平聲

九月二日玉文山禱晴

秋登苦澗潦騎月雨不止黃熟半垂隴禾頭欲生耳西風吹欲晴南山雲又起時見奎峰塔出沒烟霧裡靈閣隱松杉濕翠如潑水穿林躡嶂高樓觀碧巖倚轉徑開巖扉諷經聽道士稽首香案旁豈求神福已愆咎責吏躬艱難恤農里願垂臨照光羣仰天容喜

戊申六月存少柏名杰司馬權署郡篆余有滇南之行

城南鼓角好風催入境褰帷瘴雨開時久雨望晴苗黍已敷

新惠澤竹松猶護舊亭臺官書火急程千里吏事商量

大定府志

卷五

七

酒一杯七十三人題姓氏廳前倚馬望君來康熙間設大定知府至道光二十五年冬十有一月余蒞任後凡本任及署事者共得七十二人題名廳事爲文以紀之君至則又增一人也

初發郡城

暑雨連旬快放晴及瓜初代覺身輕六月上旬霪雨卸篆登程暄朗可喜

時田未正綠疇禾黍農添喜烏撒雲山客紀程世路平

秀發也湖南鄒漢勳在署纂修府志稿成十之八九約秋歸

行無險阻輿圖歷指倍分明志稿成十之八九約秋歸

付梓臨別印新刻全郡地圖二裁詩鄭重鄒枚筆約我

秋歸訂稿成

七星關謁武侯祠



旌旗南指記平蠻西嶺雲扶赤日殷萬古香烟燃漢鼎  
一碑風雨護黔山祠有乾隆二十二年峰如八陣圍初

合水比三巴勢更彎誰道長星天外落靈光夜夜照邊

關

由新堽舖宿齊家灣

曉發新堽舖黃昏止驛亭夜深人獨坐燈下閱圖經畢

縣爲蜀滇孔道由縣東出層台舖過深家舖白巖舖高山舖至赤水河則四川永寧縣界也層台驛即古龍場九驛之一也今則新關巴折坪大路甚坦捷又自縣北出長春舖過鴉關白家哨至新堽舖二十里七星關三十里平山哨二十里烏蒙舖二十里黑章汛十里齊家灣入威寧州境四十里磴子坎四十里渾水塘今改名清水塘四十里至可渡河則雲南宣威州寧州城由州南行九十里至可渡河則雲南宣威州

大定府志

卷五

天

界也附識於此

威寧州山田多種苦蕎燕麥時屆登場戲作打麥歌

蕎麥微紅燕麥黃茅檐枷板響丁當願天半月晴無雨

打得山家一歲糧

可渡河距威寧州城九十里滇黔分界處

黔雲過嶺隔河橫此是滇遊第一程兩界山川留碣鎮

康熙三十年雲貴范公承勲命修可渡河橋助碑岸上碑記載吳梅村盤江西繞七星關可渡河邊萬仞山詩句狀其形勝今

橋壞用船渡幾箱書卷壓船輕無端駭浪掀風起會

待澄波鑑月明南去問津真可渡淡懷渾似野鷗清

可渡河北岸半山有寺寺中李道士淪茗款客且言嘉

慶五年修寺宣威州貢生鄒渭謨文勒石題曰暫住亭  
謂其地南通六詔北接三巴往來登躡者勞頓之餘迄  
可小憩此中大有佳處也

幽棲恰羨道人閒卜築丹崖碧嶂間  
薛壁捫碑看姓字  
茶烟颺榻憩禪關  
亭如候館能留客  
石似高僧不出山  
且住爲佳忙底事  
坐看飛鶴帶雲還

熊家場宿文丈人水閣留題

名宗泰字履安時年七十

萬峰蹊徑入雲斜  
兩次經過處  
士家宿此  
軒外水聲

青澗落檻前  
山色綠林遮  
虎猴場市期  
頻集  
場市於寅  
申日相聚

易蟋蟀鄉風儉不奢  
他日橋成人  
利涉重來把酒話桑

### 大定府志

卷五

五

麻時議修大路舊石橋工費頗鉅

過平遠州

探龍塘汎界初分青岡塘十里  
比喇山高半入雲鎖鑰

四城黔北郡輓輸三岔水西軍平遠安氏比喇地康熙四年入版圖與大定黔

西威寧并建四府二十二年改州黃元治平遠風土記

云鳳凰山高三十里頂平潤山麓平衍穆將軍戰壘在

焉由鳳凰山六十里至鎮寧州三岔河卽吳三桂積米

接濟平遠兵糧倉址猶在今則承平久而風俗淳士民

安居樂業前時茅絢冬屋民風古紡織晴村婦事勤更  
巖邑俱爲樂土

向鳳西觀校士絃歌聲傍講堂聞時州刺史徐君豐玉新建鳳西書院  
烏西橋

烏西橋下碧波橫  
照影依然徹底清  
流水何心作波浪

千迴百折總平行

鄒叔績先生纂郡志既成將歸湖南詩以紀別道光戊申十月也

欲歌維繫愧迂疎風雨編摩閱歲除鬢鬢雲山雙塔外  
叢殘卷帙一燈餘文章概洗蠻荒陋考鏡新資郡國書  
留得悠然臺畔月清輝常照夜窻虛

得樹書屋之東有地高爽姚伯山太守策室其上額曰悠然臺蓋開軒正對南山也先生下榻於斯

己酉秋熟登迴龍閣晴眺題壁二首

年年早潦爲農愁攬鏡霜花欲上頭歲事頻占三伏雨

田家喜報萬勝秋天憐瘠土貧羸活地重邊壘富教籌

大定府志

卷五九

三

蒿目窮閭無限意暫舒懷抱一登樓

隴雲黃割趁秋晴漸息嗷嗷野鴈聲千屋爨烟連井里  
四鄉新穀糶山城儲來廩庾荒宜備

時籌補六里義倉

說到瘡

瘡淚尚傾勸我邦人修善業義漿仁粟救孤悻  
平糶通商捐錢散米兼施藥相拮据經營皇皇三月並  
告富而好施者發粟煮糜極力賑濟表閭式里以敦勸  
之

解道俊 字一齋直隸涿州人普安縣典史大定府委員

白鋪河義渡紀事

附記文

郡守黃宅中義渡記云濟物而不求人知可不謂篤於爲善者乎郡城西行二十餘里爲白鋪河河水瀉兩岸

間涉者病之先是有富而好施者欲建石橋爲利濟永久之事橋將成矣爲水所敗工卒不就今其岸上石基猶半存也已而日橋不成則設義渡便乃出白

金五百兩以一百生息爲歲修船費以四百質田歲收租穀二十餘石爲渡夫工食書券立碑垂之永久武生鄧萬春家白鋪河上喜其事之有濟伐木造船以助成之誠善舉也出金者不詳姓氏然行道之人固莫不知之而莫不傳之矣又烏能沒其善名哉道光二十有九年秋八月記

絕徑危橫澗輕舟穩渡人一溪穿疊嶂雙舸利通津郡俗蠻荒變鄉評道路真善心如此水浩浩自千春

殷懋德

字敬亭定番人  
大定府訓導

龍水井

城東最高處有泉湧出水清冽繞學署明倫堂側過府倉西流出水洞門所謂九十九井之一也井

山勢蜿蜒矯若龍龍山一脉暗相通尋源有本來應遠取汲隨時養不窮噴玉乍添芹藻雨流香還送稻秔風

大定府志

卷五

三

溶溶瀉瀉出西疇外萬畝還資灌溉功

陶寶熊

字渭川浙江  
秀水縣人

西笑亭卽事

道光乙巳冬惺齋太守招襄  
幕事下榻於斯今五載矣

風雨憑孤案星霜歷五年暢懷春酒後清影夜燈前東塔尖如筆西峰淡似烟看山無限好最愛晚霞天

張

字子佩黔  
西州副榜

奢香驛

誰激諸羅變貪邊詎有功君王自長策女子亦英雄九驛郵初置三巴路已通夜郎今自小不待問唐蒙

內庄弔古

地有萬人墳前明  
王中丞殉節處

慷慨中丞節丹心照鬼方過門曾走馬解綬不還鄉成  
敗何須論生靈實可傷至今叢塚骨遺恨失因糧

西笑亭讌集呈鹿簡堂太守

西笑亭前霽色開西山爽氣淨氛埃雲中五老當軒立  
郭外長江隱地來萬里和風調玉燭二分明月載金罍  
名園雅集追文讌遊從何堪擬上才

黔西城東觀音寺小集詠懷古跡

紫荊花繁秋色新稻花香繞曇花林飄飄旅行詣古寺  
一徑穿入秋雲深中有黃楊如車蓋駢柯接葉雙幽森  
寺中黃楊二木垂陰覆院數百年物也此間地僻遊者少日見墻影山光

大定府志

卷五十九

三

臨寺僧枯寂淨掃地院落不許紅塵侵吾儕選勝偶集  
此開樽列坐當斜陰紛紛蒼雪落几席冉冉綠霧霑衣  
襟是日座中誰爲客趙孟一獻詩一吟棠棣有華瓠有

葉白駒食藿鹿食芩賓主懽洽良有以田歌隔嶺聞鳴

喑莫嫌野貺無嘉樂撞鐘猶存正德音

寺內鐵鐘明正德庚午安貴榮

鑄水西開闢二百載如此故物稀見今俗耳聽來幾曾  
異每收贖鼎遺淮琛東山十柏盛題咏明龜豈掩雙南  
金邇逢萬事那足道木石自若何容心人生百年頃刻  
耳樽中有酒還復斟晨星天涯感落落聚散誰知商與  
參穿花度隴醉歸去秋月朗朗升高岑

黔西陽明祠創自前刺史吳蘭雪先生越十三年署刺史俞秋農先生始率諸生釋奠行禮並置祀田詩以紀之

陽明祠院舊山房鑿翠叢林闢講堂曠代儒宗新俎豆  
一番典禮肅冠裳黃花酒熟生辰奠十柏階聯弟子行  
誰繼龍場勤勸學新昌俞公越西新昌人遺愛嗣東鄉吳公江右東鄉人

人縣

香稻米

薄田種香秈三秀兩不實心知稼穡艱抱甕安吾拙  
糠羨望豐年鹵莽終難必比歲大有秋黍稌盈百室欣然

大定府志

卷五

三

觀我稼含馨紛茂密晚稻比秋花隕霜初不殺寒蝶探  
芬芳雁來垂堅粟斗種十斛收狼藉封藁結春掄脫金  
粟清豔炊綠雪薦新雲子滑承膳白華潔腐儒飽饜殮  
百年足粗糲惜此香玉粳自出予手拈念我慈惠師民  
依勤在郵穀賤恐病農歲豐猶若疾稼穡永思艱朝晨  
遑暇逸願言力加餐香飯勸生佛

桂花茶

種稻取其晚種茶取其早方春社雨前驚雷動百草芳  
茗怒生芽雀舌兼鳳爪攀條采其英終朝不盈抱活火  
焙清明將潤還帶燥松綠與朱蘭佳品各殊造未若釀

桂開風清月出皎貯甕泥三危露華滋晶晶雲葉吸瓊漿浸淫酣徹曉正如坐佳士積氣潛除掃苦薜化爲甘薰染功不少髣髴白鷄園風味十分好枯腸那能禁三椀香透腦清夢廣寒遊金粟餐英飽六班憶香山試院懷坡老詩人例嗜茶豈惟滌煩惱頗怪桑苧翁仙品殊不道水西有山僧黔西開元寺僧杰地始造此茶妙製奪天巧可以羞王公辦香薦蘋藻

貞女行

有序

貞女姓楊氏黔西茂才楊學雍之女山後之裔孫也幼許字同邑史氏子未請期而史子殤女誓志請於

大定府志

卷五九

三

父母過門守節於今十有餘年怡如也茲所謂達觀而甘節者與因爲之記並詠其事

烈女自守貞烈婦自守節以節責女情所難古無其禮今爲烈哀哀楊氏女矯矯閨中傑謂女無夫女有夫十年綰就同心結謂女有夫女無夫未成室家先成別死別吞聲兩無猜奇哉楊女殊咄咄毀粧破鏡之子歸誓死百年待同穴靡他不諒母也天下請從郎俱歿保身全義心所安何須割耳更截髮紛紛流水逐桃花惟有女貞耐冰雪郎今堅苦十二年蠟蛉有子縣瓜瓞高堂卒養終不歸操如金石心如鐵嗚呼女子從一終禮

經祇爲緣情設奇節如斯不可羈情禮常談劍一映人  
生夢幻與浮漚惟有真性終不滅誰能蟬蛻塵濁中疑  
是女身有仙骨安得內景黃庭經總帷深寂妙香藪至  
誠所感神爲通靈飛下授還丹訣獨跨紫鸞上玉京羅  
郁妙想相頽頤自然節義著人天猶有貞坊表清潔

戴粟珍

字未莊清鎮人貴筑  
籍道光丁酉舉人

題孺人李徐氏澹靜樓詩卷後

妾有姑妾無夫無夫妾不可以獨生誓當地下從郎行  
一妾無夫妾有姑有姑妾不可以先死依舊堂前奉菽  
二水解含笑而逝霍然而醒受郎冥囑代郎事親三妾姑

大定府志

卷五

三十五

無孫妾身卽子何以佐餐妾有十指何以解憂妾有圖  
史二十餘年姑曾不覺郎之已死四嗚呼盡妾之心卽  
郎心竭妾之力卽郎力天誘妾衷能骨立五

楊貞女

大風吹拆花連理未識郎面郎已死郎死妾必不獨生  
妾心先隨郎死矣郎胡死攫親怒虎食兒鴉墜樹子死  
孝諒非誤妾能言復誰訴刺妾身草頭露嗚呼一死從  
郎何足難郎有雙親死何安郎死郎親已不甘妾復隨  
死誰承歡毀妾之面易妾之衣妾衣衰經衣麻總出告  
兒父母夫死兒于歸父曰嗟婚未成禮兒何歸嗚呼兒



今不歸歸無期母曰嗟夫死兒安歸嗚呼兒夫雖死兒家有霜帷登我舅姑堂一痛而幾絕泣捧夫子靈淚盡繼以血匍匐伏靈前涕號而誓曰郎有父母妾事之郎有神主妾所依妾心如是郎鑒茲視我舅姑淚涔涔下伯叔聲酸涕泗顏赭驚彼東西鄰痛我宗黨親感泣及婦孺莫不嘖嘖歎其堅貞嗚呼貞女何知有堅貞知慕堅貞斯爲名夫一而已何論歿與存女惟知行其心之所欲行夫誰家厥姓史翁載圖第四子父伊誰宏農氏學雍名豪俠士事在道光十六年時維正月履端始

王海鏡

字鉅階畢節貢生

大定府志

卷五十九

三六

綜馬歌

紡織用之見橡繭圖說

女紅首務重蠶織用物綜馬勞爲持功緣不息文匹成左之右之當萬億駸駸繞架長由庚別號曰梭肖流鶯晨施鞦韆繼以夜若馳若驟何爭衡道路機開經下上整齊扣勒緯來往豈空濶兮逞驍驍抑罄控忌歸平蕩曷嘗戀棧滋貽譏能拂拭之寒有衣吾爲此馬增嗟歎乘者衆矣寶者希

顏卓之

大定舉人

悠然臺感懷做昌黎南山體卽用其韻

我生本遐荒窺營見聞園載酒子雲亭奇字相推究三

載易星霜卓自辛丑從姚伯山太守受業癸卯三載衣鉢親授受論文趁公

餘講學忘夜漏其材真浩博考據世難覲一揮成萬言

經史相輔奏氣若天垂虹光若錦鋪繡坐我悠然臺虛

室琉璃透庭空鳥語喧徑仄苔痕茂湘影捲疎簾嵐光

羅遠岫排闥送青來螺鬟新梳就萬態與千形鋒鋷類

鳥喙晨起望崇邱白雲漸吐秀爽氣撲眉宇何殊飲醇

耐夕陽返照佳緩緩金盆覆牧子騎牛歸笛韻天然構

晦茫失翠微渾忘肥與瘦煙雨溟濛合甘霖遍宇宙明

媚脩眉浮秀骨誰鑄鏤厯厯指新滕鱗紋連廣袤拱衛

樹屏藩陰陽占氣候峭壁旅人行懸巖樵子造星野分

大定府志

卷五

五

井參風臺位丁戊風臺掃雪麗城八景之一在城南憶昔遊文龍山舊有文

龍書院後移置巖泉穿石竇潺湲復潺湲銀牀鏗玉漱

城中更名萬松俯瞰林青蒼松檜色相糅浩浩天風來塔影圓晴晝其

下有龍湫俗呼余家塘一鑑開清漚水淺點蜻蜓山深靜猿

欲截業映波光孤根將欲仆行行入田家竹籬居何陋

乃知稼穡艱縱覽桑麻富蠟屐得得回山先人面走緬

懷仁者樂太古德彌宥玉韞氣自輝賈用期必售莫遣

愚公移常荷坤靈祐骨相本嶙峋何虞鬼神詬為學似

登山慙慙日運甃歸宿悠然中心境除昏愁北窗恣臥

遊蒼莽仍依舊五老雲中招西山有五老峰捫蘿爾曷又芙蓉

勢嵯峨疑有蛟龍畧林箐聳雄關小醜難爲寇蜿蜒走  
百里其勢相護救或如鵬騫翮或如鳳育殼或如倉廩  
呈或如鍾鏞奏或如珠玉輝璀璨人競貿或如揖讓容  
賓主形相迺或如具肢體經絡通脰脰或被毛髮蒙  
茸憎眩瞽或如湧泉落灑瀚聲奔溜或如怒馬馳騰驤  
首不復或如綴星辰輔弼分左右或如排鸛鵝行列森  
介胄或密如同心氣味薰蘭臭或媚如新妝髻髮堆笄  
副其立如鸞鶴其伏如鼯鼯藹藹笑容和粼粼石齒皴  
蒙蒙微醉醒青青黛眉鬪曲曲盤龍蛇翩翩翔雉雉徐  
徐魚唼喁滾滾車輻輳雷電任掀逐雨風憑馳驟玉筍  
大定府志 卷五 三

抽參差儼然殊佐佑野燒痕瀟漫恍若被針灸遠寺藏  
鐘鐸隆碑垂篆籀千巖新月臨一角歸雲逗平原廣榛  
栗絕巘勤耕耨實應丹砂出石宜雲母購地志詳搜羅  
山經異諠譎自愧學道遲立身苦早幼三度戰春風事  
輒與心謬窮年困帖畢立說恥釘鉅吾師已騎鯨句容  
掩棺柩履道隔山河心香祝俎豆昔年辨魯魚多識及  
鳥獸析義心如絲觀微目若鷺青紫澤承先丹黃書啟  
後棠陰惠常存鶴冢銘可留

府署倉創有伯  
山師鶴冢銘

恩義荷生

成分名通世媾遺愛傳一錢清風滿雙袖解組方南歸  
絕筆等西狩星曜震重霄牛眠正邱首迄今讀遺編蓬

謂太

勃氣如饋啣環勒心銘耕石乏秋收知我河曲翁

守黃

怪齋先生王金嘉入穀和公評卓文有玉節金焦桐加斧削朽

木供薪樵獻文紀職方府志乾坤編卦繇公手鈔周易

說為精義秉鈔民風由以淳文運已非始分校屏山閣恩遇實

罕遘聯牀多先達揚敏齋吳小山德星聚奎宿蓼苓蓄

藥籠洩勃陳圍廐掘劔冲斗牛求珠獲瑩琇碧桃綻短

牆綠竹搖高雷閣旁舊栽五柳將感激心難恕疎狂性

所狙步屨尋舊居欣欣草木懋文翰存門楣伯山師題

及楹聯尚存魄力出膚腠陳迹費摩挲精靈誰安侑極目望

天閭耿耿中心疚此亭願千秋默爾潛祝咒人生本過

大定府志 卷五 五

客天地逆旅餽酌酒獻南山山靈苾芬艤俚言綴篇終

聊以為勸酌

種青桐

肥土宜植桑瘠土喜種櫟葉皆可飼蠶蠶成辛苦歷太

守來歷城敦勸樹嘉績劉鄭圖譜傳法良少匹敵我從

遵義來覩此心感感邊城乏蠶桑四山多沙磧允宜種

橡榭課民為解晰成繭如扶桑枝頭任攀摘

張吉熙威寧人見官

洞溪瀑琴

洞口路崎嶇溪頭有茅屋爲聽洞前流抱琴傍溪宿  
望海亭

密雨空庭綉綠苔疎簾一桁晚晴開呼童移椅欄邊坐  
華月亭亭海上來

千丈崖

茅屋人家半掩關巉巖千丈響淙潺斜陽一抹鴉邊路  
青透溟黔萬疊山

遊仙人洞

一笑穿雲悟夙因梅花香裏認前身休嫌遊屐都沾濕  
只染青苔不染塵

大定府志

卷五十九

四十一

南海子

北海聯南海茫茫繞郡城四圍寒氣重兩岸水雲頻眼  
界澄如許心期澹與迎憑檻臨眺久有客憶騎鯨

湧珠泉

身世萍踪聚散輕湖山從此亦鍾情敢云題詠能千古  
只合林泉過一生幻泡聯時珠顆顆浮漚湧處水盈盈  
散才翻愧閑居久豈望人傳吏隱名

余家駒畢節諸生

奢夫人

夫人諱奢蘓四川永甯宣撫使奢阿鼎妻洪武中宣

撫卒夫人襲爲宣撫使永樂中入朝增置赤水宣撫  
司分隸貴州時諸蠻喜爲寇屢費征討宣德中夫人  
上言欲化頑俗須脩文教而諸生皆夷獠朝廷所設  
訓導官言語不通難以教誨庠生李源文品兼優並  
諳夷語乞卽授爲訓導官庶有實濟詔從之諸夷乃  
知向學不復爲寇夫人又廣立義學厚諸生膳故後  
世赤水畢節二衛人文稱盛論者謂是時諸生言語  
且不通欲令從文亦大難事而夫人以婦人能見及  
此開文教於夷疆較之奢香通道良玉勤王尤爲有  
功後世云

大定府志

卷五九

三

中女文明象離位正南方南方有賢女文運以之昌皇  
皇奢夫人坐鎮西南土欲以德化頑脩文而偃武草昧  
初開創華夷語不通振鐸爲譯訓荒裔起曠壘善教貴  
得人一章奏天子俞允下九重吾道乃南矣鉦鼓化絃  
歌漏天人文起至今溯淵源肇自夫人始適姑佐戎陣  
良玉統三軍女官尚多武夫人獨重文南土知文學人  
推小洞天陽明猶後輩陳朱已生先相傳貴州文學開  
陳迪天順丁丑進士朱謙天順甲  
申進士皆歷官御史在陽明之前史筆雖書記文人未  
表彰夫人有潛德流水山蒼蒼

忠烈南公

常山之舌睢陽齒鮮血淋漓將軍指同爲正氣炳乾坤  
唐社稷賴有此千秋血食在黔疆天報忠臣以孝子  
公子南承嗣官於黔有善政民爲建  
生祠承嗣不可乃建公廟以成其孝

陸龍安宣慰墓

千年爵土五朝功剩有殘碑蔓草中百廿裔孫多富貴

無人點酒灑西風

鄒漢勳字叔勳新化諸生詩六首

初入大定作

延江西畔鴨池邊風景依稀似蜀天約法經仍諸葛舊

寫詩人愛薛濤牋南州冠冕朱提郡郡境有晉朱提郡地鬼國封

大定府志 卷五

圻墨特川一自羈縻無紀載郡地自唐後始爲羈縻州其先實內地也千秋

蹤跡任沈湮

水西詠古

封疆猶是古梁州拓境秦元計漫周大定開自秦而元再闢之鎮壓

百蠻煩帝子謂元世祖使皇孫鐵木兒不花駐營亦奚不薛也傳馳千禩尚王

侯開郵闢箐勞經畫謂明初驛剪地安屯亦勝猷謂明初

地統絕自然歸大化西南天意已全收水西慰安宣慰勝祖

庸奴掣肘事奇冤妄議于今尚懵然應接不曾來一介

旁撓終自有餘權皆目揚述中事兵良將武空饑戰敵狡師婚

向奮前今古蓋臣同墮淚黔書苛論莫重編內莊吊王少司馬

黑雲堆箐影模餽一夜飛星墮海隅敵愾屢摧心未忤  
領圻新喪勢彌孤紅崖戰枉驚羅鬼少保入水西境連

諸國皆水西之奇險也墨特功難續霸都霸都元劉風雨至今猶

激厲似常磅礪罵更租更租水西尊官之號楊

學肇祥柯紀道真道真尹儒風遠被到砣津見華陽國

志堪同尹董標名族華陽國志建武中蜀中大且與長

通步後塵盛覽字長通祥柯路闢焚符侯奉帛經承應

許士漸仁如何宋氏無良策屬國千年竟讓人後漢有

國興王之不經營捷柯者惟趙宋耳平夷懷傳巴郡實

大定府志 卷五十九 四三

中秋月下同解逸齊少府名道夜坐悠然臺

羅施本自煙嵐窟月色從來夜不多到此四時都閱歷

如斯三五莫蹉跎檐牙露冷猶偕坐屋角風微且詠歌

不信積陰曾幾日還留清蔭上藤蘿



大定府志卷之六十

外篇十

知大定府事鄱陽王允浩原本  
知大定府事河曲黃宅中重輯

舊志敘錄

烏撒志畧四卷

元李京撰詳職官傳書今佚方輿紀要引元志云烏撒山崖險阨襟帶二湖羊腸小徑十倍蜀道殆卽京書之文也

萬歷畢節衛志一卷

萬歷中高少室韓襟江撰名皆佚少室襟江蓋其號  
大定府志 卷六十 一

也羅英畢節縣志序云畢志明萬歷中高少室韓襟江兩先生所撰後遭兵火失傳又云余受校官清平禮謁郡伯見郭青螺先生所修黔記中有畢志一卷卽借歸手抄殆卽少室襟江之舊也

威寧風土記一卷

康熙三年知府宋起撰盧永勝威寧志序云宋公起始創志曰風土記今按此記僅文一篇具錄在文徵中

康熙平遠府志

知府邱業通判查函撰旋散佚見鹿驄豫平遠州序

康熙黔西州志

康熙二十五年知州何縉修主撰爲四川舉人高八龍書今佚縉有序存 何縉修黔西州志序今天下孰有重於大一統之書哉厥書維何志是也凡郡邑之有志猶夫

國家之有史其體異而其用同何以明其然也蓋史主文志主實史尙畧志尙詳史陳論斷志陳沿襲故曰其體異至若臚列例事之始終列輿圖之形勢述習尙之貞淫紀人才之盛衰作史者類必遠取諸志故曰其用同明乎異同之故而志可爲矣縉少也賤長涉大定府志 卷六下 二

藝林謬提南宮江浙新吳三仕爲令政事之餘閒覽雜史旁及天下諸志惟山陰武功兩志爲典核彬彬有大雅之遺而惜其俱成絕響也其諸薄海內外志有不一例無所殊均有取焉今

聖天子御極二十有五年聲教四訖車書一統爰是天下郡邑蒐採遺書以次

上進集蘭臺石室之英纂修通志誠盛典也思京都直省無不釐然大備獨黔南荒服多闕如縉於旃蒙赤若之歲自江右量移承牧是邦適直改府爲州之始夷漢混處庶事草創問載籍無有也問文獻無有也蓋黔

西新疆舊隸土司爲羅甸國衣冠不列王會之圖民數不登司徒之版自開闢來閱二十餘載幾經懲勸幾經漸摩乃駸駸乎有革舊鼎新用夏變夷之象而猶未盡然也語山川則危巒峭嶂激湍奔流語人物則異貌奇形缺舌卉服語田賦則菁莽山碁窮溪邃壑無善狀可名無大觀可紀惟昔府今州建學明倫有子衿輩出而文章品行底於醇厚所謂名賢勝跡忠孝廉節概乎未見似無庸志亦不敢輕志也但思天下無不可治之地亦無不可化之人是在治人化成俾風移俗易或可漸臻一道同風之盛縉忝牧茲土甫一年爲歲丙寅奉撫憲檄下所屬有司採集編纂將以彙成全志上達

大定府志

卷六

三

御覽縉慚無修志之才又無舊章可考適有鄉試丙午科孝廉高人龍流寓金陵回籍道經黔地出平日紳士父老所傳聞與耳目所經歷者與之叅定約畧纂成以備今

上天下一家之觀少佐大一統之書於萬一云時康熙丙寅二十五年也

康熙舉節志二卷

康熙三十一年知縣方瑞合修主纂者爲縣人羅英

書今佚瑞合英序皆存 方瑞合畢節縣志序周禮  
大司徒掌九州輿圖紀其廣輪與山林川澤邱陵墳  
行原隰之名物職方氏辨九土百族九穀六擾之要  
周知其利害卽後世郡邑志之所由昉乎夫國無史  
治亂興衰無由鏡家無乘世德源流無由考若邑無  
志則錢穀戶口阨塞險要風俗人物以及山川道里  
之遠近災祥時政之得失又奚以洞悉無遺故考亭  
所至卽以修輯爲急其重概可知矣黔去京師萬里  
荒服也畢去黔復數百里介古梁西南夷穴地不掌  
大人不數千疑無庸志然一民尺地莫非臣土可曰  
大定府志 卷六 四

彈丸黑子竟置弗錄耶攷舊志畢節始於前明洪武  
二十一年一時戍守之官軍來自中州冠婚喪祭不  
類夷俗後二百七十餘年間家絃戶誦合畢赤兩地  
捷南宮者四人登賢書者四十五人男子之盡忠盡  
孝女子之爲貞爲烈往往不乏在名邦雖不足多而  
邊郵荒裔殊可稱善也

本朝順治十八年入版圖康熙二十六年建縣瑞合於  
改設之三年來令茲土初入境見山田荒蕪民凋物  
做校簿書則里甲混雜行釋菜則明倫無地問志籍  
則兵火無存卽欲效考亭脩輯未遑也今承乏三載

鴻雁漸歸疆界漸楚石田漸熟學校義館亦稍稍脩築倘邑志仍聽缺畧奚以繼前徵而啓後哲乎爰捏遺編斷碣得十之七讀郭青螺先生通志得十之三命邑人羅英屬稿裁定上下二卷曰輿地曰建設曰民物爲考者三爲目一十有五曰官師曰科貢爲表者二爲目一十有五曰名宦曰人物爲傳者二爲目一十有二曰雜記爲目六曰藝文爲目九凡萬有餘言雖未能彰往示來庶一方之錢穀戶口阨塞險要風俗人物以及山川道里之遠近災祥時政之得失可藉是無憾文獻之不足也乎是爲序 羅英舉節

大定府志

卷六十一

五

縣志序畢志明萬歷中高少室韓襟江兩先生所纂後兩罹兵火失傳卽得一二故老所聞亦祇存十一於千百可慨也康熙八年復貢例余授教清平禮謁都勻郡伯於幕見明大中丞郭青螺先生所修黔記中有畢志一卷卽借歸手抄以俟續輯五十餘年未記之事俾後起者有所考奈寄命黃口朝暮冬烘無一日之暇今二十六年秋奉督撫奏準畢節改衛爲縣部選方公來宰斯土命余纂校志乘因前所抄者率同人分類採訪編輯成書挂漏之病誠所不免而徵獻考文得償余續輯之夙願非余之大幸也哉

康熙平遠州志

知州劉悼學正田祖同修見鹿驄豫平遠州志序

康熙平遠州後志十六卷

康熙四十一年知州俞九成撰書佚九成序存 俞九成舊序平遠爲水西比喇地世爲安氏所踞跳梁反覆封疆大吏未能安枕甚且肆其蹂躪而兇逆之勢益張迫入

國朝猶然負固康熙三年

上命重兵征之始收其土地籍其人民建郡設官與大定黔西威寧並列四郡而平遠爲之冠無何吳三桂叛逆

大定府志 卷六

六

土人首尾其間陰相糾煽欲以抗大軍之麾迫吳逆翦而土人有阿五者求安坤之妻祿氏於其母家指一子爲安氏遺孽奉以爲主冀

朝廷罷協鎮重兵還其疆土賴

聖天子之明毅然不允惟賜宣慰虛銜羈縻之因以折其奸

使不得逞未幾平遠與黔西悉改爲州前之郡守別駕席未暖遽去人文風俗未及轉移而溪山諸勝亦汨沒林莽不暇搜求嗣是州牧項背相望諸當事撫綏懷柔詩書禮樂漸摩二十年學校聿新科名鵲起而文物風景亦遂可著之紀載形之歌咏視向之兵

戈充斥樸畧無文者亦已遠矣嗚呼豈不在人哉余於康熙三十九年由粵東連州倅來判斯州過同年黃樵谷昔爲平遠倅乃以向日踐履所識備道其概以策余行而尤以建學修志諄諄爲屬余用是竊有志焉雖簡編缺然無所參訂姑卽一人大端而紀述之如學宮學田不遺餘力求盡一日之職守迨事成則紀之書又推夫星土山川之大旁通於兵農禮樂文武人物神祠之間下而至於昆蟲草木之細兼該博採纂爲十六卷自康熙四年建設以來至今僅四十載而卷帙已如此使由此而往踵事增華所志

大定府志

卷六十一

七

又豈有量哉然此篇特權輿耳慨自濟濟火歸誠蜀漢而後千百餘年其間豈無英特之才拔萃超羣之品足以書簡冊昭來茲顧湮沒無聞獨其戰鬪犯叛之事操管者一一備載致使山川亦且黯然削色而況於人乎吾願產斯土者化其弓刀荼毒之氣而遊於仁義之鄉牧斯土者澹然無欲與苗民休息於耕桑衣冠之地則生養遂教化行文物明備將以潤隆平而比中土矣豈獨此編而已乎吾是以畢然有望於後之君子也康熙四十有一年歲次壬午仲冬撰

康熙畢節縣後志

康熙五十三年知縣柯天健修主纂者爲教諭張鯤  
書原未梓見畢節志大事紀今佚天健鯤二序存  
柯天健畢節縣志序竊惟事無關乎興廢者不必創  
於前義非切乎勸懲者亦無俟繼於後故貞淫並陳  
國風之訓也淑慝具載春秋之筆也知此可通其說  
於志志者記也史之支輔也三代有史而無志夏之  
禹貢周之周禮尙已司馬氏於紀傳年表之外若禮  
樂律歷及天官河渠志焉而名之以書至班氏始著  
爲志後乃因之通都郡邑咸得舉焉此志之所由來  
也黔之有畢衛改爲縣其原委前人已先我言之無  
大定府志 卷六十 八

煩復贅癸歲孟春余奉

天子命承乏茲土入境以來觀山川之巉澗風俗之淳漓人  
物戶口之錯雜思一詳其巔末因數十年前兵燹頻  
仍典籍殘缺帳焉莫考嗚呼蘭臺石室代有傳人前  
者耳熱後者茫茫是誰之過歟爰與廣文張君慨焉  
作興取前任方公舊稿孜孜校讐庶合邑之土地山  
川人民物產戶口賦役古跡舊墟政事風俗俱一一  
瞭如指掌絕無疑義但自愧才疎學淺且蒞任未久  
不敢妄有增損貽譏識者惟願後之同志再加詳核  
補其不逮俾斯集得成全璧或於政教之興廢人心



之勸懲有小補云張鯤畢節縣志序畢節原無志洪武十六年允穎川侯傅友德之奏而衛治始設焉二百七十餘年欽惟我

世祖章皇帝膺圖御宇革去衛所指揮千百戶而設以守備所千總之流官以治之隸於黔之都司制斯善矣嗣因州縣衛所等官文武殊途軍民岐視權不畫一康熙二十六年蒙總督雲貴部院范公諱承勳者特疏題

請改衛爲縣而以赤水衛附之斯又盡善而盡美矣自改

縣迄今幾二十餘載鮮有簪筆文獻莫徵鯤是以憂

大定府志

卷卒

九

之憂之維何曰荒已漏已墜已軼已紛已考之璇璣曰井鬼曰甯參於彼乎於此乎庸毋荒問其始曰烏蠻也曰羅甸也曰八番宣慰司也勿之據矣庸毋漏城其築乎而雉堞無存官其建乎而爵秩莫考庸毋殘奢寅之變付諸莽矣邦彥之戮厥爲燼矣庸毋墜畢赤之山川如故也創制依然也而鄉賢勿問名宦難稽矣庸毋軼田賦混淆戶口流遺也庸毋紛方今

聖天子撫有九有擴清無外百代靈長之慶悠久無疆而顧使禹貢之內有荒漏殘墜軼紛之虞何以舒南顧而

答

聖明乎鯤於是旁搜曲證得邑人羅英之抄本而合之貴州通志之紀載晝夜校讐閱兩月而始就緒荒則正之漏則葺之殘則整之墜則舉之軼則補之紛則畫之正斯無忒葺斯無缺整斯無傲舉斯無廢補斯無遺畫斯無偏鯤之所以釋此憂也其在茲矣爲綱有十爲目六十三非惟是畢節也畢節志成則言畢節也攷古者可以繩今彰往者可以察來知已然者可以知未然志者繩也鏡也坊也問地方之原昔何以夷而今何以漢問建設之制昔何以武而今何以文問

大定府志

卷六

十

衛治之名昔何以分而今何以合問科目之數昔何以盛而今何以衰也問忠孝名節昔何以有而今何以無也問土田戶口昔何以腴且庶而今何以瘠且凋也若此者非鯤與紳士之憂抑亦當事諸公先一邑之憂以成

盛世休明之治永彰

聖天子萬壽無疆之樂爾至於踵事而增之尤有望於賢宰主持而聿觀厥成矣是爲序

雍正黔西州志

知州鮑尙忠撰書及序俱佚見劉永安黔西州志序

雍正畢節縣志

雍正十三年縣人邵熙載撰書未見卷數無考熙載序存 邵熙載畢節縣序我黔自前明建置以來猗氏衛中丞通志最詳其他郡邑之有志者絕鮮畢志附於省乘甚爲簡畧昔萬歷間高韓兩先生嘗修明矣尋火於兵湮滅莫考康熙二十六年羅奏五先生訪傳聞於故老討軼事於殘篇歷兩載而志成其間之爲綱爲目瞭若指掌越甲午司鐸張德江因其遺稿增減成書余覽之山川關梁其有定也而易位者十之三人物名宦其共傳也而遺逸者十之二建設

大定府志

卷六十一

十一

紀事之彰彰可考也而歲月互淆者十之一藝文僅錄一己之批詳職官盡削前人之名姓耳目之近尙多失實况遠者乎每與同人話及不勝捥腕意欲考正以成實錄自惟寡陋無能爲役低徊久之乃思志者志已事也義先比事詞之工拙弗計焉遂不自揆於雍正乙卯長夏取其刻本次第而稽真者仍之舛者正之漏者補之濫者去之依奏五先生體例細加校正刪繁就畧萬有餘言並續康熙壬申以後五十年遺事以成全書明知疎淺不文不能彰往示來然以備一方記載亦未必不可爲敝帚云

乾隆威寧州志

乾隆十年威寧學正牟岳齡撰書今佚其凡例及諸篇小序尚存威寧志之前大率分類一依貴州通志首天文次地理次營建次食貨次秩官次武備次人物次藝文盧永勝謂營建食貨皆遺佚其書蓋未刊故相隔不二十年卽有殘缺也

乾隆大定府志八卷

乾隆十五年知府王允浩修主纂者爲江西舉人王夢桂同採訪者有舉人李鴻勳王函貢生李琳生員梁文元陳純李天柱書未梓無序書中所紀亦惟詳大定府志

卷六

十二

親轄地諸屬州縣尙不之及也

乾隆平遠州志十六卷

乾隆十五年知州鹿驄豫撰尙未竟業乾隆二十一年知州李雲龍踵成之書今存驄豫雲龍皆有序○鹿驄豫平遠州志序志爲紀載之書所以信今而垂後故九州之志掌於職方凡百郡邑莫不各有成編以備輶軒之采輯雖體裁詳畧不同敘述簡緝各異而要之山川形勝財賦物產人物事功及文藝之足供流傳叢談之足廣見聞者所在多有平遠本水西地原屬要荒開拓未久樸畧簡陋之風勢所不免予

於己已元正來牧茲土與士民相見竊喜其人文秀  
拔風俗淳龐益

國家百年培養之恩無遠弗届而士民之陶淑於德禮者  
深宜其蒸蒸日上也下車後相與休息予既樂此地  
之善而民亦安予之拙獨受任年餘鞅掌奔馳未能  
少補斯土又荷諸上憲甄選調任將有威寧之行不  
能不繾綣於懷也會郡伯王公以西江名宿來守此  
邦期月之間不令而行不勞而理每於退食之暇殷  
然有懷念大定爲全黔西北股肱雄郡而志無成書  
文獻之無徵是守土者之責也爰命各輯邑志彙於  
大定府志

卷六

十三

郡志以昭示來茲是以散木弱植亦得入匠石之室  
而邀其斤斧予忝在屬末何能不與平遠人士同踴  
躍而趨事惟觀州之志草創於前太守邱公業別駕  
查公函繼以兵燹散失前牧劉公惇廣文田君相從  
而編輯之及錢塘俞公九成牧此土而囊括時事潤  
色前編集爲十六卷此康熙四十一年事也維時建  
置未久事實無多而首事踵事者已汲汲若是是誠  
有心人哉予不敏敢不敬承厥緒於是延鄉先生之  
有達識者多見聞者習風土而能記憶者偕廣文曹  
公海不惜公餘焚膏僭爲增易仍其舊補其新發其

凡就其例以備採擇顧其中紀載猶多簡畧亦以地本荒外載籍莫稽聊集本地事實備一隅之觀助爲山一簣不敢少涉鋪張懼失實也然玉可輝山珠能媚水人文風教積久而昌況今

聖天子在上加意邊陲賢執政接跡多方教養天時人事日起有功其所以焜燿簡編流芳奕禩者正未有艾但使士不以邊方自待狹小其規模民不以爭訟爲長相安於隴畝薰陶漸染刮垢磨光將冠裳之風化及卉服詩書之澤徧彼鳥言文教振而禮樂興人物盛而事功起凡可以增光史冊者富有日新其於牧養

大定府志

卷六

十四

斯土之意庶幾藉慰而與有榮光矣予行爲薦紳父老別臨歧戀戀爲數言於篇首且以望之後來焉乾隆十五年歲次庚子小陽月書 李雲龍平遠州志序周禮外史掌四方之志志卽史也史記八書漢書變爲十志范氏後漢書爰有八志歷代史家悉取裁之其中彙聚部分綱目體例卽纂述志乘者亦咸奉以爲正鵠而無所於軼然其間有難易焉述易而作難作於文物聲名大備之地易作於雕題鑿齒文獻無徵之地難惟其無徵不獨作難而述亦匪易也平遠古爲羅甸蟠踞之鄉獸伏鳥居長其子孫元明皆

授以宣慰司之職然不過羈縻之而已千年氣運必有自開我

聖祖仁皇帝平安坤之亂取其地而郡縣之埽其穰槍奠之磐石聲靈之赫幅幘之廣亘古未有乃巨魁豪傑四十八部之衆泥首効誠而音語則鈎輅格磔非譯不通間或用書契而字如蝌蚪不可辨識此無論千餘載之官師賦役戶口土田茫乎無可舉似卽丹山碧水嘉植奇琛亦沉霾消滅於蠻氛瘴氣中耳夫以濟濟火之英雄普露普貴之恭順阿畫靄翠父子之濟美奢香奢助之婦姑嗣徽使生禮義之鄉沐浴至教

大定府志

卷六

十五

粹然一出於正其卓卓可傳無疑卽不然亦人之所難能而可貴而今能舉其姓氏者幾何人耶且此數者皆蠻之君長與君長之婦赫赫者尙若此又何況匹夫匹婦之至性激發喜怒哀樂中乎節生死利害不櫻乎心者之不能自拔於狂獠之俗乎舊志爲錢塘俞公所撰窮搜極討畧而不詳厥後潁川鹿公復加採集惜未成書若名宦鄉賢文苑三者俱廢則其地與時之圓而濟濟火等不爲立傳非其遺憾歟余承乏茲土甫下車卽思興廢振墜修文廟建書院二者幸藉手告成惟志乘獨需時日而乃竣延訪故老

卽郡中能文學之士相與參考繁徵博引必存必詳  
要使後之君子閱建置城池疆域兵防而思教寧閱  
賦役而思拊循閱職官公署而思忠蓋閱學校風俗  
人物而思整齊而化導則是編也豈獨爲徵文考獻  
之一助乎哉乾隆二十有一年歲次丙子重九

乾隆畢節志八卷

乾隆二十二年知縣董朱英修主纂者爲福建馮錫  
綬江南唐材未竣事而錫綬卒材實終其事沈德潛  
又加刪潤焉書今存德潛朱英皆有序 沈德潛重  
修畢節縣志序予同年友董君陶然敦篤愷悌學問

大定府志

卷六

十六

宏深而其經濟才又豁達俊偉肆應咸宜乾隆甲戌  
十一月奉

天子命蒞黔之畢邑當滇蜀要道自建縣以來休養生息  
風俗隆隆日起而志書鼠殘蠹耗湮沒不彰此雖彼  
都人士之事亦不可謂非令斯邑者之責也董君甫  
下車慨然念之卽搜遺稿郵書招予過從討論予因  
年邁不便遠行且聞萬山綿亘苗獮與民雜處邇來  
鼓鑄鉛運以及稽查稅務召募夫役寬則有妨

功令嚴則易拂人心素號難治最費經營恐董君履任  
伊始亦奚暇以文獻爲兢兢爰婉辭以謝之越二年



餘人之來自黔中者無不盛稱其愛民如子興舉廢  
墜是以合境歡忭大憲器重而惟邑志尙未編纂予  
念邑雖蕞爾尙爲重鎮自元明以來奸宄百出擄掠  
時聞不知幾經籌畫幾費討平幾許官弁防禦乃得  
黎民安堵絃誦振興則其間文武忠孝義夫節婦兼  
之撫綏周徧未雨綢繆之計當不可勝數今幸際昇  
平之世得賢而有才如董君者爲之宰更值政通人  
和百廢具舉之候尙不及時修輯將所謂湮沒者終  
於湮沒亦奚以昭職守而垂法戒乎予老朽不獲執  
鞭從事思遙寄一言相促不意董君業已告竣不遠

大定府志

卷卒

七

數千里示予也夫乃知向之疑其不暇與今之疑其  
不爲總予私心揣度耳曾是董君之才而顧不能以  
公餘與都人士商榷成書也哉披讀再三洵見其經  
濟過人甚遠有非淺識可以窺及者若夫考訂之精  
詳增補之確核足以信今傳後此固有目所共賞無  
煩縷述予惟折服董君惓惓畢邑之苦衷爲畢邑幸  
焉爾乾隆二十二年歲次疆圉赤奮若如月 董朱  
英重修畢節縣志序邑之有志所以徵時事辨人物  
定疆里信今傳後之書也畢節自奢香獻道以還艾  
夷榛莽先於省會通滇通蜀實爲要區是以元明之

間寇盜充斥干戈迭起斯民不勝其凋敝幸遇我朝遷衛爲縣輕徭薄斂仁義漸摩教養百十餘年之久而後文物聲明彬彬稱盛洵乎畢之涵濡德澤視內地爲倍深而畢之詮述淵源亦較他志爲倍急也前令淳安方君取黔記中畢志一冊命羅明經英與多士分纂發潛闡幽釐爲二卷及南陵柯君爲宰偕張廣文鯤畧增舊稿數年後邵明經熙載謂其猶有失實復加筆削補所未備惜未雕板傳寫浸譌考之柯本久而漫滅噫畢志何不絕如線若此甲戌余膺

簡命承乏茲土搜其遺草帝虎魯魚紛紛舛錯思與邑人校

大定府志

卷六

六

訂郵書請同年沈歸愚先生來黔總裁其事時先生以年高堅却余亦以兵刑賦稅局廠諸事未易釐剔兼之營宮漫漶書院傾圮苗夷頑梗皆急需整理安有餘力講求今昔時事之盛衰人物之顯晦以及疆里之常變乎於是舉其所宜先者虛衷體察竭力經營勉勉循循行二年餘畧有端緒擬將舊本反覆深維補輯成帙適聞中馮先生及江左家弟半壑後先過畧余卽請其互相考訂延衆紳士彙集編纂功未及半而馮先生捐館舍惟家弟與紳士輩悉心搜討改其失誤疏其支離正其矛盾並採年來應脩事實

商酌詳明一一增補仍賚至歸愚先生處求其裁定  
乃得繕寫磨勘壽之棗梨倘生斯土者展卷之下恍  
然於太平溫飽之有由而爲子思孝爲臣思忠無負  
國家教養之深恩是余脩志者之所厚望也夫

乾隆威寧州後志八卷

乾隆二十年吏目盧永勝撰書未刊今存鈔本道光  
中州人張吉熙又有所增益然亦不甚備也 盧永  
勝威寧州志序守土者大吏而下有一郡一州一邑  
之長郡有省郡外郡之別而州邑亦有首善附郭之  
殊自州邑之下列執事以奉命奔走者昔之人稱曰

大定府志

卷六

十九

少府曰贊府郡州邑得知一方事少贊莫不與知焉  
若天時之陰陽順逆地勢之高低險夷原隰之燥濕  
寒煖城郭或興或廢或固或傾物產宜種宜蒔較多  
較寡民夷若馴若梗易亂易治與夫士習風化文武  
規制兵民和輯之道上與下皆不委爲局外事誠亟  
亟也然又何由而知之曰有志在可稽也予以士籍  
除吏目官旣微矣而隸於威寧州屬寧僻在南又極  
邊也

今上御極之十六年任事迄今二十六年十閱歲矣歷事堂  
台者十一人供使令者不一事凡可興可革凜凜與

上官商酌罔擅堂屬頗合柄鑿幾無因是不致竭蹶  
隕越馬公暇取寧志卒讀以身之所歷與志之所載  
曉然於前此之威本烏蠻素稱難化屢叛屢平迄今  
聖德神武布昭則無遠不服且舉凡象緯方輿兵防名宦鄉  
賢流寓文章與死事之忠勤孤嫠之貞操咸了然心  
目先是威設府治康熙三年宋公諱起守茲土始創  
志曰風土記兵燹之餘幾如敝帚之僅存乾隆十年  
牟君岳齡以安順孝廉任州學正葺州志取而錄於  
首又發凡起例爲書八表以傳後焉若天文若地理  
若武備若秩官若人物悉本通志編纂成書若藝文

大定府志

卷卒

十

則旁採此方斷碑殘簡益若干首不僅通志所有也  
而營建第三食貨第四則遺漏無存余於州署及學  
中遍訪不得也都人士亦無收藏者噫異矣嘗讀楊  
升庵四貴州志序云衣之邊曰裔器之邊曰羨器之  
破必自羨始衣之敝必自裔始余小吏而宦於邊何  
以異裔故兢兢焉不敢使敝志非余事也見其敝則  
且補之焉亦不敢使裔獨敝之意也又何敢述往以  
昭來乎他日名賢操觚登壇議余僭竊固其所也是  
爲序乾隆二十六年歲次辛巳臘月上浣之吉

知州劉永安修分纂者爲徐文璧陳汝梅李華黼皆州人書今存永安有序後知州陳詩又有增補分纂者爲熊聲元漆應麟亦州人皆列姓名於書首然此後州人士遇事卽書故多有近年事也○劉永安重修黔西州志序天有真文地有真形人物有真跡郡邑無志負天負地負人物然必賴有真材而後天文地與人物胥賴以傳也水西一邑地出西偏四圍皆河中多名山佳境其星躔環拱廟宇輝煌旣不可勝數而山川磅礴之氣往往毓爲人材其顯宦名跡才人節婦代不乏人然自康熙三年前牧何公縉鮑公

大定府志

卷六

五

尙忠馮公光宿修集後未嘗有一紀載遂使天地人物鬱而不彰噫誰之責生於斯者之責抑亦爲斯牧者之責也嘉慶六年三月望日余來署斯篆欲於是州之天文地與人物求一書可備覽而知之僅獲其四册所載皆乾隆三年以前之事其後無稽幾欲續修而未得其人八年六月商諸胡劉龔黃諸公均以爲可及余奉調入省而諸公已設立公所相與續修俾百餘年之天地人物斷者續之隱者彰之使余志之卒於有成此惟地儲真才而後天象有真文地與有真圖人物有真跡天地人物之幸亦余之幸也是

爲序時嘉慶八年歲次癸亥秋七月望二日○黔西  
州志跋嘗讀周禮云外史掌書外令掌四方之志是  
凡列爵之區莫不有志以達王朝如晉之乘越之絕  
楚之檣杞魯之春秋皆是已自封建降爲郡縣而外  
史外令之職廢然今之郡縣卽古之列國也故省有  
通志郡有郡志下至一州一邑亦各有志凡境內山  
川形勝廣狹戶口賦役之增除官制典禮之沿革以  
及良吏名臣潛德幽光可法而可傳者罔不備載我  
州侯劉公奉

簡命撫水西政簡刑清留心掌故公暇之餘集多士而商曰  
大定府志 卷六

二十三

余歷宦諸邦莫不有志水西何以獨無僉曰地自漢  
唐而下俱爲荒服文獻莫稽雖有明關土亦屬羈縻  
我

世祖章皇帝定鼎猶爲安酋所據至

聖祖仁皇帝改土設流始置府焉不數年改州其間歷任諸  
公莫不有志振興總以無徵爲慮前何侯縉畧爲記  
載簡而不詳繼鮑公尚忠馮公光宿彙集成編未付  
剞劂今我公銳意重修實二百年來盛舉也更值吾  
邑中憲大夫李公華黼家居讀禮樂勳厥善余輩敢  
不敬慎從事於是稽之通志所載採之父老傳聞彙

集詳訂之使二百年若存若亡之事不致湮沒無聞  
且詳取昔之蒞斯土者書曰某也廉後之廉者觀斯  
志而思奮焉反是者亦得觀斯志而思懲取昔之產  
斯土者書曰某也賢後之賢者觀斯志而思起焉反  
是者亦得觀斯志而內省若夫科名徵人才之盛節  
孝關紀綱之美亦莫不綜核名實而颺言於簡編其  
琳琳瑯瑯於前昔者未得親見姑不具論而名宦鄉  
賢如州侯譚公秀齊許公學范甘棠遺愛至今昭然  
尙書李公世傑勲績顯著照人耳目皆表而異之亦  
可識其意之所在矣孰謂志之關係淺眇哉嘉慶八  
年歲次癸亥桂月上浣闔州紳士謹跋

大定府志

卷卒

二十三

道光平遠州志二十卷

道光二十七年知州徐豐玉修主撰者爲州人謹厚  
光尙未刊厚光有序○謹厚光平遠州志序史家莫  
難於志例不可淆事不可畧纂言尤不可涉於輕肆  
蓋政治之所關人心風俗之所繫非若野乘稗官徒  
資談柄也自古志中要領惟善作者能綜揭之亦惟  
善讀者能默喻之學問經濟胥於此徵焉余弱冠以  
明經赴都

廷試分職西曹繼入詞垣然藜編校於諸志幸得觀其

大畧旋荷

思命泣守雲中四載有餘涓埃未効因循該念切引疾言  
歸方期桑梓之敬恭詎謂椿萱之凋謝索居讀禮愴  
感何如乙巳歲碩民刺史來牧斯州講求吏治庶務  
畢興而尤以育才訓士爲急益閱閱之門家傳治譜  
可謂得爲政之大端者矣相晤時以增修舊志爲屬  
余自維宦遊閱三十載鄉邦聞見半涉生疎且制中  
抱恙筆硯塵封再三辭不獲命因與同學諸友互操  
鉛槧各分目而編輯之至裁酌審定悉由刺史總其  
成不數月而竣事比舊制加增數卷較爲完備非刺  
大定府志 卷六

十四

史之勤敏賢能向由得此方今

聖天子柔遠推恩任循良以撫馭余更冀刺史之奮發有  
爲宏敷駿烈行見黔疆治績之隆固當炳耀於斯志  
也已道光二十有七年歲次丁未仲夏月



大定居行省上游素稱劇郡道光乙巳仲冬宅中受任是邦日匪勉於吏職聽訟催科勘驗緝捕昕宵鹿鹿無暇時也然於戴星出入之餘親歷其山水險夷細詢其風俗利病隨所見聞錄而存之日積月累漸次成帙因念郡入版圖幾二百年文獻闕如守土之恥纂修志乘非爲政之急務乎已而訪求民家得乾隆間前守王君允浩所輯府志鈔本十餘卷又聞鄒叔績茂才修貴陽府志已成書矣廼於丁未季冬招延至署取舊志鈔本及余歷年所采錄者分類編纂逾年而就共得六十卷

大定府志

卷六十跋

二十五

次第校刊所以汲汲於是者誠恐稍涉因循又若舊志稿本之幾於湮沒後來者更無所考耳第成書太速捐俸無多心雖勤而力有限采訪不無遺漏校讎仍有錯謬簿領匆匆草創爲此所望後之君子因而討論之修飾之更加潤色完善克臻則官斯土與居斯土者均有責焉宅中率爾操觚麤疎淺陋知不免貽誚大方然王前守與鄒茂才先後編摩之苦心何可泯沒哉王君傳略見惠人志中鄒君名漢勳湖南新化縣人博學多聞大定志甫脫稿張春潭太守又屬修興義府志云道光二十有九年歲在己酉冬十有二月甲子朔知府事黃

宅中謹跋於大定府署之屏山書閣



大定府志卷終  
大定府志 卷六十跋

二十六